



# Ga Shaka Dingsa na Maumwi Shi Matsaf

**TITLE: Ga Shaka Dingsa na Maumwi Shi Matsat**

ISBN: 978-1-927468-37-1

COPYRIGHT © 2016 Dr. James Paul Humphries

All rights reserved. No part of this publication may be reproduced, stored in a retrieval system or transmitted, in any form, or by any means, electronic, mechanical, photocopying, recording, or otherwise, without the prior written permission of Project L.A.M.B.S. Publications.

Author: Rev. F.H. Eveleth

Translator: Sara Kaba Sumlut Gam

Edited and Revised by: Hkaw Win Humphries

Artist: Naw Ra (CanaaN)

Cover Design / Layout: Van Pelt's Design Plus

Printed in Canada by:

Project L.A.M.B.S. International Inc.  
Box 20569 Steinbach, MB Canada R5G 1R9  
E-mail: projectlambs@gmail.com  
Website: [www.projectlambs.com](http://www.projectlambs.com)

Second Edition: Aug.2016

# **Ga Shaka Dingsa na Maumwi Shi Matsat**

Myen ga hku ka lajang da ai Ga Shaka Dingsa kaw na maumwi ni  
hpe Jinghpaw ga hku bai ka gale lajang da ai.

Ga gale ai,

Sara Sumlut Gam : Headmaster, K. S. M.

State Primary School : Htingnan

Date: 1<sup>st</sup> February, 1954

Board of Publication

Burma Baptist Convention , 1957

## **Ga Hpaw**

Ndai laika hta rawng ai Ga Shaka dingsa kaw na maumwi ni hpe Taungoo mare e nga ai Sara kaba Rev. F.H. Eveleth gaw Myen ga hku lai wa sai 1906 ning hta ka lajang da ai laika re.

Ndai laika hta rawng ai maumwi ni gaw kadun ai hte malang ai hku ka lajang da ai re majaw, Chyum Laika buk kaba hta rawng ai maumwi ni hpe tam kasawk hti yu na matu ram ram yak ai hte maumwi langai mi hpe matut manoi kadun ai hte lawan ai hku chye na na matu yak nga ai. Rai timung ndai laika gaw, maumwi ni hpe kadun ai hku ka lajang da ai re majaw, hti yu ai shaloi maumwi langai hte langai hpe a loi sha chye na lu ai rai.


Ndai laika hpe hti yu ai masha ni yawng hte mung Chyum Laika a maumwi ni hpe grau nna lawan ai hku chye na lu ai hte Karai Kasang mungdan lam gaw grau lawan ai hku Jinghpaw masha ni hta mung nhtoi gaw htoi shang wa u ga law.

Sumlut Gam, Headmaster. K.S.M.  
State Primary School: Htingnan  
*Date: 1<sup>st</sup> February, 1954*

## **MA LAW M**

<b>No.</b>	<b>Gabaw</b>	<b>Laika man</b>
1.	Adam yan Ewa a maumwi	5
2.	Noa a maumwi	10
3.	Abraham a maumwi	14
4.	Yaku a maumwi	22
5.	Yawsep a maumwi	33
6.	Mawshe a maumwi	50
7.	Yawshu a maumwi	71
8.	Gidon a maumwi	89
9.	Samson a maumwi	94
10.	Samuela a maumwi	102
11.	Dawi a maumwi	115
12.	Shawlumon a maumwi	150
13.	Elia a maumwi	164
14.	Elisha a maumwi	178
15.	Eshta a maumwi	194
16.	Yoba a maumwi	206
17.	Daniela a maumwi	212
18.	Yona a maumwi	232

## ADAM YAN EWA A MAUMWI



Karai Kasang gaw, shawng nnan e sumsing lamu hte ginding a ga hpe hpan da wu ai. Dai hpang mungkan ga ntsa e nga manga pra mapra ngu ai, nam ashan hte ntsa malen pyen ai u numji numjoi yawng hte hpe mung hpan da wu ai. Dai hpang Karai Kasang gaw, shi a hkrang hte bung ai shinggyim masha hpe ga yun hte hpan da wu ai. Karai Kasang gaw, shi a hkrang hte shabung nna shachyaw da ai sumla hkrang hta shi a nsoi nsa kawut bang ya wu yang, dai sumla gaw hkrung ai shinggyim masha tai wa ai rai. Karai Kasang gaw, ndai mungkan ga ntsa e, nga manga hte hkrung mahkrung yawng hta dai shinggyim lasha hpe Adam ngu nna shamying ai hte shagrau da wu ai. Karai Kasang gaw shinggyim lasha hpe grau nna sharawng awng wu ai rai nna, nammukdara panglai hte hka nu, hka shi ni hta rawng ai nga amyu ni yawng hte hpe mung, hkarang ntsa e nga ai dusat dumyeng yawng hte hpe mung, up hkang lu ai ahkang gaw, Adam hpe jaw wu ai. Dai hta n ga, grai ngwi pyaw tsawm htap ai Edin ngu ai sun e mung nga


shangun wu ai. Dai sun hta hkrang grai tsawm ai namsi namsaw hpun ni hte shingbyi shara shingnip ni mung grai nga shajang ma ai. Dai daram pyaw ai shara hta nga ai rai timung, gumrawng gumtawng ai myit n rawng na matu, Adam hpe hkum da na matu, mai n mai chye ginhka ai hpun hta lai nna kaga hpun ni a asi ni hpe sha lu ai hte dai mai n mai chye ginhka ai hpun hta na, nang sha lu na ndai n rai, ngu nna hkang da wu ai.

Karai Kasang gaw shi nan kalang lang Adam hpe shaga chyai chyai re ai hta n ga, Adam hpe bau sin na matu, lamu kasa ni mung galoi mung asa kawan yu nga ma ai. Rai timung Adam a matu, htap htuk ai kanawn manang n nga ai hpe Karai Kasang myit dum wu ai rai nna, Karai Kasang gaw Ewa hpe hpan nna, Adam hpe ap ya wu ai. Dai yan gaw hpun palawng n bu hpun ma ai rai timung, shada da hkrit kaya ai lam hpa mung n nga ma ai. Dai ten hta Adam yan Ewa gaw san seng ding hpring ai masha yan rai nna, Karai Kasang hpe nawku hkungga let, dai Edin sun hpe yu lajang let nga ma ai. Shingrai nga nga yang, lani mi hta Adam yan Ewa gaw, kaga ga rai nga nga ai ten hta satan nat wa gaw, lapu hta shang nna, hkalem na matu Ewa hpe tsun wu ai gaw, “Ndai sun hta tu ai namsi ni yawng hpe n sha lu ai nga nna, kaja wa Karai Kasang gaw tsun a ni?” ngu nna san wu ai. Shaloi Ewa gaw, “sun hta tu ai namsi yawng sha lu ga ai rai timung, si ai n hkrum na matu, sun ka-ang e tu ai hpun a asi gaw, n sha lu na myit dai, nga nna Karai Kasang hkang da ai,” ngu nna bai htan wu ai. Shaloi lapu gaw, “Nan kaja wa si na myit dai n rai, hpa majaw nga yang dai namsi sha ai shani, nan gaw myi hpaw wa na hte kaja ai, n kaja ai chye ginhka nna Karai Kasang hte maren tai wa na hpe Karai Kasang chye nga ai,” ngu nna Ewa hpe tsun wu ai. Dai hpun gaw, sha na matu kaja ai hte tsawm nga ai rai nna, hpaji jat wa na matu ra sharawng mai ai hpe Ewa mu wu yang, dai namsi hpe di sha kau wu ai. Dai hpang Adam hpe mung di jaw let, tinang mung sha wu ai. Shingrai Karai Kasang jaw da ai ga sad i hpe tawt lai masai majaw, Adam yan Ewa gaw singgu krin rai nga ai hpe dum chye mu yang, hkrit kaya ai hte lakum lap ni hpe chywi matut nna tinang a matu dangpae galaw ma ai. Dai hpang shan gaw shana de bungsoi katsi ai ten hta Yehowa Karai Kasang gaw dai sun hta sa

hkawm shara nga ai hpe na mu ai. Dai majaw Adam hte shi a madu jan gaw, Yehowa Karai Kasang a myi man kaw nna makoi lu hkra, dai sun kaw na hpun ni a kata e gawp makoi nga ma ai. Shaloi Karai Kasang gaw Adam hpe, “Nang kanang nga nta?” ngu nna jahtau wu ai; shi gaw, “Ndai sun e, na a nsen ngai na nna singgu chyakrin rai nga nngai” ngu wu ai. Shaloi Yehowa Karai Kasang gaw, “Nang singgu krin rai nga ai gaw, nang hpe kadai shadum a ta? ngai hkum sha ngu nna jet da ai hpun hta na namsi nang sha kau nu ni?” ngu wu ai. Dai rai nna Adam gaw “Ngai hte rau nga na, nang ngai hpe ya ai num gaw, dai hpun hta na ngai hpe di jaw nna, sha kau se ai,” ngu wu ai.

Dai rai nna Yehowa Karai Kasang gaw, dai lapu hpe “Nang ndai galaw ndai majaw, yam nga mahkra hte nam mali na dusat nhprang mahkra hte nang dagam dala hkrum na ndai. Na a kan hte nang hkawm lu na rai nna, nang hkrung nga ai nhtoi mahkra hte hta ga nhpu sha lu na ndai; nang hte num sha hpe mung, na a amyu matu ni hte shi a amyu matu ni hpe mung ngai majan shangun da na made ai; shi gaw na a baw abrep na ra ai, nang mung shi a lahtin achye na ra ai,” ngu wu ai. Num sha hpe mung, “Na a tsin-yam hte shinggyim machyi ai gaw ngai grau shalaw ya na de ai. Shinggyim machyi ai hte nang kashu kasha shangai lu na ndai; na a madu wa hta nang myit manoi nga na ra ai rai nna, shi mung na a ntsa e up nga na ra ai”. Adam hpe mung, “Na a madu jan a ga nang madat nna, ngai hkum sha ngu ai jet da ai hpun hta na nang sha nit dai majaw, aga gaw na a jaw e ding-nye hkrum nga ai. Nang hkrung nga ai nhtoi mahkra hte hta, ru tsang ai hte ga hta na nang sha lu na ndai; aju hte tsing mung na a matu shi shatut na ra ai. Ga na nsi naisi namlaw namlap nang sha nga lu na ndai, ga de na nang shapraw la de ai majaw, ga de nang bai nhtang wa ai ten du hkra, na a myi man a salu salat hte na a shat nang sha lu na ndai. Kanning rai nme law, nang ga yun rai nga ndai rai nna, ga yun bai tai na rin dai,” ngu wu ai. Shaloi Adam gaw, shi a madu jan hpe Ewa ngu nna shamying wu ai. Kanning rai n me law shi gaw hkrung mahkrung yawng a kanu rai nga ai. Yehowa Karai Kasang mung, Adam hte shi a madu jan a matu, shan hpyi hpun palawng galaw nna, shan hpe jahpun mu ai. Yehowa Karai Kasang gaw,

“Yu mu, masha wa gaw kaja ai hte n kaja ai hpe chye ginhka lu ai lam hta, anhte hta na langai mi zawn tai nga ai, ya shi gaw prat dingsa hkrung nga lu na matu, shi a lata ladawn nna, asak jahkrung ai hpun a asi di sha na n mai nga ai,” nga ai rai nna,dai masha wa gaw, shi pru ai ga hta galaw sha u ga nga, Yehowa Karai Kasang gaw, Edin sun hta na shi hpe shapraw kau dat wu ai. Shingrai dai masha wa hpe shi shapraw kau dat nna, dai asak jahkrung ai hpun a lam, sin nga na matu, Hkerub ngu ai ni hte shi chyu nwat shadang chye ai wan nhtu hpe Edin sun a sinpraw maga de tawn da wu ai.



Dai zawn shinggaim masha ni a kanu kawa rai nga ai Adam yan Ewa gaw yubak mara a majaw, ruyak tsin-yam grai wa hkrum hkra ma ai. Rai timung, hpan da ai madu Karai Kasang hpe ndai prat hta kam sham ai hte hpang na prat hta ngwi pyaw ai hte nga lu na lam hpe myit mada ai hte nga ma ai rai.

Edin sun kaw nna shapraw dat hkrum ai hpang, Ewa gaw shayi shadang sha shaprat wu ai. Ewa a shadang sha ni gaw, Ka-in, Abela, Shet ni rai ma ai. Ka-in gaw Karai Kasang a man de hkungga nawng na matu, sun hkauna kaw nna pru ai nsi naisi ni

hpe la sa wu ai. Abela gaw, sagu rem ai wa rai nna, shi a sagu hpung hta na shawng hkrat ai sagu kasha nkau mi hpe shaw la wu ai. Karai Kasang gaw dai yan lahkawng a myit masin hpe chye ya wu ai rai nna, Abela hte shi a hkungga hpe sawn la ya wu ai. Ka-in hpe n dawng wu ai majaw, shi a hkungga hpe n sawn ya wu ai rai nna, masin ja ja pawt bu ai hte n dawng ai myit hte Abela hpe shaga la nna, hkauna pa langai mi de du ma yang kanau hpe mara tam ai hte kayat sat kau wu ai. Shingrai Karai Kasang a hkang da ai ga hpe tawt lai ai hte si ai tara gaw, shawng nnan dan pru wa sai rai.

Kalang mi na Karai Kasang gaw, “Ka-in e, na a nnau Abela gaw, kanang nga a ta?” ngu nna san wu yang, Ka-in gaw, “Ngai n chye nngai Madu e, ngai gaw ngai nau hpe rem ai wa rai nga nni?” ngu nna bai htan wu ai. Dai shaloi, Karai Kasang mung, “Nang hpa galaw nu ta? Na nnau a asai nsen gaw, ga kaw nna ngai hpe jahtau nga a hka” ngu tsun nhtawm, Ka-in a mara hpe jeyang ngut jang, kadai rai timung, Ka-in hpe matai htang nna n sat na matu, Ka-in hpe masat shakap ya wu ai.

Adam a kashu kasha ni gaw, grai wa law htam mayat maya wa ma ai rai timung, dai masha ni hta yubak mara grau nna law jat wa ai hpe Adam mu wu ai majaw, grai yawn ai hte shaning jahku tsa jan asak hkrung nna, si mat wa sai rai.

Adam gaw asak jahku tsa e sumshi ning asak hkrung nna si wa sai. Adam a ahtik labau ni gaw Ningpawt Ninghpang Laika Dawkaba 1-5 laman hta rawng nga ai rai.

## NOA A MAUMWI

Shawng na lasha Adam si mat wa ai hpang, Lamek a madu jan gaw, shadang sha shaprat wu ai. Dai shadang sha hpe Noa nna shamying wu ai. Dai gaw “Yehowa dagam kau ai ga hta anhte hkrum ai amu bungli hte lata a ru tsang ai hta ndai wa gaw anhte hpe shangwi shapyaw na ra ai,” nga ai rai nga ai. Noa gaw, grai dan hkung ai wa rai timung, shi nnan shangai ai shani kaw nna asak manga tsa ning du hkra, tinang a labau lam ni hpe n matsing da lu wu ai. Noa gaw dinghpring ai wa rai nga ai hte dai aprat na ni hta hkum tsup ai wa rai nga ai.

Noa gaw, Karai Kasang hte rau ahkawm asa nga ai. Noa a shadang sha ni marai masum rai nga ma ai. Dai ni gaw, Shem, Ham, Yahpet hte rai ma ai.


Noa a lakhtak e shinggyim masha yawng hte gaw, n hkru n kaja ai yubak hta lup mat nga shajang sai hte tinang a kraw lawang hta myit mamyit yawng hte gaw, tut nawng e n hkru ai hkrai hkrai rai nga ai hpe Karai Kasang gaw, tut nawng e chye nga ai rai nna, ndai n hkru ai shinggyim masha ni hpe jahten kau na nga, dawdan wu yang, Noa gaw, dinghpring nna amyu masha ni yawng hta hkum tsup ai wa rai nga ai majaw, Karai Kasang a myit du ai wa rai nga ai hte du na ra ai sha-u ing wa ai hta lawt lu u ga nga, Noa hpe hkang da wu ai gaw, “Guhpra hpun hte sanghpaw li langai mi hpe nang galaw u, ga ntsa e sha-u ing wa na ra ai rai nna, ga ntsa e nga manga hte gaw si mat na mara ai. Nang hta gaw, ga sadi ngai shatup na de ai rai nna, na a shadang sha ni hte na a kanam ni hpe sanghpaw li de shang shangun na rai ndai; dai hta n ga, ga ntsa na dusat shagu na mung, yi la yep yep la nhtawm, nang hte rau asak lawt lu na matu, sanghpaw li de la bang na rai ndai; tinang lusha na matu mung, dusat dumyeng ni hpe jaw na matu mung lusha amyu myu shinggyin bang da na rai ndai,” ngu nna hkang da wu ai.

Dai aprat hta ginding aga hpe jahten kau na kumla langai pyi rai n nga ai majaw, Yehowa Karai Kasang gaw, ndai zawn hkang da ai ga hpe, Noa gaw grai mau na re ai, ngu myit lu ai. Dai hta n ga, ndai daram kaba ai sanghpaw li hpe hka hte grai tsan ai

bum ntsa e galaw shangun ai hpe ga ntsa na masha ni mu yang, Noa hpe jahpoi nna asawng asang n galaw ai nga lu ma ai nrai. Rai timung, Noa gaw masha ni jahpoi asawng ai hpe hpa n nawn ai sha, Karai Kasang hkang da ai hte maren, n tsam mat lu ai Guhpра hpun hte n hkring n sa grai kaba ai sanghpaw li langai mi hpe galaw wu ai.

Dai hta kaga Noa gaw, Karai Kasang a mungga hpe madat mara ai hta n ga, mungkan masha ni gaw dingman ai hte tara hpe hkan na matu shadum jahprang let hkaw tsun wu ai. Rai timung mungkan masha ni gaw, Noa hkaw tsun ai ga hpe lale let, shawng na hta grau ai yubak mara hta lup mat wa shajang ma ai.

Noa gaw asak kru tsa ning du ai shaloi, sanghpaw li hpe shangut nna, sha-u ing wa ai ruyak tsin-yam a majaw, shi a madu jan kasha kanam ni hte rau sanghpaw li de shang nhtawm, Karai Kasang a mungga nga ai hte maren, seng ai ashu ashan hta na mung, n seng ai ashu ashan hta na mung, u ni hta na mung, ga ntsa e gumrawt hkawm ai baw, dusat ni hta na, yi la hpawn hpawn rai nna, sanghpaw li hta shawn shajang mu ai.



Shingrai shang ngut ai hpang sanit ya lai jang, chyum laika hta ka da ai hte maren, grai grai sung la ai hka htung hka hpawk ni kaw na hka ni hpaw malang pru wa ai hte sumsing lamu na hkuwawt hku ni hpaw malang mat wa ai rai n na, shani shana nhtoi mali shi ya tup marang jahtu dat wu ai. Hkarang ntsa e asak hkrung nna naw ngam nga ai shinggyim masha ni hte dusat dumyeng ni yawng hte gaw, si mat shajang ma ai.

Dai hpang nhtoi latsa e manga shi ya lai jang, hka gaw yawm mat wa nna, sanghpaw li gaw Ararat bum hta mara nga wu ai. Dai hpang nhtoi mali shi ya lai jang, Noa gaw hkuwawt chyinghka hpaw nna, u hka langai mi hpe dat dat wu yang, u hka gaw nang de, waw de rai nna, pyen kawan hkawm wu ai.

Dai hpang hka hkyet n hkyet chye na matu, hkrudu langai mi bai dat yu wu yang, lagaw hte kabye nna dung sa la na shara n mu wu ai majaw, Noa nga ai sanghpaw li kata de bai pyen n htang wa wu ai. Dai hpang sanit ya lai jang, hkrudu hpe bai dat dat yu wu ai shaloi, hkrudu a n gup hte tsanlun lap makrang wa ai hpe mu wu yang, lamu ga gaw hkraw hkun sai hpe chye wu ai rai nna, nhtoi sanit ya tup Karai Kasang a mungga hpe la let, Karai Kasang kaw na ahkang lu ai hpang sanghpaw li kaw na pru wa wu ai.

Dai masha ni hpe asak shalawt ya ai chyeju hpe myit dum let, tawn hkungri hpe alawan galaw nna, wan nat hkungga nawng let, Karai Kasang hpe nawku wu ai. Karai Kasang mung ga ntsa e ngam nga ai shinggyim masha ni hte dusat ni hta myit dik wu ai rai nna, Ndai mungkan ga nhtum dingsa tut nawng e nli naili gat ai du hkra ladaw, nlum ta ladaw, nshung ta ladaw, galoi mung a grin nga nu ga nga, hkang da let dai du hkra ladaw ni hpe tawn da wu ai. Karai Kasang mung Noa hte rau shi a kashu kasha ni hpe shaman ya nhtawm, “Nanhte a lata hta dusat dumyeng, nga manga hte hpe ngai ap ya made ai. Asak hkrung nna shamu shamawt ai yawng hte gaw, hpunsi hpunlap hpe zawn, nanhte sha na matu rai nga ai,” ngu nna hkang da wu ai. Dai hta kaga Madu Karai Kasang gaw, “Hpang de mungkan ga hpe jahten na matu, sha-u bai sha-ing sana n rai,” ngu nna ga shaka tawn da wu ai. Dai ga shaka a kumla gaw, sumwi hta n-goila tum tawn da nna, dai hpe mu ai shaloi, tinang a ga sadie hpe myit dum na nga nna htet da wu ai.

Noa gaw shi a kasha Ham galaw ai bungli langai mi hpe nra sharawng wu ai majaw, Ham a kasha hpe dagam da wu ai gaw, "Hkanan gaw dagam dala hkrum u ga, shi a kahpu ni a mayam tai u ga law," ngu wu ai. Shem yan Yahpet hpe gaw, shaman ya wu ai. Sha-u ing ai hpang Noa gaw shaning masum tsa e manga shi ning asak naw hkrung nga nna asak jahku tsa manga shi ning hpring ai shaloi, si wa sai rai.

Noa a ahtik labau ni gaw, Ningpawt Ninghpang Laika Dawkaba 5 - 9 laman hta rawng nga ai rai.

## **ABRAHAM A MAUMWI**

Karai Kasang a jingku wa, kam sham ai masha ni yawng a kawa ngu nna shamying la ai Abraham gaw, Noa n nga mat ai hpang, Hkalade mung Ura mare hta shangai wa nna, Shem a aru arat rai nga ai Htera a kasha rai nga ai.

Abraham a amyu ni gaw jan, shata, shagan ni hta hpung shingkang rawng ai ngu nna, kam sham ma ai majaw, Hkalade mung gaw, sumla galaw ai hta mung, shut ai kam sham lam hta mung, hpara tsasam hpe nawku ai ni hta mung hpring chyat shajang nga ma ai. Dai hta n ga, hkaw tsun ai hte seng ai tamaka yu ai, lakle wawt ai lam ni gaw Hkalade masha ni kaw nna, shawng nnan byin hpang wa ai rai.

Htera gaw kasha Abram, Haran a kasha rai nga ai kashu Lawt hpe mung, Abram a madu jan Sarai hpe mung, shaga la nhtawm jan, shata, shagan hte sumla amyu myu nawku ai Ura mare masha ni hte jahka la nhtawm Hkanan mung de sa na matu, pru wa ma ai. Shing rai shanhte gaw Haran de du nna, dai yang e nga nga ma ai. Htera gaw asak kaba sai hte n gun yawm wa sai rai nna, Haran mare e si mat wa sai.

Shaloi Karai Kasang gaw Abram hpe shaga la nna, “Na a mungdan hte rau jingku jingyu ni a kata kaw na pru let, ngai madun na de ai mung de sa wa su, ngai gaw nang hpe masha amyu kaba shatai na de ai, nang hpe shaman ya nna, na amying hpe kaba shangun na de ai. Nang hpe dagam ai wa hpe ngai mung dagam na we ai. Na marang e masha amyu yawng hte gaw shaman ai akyu, hkam la lu shajang na mara ai,” ngu nna hkang da wu ai.

Abram sa wa na lam gaw, grai tsan ai hte bum tsaw ai majaw, lam e ruyak hkrum na lam ni hpe n myit ai sha, hkrit ai myit hpe kau da nna, de da ngut sai Haran mare hpe kau da nhtawm alawan sha madu jan Sarai hte kahpu a kasha Lawt hte sutgan lu malu hpe mung, dai mare hta lu la ai masha yawng hpe mung woi nna Hkanan mung de myi man yawng let pru sa wa wu ai. Hkanan mung Shekim shara de du ma yang Karai Kasang bai dan pru nna, “Ndai mung hpe na a aru arat ni yawng hpe ngai jaw na” ngu nna hkang da wu ai.

Dai hpang Abram gaw, Behtela mare kaw nna, shi a nga shara rai nga ai udat shara kaja ai shara de hkawm kawan yu let hku hku ai majaw, Egutu mung de bai htawt mat wa ma ai. Madu jan Sarai a ahpraw nsam tsawm ai majaw Egutu hkawkam gaw shi hpe mu yang, tsawra nna lu la na matu Sarai a madu wa hpe sat na ra ai, nga nna Abram myit tsang ai hte, “Nang gaw nye a kajan re ai lam tsun u,” ngu nna shi a madu jan hpe sharin wu ai.

Abram myit nawn ai hte maren, byin wa ai gaw Egutu hkawkam a agyi salang ni gaw ahpraw tsawm ai Sarai hpe mu ma yang hkawkam a man de shaga la nna, hkaw kata de jashawn ya mu ai. Hpara-u hkawkam wa mung alawan shi hpe kumhpa jaw nu ai. Rai timung Yehowa Karai Kasang gaw Abram hpe matsan dum wu ai rai nna, Sarai a majaw Hpara-u hkawkam hte hpawn hkawkam hkaw kata na masha ni yawng hpe tsin-yam jaw ai hte sharin mu ai.

Dai shaloi Hpara-u hkawkam gaw, Egutu mung e nga ai lakle sara ni hte gumhpan sara ni yawng hpe shaga la nna, san yu mu yang lakle sara ni hte gumhpan sara ni gaw, “Ya hkrum sha ai tsin-yam gaw kaga n rai, Hpara-u hkawkam gaw, masha langai mi a madu jan hpe la kau ai majaw byin ai lam rai nga ai,” ngu nna hkawkam wa hpe tsun dan mu ai. Shingrai Hpara-u hkawkam gaw, Abram hpe shaga la nna, “Nang gaw ngai hpe ning rai galaw ai gaw hpa rai nga a ta? Shi gaw na madu jan re ai lam hpe hpa majaw n tsun dan nni? Na a madu jan hpe woi la nna wa nu,” ngu nna hkang dat wu ai.

Hkanan mung de hku hku ai lam hkoi mat wa ai hpang Abram hte Lawt gaw, sagu, dumsu ni hte ja gumhpraw law law gun nna Hkanan mung a dingda maga de wa mat ma ai.

Dai hpang kade nna yang, Abram hte Lawt a sagu hte dumsu ni grai law ai majaw shara mi sha hta rau nga na matu, yak wa ma yang Abram a sagu dumsu rem ai ni hte Lawt a sagu dumsu rem ai ma ni mung shada da ga law shajang ma ai. Dai shaloi Abram gaw “Kahpu kanau rai timung an a lapran e mung, an a dumsu rem ai ma ni a lapran e mung ga law shara n nga u ga, ga gaw na a man e dam nga ai nrail ni? ngai hte hka nna nga u; nang gaw pai maga de sa yang, ngai gaw hkra maga de sa na n ngai,

nang hkra maga de sa yang ngai gaw pai maga de sa na n ngai,” nga nna tinang a akyu hpe n yu ai sha, kaja ai myit hte tsun wu ai. Lawt gaw lawhpa myit marin chye ai wa re ai majaw, hka law ai hte ga sau kaja ai Yawdan hka masawn hpe lata la wu ai. Dai shara hta nga ai Sodom masha ni gaw grai n hkru ai masha ni rai ma ai rai nna, yubak grai galaw ai shara re ai hpe atsawm sha n myit yu ai sha, tut nawng e grin nga ai Karai Kasang a sun hte bung ai tsit lali ai ga hpe myit marin law hpa ai hte sinpraw maga de htawt mat wa nna Sodom mare makau e nga na matu sum gap wu ai.

Ya Lawt gaw Abram kaw na hka mat wa ai hpang, Yehowa gaw Abram hpe shaga nna “Ya nang nga ai shara kaw nna dingdung dingda, sinpraw sinna mada yu u: Kanning rai nme law, ya nang mu nga ai lamu ga mahkra, nang hte na a amyu matu ni hpe prat dingsa ngai jaw nga na made ai. Na a kashu kasha ni hpe ga nhpu zawn ngai mayat maya shangun na mawe ai: masha langai langai ga nhpu hpe dang hti yang gaw, na a kashu kasha ni hpe mung dang hti na mu ai. Rawt u, dai mung a dingdung de mung nda de mung dinghkren hkawm yu u: kaning rai nme law, dai mung ngai nang hpe jaw na de ai.” ngu wu ai. Shaloi Abram gaw shi a sum htawt nna, Hebron mare na wamyi hpun tu ai Mamre ngu ai shara a makau e shang nga nga ai: dai yang e mung Yehowa a matu tawn hkungri shi galaw wu ai.

Dai hpang ram ram na wa jang, Yawdan ginwang hta nga ai hkawkam ni gaw, Elam hkawkam hpe gumlau nna sinpraw dingdung maga de na luksuk hpyen hpung kaba ni yu hkrat wa nna, Sidim hkaraw hta gumlau ai hkawkam wa hpe gasat ma yang, Sodom hkawkam hpyen sum nna hpyen ni gaw mare kahtawng ni hpe kashun la let mare masha ni yawng hte hpe mung, bawng rim la mat wa mu ai. Shingrai rim mat wa ai hta Lawt hte shi a nta masha ni yawng mung lawm mat wa ma ai. Dai shiga hpe Abram na wu yang alawan sha shi a mayam ni hta na, kam ram ai shabrang ni hpe lata la nhtawm hpyen rai laknak jaw let, nta htingbu manang ni nkau mi hpe shaga la nna Lawt hpe rim mat wa ai masha ni hpe alawan sha hkan nna Yawdan hka a lahta e nga ai Dan mare de du ma yang, shanhte hpe dep mu ai.

Dai hpyen hpung ni hte tinang lu la tawn ai masha ni hpe n sat kau na matu, shana aten hta gasat hpang ma yang, dai hpyen hpung ni hpe dumbru dumbra rai gasat shabra kau nhtawm, la mat wa ai sut rai lanep ni hpe mung, rim mat wa ai masha ni hpe mung bai lu la wa mu ai.

Shingrai bai nhtang wa ma yang Sodom hkawkam hte hpung shingkang rawng ai Karai Kasang a hkinjawng wa Shalem hkawkam Melhkizedek gaw hkap tau la nna, shakram mu ai. Abram mung shi lu la ai rai ni hta na htam shi hta na htam mi karan jaw wu yang Abram hpe mung shaman ya wu ai. Sodom hkawkam wa gaw Abram hpe “Dai masha ni hpe ngai e jaw da rit, a rai ni hpe chyawm gaw nang la wa u,” ngu wu ai. Abram gaw, “Hkawkam wa gaw, ngai Abram hpe sut jasu se ai nga nna tsun shara n nga u ga, nang lu ai arai hta na hpa mung n la na nngai, raitim shabrang ni sha kau manu ai hte, ngai hte rau hkan sa ai masha ni gaw shanhte lu la ai lanep daw mi hte daw mi la wa manu ga” ngu wu ai.

Abram gaw asak kaba wa sai rai timung, kashu kasha rai n lu ai majaw, Karai Kasang a ndat ga hte maren, grai law ai aru arat gaw kaning rai nna lu la ai hte law htam wa na hpe n chye wu ai. Kashu kasha rai n lu yang, si na hpe tsang ai majaw madu jan rai nga ai Sarai gaw, tinang a nta e nga ai mayam jan rai nga ai Hagara hpe Abram hpe ap wu yang lashi num shatai na matu dai mayam num hpe Abram la nna kanawn mu yang Hagara gaw, shadang sha marai mi shangai ya wu ai. Dai shadang sha hpe Ishmaela ngu nna shamying wu ai.

Dai hpang Karai Kasang gaw Abram kaw bai dan pru nna, Shi gaw masha amyu yawng a kawa tai na ra ai rai nna, htawm hpang de Abram ngu nna shamying sana n rai, masha amyu yawng a kawa ngu ai Abraham nga nna shamying na matu shingran shadan dan wu ai. Sarai hpe mung Sarai ngu nna shamying sana n rai, masha amyu yawng a kanu ngu ai Sara ngu nna shamying na ra ai, ngu nna hkang da wu ai.

Dai aprat hta matu kadoi ai ngu ai jasan jaseng ai tara hpe hkan galaw ma ai.

Lani mi hta Abraham gaw, shi a sum chyiningka makau e dung nga ai shaloi, masha marai masum sa wa ai hpe mu wu yang, dai masha ni hpe hkap hkalum shakram ai hte a tsawm sha hkungga lara ai hte hkap hkalum la wu ai. Dai hta na manam marai langai mi gaw, “Na a madu jan Sara gaw, shadang sha shangai na ra ai,” nga ai. Karai Kasang a shingran hpe Abraham hpe tsun dan ngut jang dai masha ni gaw Sodom mare de man yawng let bai sa wa ma ai.

Abraham mung dai masha ni hpe hkan sa dat na nga pru sa ai hte, Yehowa Karai Kasang gaw, n hkru n kaja ai Sodom mare hpe jahten kau na lam hpe chye wu yang, “Madu gaw ding hpring ai masha ni hpe n tara ai ni hte rau jahten kau na rai ni? Ding hpring ai masha manga shi daram nga ai mare hpe n lahpawt ai sha jahten kau na rai ni?” ngu nna law law lang hpyi tawng ban tsun wu ai. Hpang jahtum e, Madu mung, “Sodom mare hta dinghpring ai masha marai shi nga yang dai marai shi a majaw, ngai n jahten na n ngai,” ngu nna bai htan wu ai.

Abraham gaw Karai Kasang a man e myi man pa wu ai rai nna Sodom mare e nga ai shi a kahpu a kasha Lawt hpe dai mare hpe jahten ai ruyak tsin-yam hta na lawt lu na matu, Karai Kasang gaw Lawt hpang de lamu kasa marai lakhawng shangun dat nna, shadum shangun dat wu ai.


Hpang jahpawt n htoi htoi ai shaloi, Lawt gaw shi a madu jan hte shayi sha yan hpe woi nna mare shinggan de pru wa ma yang, lamu kasa marai langai gaw, “Nang asak lawt lu na matu h prawng u, hpang de hkum kayin yu sa, pa layang lai hkra, bum de alawan h prawng su, shing nrail yang si na rin dai,” ngu nna hkang dat wu ai. Lawt gaw, h prawng wa ai shaloi jan nnan pru wa ai ten hta Zora mare de du yang Yehowa Karai Kasang gaw sumsing lamu kaw nna Sodom hte Gomora mare hta grung ai wan marang jahtu dat nna dai shara ni yawng hpe jahten kau wu ai. Lawt a madu jan gaw, shi nga ai mare hpe grai ra sharawng wu ai rai nna lamu kasa a ga hpe n madat ai sha hpang de kayin yu dat wu yang, jum shadaw tai mat wu ai. Abraham mung jahpawt jau jau rawt nna Sodom hte Gomora mare de yu dat wu yang, hkaraw mayan ting grai ja la ai wan shinglet ni hpe mu wu ai. Dai hpang Abraham

gaw, dingda mung de sa wa nna, Gerara mare de sa shingbyi let, nga wu yang Gerara hkawkam gaw, Sara gaw Abraham a kajan re ai zawn nawn nna, shangun ma dat nna Sara hpe la u yang, Karai Kasang gaw, yupmang hta hkawkam wa hpang de sa nna shadum wu yang, Gerara hkawkam gaw, Abraham hpe shaga la nna, “Nang ngai hpe galaw ai gaw, hpa rai nga a ni?” ngu wu yang Abraham gaw, “Nye a madu jan a majaw ngai hpe sat na ra ai, ngu nna ndai zawn galaw ai rai nngai, rai timung shi gaw nye a kajan re ai teng nga ai, nye a kawa a kasha mung rai nga ai, nye a kanu a kasha gaw n re ai, nye a madu jan mung rai nga ai,” ngu nna bai htan wu yang, hkawkam wa gaw, Sara hpe bai n htang shawawm dat wu ai. Shingrai Karai Kasang e ladaw da ya ai aten hta shadang sha marai langai mi shangai ya wu ai rai nna dai ma hpe Isak ngu nna shamying mu ai. Isak gaw kaba wa nna, chyu hka ai nhtoi hta Abraham gaw poi kaba galaw wu yang, Hagara a kasha Ishmaela gaw, Isak hpe matsa nga ai hpe Sara mu wu yang akajawng sha masin pawt nna, “Ndai mayam jan hte shi a kasha hpe gawt shapraw kau u,” ngu nna Abraham hpe tsun wu yang, Abraham gaw shi a kasha Ishmaela hpe tsawra ai hte matsan dum wu ai rai timung, Karai Kasang kaw na akyu hpyi ngut jang Sara a ga hpe madat ya wu ai.

Karai Kasang gaw Abraham hpe lang mi bai shaga nna, chyam yu ai gaw, “Nang grai tsawra ai shadang sha shingtai hpe woi nna Moria ga de sa su, ngai madun na de ai bum ntsa de shi hpe wan nat hkungga sa nawng su,” ngu nna hkang dat wu ai. (Masha sat ai amu gaw Karai Kasang hta rai timung, shinggyim masha hta rai timung, matsat shara rai nga ai rai nna Abraham gaw, alawan sha httingnut mat ai hte dai yak la ai bungli hpe koi kau na ra ai ngu nna myit la shara nga ai. Rai timung, dai zawn re ai myit shi hta nga ai n rai, Karai Kasang gaw Isak hpe si ai kaw na rai timung bai jahkrung ya lu ai ngu, hkang da ai hte maren galaw na matu n hkring ai sha, lajang wu ai). Shingrai masum ya tup sa wa yang, hkungga nawng na shara hpe tsan tsan kaw nna mu mada wu yang, shangun ma yan hpe, “Nan gaw ndai shara kaw lawze hte rau nga nga mala, ngai hte an wa lahkawng gaw dai shara de sa nna

Karai Kasang hpe sa nawku na ga ai; dai hpang nan hpang de bai wa na ga ai,” ngu nna tsun wu ai.

Dai shaloi hkungga nat nawng na matu, hpun hpe la nna kasha Isak hpe jahpai let wan hte n htu hpe shi nan lang da n htawm, shan wa lahkawng rau sha sa wa ma ai. Isak mung, “Wa e, wan mung lu ai, hpun mung lu ai, wan nat hkungga nawng na matu, sagu kasha gaw kanang rai ta?” ngu san jang Abraham gaw, “Sha e, hkungga nawng na matu sagu kasha hpe Karai Kasang gaw shi a matu shi lajang da na ra ai,” ngu nna bai htan wu ai.



Shingrai shan wa lahkawng sa nna Karai Kasang htet da ai shara de du ma yang, Abraham gaw, tawn hkungri hpe galaw nna hpun hpe mara ngut jang kasha Isak hpe gyit hkang nna wan nat hkungga nawng ai shara tawn hkungri e, hpun garai tawn da ai hpun sum pum ntsa de mara da wu ai. Dai shaloi shi a lata ladawn nna kasha sat na matu dawn wu yang Karai Kasang a lamu kasa gaw, “Abraham, Abraham,” ngu nna lamu de nna shaga wu ai. Abraham gaw, “Ngai nga nga n ngai,” ngu nna htan wu yang, “Dai shabrang hpe hkum hkra u, hpa mung hkum di u, nang Karai Kasang hpe hkrit hkungga ai hpe ngai chye se ai. Kanning rai n me law, na kasha shingtai hpe ngai hpyi yang nang n dang ndai n rai,” ngu nna htan wu ai. Dai shaloi Abraham gaw shingdu de kayin mada dat yu wu yang sumwum hta n rung dau nna nga nga ai sagu la hpe raw la nna, kasha a malai wan nat hkungga nawng jau wu ai.

Shingrai Karai Kasang gaw, Abraham a kamsham ai myit n gun hpe chyam yu nna chye ngut jang Abraham gaw Hebron mare e naw nga nga yang, madu jan Sara si wa sai rai. Abraham gaw Ephrun a ga dachyawlk hpe gumhpraw lap mali tsa jan hte mari nhtawm Makhpela ginlawng hku hta shi hpe makoi mayang nu ai rai.

Dai hpang Abraham gaw, Ketura ngu ai numsha hpe tsawra ai hte bai nga wu yang shadang sha marai kru hpe bai shaprat wu ai. Lashi num ni hta na lu ai shadang sha ni hpe mung, asak naw hkrung nga yang sutgan ni hpe karan ya wu ai. Dai hpang asak latsa e sanit shi manga ning du wa yang, dingla ugut gu mat wa sai rai nna kaji kawoi ni nga ai shara de du mat wa sai rai.

Abraham gaw sutgan law law lu ai rai timung ndai mungkin ga n tsa e hkrun lam manam zawn kawan hkawm nna, shi a nta masha ni hpe lup makoi na matu ga dachyawlk lu ai hta kaga lamu ga kaga mi nlu ai sha aprat htum mat wa sai rai.

Abraham gaw dinghpring ai myit hte kamsham ai myit hpring ai wa rai nna, Yuda amyu a npawt hpe de da let, Yuda masha, Hkristan hpung masha ni yawng hte gaw, shi a amyng hpe chye ai hte hkungga shajang ma ai. Abraham a ahtik labau hpe Ningpawt Ninghpang Laika Dawkaba 11-26 laman hta rawng ai rai.

## **YAKU A MAUMWI**

Abraham a kasha Isak gaw, shadang sha marai lahkawng lu wu ai. Shadang sha alat hpe Esaw ngu nna shamying wu ai. Esaw gaw sumnung shingdi ai myit n rawng ai sha, sheng mareng ai hte jaugawng galaw sha ai wa rai nna, shi a kawa hpe lusha na matu shan hpe galoi mung asa jaw nga ai majaw, Isak gaw, Esaw hpe tsawra wu ai. Yaku chyawm gaw ga law, ga la ai lam hpa nnga ai rai nna, kanu kawa a ga hpe madat mara ai hte myit sumnung ai wa re ai majaw, kanu Rebeka gaw Esaw hpe tsawra ai hta Yaku hpe grau nna tsawra wu ai.

Lani mi hta Esaw gaw, nam de shan gyam sa ai kaw nna bai wa yang Yaku shadu da ai shat lusha a sama hpe na wu yang, kawsi wu ai rai nna, “Dai na a lusha ngai hpe jaw sha rit,” ngu nna hpyi wu yang Yaku mung, “Dai ni jang na a hpulat aya ngai hpe dut ya rit,” ngu wu ai. Esaw gaw grai hki ba ai hte kawsi wu ai rai nna, ngai si wa magang yang ndai hpulat aya gaw hpa di na i? ngu nna shi a hpulat aya hpe shat ma mi hte kanau hpe dut ya kau wu ai. Kawa Isak gaw, asak kaba wa nna myi n mu mat ai shaloi, kasha Esaw hpe shaga nna, “Ndan hte pala ni hpe la gun nna shan sa tam su, lu wa jang ngai ning wa sha ra ai hku shadu nna la sa rit, ngai garai n si yang shaman ya na de ai,” ngu wu ai. Shi a madu jan Rebeka gaw shi a madu wa tsun ai ga hpe na wu yang, shi a tsawra ai kasha Yaku gaw kasha alat lu ang ai shaman chyeju hpe lu la u ga nga, ning ngu Yaku hpe tsun wu ai. “Nang gaw sagu kasha lahkawng la n htawm, sama manam pyaw ai shat mai ni hpe shadu n htawm na nwa Isak hpe jaw nna hpulat aya hte shaman chyeju hpe hkam la u,” ngu wu ai. Kahpu Esaw gaw amun grai tu ai wa rai nna, Yaku gaw akrin sha re ai wa rai nga ai. Kawa gaw dai hkalem ai lam hpe chye kau na hpe Yaku tsang wu ai rai nna, kanu Rebeka gaw, “Nang hkam la na dagam ai ga gaw, ngai hta hkrum hkra u ga, nye a ga hpe madat u,” ngu nna bai tsun wu yang Yaku gaw grai mu ai shan shatmai ni hpe lajang da ngut jang Rebeka gaw, kasha Esaw a hpun palawng hpe la jahpun n htawm sagu kasha a hpyi hpe mung la nna kasha lata hta atsawm sha kayawp lajang ya n htawm kawa hpang de dat dat wu ai.


Isak gaw, “Nang gaw kadai rai n ta?” ngu nna san wu yang Yaku gaw, “Ngai gaw na a shadang sha alat wa Esaw rai nga nngai,” ngu nna bai htan wu ai. “Rawt nna nye a shan shatmai ni hpe sha nna shaman ya rit,” ngu wu yang Isak gaw, “Ngai sha e, nang gaw ngai sha Esaw re ai n re ai hpe chye lu na matu ngai masawp yu we ga ngai hpang de sit wa yu rit,” ngu wu yang Yaku mung kawa hpang de sit wa wu ai. Isak gaw shi hpe masawp yu nna, nsen gaw Yaku a nsen rai nga ai; lata ni gaw Esaw a lata rai nga ai, ngu nna shan shatmai ni hpe sha ngut jang, Yaku hpe shaman ya wu ai.

Dai hpang Esaw gaw, shan gyam ai de nna bai wa wu yang, lu wa ai shan shatmai ni hpe shadu la ngut jang Isak hpang de la wa wu yang Isak gaw, “Nang kadai rai n ta?” ngu wu ai. “Ngai gaw na a nsha lat wa Esaw rai nngai” ngu nna htan wu ai shaloi, Isak gaw mau nna grai kajawng ai hte, “Na a nnau wa gaw, hpaji hte sa nna na a shaman chyeju hpe la kau nu ai,” ngu nna Esaw hpe tsun wu ai. Esaw gaw kawa tsun ai ga hpe na jang aja awa jahtau hkrap let, “Ngai hpe mung shaman chyeju shaman ya e law,” ngu nna hpyi wu ai.

Shaloi Isak gaw kasha alat wa Esaw hpe matsan dum wu ai majaw, shi hpe mung shaman chyeju bai jaw wu ai. Shingrai masu hkalem sha ai majaw Esaw gaw masin grai pawt ai hte kawa si mat wa ai shaloi, kanau Yaku hpe sat kau na lam dan dan leng leng tsun ai majaw, kanu Rebeka gaw Yaku a matu tsang wu ai rai nna, “Ngai sha e, nye a kanau Laban nga ai shara Haran de h prawng wa su,” ngu nna Yaku hpe htet da ngut jang, Yaku mung kahpu zingri na hpe hkrit ai majaw, kanu a ga hpe madat mara let grai htat ai nam mali lam hku shi hkrai sha lagaw lam hku Hpadan Aram mung de man yawng let sa mat wa wu ai. Yaku shut ai lam hpe n dang shara n nga ai. Yaku mung hpang e shi shut ai lam hpe myit dum nna myit malai lu ai lam dan leng nga ai.

Lani mi hta Yaku lam hkawm sa wa nga yang, shingbyi na shara rai n mu ai ten hta n sin sin wa ai rai nna, bunghkum shatai na matu lungbyen langai mi hpe hta la nna yup pyaw mat wa wu yang, yupmang mu wu ai gaw, ga ntsa e lakang sharawt let dai lakang gaw lamu du hkra dep nga ai hpe mu wu ai. Karai Kasang a

lamu kasa ni gaw dai lakang kaw na yu wa, lung wa rai nga ma ai hpe mu wu ai. Yehowa Karai Kasang mung dai lakang baw e tsap nga ai rai nna, "Nang yup nga ai shara gaw, nang hte na a aru arat ni yawng hte hpe ngai jaw sade ai. Na a aru arat ni gaw ga n hpu zawn, law htam wa na mara ai rai nna, na a jinghku jing-yu ni yawng hte mung shaman ai chyeju hkam la shajang na mara ai. Ngai gaw nang hpang maga de nga na n ngai rai nna, nang hkawm sa wa ai shara shagu hta ngai yu karum na n ngai, n dai mung de mung nang hpe lang mi bai woi wa na de ai," nga nna hkang da ai hpe Yaku mu wu ai.



Shingrai Yaku gaw shi hprawng wa ai shaloi Karai Kasang gaw shi hte ga shaga ai lam hpe myit dum nna, grai hkrit gari ai hte, "Ndai shara gaw kaga n rai, Karai Kasang a nta hte

sumsing lamu a chyinghka lam rai nga a hka gaw,” ngu wu ai. Dai majaw Yaku gaw, Karai Kasang a nta ngu ai lachyum hte dai shara hpe Behtela ngu nna shamying da wu ai.

Dai hta e Yaku gaw, “Ngai nye wa nta de ngwi pyaw ai hte bai du wa lu hkra, Yehowa nye a Karai Kasang tai nga nna, Karai Kasang shi ngai hte rau nga nga ai hte, ya ngai hkawm sa wa ai lam hkan e ngai hpe hkan pau let, sha na shat hte bu hpun na hpun palawng ngai hpe jaw a yang gaw, ndai mahtan daw di nna ngai jun ai nlung mung, Karai Kasang a nta tai na ra ai, nang ngai hpe jaw ai mahkra hta na htamshi hta htammi, ngai nang hpe teng teng wa jaw na ring ngai,” ngu nna shaka dagam da wu ai.

Dai hpang Yaku gaw shawng de shanang nna Haran mare de du hkra bai sa wa wu ai. Shingrai shi sa wa yang hkauna pa langai mi hta nga ai hka htung makau e yup nga ai sagu hpung masum hpe mung, sagu rem ai masha ni hpe mung mu wu yang, “Nanhte gaw gara shara hta nga myit ta?” ngu nna sagu rem ai masha ni hpe san wu yang, Haran mare e nga ai lam bai tsun dan mu ai. Shaloi Yaku gaw, “Laban hpe chye myit ni?” ngu nna bai san wu yang, “Dai wa hpe chye ga ai, dai hta n ga, dai wa a shayi sha rai nga ai Rahkela mung sagu hpung hte rai, ndai shara de sa wa nga ai,” ngu nna bai tsun dan mu ai. Yaku gaw, hka htung n tsa e magap nga ai nlung hpe galau kau nna sagu hpung hpe hka ja jaw karum wu ai. Shi gaw Rahkela a kawa a kahkri, Rebeka a kasha re ai lam hpe tsun dan ngut jang, Rahkela hpe pup ai hte aja awa jahtau hkrap wu ai. Rahkela mung grai kabu ai hte gat wa nna shi a kawa Laban hpe wa tsun dan wu ai. Laban gaw dai shiga na ai shaloi, tau la na matu alawan sa n htawm, Yaku hpe a hpum nna, pup ai hte nta de woi wa wu ai.

Dai hpang shata mi daram lai ai hpang Haran mare e nga nna, sagu hpung ni hpe rem na matu, shabrai kade daram hpyi na lam Laban gaw Yaku hpe san wu yang, Yaku gaw, Na a shayi sha kaji Rahkela hpe ngai grai tsawra ai majaw, dai wa hpe jaw ya yang gaw, Laban kaw sanit ning galaw jaw na, ngu tsun wu ai hte maren, Laban mung myit hkrum wu ai.

Shingrai Yaku gaw Rahkela hpe lu la na matu, Laban kaw sanit ning shangun ma tai nna ngut ai hpang, hpyi wu yang, Laban

gaw, “Anhte a ga hta shayi sha kaba hpe shawng n ya sha yang gaw shayi sha kaji ai hpe ya sha ai htung n nga ai. Dai majaw sanit ning bai kahtap nna shangun ma naw tai u; shingrai yang Rahkela hpe mung nang hpe ya sha na re ai,” ngu tsun wu yang, Yaku gaw grai myit yawn ai rai timung kana ba Lea hpe tsawra ai hta Rahkela hpe grau nna tsawra wu ai rai nna katsa a ga madat let Rahkela hpe mung la wu ai.

Rahkela gaw Yawsep hpe shangai ngut ai hpang Yaku gaw tinang a buga rai nga ai kanu kawa ni hpang de madu jan kasha ni hte rau bai wa na matu a hkang hpyi wu yang Laban gaw, “Yehowa Karai Kasang gaw na a majaw, ngai hpe shaman ya ai hpe ngai dum se ai. Ngai jaw na ngu nna ga sadiai shabrai hpe nang hpyi ai shaloi, ngai jaw na,” ngu tsun wu yang Laban a yam nga hpung hta na, dumsu bainam hte sagu re ai ni nkau mi jaw yang gaw, naw nga na ngu nna bai tsun wu yang, Laban myit hkrum wu ai rai nna, shi nga ai shara hte Yaku nga ai shara hpe shada da a lapran e masum ya sat tsan gang hkat na matu, lajang nna Yaku gaw naw ngam ai Laban a sagu bainam hpung ni hpe rem let nga wu ai.

Lani mi hta Laban a kasha ni gaw, Yaku gaw anhte a kawa a sutgan rai nga ai sagu bainam hte dumsu ni hpe lagu la nna lusu ai sahti wa tai wa sahka, nga nna tsun ai ga hpe Yaku na wu yang, shawng na hte maren katsa Laban a man e myi man pa sai hpe mung, Karai Kasang mung, na a kaji kawoi ni nga ai shara de bai wa su, nga nna hkang da ai ga hpe mung bai myit dat yu wu yang, Yaku gaw madu jan Rahkela hte Lea hpe hkauna pa de shaga la nna, Laban gaw, Yaku hpe n dawng sai hpe mung, Hkanan mung de bai wa lu na, nga nna Karai Kasang hkang da ai ga hpe mung shi a madu jan yan hpe tsun dan wu yang, dai ni gaw Yehowa Karai Kasang hkang da ai hte maren, hkan galaw u, ngu nna htan wu ai.

Dai majaw Laban gaw sagu mun rep na matu kaga shara de sa mat ai laman hta Yaku rawt nna shi a madu jan hte kasha ni hpe gawla-u n tsa e jawn shangun nna shi hte seng ai yam nga ni yawng hte hpe mung la nna, Hkanan mung de rawt mat wa wu ai. Ya masum ya na ai hpang Yaku hprawng mat wa sai lam hpe

Laban na wu yang, masha alawan shaga la nna sanit ya tup hkan shachyut ma yang, Giliad bum n tsa e Yaku hpe hkan dep mu ai.

Lam hkawm sa wa nga yang Laban a myit hpe shakawp ya na matu, Karai Kasang gaw, yupmang hte Laban hpang de sa nna, mai ai n mai ai lam Yaku hpe hpa mung n tsun na matu, sharin ya wu ai.

Laban gaw shi a kakhri rai nga ai Yaku hpang de du ai shaloi, shi gaw “Ngai hpe hkalem nna hpa majaw a katsi sha hprawng mat wa a ni? nye a kashu kasha ni hpe pup la na matu, hpa majaw ahkang n jaw nni? Nang gaw grai n hkru n shawp ai hku galaw nit dai,” ngu nna Yaku hpe tsun let, yupmang hta na a Karai Kasang a hkang da ai ga a majaw, Yaku hpe n zingri ai sha nga ai lam hpe Laban bai kahtap tsun wu yang Yaku mung masin pawt nna, “Hpa baw mara lu ai majaw ndai daram lawan ai hte hkan shachyut nni?” ngu nna Laban hpe bai san wu ai. Dai hta n ga Laban a sagu bainam rem ai shaloi shani jan ja ai mung, shana aten hta kashung ai hpe mung, ahkying aten ntam ai sha bungli galaw ai hte n lu yup ai shaning hkun ning tup Laban a nta hta e shangun ma tai nna nga sai rai timung, Karai Kasang gaw Laban hpe n hkum da yang gaw, ngai hpe kaman sha dat dat na rai nga ndai, ngu nna Laban hpe tsun wu ai. Laban mung Karai Kasang a hkang da ai ga hpe myit dum wu yang, angwi apyaw sha ga bai shaga wu ai.

Dai hpang Hkanan mung de bai sa wa ma yang kahpu Esaw nga ai shara hte gade n tsan ai shara kaw du mu ai. Shaloi Yaku gaw kahpu Esaw hpe kaning rai shut yu sai lam hpe dum nna grai hkrit wu yang shi a katsa Laban hte na na nga kau sai hte kawa Isak hpang de bai wa ai lam hpe Esaw hpe wa tsun dan na matu kasa ni hpe shangun dat wu ai. Dai ni bai n htang wa nna, madu hte hkrum na matu Esaw gaw luksuk mali tsa hte rau rawt sa wa ra ai hpe wa tsun dan ma yang Yaku gaw grai hkrit gari nna, Esaw a lata hta na tinang a hkum kaning rai lawt na matu Yehowa Karai Kasang kaw akyu hpyi ngut jang, shi a sagu, bainam, lawze, dumsu hte gawla-u ni hpe lata la nna, Esaw a masin pawt ai hpe jasim na nga, kumhpa sak jaw na matu Esaw hpang de masha alawan sa shangun dat wu ai.

Dai shana nhtoi garai nhtoi yang, Yaku gaw rawt nhtawm madu jan kasha ni hte Yam nga ni yawng hpe Yabok hka hta sharap dat nhtawm shi chyu sha hti nga mat wu ai. Shingrai hti nga yang masha marai langai mi pru sa nna, nhtoi htoi wa hkra shi hte gamu hkat wu ai. Dai wa gaw shi n dang lu ai mu jang, Yaku a magyi pawt ahtawk ya wu ai rai nna, shi hte kamu nga yang, shi a magyi pawt hkrihkraw kashai mat lu ai. Shaloi dai wa gaw, “Nhtoi htoi wa ra ai, ngai hpe dat dat ni,” ngu wu ai. Yaku gaw, “Nang ngai hpe n shaman ya yang gaw, ngai nang hpe n dat dat na nngai,” ngu nna htan wu ai. Bai dai wa gaw, “Na a amying hpa rai lit ta?” ngu nna san wu yang, “Yaku ngu ai rai li ai,” ngu nna tsun dan wu ai. Shaloi dai wa gaw, “Na a amying htawm hpag de Yaku ngu lu na n rai: Israela ngu na rai lit dai: kaning rai nme law, nang gaw Karai Kasang hte maung, masha hte mung gasat hkat nna dang kau nit dai” ngu wu ai. Yaku mung, “Na a amying gaw hpa rai lit ta? Ngai hpe tsun dan e,” ngu nna san wu yang, dai wa gaw, “Nye a mying hpa rai san n ta?” nga nna, dai yang e shi hpe shaman ya wu ai. Dai majaw Yaku dai shara hpe Hpeniela ngu nna shamying wu ai: kaning rai nme law, Ngai gaw Karai Kasang hte myi man tut hkrum timung, ngai n si nngai, nga ai.

Yaku gaw hkashi langai mi hpe rap nna lai sa wa wu yang Esaw gaw shi a luksuk mali tsa hte rau rawt sa wa ai hpe mu wu yang, shawng de sit sa nna, sanit lang du hkra ga de gum dagup let nawku n htawm, kahpu a makau de sit sa wa wu ai. Dai shaloi Esaw gaw tau la na matu, gat sa wa let, du hta ahpum nna pup let shan nau lahkawng yan hkrap ma ai.

Dai lam hpe yu yang Karai Kasang gaw, Yaku hpe karum la ai lam dan leng nga ai lam hpe mu lu ai rai.

Esaw gaw Yaku sak jaw ai kumhpa ni hpe hkap la ngut jang, kanau Yaku hte rau hkawm sa wa wu ai rai nna, Yaku tsun wu ai gaw, “Ndai ma ni gaw rai n kung shajang ma ai majaw, lani jan hta sha lam nau hkawm yang gaw, si mat ma wa na re. Dai rai nna nang madu gaw, na a mayam wa a shawng de sa wa magang su, ngai chyawm gaw ngai hte rau rai nga ai ma ni hte dumsu yam nga ni hte rau nang madu nga ai shara Seira mung de du hkra angwi sha sa wa na ga ai,” ngu nna tsun wu ai.

Yaku gaw Hkanan mung de du ai shaloi Behtela shara de sa nna tawn hkungri hpe galaw lu n ga nga, Karai Kasang a shingran hte, shi hte rau lawm wa ai hpara tsasam hpe nawku ai lam kau da nna, Behtela shara de du jang shi hpe yu karum nga ai Karai Kasang a chyeju hpe myit dum na matu tawn hkungri galaw nna dai shara hpe Behtela a Karai Kasang ngu ai lachyum hte El-Behtela ngu nna shamying da wu ai.

Dai hpang Behtela shara kaw nna htawt mat wa ma ai rai nna, Ehprat mare de du ni wa yang Rahkela gaw shadang sha marai langai mi hpe shaprat wu ai. Yaku gaw dai shadang sha hpe Ben-yamin ngu nna shamying wu ai. Rahkela gaw shadang sha shangai ngut jang si mat wa sai rai nna, hkrun lam e shi hpe makoi mayang manu ai rai.

Dai hpang Yaku gaw kawa shingbyi nga ai Hebrun mare de bai du wa wu yang, shi a kawa mung kasha kaji hpe bai mu na ahkang bai lu la ai hte dingla ugut gu mat wa sai rai nna, kaji kawoi ni nga ai shara de du mat wa sai rai. Kasha Esaw hte Yaku gaw, shan nau a kawa hpe Makhpela ginlawng hku hta e makoi mayang manu ai rai.

Yaku gaw shadang sha marai shi lahkawng lu wu ai. Shi gaw Yawsep mying ai shadang sha hpe grau nna tsawra wu ai rai nna, dai ma hpe laklai ai palawng langai mi chywi ya wu ai. Yawsep a kahpu marai shi hte gaw Yawsep hpe n dawng ai hte jahten kau na bawng ma ai rai.

Dai hpang kade nna yang lani mi hta Yawsep a kahpu ni gaw sagu bainam rem nga ai kaw na nta de bai wa ai shaloi, sai galu ai palawng langai mi hpe kawa Yaku hpang de la wa nna, madun ma yang, ndai gaw ngai sha a palawng nan rai nga ai, shi hpe dusat matse ni kawa sat sha kau nu hka, kaja wa Yawsep hpe kahtum kadaw di nna kawa sha kau sahka, ngu nna shi a palawng hpe gang je kau nna lachyit nba lawai let sharung shayawt nga wu ai. Dai shaloi kasha ni yawng hte gaw, kawa hpe shalan shabran ma ai rai timung, shi gaw shi hpe shalan shabran ai ni a ga hpe n madat ai sha, ngai gaw ngai sha nga ai katsan ga de yawn hkyen ai hte yu wa na ni ai, ngu nna tsun ai rai.

Dai hpang Hkanan mung ting hta hku wa kaba wa ai shaloi Egutu mung de nai mam law law nga ai lam Yaku na wu yang, shahpa n nga ai hte kawsi nna n si na matu, kasha ni marai shi hte hpe Egutu mung de mam mari shangun dat wu ai. Dai ni gaw nai mam mari la nna, kawa hpang de lang mi bai du wu ai hpang Egutu mung hpe up hkang ai madu gaw, anhte hpe kin-yu shadu ai majaw, “Madu a mayam ni kin-yu n rai ga ai, shahpa mari na she sa ga ai. Anhte gaw Hkanan mung e nga ai marai langai mi a kasha ni hkrai rai ga ai. An nau ni marai shi rai ga ai; kaji htum ai hpung dim wa gaw anhte a kawa hte rau nga nga ta sai langai mi gaw n nga sai,” ngu nna tsun dan mu ai. Munggyi wa gaw sheng mareng nga ai ga hte shaga nna Simun hpe htawng hta rim bang da ngut jang, “Nanhte gaw ding hpring ai masha ni re ai, n re ai hpe chye lu na matu, ndai masha langai mi hpe tawn da lu na rai myit dai; hpang e nai mam mari na matu bai sa ai shaloi kaji grau ai nan nau ni a kanau hpung dim wa hpe mung woi sa lu na rai myit dai; nanhte dai zawn rai galaw myit yang gaw, kin-yu n rai, dinghpring ai masha ni re ai lam dan leng nna ngai mung ndai ngam da ai wa hpe bai ap ya na n ngai,” nga nna htet dat ai. Shing nga nna munggyi wa htet dat ai ga hpe kawa hpe wa tsun dan mu yang Yaku gaw grai myit ru ai hte, “Ya Yawsep mung n nga sai, Simun mung n nga sai, Ben-yamin hpe mung bai naw woi sa na myit hka, nanhte hte rau ndai ngai sha gaw n hkan sa lu na re ai,” ngu nna bai htan mu ai.

Dai hpang Egutu mung kaw nna mari wa ai nai mam ni hpe sha htum kau jang, shahpa lang mi bai mari shangun na matu Ben-yamin hte rau Egutu mung de nai mam mari na matu lang mi bai shangun dat wu ai. Shing rai munggyi wa hpang de bai du ma yang gum dagup let, shanhte gun sa ai kumhpa ni hpe sak jaw shajang ma ai. Munggyi wa mung dai masha ni hpe sha hpa daw jaw mu ai. Hpang jahpawt manap n htoi htoi ai shaloi shannau ni gaw, Hkanan mung de bai wa na matu, mare kaw nna loi mi bai sat sa wa ma yang munggyi wa a shangun ma langai mi gaw hkan shachyut sa nna bai shaga n htang la mu ai. Dai masha ni gaw grai hkrit gari ai hte munggyi wa hpang de bai n htang sa ma yang, munggyi wa gaw, shi a lam tsun dan ai hte, “Nanhte gum dagup ai

hte nawku ai wa gaw, kaga n rai, nanhte a kanau majing Yawsep rai nga n ngai,” ngu nna tsun dan let aja wa jahtau hkrap wu ai. Dai shaloi shi a kahpu kanau ni hpe ahpum let pup nna grai kabu shajang ma ai. Dai hpang shanhte gaw alawan sha bai wa nna, kawa Yaku hpang de bai du wa ma yang, Yawsep gaw asak hkrung nga ai hte Egutu mung hpe up hkang let nga nga ai lam hpe tsun dan ma yang Yaku gaw grai kajawng ai hte mau nna alawan sha n kam wu ai. Rai timung byin wa ai sakse kumla ni hpe madat yu n htawm, “Teng nga ai, ngai sha Yawsep gaw rai n si n mat ai sha nga nga a hka, ngai rai n si yang shi hpang de sa nna yu yu na n ngai,” ngu wu ai. Shing rai Israela rai nga ai Yaku a kasha ni gaw shanhte a kawa hte hpawn, madu jan kashu kasha ni yawng hte hpe woi let Egutu mung de yu wa shajang mu ai.

Yaku gaw Goshen mung e Yawsep hte hkrum na matu, kasha Yuda hpe shawng de shangun dat let, Goshen mung de sa wa shajang mu ai. Yawsep mung leng ni hte lajang la nna kawa Israela hte hkrum na matu Goshen mung de sa wa wu ai. Shing rai kawa hte hkrum jang kawa a du hta ahpum let na na wa hkrap nga ai. Israela mung, “Ya ngai si wa ni ai gaw, na a myi man hpe ngai mu lu ni ai; na a asak mung naw hkrung nga lit dai,” ngu nna Yawsep hpe tsun wu ai.

Hpara-u hkawkam wa mung Yaku hte rau lawm sa ai masha ni yawng hte hpe atsawm sha hkap la wu ai rai nna, Egutu mung hta kaja grau ai mung ngu ai Goshen mung hta shingbyi nga na matu ahkang jaw wu ai rai nna, Yaku mung Hpara-u hpe shaman ya wu ai. Nai mam hku hku mat wa sai rai tim, Yaku gaw Goshen hta naw shingbyi nga ai rai nna Yaku si na ningtawn e kasha Yawsep hpe shaga let, tsun wu ai gaw, “Chyeju hte sad sahka lam ngai hpe madun nna Egutu mung e ngai hpe hkum lup makoi da et, ngai gaw ji wa ni hte rau yup nga mayu nngai majaw, Egutu mung kaw nna la wa nhtawm ji wa ni a lup wa hta makoi mayang mi,” ngu nna ndat ga tsun da wu ai.

Yaku si na aten ni yang Yawsep a kasha marai lahkawng hpe shaga la nhtawm ahpum ai hte pup nhtawm shaman ya ngut jang Yaku kasha ni yawng hte hpe mung bai shaga la nna, langai hte langai hpe shaman ya da ngut jang, ‘Ngai gaw ji wa ni hpawng

nga ai shara de wa na ni ai; Makhpela pa e nga ai ginlawng hku hta Abraham gaw shi a madu jan Sara hpe mung, Isak a madu jan Rebeka hpe mung makoi mayang masai. Lea hpe mung ngai makoi mayang ni ai. Dai ginlawng hku hta nan nye a hkum hkrang hpe mung wa makoi mayang mu,” nga nna ndat ga tsun da ngut jang shi nsa hkyet mat wa sai rai nna, kaji kawa ni hpawng nga ai shara de du mat wa sai rai.

Yawsep a shangun ma rai nga ai tsi sara ni gaw, Yaku a moi mang hpe manam pyaw ai baw hte chya nna, lajang ngut ai hpang Egutu masha ni gaw, Yaku a lam hta e nhtoi sanit shi ya tup sharung shayawt let nga ma ai rai. Dai shaloi hkawhkam hkaw de na arawng sadang lu ai masha ni hte mung masha ni yawng hte Yawsep a nta masha ni yawng hte gaw, gumra leng ni hte mung, gumra jawn ai hpyen masha ni hte mung Yaku a moi mang hpe hkan sa let Hkanan mung e nga ai Makhpela pa na ginlawng hku hta e shi hpe makoi mayang manu ai rai.

Yaku a ahtik labau ni gaw Ningpawt Ninghpang laika Dawkaba 25-50 laman hta rawng nga ai rai.

## YAWSEP A MAUMWI

Yaku a kasha marai shi lahkawng hta na shi grau tsawra ai madu jan hta na lu ai shadang sha marai lahkawng nga ma ai. Ndai shadang sha yan hta na Yawsep mying ai wa gaw, asak shi sanit ning du ai ten, lani mi hta shi gaw kahpu ni bungli galaw nga ai shara hkauna pa kaw nna bai wa yang, shanhte galaw ai mara ni hpe kawa Yaku hpe wa tsun dan dan di wu ai. Yaku mung asak kaba sayang Yawsep hpe lu wu ai rai nna kasha ni hpe tsawra ai hta na kasha kaji Yawsep hpe grau nna tsawra wu ai rai nna laklai ai palawng langai mi Yawsep hpe chywi ya wu ai.

Lawu de na lam lahkawng a majaw, Yawsep a kahpu ni gaw, shi hpe n dawng da mu ai rai nna, tsawra ging ai ga n shaga ma ai.

Dai hpang Yawsep gaw, yupmang mu wu ai rai nna dai yupmang kahpu ni hpe tsun dan mu ai gaw, “Anhte gaw hkauna pa e, hkauling ni hpe lahkawn nga yang nye a hkauling gaw ading sha rawt tsap nga ai rai nna nanhte ni a hkauling ni gaw, nye a hkauling ni hpe shing grup nna nawku nga ai hpe ngai mu nngai,” ngu wu ai. Dai shaloi kahpu ni gaw, dai yupmang a lachyum hpe myit dum mu ai rai nna, masin grai pawt ma ai hte, “Nang anhte a ntsa e hkawkam tai na rai nga nni? anhte a ntsa e up hkang lu na rai nga a ni?” ngu nna Yawsep hpe n dawng ai hte htan mu ai.

Hpang e Yawsep gaw, yupmang langai mi bai mu wu ai gaw, “Jan shata hte shagan shi langai hte gaw ngai hpe nawku nga ai hpe ngai mu nngai,” bai ngu wu ai. Dai shaloi kawa na wu yang, “Ngai sha e, anhte nwa, nnu, nhpu ni yawng hte gaw teng teng wa na a man e gum dagup nna nawku lu na rai nga a ni?” Ngu nna san wu ai. Dai kaw nna kahpu ni gaw, grau nna n dawng shajang mu ai.

Kahpu ni gaw Shehkem mare de sagu bainam ni hpe rem let nga ma yang yawng hte gaw kaja nga ma ai kun? Kawa chye mayu wu ai rai nna, Yawsep hpe shangun dat wu ai. Yawsep gaw pru sa wu yang Shehkem mare e kahpu ni hpe n mu wu ai rai nna, bai tam hkawm wa wu yang Dohtan mare de du yang she kahpu ni hpe mu wu ai. Kahpu ni gaw Yawsep sa wa ra ai hpe mu ma yang,

“Yu yu mu, yupmang sara wa sa wa ra ai law, shi hpe rim la nna sat kau nhtawm nhkun langai mi de sa kabai bang kau ga, shi hpe dusat matse ni e sha kau sai, ngu nna wa hpe wa tsun dan ga,” ngu nna shada da bawng mu ai.

Rubin gaw kanau hpe tsawra ai hte matsan dum ai majaw, kanau hpe hkye la na matu, “Ndai ma hpe n sat ai sha nam de tawn da yang gaw grau kaja na nhten,” ngu nna hpaji jaw ai hte maren, Yawsep a tsawm la ai palawng hpe raw la nhtawm Yawsep hpe nam de na nhkun langai mi de sa kabai bang kau mu ai. Shingrai shanhte gaw Yawsep gun sa ai muk hpe sha let dung nga ma yang Midian hpaga la ni lai sa wa ai hpe mu ma yang Yuda gaw, “Anhte gaw kanau hpe sat yang gaw hpa akyu nga na a ni? Yawsep hpe shaw la nna wora hpaga la ni hpe dut ya ga,” ngu nna tsun ai hte maren Yawsep hpe shaw la nhtawm gumhpraw lap hkun hte Ishmaela masha ni hpe dut ya kau dat mu ai. Dai hpaga la ni gaw Yawsep hpe Egutu mung de woi hkrat wa manu ai.

Rubin gaw kanau ni galaw ai lam hpe n chye wu ai rai nna, Yawsep hpe bang da ai nhkun de sa yu yu wu yang Yawsep hpe n mu wu ai. Shaloi Rubin gaw, kaning di na i? ngu wu yang kahpu ni gaw “Sagu kasha langai mi sat nna sagu kasha a asai hte dai palawng hpe galu nhtawm, ndai palawng gaw Yawsep a palawng rai n rai gaw, wa chye na re ai,” ngu nna kawa hpe wa madun mu ai. Yaku gaw kasha a palawng hpe matsing wu ai rai nna, ndai gaw ngai sha a palawng nan rai nga ai; shi hpe dusat matse ni e kawa sha kau nu hka, kaja wa kahtum kadaw di nna kawa sha kau nu hka, ngu nna tsun wu ai.

Midian masha ni gaw Egutu mung de du jang Hpara-u a bu, sin langa ni a agyi Egutu masha Hputihpa hpe sa dut ya kau mu ai. Yawsep mung shi a madu Hputihpa nta e nga nna, shi a madu a nta e lam shagu hta kangka sadia sahka ai hte bungli ni hpe atsawm sha galaw let nga wu ai rai nna, Karai Kasang mung Yawsep hte rau nga nga ai rai nna, Yawsep gaw shi a madu a man e myi man pa wu ai. Shi a madu mung shi hpe kam ai majaw, nta ting hte sutgan yawng hpe Yawsep a lata hta ap da ya wu ai rai.

Yawsep gaw ahpraw nsam htap ai hte ding hpring ai shabrang rai nga ai. Dai hpang shi a madu Hputihpa a madu jan

gaw, Yawsep hpe tsawra wu ai rai nna, lani hte lani Yawsep hpe gunglau wu ai. Yawsep gaw ding hpring ai wa re ai majaw, Karai Kasang hpe hkrit hkungga ai hte shi a madu a madu jan gunglau ai de n hkan sa wu ai. Dai hpang Hputihpa a madu jan gaw Yawsep hpe gunglau yang n lu wu ai rai nna shi a madu wa Hputihpa hpang de sa nna Yawsep hpe sa shawk wu ai rai nna, Yawsep gaw mying hten ai hte arawng sum ai hkrum wu ai. Hputihpa mung masin pawt ai hte Yawsep hpe htawng hta rim bang kau wu ai rai.

Karai Kasang gaw shi a mayam wa Yawsep hpe matsan dum wu ai rai nna htawng agyi wa a man e myi man pa shangun wu ai majaw, htawng agyi wa gaw, htawng rawng ai masha yawng hpe Yawsep a lata hta ap ya wu ai rai nna, Yawsep gaw htawng rawng ai masha yawng hpe amu je yang ya let bai nga wu ai.

Kalang mi na Hpara-u hkawkam wa a tsabyi jau ai wa hte muk kabaw ai agyi wa yan gaw, shan a madu hkawkam hpe shut kau mu ai rai nna, shan hpe htawng hta rim bang da mu ai. Lana jan hta dai agyi wa yan gaw yupmang kaga ga langai hpra mu mu ai rai nna, jahpawt nhtoi htoi yang dai agyi wa yan gaw, myi man sum nga ma ai. Dai lam Yawsep mu wu ai rai nna, “Nan hpa majaw myi man sum nga myit ta?” ngu nna san mu yang agyi wa yan gaw, “An mu ai yupmang hpe htai dan lu ai masha n nga ma ai,” ngu nna bai htan mu ai. Shaloi Yawsep gaw, “Yupmang gaw Karai Kasang hte seng ai nrail ni? Ngai hpe nan mu ai yupmang hkai dan mi,” ngu tsun jang, tsabyi jau agyi wa gaw, “Ngai mu ai yupmang gaw nye a man e tsabyi ru hpun nga ai, dai ru hta lakying masum kying nga ai, lakying ni hta mung majawn ai hte pu pu ma ai, apu hte asi ni mung myin ai tsabyi si tai ma ai. Hpara-u a gawm hpe ngai la nna dai tsabyi ni hpe shup bang ngut jang hkawkam wa hpe sak jaw we ai,” ngu tsun dan wu yang, Yawsep gaw yupmang a lachyum hpe htai dan wu ai gaw, “Tsabyi lakying masum gaw masum ya rai nga ai, masum ya lai jang Hpara-u gaw na a baw hpe sharawt ya nna nang gaw shawng na hte maren tsabyi jau agyi bai tai nna Hpara-u hpe shawoi na hte maren bai jau lu na rin dai,” ngu wu ai.

Dai hpang Yawsep gaw, shi a lam tsabyi jau agyi wa hpe bai tsun ai gaw, ‘Nang nga mu nga mai lu ai shani ngai hpe myit

dum nna chyeju galaw e law, Hpara-u a man e nye a lam tsun dan nna ndai nta kaw nna ngai hpe shaw la e,” ngu nna tsabyi jau agyi wa hpe tawng ban tsun wu ai.

Yawsep htai ai lachyum kaja nga ai hpe muk kabaw agyi wa chye wu yang dai wa gaw, “Ngai mu ai yupmang gaw hpraw tu ai mung masum nye a baw e ngai nan mara nga yang ntsa e jahtum ai mung hta gaw Hpara-u hkawkam sha na matu shadu ngut chyalu luhpa, shahpa amyu myu rawng nga ai. U ni mung dai mung hta na sa shaw sha ya ma ai,” ngu nna tsun dan wu yang, Yawsep mung yupmang a lachyum hpe bai htai dan ai gaw, “Mung masum gaw masum ya rai nga ai; masum ya lai jang Hpara-u gaw na a baw hpe nang hte jahka nna nang hpe noi kau na rin dai, shaloi u ni gaw na a shan hpe shaw sha kau na mara ai,” ngu nna htai dan wu ai.

Dai hpang Yawsep a ga hte maren byin wa ai gaw masum ya lai yang Hpara-u a shangai nhtoi du wu ai rai nna, shaning shagu galaw ai hte maren, poi hta tsabyi jau agyi wa hpe hkaw de bai shaga la nna shawng de na hte maren, tsabyi bai jau shangun wu ai. Muk kabaw ai agyi wa hpe chyawm gaw, noi kau mu ai.

Tsabyi jau agyi wa chyawm gaw, nga pyaw mat wa nu ai rai nna, Yawsep hpe malap kau wu ai. Dai hpang Yawsep gaw lahkawng ning tup htawng hta e naw rawng nga wu ai rai. Dai hpang lani mi hta Hpara-u yupmang mu ai gaw, Egutu mung e nga ai hka langai mi a hkin-gau e shi tsap nga yang dumsu sanit gaw hka de nna pru lung wa ai hpe mu wu ai. Dai dumsu ni gaw grai tsawm ai hte hpum ma ai rai nna hka kau e tu ai tsing hpe sha let nga nga ma ai.

Dai hpang grai lasi lamun re ai dumsu sanit bai pru sa wa nna shawng na grai hpum ai dumsu ni hpe kawa sha kau mu ai hpe mu ai hpang hprang wa wu ai. Dai hpang bai yup wa yang yupmang langai mi bai mu kahtap ai gaw, grai tsawm ai mam hpun langai mi hta sha tsawm ai hte ja kat ai mam gungsi sanit bai si pru wa ma ai. Dai hpang, nyip nyip re ai hte kaji nna sin praw nbung e ahpawt kau sai mam n myem gungsi sanit bai si pru wa ma ai hte shawng na ja kat ai mam gungsi sanit hpe sha kau mu ai hpe mu wu ai. Jahpawt hprang wa yang Hpara-u gaw grai myit ru ai hte

Egutu mung na gumhpan hpan ai ni hte hpaji rawng ai ni yawng hte hpe shaga nna yupmang mu ai lam yawng hte hpe tsun dan mu ai. Rai timung dai masha ni gaw, dai yupmang a lachyum hpe n htai dan lu ma yang, tsabyi jau wa gaw Hpara-u hpe ning ngu nna shawn wu ai. “Nang madu gaw muk kabaw agyi wa hte an hpe masin pawt nna htawng hta sharawng da ai shaloi an lahkawng gaw lana jan hta sha, yupmang kaga ga langai hpra mu ga yang htawng hta rawng ai Hebre masha langai mi gaw dai yupmang a lachyum hpe htai dan ai hte maren, byin wa sai” ngu nna tsun wu yang, Hpara-u gaw, Yawsep hpe htawng de na woi la na, shangun nhtawm shi a man e jashawn shangun dat wu ai. Dai shaloi Hpara-u hkawkam gaw, “Ngai gaw yupmang hpe mu sai, nang gaw yup mang a lachyum chye htai ai nyan rawng ai hpe ngai na lu sai,” ngu wu yang Yawsep gaw, “Tinang hkrai sha dai amu hpe ndang lu ai rai timung Karai Kasang gaw dai lachyum hpe madun dan na ra ai,” ngu wu yang Hpara-u gaw shi mu ai yup mang ni Yawsep hpe tsun dan wu ai.



Yawsep mung, “Madu mu ai yupmang lahkawng yan gaw langai sha rai nga ai, hpum sau ai dumsu sanit gaw, sanit ning rai nga ai; ja kat ai mam gungsi sanit mung sanit ning rai nga ai. Dai hta n ga lasi lamun ai dumsu sanit hte sinpraw nbung e ahpawt kau sai mam n myem sanit mung nai mam hku hku na sanit ning rai na ra ai; Karai Kasang galaw na ra ai amu gaw, Hpara-u hpe madun wu ai. Egutu mung ting hta sanit ning tup nai mam lusu na ra ai. Dai hpang sanit ning tup hku wa kaba wa na ra ai rai nna, Egutu mung hta e ngwi pyaw ai shaning ni gaw lai mat wa nna, hku wa kaba wa ai majaw mungdan ting gaw hten mat wa na ra ai. Dai lam hpe Karai Kasang alawan galaw na ra ai rai nna Hpara-u hkawkam gaw, nyan rawng ai masha langai mi hpe lata san da nhtawm Egutu mung e up hkang shangun u, dai hta n ga dai munggyi wa gaw mungdan ting agyi ni hpe bai san da nna du na ra ai ngwi pyaw ai shaning ni hta nai mam ni hpe shinggyin nhtawm Hpara-u hkawkam a man e shinggyin da mu ga, shingrai galaw da yang gaw, hku hku ai shaning ni hta du yang mung masha ni sha na matu nai mam nga nga sai majaw, mungdan gaw n hten lu na re;” ngu nna Hpara-u hpe tsun htai dan wu ai.

Yawsep tsun ai lam ni hpe na wu yang, na sharawng wu ai rai nna myit hkrum wu ai. Yawsep zawn nyan hpaji rawng ai hte hkum tsup ai masha langai mi pyi n nga wu ai rai nna, Hpara-u hkawkam gaw, “Egutu mung ting up hkang na matu, ngai nang hpe hkang da sai,” ngu nna shi a lata hta chyawp da ai lachyawp hpe raw la nhtawm Yawsep a lata hta chyawp ya ai hte kaja reng ai hpun palawng mung shi hpe jahpun nna shi a du hta ja saidawng mung gali ya wu ai. Shi a hpang na leng hta mung shajawn wu ai. “Shi a shawng e mung lahput hput di nga mu,” ngu nna mung jahtau wu ai. Shingrai galaw nna Egutu mung ting hta up hkang wu ai. Ona mare na hkinjawng Hputihpera a shayi sha hpe mung Yawsep hpe la ya wu ai. Dai ten hta Yawsep gaw, asak sum shi ning du sai rai.

Shaloi Yawsep gaw Hpara-u a man kaw nna pru wa nhtawm, Egutu mung ting hta kayin hkawm let nai mam hte seng ai amu ni hpe galaw lajang let nga wu ai. Ngwi pyaw ai sanit ning laman hta nai mam ni hpe law law mahkawng da shajang mu ai.

Hku wa kaba rai n wa ai aten hta Yawsep a madu jan Asnat gaw shadang sha marai lahkawng hpe shaprat wu ai. Shadang sha kaba hpe Manashe ngu nna shamying ai hte kaji ai wa hpe Ehprim ngu nna shamying mu ai.

Shingrai ngwi pyaw ai sanit ning lai ai hpang hku wa kaba wa wu yang, mung masha ni gaw Hpara-u hpang de lu sha hpyi nna jahtau shajang mu ai. Hpara-u gaw “Yawsep hpang de sa mu, shi tsun ai hte maren nanhte madat mu,” ngu nna Egutu masha ni yawng hpe tsun dat mu ai.

Egutu mung hta shat lu sha taw wa ai shaloi Yawsep gaw mam dum ni hpe hpaw nna mung masha ni hpe nai mam dut ya wu ai. Dai shaloi Yawsep a kahpu kanau ni gaw, Hkanan mung e shingbyi nna naw nga nga ma ai. Shanhte a kanau hpe Ishmaela masha ni hpe dut kau dat ai hpang shaning ram ram na hkra lai mat wa sai rai nna shi gaw si mat na sai, ngu nna myit ma ai. Hkanan mung e lusha taw wa ai shaloi, Yaku gaw kasha ni marai shi hte hpe shaga la nna, “Egutu mung de mam sa mari masu, Egutu mung de nai mam law law nga ai lam ngai shiga na lu sai,” ngu nna kasha ni hpe shaga la nhtawm, Egutu mung de mam mari shangun dat wu ai. Kahpu ni gaw du sa wa ma yang, Yawsep a man e gum dagup nna, nawku let Yawsep hpe n chye mu ai rai timung Yawsep gaw kahpu ni hpe chye timung n chye masu nna sheng mareng nga ai ga tsun let, “Nanhte gaw gara de na sa myit ta?” ngu nna san wu ai. Shanhte gaw “Nai mam ni hpe mari mayu ga ai majaw, Hkanan mung kaw nna sa ga ai,” ngu nna bai htan mu ai. Yawsep mung, “Nanhte gaw kin-yu rai myit dai; mungdan a n gun yawm ai lam hpe yu na matu sa ai rai myit dai,” ngu wu yang shanhte gaw “N rai ga ai madu e, sha na matu mari na ngu, madu a mayam ni sa ga ai, madu a mayam ni gaw kahpu kanau ni marai shi lahkawng rai ga ai, kaji grau ai wa gaw wa hte rau nta e nga nga ta sai, langai mi gaw n nga mat sai,” ngu nna bai tsun mu yang Yawsep gaw “Nanhte hpe ngai kaning rai chyam yu na gaw nanhte a kaji htum ai kanau hpungdim hpe n woi sa yang gaw, Hpara-u ahkrung nga ai hte maren, nanhte gaw ndai shara kaw nna, n hkawm n sa, n pru wa lu ai,” ngu nna hkang da ngut jang kahpu ni yawng hpe masum ya tup rim tawn da mu ai.

Dai hpang Yawsep gaw, shanhte hpe shaga nna, “Nanhte gaw teng man ai masha ni rai myit yang gaw, nanhte hta na marai langai mi hpe htawng hta e sharawng kau da nna, ngam ai nanhte gaw bai wa mu, nta masha ni hta lusha nnga ai majaw, mam ni hpe mari la nna bai wa manu, nanhte a kaji grau ai kanau hpungdim hpe ngai hpang de woi sa marit, ning rai hkan galaw myit yang gaw, nanhte teng man ai masha ni rai na myit dai; nanhte mung asak lawt lu na myit dai,” ngu nna hkang dat mu ai.

Kanau Yawsep hpe Ishmaela masha ni hpe dut kau ai mara a majaw Karai Kasang gaw shanhte hpe yubak jaw ai zawn nawn nna shada da mara shagun let tsun mu ai gaw, “Anhte gaw anhte a kanau a majaw, anhte hta yubak mara du sai, shi gaw anhte hpe hpyi tawng ban ai rai timung, anhte n madat ai sha nga nga saga ai; ndai mara ni gaw anhte hta du sa hka,” ngu nna marai langai hte langai tsun shajang mu ai. Rubin mung, “Kanau kaji hpe hkum hkra myit ngu nna ngai tsun sai rai timung nanhte n madat myit dai n rai ni? dai rai nna ya shi a sai galu ra ai; dai majaw anhte ning rai jep ai hte hkrum ga ai, n rai ni?” ngu nna tsun wu ai.

Shanhte shing nga hkat ai ga hpe Yawsep chye na ya ai hpe gaw shanhte n chye mu ai. Hpa majaw nga yang Yawsep gaw ga shaga ai hte san jep ai shaloi ga byan san da nna san jep ai hte shaga ai majaw rai nga ai. Rai timung shanhte shada da mara shagun hkat ai ga hpe Yawsep na ai shaloi kaga shara de pru sa nna hkrap wu ai.

Shaloi bai nhtang wa nhtawm shanhte yawng a man na Simon hpe shaga la nhtawm gyit hkang ngut jang, kaga masha ni a mam jan hta mam ni bang ya na matu mung, shanhte gun sa ai gumhpraw ni hpe mung, langai hte langai a jan hta bai bang ya dat na lam hpe mung, lam na matu lusha jarik hpe jaw dat na matu mung, htet da wu ai. Shing rai shingma ntsa e mam buri jan ni hpe gun nna pru wa shajang mu ai.

Shingrai shanhte wa nga yang dabang de du ai shaloi marai langai mi gaw lawze hpe shat jaw na matu, shi a mam buri hpe hpaw yu wu yang mam buri mahka e rawng nga ai gumhpraw jan hpe mu wu ai. Shaloi kahpu ni hpe, “Ngai hpe ndai gumhpraw bai bang ya dat ai, yu yu mu, ndai jan hta rawng ai” ngu wu yang,

shanhte gaw grai hkrit gari ai hte, “Anhte hpe ndai zawn Karai Kasang galaw ai lam gaw hpa rai nga a ta?” ngu nna langai hte langai tsun shajang mu ai.

Shanhte gaw Hkanan mung de du nna, shanhte langai hte langai a mam buri ni hpe hpaw yu shajang mu yang langai hte langai a mam buri ni hta tinang hte seng ai gumhpraw jan ni hta bai rawng shajang ai hpe mu ma ai rai nna, grai hkrit kajawng shajang mu ai. Shingrai mam mari na matu Egutu mung de bai sa ai shaloi, kanau Ben-yamin hte gumhpraw ni mung htam lahkawng jat nna munggyi wa hpe jaw na matu kumhpa ni hpe gun let bai sa wa ma ai.

Dai masha ni hte Ben-yamin lawm sa wa ai hpe Yawsep chye wu yang, shi a kunhting wa hpe shaga nna, “Nta masha ni hpe nta de woi wa su; shan ni hpe sat nna lusha wa lajang u, ngai ndai manam ni hte shani shat sha na nngai,” ngu nna htet dat wu ai. Shingrai kunhting wa mung lajang nna kahpu ni hpe Yawsep a nta de shangun dat wu ai. Shingrai lam hkawm sa wa nga yang, shanhte gaw, “Shawng de anhte hpe bai bang ya dat ai gumhpraw a majaw anhte hpe shaga ai rai sai; kaja wa teng teng mara tam na mara ai; anhte hpe mung mara galaw nna mayam shatai nhtawm anhte a lawze ni hpe la kau ya na ra ai,” ngu tsun shajang let Yawsep a kunhting wa hpang de sit sa nna, “Madu e anhte gaw shawng de mung nai mam mari na matu she sa ga ai, dabang de du nna mam buri ni hpe hpaw yu yang mam manu hte seng ai gumhpraw gaw loi mi pyi n yawm ai buri mahka e rawng nga ai; dai gumhpraw hpe ya lang mi bai gun sa ga ai; ya mung sha na matu mam mari na matu gumhpraw kaga mung bai naw gun sa ga ai; dai gumhpraw ni hpe anhte a buri ni de kadai bai bang dat ai hpe n chye ga ai,” ngu tsun mu yang kunhting wa gaw, “Dai lam myit hkum ru myit nanhte a Karai Kasang gaw, nanhte a buri ni hpe shaman ya ai rai nga ai. Nanhte a gumhpraw hpe gaw, ngai la sai,” ngu tsun nna Simon hpe shaw la nna ap ya dat mu ai. Yawsep gaw nta de du ai shaloi, shanhte gun sa ai kumhpa ni hpe Yawsep a lata hta ap ya nna, shanhte gaw gum dagup let, Yawsep a man e hkungga la ra ai hte nga nga ma ai. Yawsep gaw shakram nna “Shawng de nanhte tsun ai asak kaba ai nanhte a kawa gaw, hkam

ja nga a ni? asak naw hkrung nga a ni,” ngu nna san wu yang, shanhte gaw “Madu a mayam anhte ni a kawa gaw hkam ja nga ai” ngu nna tsun dan mu ai. Dai shaloi Yawsep yu dat yu yang shi a kanau majing rai nga ai Ben-yamin hpe mu wu yang, “Ndai wa gaw shawng de nanhte tsun ai nanhte a kanau hpungdim rai nga a nni?” Ngu nna san let, “Nang hpe Karai Kasang gaw shaman ya u ga law,” ngu nna Ben-yamin hpe tsun ngut jang grai matsan dum ai myit rawng wu ai rai nna alawan sha rawt nhtawm shi a gawk de shang wa nhtawm a katsi sha wa hkrap wu ai. Hpang e myit hpe shaja kau nna man myit kau ngut jang bai pru sa nhtawm “Shat lu sha lajang mu,” ngu nna hkang dat mu ai. Yawsep sha ai shaku hpe mung kahpu ni a matu mung Yawsep hte Egutu masha ni sha na shaku hpe mung langai hte langai sha na shaku ni hpe lajang da mu ai. Kahpu ni mung kaba grau ai wa kaw nna kaji grau ai kanau hpungdim du hkra langai a hpang langai rai nna Yawsep a man e dung nga ma yang shanhte gaw shada da yu nna mau nga ma ai. Yawsep mung shanhte sha na matu, langai hte langai shi hpang hku nna shalai dat mu yang, Ben-yamin lu ai gambum gaw kahpu ni lu ai gambum hta htam manga grau law nga lu ai. Shanhte mung lusha sha nna pyaw pyaw rai nga ma ai.

Dai hpang Yawsep mung kunhting wa hpe bai shaga la nna, “Dai masha ni a buri hta shang ai hte maren bai bang ya dat mu, gumhpraw hpe tinang a buri mahka jan hta mung, gumhpraw hte gumhpraw gawm hpe kaji grau ai kanau hpungdim a buri jan hta mung bai bang dat ya u,” ngu nna htet da wu ai. Shingrai htet da ai hte maren kunhting wa mung hkan galaw wu ai. Shingrai hpang jahpawt nhtoi htoi ai hte maren shanhte a lawze ni hte rau bai dat dat mu ai. Mare shinggan de bai du wa ma yang mare hte kade wa rai ntsan ai shara hta du ma yang, Yawsep gaw kunhting wa hpe shaga la nna, “Dai masha ni hpang de alawan hkan gat nang su, shanhte hpe dep jang nanhte gaw chyeju hpe hpa majaw n kaja ai hku htang myit ta? dai gaw nye a madu lu ai gawm n rai ni? kaja wa shaba wawt ai gawm mung rai nga ai n rai ni? Nanhte gaw n kaja ai sha galaw nga myit hka, ngu nna tsun su,” ngu nna shangun dat wu ai. Shingrai kunhting wa mung Yawsep htet da ai hte maren hkan galaw wu ai. Shanhte mung dai ga hpe na jang,

“Madu e, shing nga ai gaw hpa nga ai ga rai ta? Dai zawn re ai amu gaw na a mayam ni hte tsan nga u ga, yu u, shawng de na jan mahka hta rawng ai gumhpraw ni pyi, Hkanan mung kaw nna nang hpang de bai la sa ga ai. Dai she rai yang me, na a madu nta na ja gumhpraw hpa rai nna lagu na ga ta? Na a mayam ni hta kadai wa hta dai mu yang gaw, dai wa gaw si u ga, anhte mung shi madu a mayam tai na ga ai,” ngu nna bai htan mu ai. Dai wa mung, “Nanhte a ga hte maren rai u ga, raitim kadai wa hta mu yang dai wa gaw nye a mayam tai u ga, nanhte gale chyawm gaw lawt na myit dai,” ngu wu ai. Dai hpang shanhte gaw tinang a daw ni hpe alawan shayu nhtawm, tinang a buri jan hpe hpaw yu shajang ma ai. Dai kunhting wa mung kaba ai wa kaw nna kaji ai wa a buri jan du hkra tam nna Ben-yamin a jan hta dai gawm hpe mu wu ai.

Dai shaloi shanhte gaw tinang a lawze ni hta daw bai shagun nna mare de bai nhtang wa ma ai. Shan nau ni yawng hte gaw Yawsep a nta de bai du nna gum dagup ai hte nawku nga ma ai. Yawsep mung “Nanhte hpa galaw yu myit ta? Ngai zawn re ai masha gaw teng teng shaba chye wawt ai hpe nanhte n chye nga myit ni?” ngu nna shanhte hpe hkap tsun mu ai. Shaloi Yuda gaw, “Nang madu hpe kaning ngu htan lu na ga ta? Hpa chye tsun na ga ta? Mara kanang raw lu na ga ta? Karai Kasang gaw na mayam ni a mara hpe sagawn yu nna mu ya mani ai, yu u shi a lata hta gawm rawng nga ai hte anhte gaw na a mayam ni hkrai rai saga ai,” ngu wu ai. Yawsep chyawm gaw, “Dai hku di na gaw ngai hte tsan nga u ga, kadai wa a lata hta dai gawm rawng yang dai wa sha, nye a mayam tai u ga, nanhte chyawm gaw nanhte a kawa hpang de angwi apyaw sha bai lung wa masu,” ngu wu ai.

Dai majaw Yuda gaw, Yawsep hpang de sa nna, “Nye a madu e, na a mayam nye a madu a na hta ga hkaw mi tsun shangun e law, na a mayam hpe masin hkum pawt et, nang gaw Hpara-u zawn rai nga ndai, nang madu a mayam ni hpe kawa lu myit ni? kanau lu myit ni? nga nna san yang, anhte mung anhte kawa dingla lu ga ai, shi dingla sayang lu ai kasha kaji langai mi mung nga ai, shi kahpu chyawm gaw si mat salu ai, shi a kanau hta na shi hkrai sha ngam mat sai rai nna, shi a kawa shi hpe tsawra wu ai, ngu nna nang madu hpe tsun dan ga ai. Shaloi nang mung, dai wa hpe ngai

mu lu hkra dai wa hpe shaga sa myit, nga nna na a mayam ni hpe tsun yang, anhte gaw dai ma hpe kawa hte n jahka lu ai, kawa hte hka jang gaw kawa si mat na re ai, ngu nna nang madu hpe tsun ga timung, nang mahtang nanhte a kanau n lawm yang gaw nanhte nye a myi man hpang de n mu lu na myit dai, nga nna na a mayam ni hpe tsun dat ndai; shingrai anhte gaw na a mayam wa, nye a wa hpang de du wa yang nang madu a ga hte maren, tsun dan ga ai. Anhte a wa mung bai sa nna anhte a matu lusha loi mi sa mari la masu, bai ngu mi ai. Shaloi anhte gaw, n yu sa lu na ga ai, anhte a kanau wa lawm yang gaw sa lu na ga ai, anhte a kanau n lawm yang gaw dai wa a myi man n mu ya lu na ga ai, ngu nna tsun we ai. Dai rai nna na a mayam nye wa tsun ai gaw, nye a madu jan ngai hpe shadang sha lahkawng shangai ya ai gaw, nanhte chye nga myit dai, langai mi gaw ngai kaw na pru mat wa sai; shi hpe kaja wa kahtum kadaw di nna kawa sha kau nu hka, ngu nna ngai ya du hkra shi hpe n mu lu sai. Ya ndai wa hpe mung ngai kaw na woi mat wa nna shi hta n hpru n mai ai lam lama ma hkrum yang gaw nye a kara hpraw hpe yawn hkyen ai hte katsan ga de yu wa shangun ai sha rai na myit dai ngu mi ai. Dai rai nna na a mayam nye a wa kaw ngai du wa ai shaloi, dai ma anhte hta nlawm yang gaw, kawa a myit masin dai ma hta manoi nga lu ai majaw, dai ma n lawm ai shi mu jang shi si mat na ra ai. Dai rai nna na a mayam ni gaw, na a mayam anhte a kawa a kara hpraw hpe yawn hkyen ai hte katsan ga de shayu kau ai sha rai na ga ai. Dai hta n ga, dai ma hpe nang hpang de bai n woi wa yang gaw na a man e prat dingsa mara lu ni ga, ngu nna wa kaw na ngai pahkam tai ni ai, dai re ai majaw, ngai mahtang ma a malai hti nga nna nang madu kaw yam nga n ga, ma hpe chyawm gaw kahpu ni hte rau wa shangun ya e, nye a wa hta byin na ra ai aru ara hpe ngai mu lu hkra dai ma ngai kaw n lawm yang gaw nye wa hpang de ngai kaning rai nna bai lung wa lu na rai nga a ta?” ngu nna tsun wu ai.

Dai shaloi Yawsep gaw, shi kaw nga ai ni a man e myit n shaja lu ai majaw, “Masha mahkra ngai kaw na pru mat mu,” ngu nna jahtau wu ai. Yawsep gaw shi a kahpu kanau ni hpe shi kadai re ai lam shapraw dan ai shaloi, masha kadai mung n nga ma ai. Shaloi Yawsep jahtau hkrap nna Egutu masha ni mung Hpara-u a

nta na ni mung na shajang ma ai. Yawsep gaw shi a kahpu kanau ni hpe, “Ngai gaw Yawsep rai nga nngai, nye a wa gaw naw hkprung nga a ni?” ngu nna san mu ai. Kahpu kanu ni chyawm gaw, shi a man e hkrit ai hte mau mat ma ai majaw, ga n htan lu ma ai. Bai, Yawsep gaw “Ngai hpang de sit sa wa marit,” ngu nna kahpu kanau ni hpe tsun wu yang shanhte mung shi makau de sit wa ma ai. Shaloi shi gaw, “Ngai gaw nanhte Egutu mung de dut kau dat ai nanhte a kanau Yawsep rai nga nngai, rai timung nanhte ngai hpe ndai de dut kau dat myit dai majaw, myit hkum ru myit, tinang hkum hpe mung hkum pawt myit, kaning rai n me law, masha asak bau mu ga nga Karai Kasang gaw nanhte a shawng e ngai hpe shangun dat ni ai. Ndai mung e hku hku ai lahkawng ning rai sai. Yi hkauna n galaw lu na hte mam n dan lu na manga ning naw ra nga ai. Ga ntsa e nanhte hpe ngam nga shangun na mung, hkye la lam kaba hte nanhte hpe jahkrung da na matu mung, nanhte a shawng e Karai Kasang ngai hpe shangun dat ni ai. Dai rai nna nanhte ngai hpe ndai de shangun dat myit dai nrail. Karai Kasang e shangun dat ai rai nga ai. Ya ngai hpe Hpara-u a kawa tai na matu mung, shi a nta up na matu, Egutu mung ting a madu tai na matu mung san da ni ai. Ya alawan rawt nna wa hpang de wa masu, wa hpe mung, na nsha Yawsep ning nga dat ai; Karai Kasang gaw ngai hpe Egutu mung ting a madu shatai ni ai; ngai hpang de yu sa rit, hkum hkring nga nit, nang wa gaw Goshen mung hta e, sa nga lu na rai nga ai; nang wa hte na nshu nsha ni mung, na a sagu bainam yam nga hpung ni mahkra hte hte nang lu malu yawng ngai hte ani sha nga lu na rai nga ai. Dai yang e ngai nanhte hpe bau na made ai. Shing nrail yang hku hku na manga ning naw ra nga ai majaw, nang wa hte na a dum nta masha ni mahkra matsan tsinyam let na myit dai,” ngu mu ai. “Yu mu, ngai hkum nan nye a ngup hte nan shaga lu ai gaw nanhte a myi mung ngai nau Ben-yamin a myi mung mu da chyalu rai manit dai, Egutu mung e ngai lu ai arawng sadang hte nanhte mu mamu nanhte tsun dan na rai myit dai; a lawan wan rai nna wa hte ndai ga de yu hkrat wa marit,” ngu nhtawm kanau Ben-yamin a du ahpum nna hkrap nga ai. Ben-yamin mung shi a du hta noi nna hkrap nga ai. Dai hpang shi a kahpu kanau ni gaw shi hte shaga nga ai.

Shaloi Yawsep a kahpu kanau ni du mara ai nga ai shi gaw Hpara-u a nta na ni na ma ai rai nna dai hpe Hpara-u hte shi a agyi salang ni na sharawng ma ai. Dai rai nna Hpara-u gaw, Yawsep hpe shaga la nhtawm, “Na a nhpu n nau ni hpe ning ngu nna lam madun u, nanhte a Yam nga daw ni shagun nna Hkanan mung de bai wa nhtawm, nanhte a kawa hte nanhte a nta masha ni yawng hpe woi nna ngai hpang de yu wa marit, Egutu mung a nga mu nga mai ai ngai nanhte hpe jaw made ai rai nna, dai mung a ga sau nanhte sha lu na marin dai, ya ngai nang hpe hkang da ai hte maren ning rai galaw mu, nanhte a num ni hte ma kaji ni a matu mung, Egutu mung na leng la wa nna nanhte a kawa hpe woi yu hkrat wa marit, nanhte a arung arai ni hpe hkum lahpawt kau myit, Egutu mung ting na, nga mu nga mai ai gaw, nanhte a sut rai nga ai,” ngu wu ai. Dai hte maren Israela masha ni galaw ma ai rai nna Yawsep gaw Hpara-u hkang da ai hte maren shanhte hpe leng mung, lam na jarik mung jaw dat mu ai. Kahpu kanau ni mahkra hpe mung hpun palawng galai jaw mu ai. Ben-yamin hpe chyawm gaw, gumhpraw lap masum tsa hte bu hpun palawng man manga naw kahtap jaw wu ai.

Yawsep a kahpu ni gaw Hkanan mung de du ai shaloi lam shagu kawa hpe tsun dan ngut jang, kanau Yawsep htet da ai hte maren galaw mu ai. Dai hpang shanhte gaw Egutu mung de yu wa ma ai rai nna, Goshen mung de du ma ai lam hpe shiga na lu wu yang Yawsep gaw alawan sha leng jawn nna sa du wu ai. Shingrai kawa a man de sa du yang kawa a du hta noi ahpum let, aja awa jahtau hkrap wu ai. Israela mung, “Ya ngai si wa ni ga law, na myi man hpe ngai mu lu sai; nang mung asak naw hkrung nga ndai,” ngu nna Yawsep hpe tsun wu ai. Yawsep hte shi a kahpu kanau ni nkau mi gaw, Hpara-u kaw shang let tsun mu yang, Hkawkam wa gaw, “Na a kawa hte na a kahpu kanau ni yawng hte hpe dai kaja grau ai Goshen mung hta tawn da u, dai ni hta na atsam rawng ai masha ni hpe mu hkrup yang gaw, na a sagu bainam rem na agyi san da u,” ngu nna Yawsep hpe hkang da wu ai hte maren, kawa hte kahpu kanau ni hpe nga shara lajang da ya ngut jang, Egutu mung na kaja grau ai shara hpe jaw da nhtawm, kawa hte kahpu kanau rai nga ai nta masha ni yawng hte hpe galaw jaw mu ai.

Dai ten hta lusha grai taw nga ai rai nna, Egutu mung hte Hkanan mung gaw, n gun grai yawm shajang nga ma ai. Mung masha ni mari ai mam manu ni rai nga ai Egutu mung hte Hkanan mung na gumhpraw ni yawng hpe shinggyin la nna, hkawhkam hkaw na sut dek hta mahkawng da wu ai. Egutu mung hte Hkanan mung ni hta gumhpraw ni ma mat ai shaloi Egutu masha ni gaw Yawsep hpang de sa nna, “Lusha a matu karum matsan dum marit, anhte gaw gumhpraw htum mat nna, madu a man e kaning rai nna si hkrum na ga ta?” ngu san ma yang, Yawsep gaw, “Nanhte gumhpraw htum mat manit yang gaw, du sat ni hpe ngai e jaw marit, dai yam nga ni a manu ngai nanhte hpe mam jaw na made ai,” ngu mu ai. Dai hte maren shanhte gaw sagu, bai nam, dumsu hte lawze ni hpe jaw mu ai rai nna, Yawsep mung shanhte hpe mam jaw shajang mu ai. Dai shaning hta mung masha yawng hte hpe jaw lu jaw sha shajang mu ai. Dai hpang lahkawng ning ngu na hta, “Anhte gumhpraw htum ai lam hpe anhte n ip tawn da ai hta n ga, yam nga ni hpe mung nang madu hpe jaw saga ai; anhte na a mayam ni gaw, anhte a hkum hte lamu ga hta jan nna, hpa mung nlu saga ai, nang madu a man e anhte kaning rai nna si ai hkrum na rai nga ga ta? mam ni jaw nna anhte a mayam ni hte lamu ga ni hpe mari la u, anhte gaw lamu ga hte rau Hpara-u a mayam ni tai na saga ai, anhte asak hkrung nga na matu, mungdan gaw n katsi mat na matu mung hkai li tum hte mam nli re ai ni hpe mung jaw marit,” ngu nna tsun mu yang, Yawsep gaw Egutu mung e nga ai lamu ga yawng hte hpe Hpara-u hkawhkam a matu, mari la wu ai. Egutu masha ni gaw, hku hku hpang gara ai majaw, kadai mung tinang lu ai ga dachyawlk ni hpe dut shajang ma ai rai nna lamu ga ni gaw, hkawhkam a sut rai tai mat malu ai. Egutu mung ting hta nga ai masha yawng hpe mung shara mi kaw nna shara mi de htawt shangun let, shinggyin kau mu ai. Yawsep mung, “Nanhte hte nanhte a lamu ga ni hpe dai ni ngai hkawhkam Hpara-u a matu mari la sai, mam nli hpe la nna hkauna ni galaw mu, mam ngai ai aten hta htam manga hta na htam mi gaw hkawhkam Hpara-u hpe sak jaw lu na rai myit dai; htam mali hpe gaw nanhte la nna yi hkauna ni hpe galaw let, nli shatai nna bai gat mu, nanhte a kashu kasha madu jan ni hpe mung bau jaw mu,” ngu nna mung masha ni

yawng hte hpe hkang da wu ai. Dai masha ni mung, “Madu gaw anhte a asak hpe hkye la ya nit dai, matsan dum ai hte yu karum marit,” ngu nna hpyi lajin mu ai.

Dai hpang shi sanit ning lai wa yang kawa Yaku ngu ai Israela gaw si wa sai rai nna kashu kasha ni gaw shi a moi mang hpe moi na nga shara rai nga ai Hkanan mung de la wa nna makoi mayang di mu ai.

Yawsep a kahpu ni gaw, kawa si mat sai lam hpe chye mu yang Yawsep gaw anhte hpe n dawng mayu yang n dawng na rai sai; anhte mung shawng de shi hpe zingri yu sai rai nna, anhte hpe mung teng teng bai zingri sharu na ra ai, nga nna myit ru ai hte shi hpang de kasa shangun dat mu ai. Kasa ni mung, “Madu a kahpu ni gaw, shawng de n kaja ai galaw yu sai rai nna shut kau ai mara hpe n matsing na matu, mara dat kau ya mi, ngu nna sa tsun tawngban na matu kawa rai n si yang anhte hpe htet da sai hte maren, ya mung anhte a mara hpe dat kau ya rit,” ngu nna hpyi tawngban wu ai. Dai zawn hpyi tawngban ai ga hpe Yawsep na wu yang myi prwi hkrat wu ai. Kahpu ni mung Yawsep a man de shang nna, nawku ai hte, “Anhte gaw na a mayam ni rai saga ai,” ngu nna tsun mu ai. Yawsep mung, “Nanhte myit hkum ru myit ngai gaw Karai Kasang a malai rai nga a ni? Nanhte gaw ngai hpe zingri na myit ai shaloi, Karai Kasang gaw masha a asak hpe shalawt na matu, chyeju galaw na myit wu ai. Dai re ai majaw myit hkum ru myit nanhte hte nanhte a madu jan ma kaji ni yawng hpe ngai yu lajang karum na,” ngu nna kahpu ni hpe shalan shabran ai hte tsaw ra ai myit madun wu ai.

Yawsep gaw asak latsa e shi ning du wu yang kahpu kanau ni hpe tsun wu ai gaw, “Ya ngai si wa na rai sai; Karai Kasang gaw, nanhte hpe kaja wa kawan katsan na ra ai rai nna, Abraham, Isak, Yaku hte hpe dagam da ai mung de bai woi wa na marin dai,” ngu wu ai. “Kaja wa nanhte hpe Karai Kasang kawan katsan yu sa na ra ai shaloi nye a nrut nra hpe nanhte n dai ga na la lung wa ya lu na rai myit dai,” ngu nna Israela masha ni yawng hpe mung dagam shangun wu ai. Shing rai Yawsep htet da ngut ai hte rau, si wa sai rai nna shi a moi mang hpe manam pyaw ai baw sau amyu myu hte chya shatsawm ngut jang Egutu mung e da-u hta

bang let tawn da mu ai. Dai hpang shaning latsa e manga shi ning daram lai wa yang Mawshe gaw mayam tai nga ai shi a amyu masha ni hpe Egutu mung kaw nna Yawsep a moi mang hpe la nna Shehkem mare de la wa nhtawm, makoi mayang manu ai rai.

Yawsep a ahtik labau lam ni hpe Ningpawt Ninghpang laika Dawkaba 37-50 laman hta hti yu lu ai rai.

## **MAWSHE A MAUMWI**

Yawsep si mat ai hpang shi a kahpu kanau ni hte dai prat na masha ni yawng si mat ai shaloi Yawsep hpe n chye ai hkawkam langai mi bai hkaw dung wu ai. Israela masha ni gaw, grai wa law htam mayat maya shajang ai hpe dai hkawkam wa mu wu yang, hkrit wu ai rai nna “Shanhte hpe hpaji hte galaw ga, shing nrai yang majan byin pru wa ai shaloi, anhte a hpyen maga de nga nga nna, anhte hpe gasat wa nna ndai mung kaw nna pru mat wa shajang na mara ai,” ngu nna hkang da wu ai.

Dai lam a majaw, Egutu hkawkam gaw, grau ruyak ai lam hku nna mare de ai lam, dum nta galaw ai lam ni hpe up hkang na matu, ningbaw ni hpe san da ma ai. Shingrai zingri ai hpe hkam ma ai rai timung grau nna law htam mayat maya wa shajang ma ai rai nna, Egutu masha ni gaw shanhte hpe grau yak ai bungli kaw nna, bungli lam amyu shagu hpe hkiba hkra galaw shangun shajang mu ai. Dai hta n ga, hkawkam wa mung bai hkang da wu ai gaw, “Nanhte ma shangai karum ai shaloi, Hebre masha ni hta rai yang lasha ni yawng hpe sat kau mu, numsha rai yang gaw jahkrung da mu,” ngu nna hkang da wu ai. Rai timung dai ma shangai karum ai ni gaw, Karai Kasang hpe hkrit hkungga shajang ma ai rai nna, hkawkam wa a hkang da ai ga hpe n madat ma ai.

Dai hta n ga hkawkam wa mung, “Israela masha ni hta shangai ai lasha ni yawng hte hpe hka de kabai bang kau mu,” ngu nna mung hkang da mu ai.

Dai prat hta numsha langai mi shadang sha shangai wu yang, dai shadang sha gaw ahpraw nsam grai tsawm wu ai rai nna, shata masum du hkra makoi da wu ai. Dai hpang shi a shadang sha hpe n shim da lu wa yang, guma sumpu langai mi la nna namsu hte hpun naw chya nhtawm, ma hpe dai hta bang nna hka makau na mai-aw tu ai shara e shawaw tawn wu ai. Kana mung shi hta kaning rai byin ai yu na nga tsan tsan e tsap nga ai.



Dai shaloi Hpara-u a shayi sha hka shin na nga hka de sa wa ai rai nna shi a shangun numsha ni hka kau e garet hkawm nga ma yang, dai mai-aw brap e sumpu hpe shi mu nna, dai hpe sa shaw la na shi a shangun num hpe shangun dat wu ai. Dai sumpu magap hpaw yu yang, dai ma hpe shi mu wu ai. Yu mu, dai ma mung hkrap nga ai; shaloi shi matsan dum nna, "Ndai ma gaw Hebre ma she rai nga ai," nga nna tsun ai. Dai ma a kana mung, "Na a matu dai ma hpe chyu shachyu ya na Hebre numsha langai mi gaw ngai wa saw ya de ga law," ngu nna Hpara-u a shayi sha hpe tsun wu ai. Hpara-u a shayi sha mung, "Wa saw ya e," ngu nna shangun dat wu yang dai numsha gaw, dai ma shangai ai kanu hpe wa shaga ya wu ai. Hpara-u a shayi sha gaw, "Ndai ma chyangai la wa nna chyu shachyu let shapan ya e, ngai nang hpe shabrai jaw na de ai," ngu nna shangun wu ai hte maren, dai numsha gaw dai ma hpe la wa nna chyu shachyu ai hte shapan ya wu ai.

Dai ma kaba wa jang, Hpara-u a shayi sha hpe sa sa ya wu ai rai nna, dai ma mung shi a kasha tai nga wu ai. Shi gaw dai ma hpe Mawshe ngu nna shamying wu ai. Dai gaw hka hta na ngai shi hpe shaw la we ai, nga ai rai nga ai.

Ya Mawshe kaba wa jang, shi a amyu masha ni kaw sa wa nhtawm, shanhte gun li ai lit hpe sa mada yu wu ai. Shaloi Egutu masha langai mi gaw, shi a amyu Hebre masha langai mi hpe adup ajin rai nga ai hpe mu wu ai. Dai rai nna grup yin mada yu yang kadai mung nnga ai majaw, Egutu masha wa hpe sat kau nhtawm, zaibru hta ahpre lup kau da wu ai. Dai hpang shani e shi bai pru hkawm wa yang, Hebre masha marai lahkawng shada da ga law nna gamu kri hkat nga ai hpe bai sa mu wu ai. Dai rai nna shi gaw dai dang ai wa mahtang hpe, “Hpa rai na a manang wa hpe kayat nta?” ngu wu ai. Shaloi dai wa gaw, “Anhte a ntsa e du hte tara agyi tai na nang hpe kadai san tawn da a ta? Dai Egutu masha hpe nang sat kau ai zawn, ngai hpe mung sat kau na maw nga nni?” ngu nna htan wu ai. Dai majaw Mawshe gaw kaja wa ndai amu brawng sam sai nga nna hkrit nga ai. Dai hpang Hpara-u gaw dai lam na jang Mawshe hpe sat kau na tam nga ai. Mawshe chyawm gaw Hpara-u kaw nna hprawng mat wa nna, Midian mung e sa nga nga ai. Dai de du yang hka htung langai mi a makau e dung let sa nga ai. Ya Midian hkinjawng gaw shayi sha marai sanit lu da wu ai. Shanhte gaw hka sa ja nna kawa a sagu bainam hpung ni hpe ntsin shayaw na nga, ntsin htung ni hta hka ja jahpring nga ma ai. Mawshe chyawm gaw rawt nna dai numsha ni hpe karum let, shanhte a sagu bainam hpung ni hpe ntsin shayaw ya mu ai. Bai shanhte gaw kawa Reuela hpang de du wa yang shi gaw, “Dai ni gaw hpa rai ndai hte wa lawan wa lu myit ta?” ngu nna hkap san wu ai. Shanhte gaw “Egutu masha langai mi anhte hpe hka ja karum ai hte sagu bainam hpung ni hpe ntsin shayaw ya mi ai,” ngu nna tsun dan mu ai. Kawa gaw “Rai taw, shi kanang rai nga a ta? shi hpe hpa rai kau da myit ta? shi shat sha ru ga, sa shaga la masu,” ngu nna shi a shayi sha ni hpe tsun mu ai.

Mawshe mung dai wa kaw wa nga ai rai nna, shi a shayi sha Tsihpura hte hkungran ya wu ai.

Ya nhtoi tsawmra na wa sa yang she, Egutu hkawhkam si mat wa wu ai. Dai shaloi Israela kashu kasha ni mung, dai mayam lit a majaw, madai nna hkrap sharung nga ma yang, shanhte a hkrap sharung ai ga gaw, dai mayam lit kaw nna Karai Kasang hpang de hkrang lung wa malu ai. Shanhte a madai sharung ai nsen

hpe Karai Kasang na ya wu ai rai nna, Abraham, Isak, Yaku hte hte tawn da ai ga shaka hpe dum wu ai.

Ya Mawshe gaw, shi a katsa Yehtru ngu ai Midian hkinjawng a sagu bainam hpung rem nna nga nga ai. Dai hpung ni hpe nam jahtum de shi gawt sa wa wu ai rai nna Horeb ngu ai Karai Kasang a bum de sa du wu ai. Shaloi Karai Kasang a lamu kasa gaw, sumwum hta wan grung ai hte shi kaw dan pru wu ai. Dai hpe shi yu yu u yang, yu u, wan grung nga timung sumwum gaw n hkru mat nga ai. Dai rai nna Mawshe gaw sumwum hpa rai n hkru mat ai kun? Mauhpa lam kaba wora hpe ngai sa yu se ga, nga ai. Shi sit sa wa ai hpe Yehowa mu wu yang Karai Kasang gaw, “Mawshe e, Mawshe e,” nga nna dai sumwum kata na shi hpe shaga pru ai; shi gaw “Nang rai nga nngai,” ngu nna htan wu ai. Shaloi Karai Kasasng gaw “Nang de hkum sit nit na a hkyepdin raw kau u, dai nang kabye ai ga gaw chyoipra ai shara rai nga ai,” nga nna mung “Ngai gaw, nwa a Karai Kasang, Abraham a Karai Kasang, Isak a Karai Kasang, Yaku a Karai Kasang rai nga nngai,” ngu nna mung tsun wu ai. Dai rai nna Mawshe gaw Karai Kasang hpe yu na hkrit wu ai majaw, shi a myi man magap da wu ai. Bai Yehowa gaw, “Egutu mung e nye a amyu hkrum ai ru tsang lam hpe ngai azin ayang mu se ai rai nna, shanhte a hpareng ni a majaw, hkrap sharung ai nsen hpe ngai na ya mase ai. Shanhte hkrum ai n ni n kri hpe ngai chye nga nngai. Shanhte hpe Egutu masha ni a lata na, hkye hkrang la na hte dai mung kaw na Hkanan, Hiti, Amori, Hperizi, Hiwi hte Yebusi masha ni nga ai ja kat ai hte kaba nga ai, nga chyu hte lagat jahku lwi ai mung ga de woi wa na ngai yu sa ring ngai. Ya yu u, Israela a kashu kasha ni a hkrap sharung ai nsen gaw, ngai kaw du ra ai. Egutu masha ni shanhte hpe zingri zingrat ai mayam amu hpe mung ngai mu se ai. Dai majaw, ya sa wa su, nye a amyu Israela kashu kasha ni hpe Egutu mung na sa shapraw la lu na, ngai nang hpe Hpara-u hpang de shangun dat de ga,” ngu nna tsun wu ai. Shaloi Mawshe gaw, Karai Kasang hpe “Ngai gaw Hpara-u hpang de sa na mung, Israela kashu kasha ni hpe Egutu mung na shaw la lu na mung, ngai hpa hkaw ai wa rai nga a ta?” ngu wu ai. Bai Karai Kasang gaw, “Ngai nang hte rau teng teng nga na nngai, nang hpe shangun


dat ai kumla gaw, dai amyu hpe Egutu mung na nang shapraw la nhtawm, ndai bum hta e nanhte a Karai Kasang hpe nawng jau lu na rai myit dai,” ngu wu ai.

Rai timung Mawshe gaw, “Yu u, shanhte gaw Yehowa nang kaw dan pru ai n rai, nga nna ngai hpe mung n kam, nye a ga mung madat na ma ai n rai,” ngu tsun wu ai. Dai majaw Yehowa gaw, “Dai nang lang ai hpa rai lit ta?” ngu wu yang, shi gaw, “Dawhkrawng rai li ai,” ngu wu ai. Bai, Yehowa gaw, “Ga de kabai kau u” ngu wu ai. Shi mung kabai dat ai rai nna, dai gaw lapu tai wa wu ai. Bai, Yehowa gaw, “Na a lata ladawn nna shi a nmai sa jum u,” ngu nna Mawshe hpe tsun wu yang shi lata ladawn nna dai hpe sa jum wu ai shaloi dai gaw shi a lata hta dawhkrawng bai tai lu ai.

Dai hta kaga Yehowa gaw, “Na a lata hpe sinda hta shawn bang u,” ngu nna shi hpe tsun wu ai. Shi mung sinda de lata shawn bang nna bai shaw la wu yang, yu u shi a lata gaw hkyen zawn hpraw nna mang gang gang nga lu ai. Bai Yehowa gaw, “Na a lata sinda hta bai shawn bang u,” ngu wu ai hte maren, sinda hta lata bai shawn bang wu yang, yu u shawoi na ta bai rai mat lu ai. “Shaloi rai timung shanhte nang hpe n kam ai hte shawng na lamik kumla hpe n sawn ya yang gaw, hpang na lamik kumla hta kam na ma ai.” Bai Mawshe gaw, “Madu e ngai gaw n-gup namsup n rawng ai wa rai nga nngai, shawng de nna mung n rawng nngai, na mayam hpe nang tsun jang nna pyi nrawng li ai; ngai gaw n gup li ai hte shinglet li ai wa rai nga nngai,” ngu nna Yehowa hpe tsun wu ai. Dai majaw Yehowa gaw, “Masha a n-gup kadai shatut ya ai rai ta? Ma-a ai hte na lahpang ai, myi mu ai wa hte myi kyaw ai wa hpe kadai hpan da a ta? Ngai Yehowa hpan da ai nrail ni? Dai rai nna ya sa su, na a n gup hta ngai nga nna, nang kaning ngu tsun na gaw ngai sharin ya na de ai,” ngu wu ai. Mawshe gaw, “Madu e, nang shangun mayu ai wa hpe me shangun dat u,” ngu wu ai. Shaloi Yehowa gaw Mawshe hpe masin pawt nna “Lewi masha Arun gaw na a nhpu rai nga ai nrail ni? Shi a tsawm sha chye tsun ai ngai chye nga nngai; shi mung nang hpe wa tau la na pru sa wa ra ai; shi nang hpe hkrum jang myit kabu na ra ai; nang shi hte shaga nna ndai ga ni shi a n-gup hta hti bang ya na rai ndai;

shingrai ngai gaw, na a n-gup hta mung, shi a n-gup hta mung nga nna, nan kaning ngu tsun na gaw, sharin ya na made ai. Shi gaw, amyu masha ni a man e na a ga htawn tai nna, na a n-gup a malai tai nga na ra ai; nang mung shi a matu Karai Kasang zawn tai na ra ai.” Dai shaloi Yehowa gaw “Nam de Mawshe hpe sa tau la na sa wa su,” ngu nna Arun hpe tsun wu ai.

Dai majaw shi sa wa yang, Karai Kasang a bum e Mawshe hpe hkrum nna shi hpe pup wu ai. Shaloi Mawshe gaw Yehowa shi hpe shangun dat ai ga nlang hte hte shi hpe hkang da ai lamik kumla yawng Arun hpe tsun dan wu ai.



Mawshe yan Arun sa nna, Israela amyu masha ni a agyi salang yawng hpe jahpawng la nhtawm, Yehowa Mawshe hpe tsun dat ai ga yawng Arun htawn tsun nna, amyu sha ni a man e dai lamik kumla madun dan mu ai. Amyu masha ni mung kam sham nga ma ai. Mawshe yan Arun mung Hpara-u hkawkam hpang de shang nna, “Israela masha ni yawng a Yehowa Karai Kasang gaw, nye a masha ni yawng hpe nye a matu poi sa galaw lu mu ga,

shanhte hpe dat dat mu, nga ai,” ngu nna sa tsun mu ai. Hpara-u chyawm gaw “Yehowa a ga madat nna Israela amyu masha ni hpe ngai dat kau na gaw, dai Yehowa kadai rai ta? Yehowa hpe ngai n chye nngai; Israela amyu masha ni hpe mung ngai n dat dat na nngai,” ngu wu ai. Dai hpang munggyi wa gaw, up hkang na agyi ni hpe san da nna, “Ndai masha ni gaw grai lagawn ma ai; bungli hpe aja awa galaw shangun nna n hkru ai masha ni a ga hpe n mai madat shangun ai,” ngu nna bai hkang da mu ai.

Dai hpang Mawshe yan Arun gaw, Hpara-u hkawkam hpang de shang nna Arun gaw, Hkawkam wa a man e dawhkrawng hpe kabai tawn dat wu yang lapu majing tai wu ai. Dai shaloi hkawkam wa gaw, hpaji rawng ai ni hpe shaga la nna Egutu mung na lakle sara ni hpe mung dai hte maren galaw na shangun wu ai. Arun a dawhkrawng gaw kaga dawhkrawng ni hpe mayu kau wu ai. Hpara-u hkawkam wa mung shanhte a ga ni hpe n madat ai sha nga nga ai. Jahpawt manap aten e hkawkam wa gaw hka kau de sa hkawm ai shaloi, Mawshe gaw hka kau e tsap let shaga wu ai gaw, Karai Kasang gaw nye a masha ni gaw ngai hpe nam de sa nawku lu na lam, ahkang jaw na lam hkawkam wa hpe tsun wu ai. Rai timung hkawkam wa gaw, hpa ga mung n madat ya ai majaw, Arun gaw hkawkam wa a man e hka hpe kayat dat yang dai hka gaw sai majing tai mat wu ai. Dai hka hta rawng ai nga ni mung yawng si mat shajang ma ai rai nna hka ni yawng yat manam mat malu ai majaw, Egutu mung ting hka n lu lu mat shajang malu ai. Hkawkam wa mung hkaw de bai nhtang wa nna hpa lam mung n myit yu ai sha nga mat wu ai.

Shingrai Hpara-u hkawkam wa hpe hpyi shawn ai rai timung, Israela masha ni hpe n dat wu ai rai nna, Arun gaw hka ni a ntsa e lata ladawn wu yang hka kaw nna shu ni gaw nta ni a ntsa e mung, nta nhku hkan e mung, yup gawk ni hta mung, shat gawk ni hta mung, muk gumdin ai ban ni a ntsa e mung, lung wa shajang ai hpe Hpara-u hkawkam wa mu wu yang, Israela masha ni hpe dat dat sana, ngu nna yin la wu ai. Rai timung kade nna yang myit bai ja wa nna, n dat dat ai sha bai nga mat wu ai.

Dai hpang Arun gaw, shi a dawhkrawng hte ga nhpu hpe bai kayat dat wu yang, ga nhpu ni gaw dusat dumyeng hta mung,

masha hta mung machyi mayan tai wa shajang malu ai. Karai Kasang gaw ndai mauhpa lamik kumla madun ai rai timung Hpara-u hkawkam wa gaw myit ja ai wa rai nna, Israela masha ni hpe n dat dat ai sha nga nga ai. Dai majaw Karai Kasang gaw, machyi mayan hpyen, jinghkam hpyen, pa e nga ai yam nga ni hta yak la ai urum zin li, bum lapau wa ai ana zinli hpyen, na chying kaba ai sin marang, Egutu lamu ga jarit grup hkra ka up kau ai n-gam yaw hpyen, nsin sin wa ai hpyen re ai ni hpe shabyin dat ngut jang hpang jahtum e Mawshe gaw Hpara-u kaw shang nna Karai Kasang gaw ning nga nna hkang da sai; “Ngai gaw Egutu mung ting a ka-ang hku ga lai mat wa ni nngai, dai shaloi hkawkam hkaw e dung nga ai Hpara-u hkawkam wa a kasha alat kaw nna mayam jan a kasha alat kaw du hkra, yam nga ni a kasha alat kaw du hkra si na marin dai; nga nna hkang da ai,” ngu wu ai. Rai timung Hpara-u hkawkam wa gaw, dai ga ni hpe n madat ai sha, hpa n nawn ya wu ai. Dai shaloi Karai Kasang gaw, Mawshe yan Arun hpe “Nan gaw Israela amyu masha yawng hte hpe ning ngu nna hkang da na rai myit dai; ndai shata shi ya shani e shanhte mahkra gaw, htinggaw langai hte langai, tinang htinggaw hkan nna htinggaw mi hta sagu kasha langai ngai la san da na rai ma ai. Htinggaw kaji nna, sagu kasha langai mi n dang yang gaw, masha sawn yu nna shi a nta hte grau ni ai htingbu hte kahkyin nhtawm, sagu kasha langai mi la da na rai ma ai. Sagu kasha rai timung, bainam kasha rai timung nanhte la na mahtang gaw, nhten ai hte ladu hkrum ai ala kasha rai na rai malit dai: dai shata shi mali ya du hkra, nanhte dai hpe rim tawn da na rai myit dai; shaloi Israela shawa hpung nlang hte, dai shana de dai hpe sat na rai myit dai. Dai sagu kasha sat sha ai nta shagu gaw de a sai la nna, dai nta a chyinghka hkadun daw lakhawng hte hkanoi hta chya da na rai mu ai. Dai shana e dai shan hpe wan hta kakang nhtawm, matsi n rawng ai muk hte sha na rai mu ai: hka ai shatmai lap hte mung sha na rai mu ai. Shan katsing hpe rai timung, shadu shapyaw ai mung hkum sha mu ga; abaw, lagaw, apu asin ni mung wan hta kakang nna she sha mu. Shan dai hpe jahpawt du hkra hkum ngam da mu; jahpawt du hkra ngam na hpe gaw, wan hta ju kau na rai mu ai. Dai hpe nanhte ning rai sha na rai myit dai; n shang e shingkyit

kyit, lagaw hta kyepdin din, dawhkrang lang rai nna, alawan wan sha na rai myit dai: dai gaw Yehowa a shalai dat ai poi rai nga ai. Kanning rai nme law, dai shana e Egutu mung hta ngai dinghkren mat wa nna, masha kaw nna yam nga du hkra, Egutu mung a kasha alat nlang hte hpe sat kau na mawe ai; dai sai hpe ngai mu ai shaloi lai kau da nna, Egutu mung hpe gaw ngai tsin-yam kaba jahkrum na nngai,” ngu nna hkang da wu ai. Shing rai shana yuptung hpawa aten hta Hpara-u hkawkam wa a kasha alat kaw nna htawng e rawng nga ai kasha alat kaw du hkra mung, Egutu mung ting hta nga nga ai kasha alat yawng hte hpe mung, yam nga ni a kasha alat yawng hte hpe mung Karai Kasang tsin-yam jahkrum wu ai.

Dai shana e Hpara-u hte shi a agyi salang ni nlang hte mung, Egutu masha ni nlang hte mung, rawt nna, si mang n taw ai nta langai mi mung n nga sai majaw, Egutu mung e sharung shayawt kaba rai nga ai. Dai shana jang Hpara-u hkawkam wa gaw, Mawshe yan Arun hpe shaga la nna, “Nan hte rau Israela amyu masha yawng hte gaw nye a amyu masha ni kaw na pru mat wa mu, nan tsun ai hte maren sagu re ai dusat ni hpe la nna nanhte a Karai Kasang hpe sa nawng jau mu,” ngu nna hkang da wu ai. Dai shaloi Egutu masha ni gaw, Israela masha ni hpe ja, gumhpraw hte hpun palawng ni hpe jaw shajang mu ai. Shingrai numsha ni hpe nhti ai sha lasha ni hkrai yawng hpawn sen kru daram law ai masha ni gaw Ramase mare kaw nna pru nhtawm Suhkut mare de sa wa shajang mu ai.

Dai masha ni shani shana sa lu na matu, Karai Kasang gaw shani e lam madun na matu sumwi shadaw hte shana e htoi ya na matu wan shadaw hte shanhte a shawng e sa wa mu ai.

Ya Israela masha ni hprawng mat wa shajang masai lam hpe Hpara-u hkawkam wa hpe sa tsun shana dan mu yang, Hkawkam wa gaw san tawn da ai hpyen leng kru tsa, gumra jawn ai hpyen hpung ni hte lagaw hpyen hpung ni hpe shinggyin la nna hkan shachyut mu yang nawng makau e dap jung nna hkring nga ai Israela masha ni hpe hkan dep mu ai. Israela masha ni gaw kayin yu dat mu yang Egutu hpyen daw wa hkan du nang wa ai hpe mu ma yang nachying hkrit gari shajang ma ai. Dai shaloi “Egutu

mung e lupwa n nga ai majaw, ndai nam mali kata e si na matu woi wa myit ni? anhte ndai nam mali kata e si na hta Egutu masha ni a lata hta mayam tai nna nga nga yang grau kaja ai n rai ni?” ngu nna Mawshe hpe aput mu ai. Shaloi Mawshe gaw, “Nanhte hkum hkrit myit, a sim sha nga nga mu, Karai Kasasng gaw dai ni anhte hpe hkye la na lamik kumla hpe yu yu ga, nanhte gaw dai ni nanhte mu lu ai Egutu masha ni hpe hpang de lang mi bai mu lu na n rai,” ngu nna tsun wu ai.



Yehowa Karai Kasang mung “Israela amyu masha ni gaw matut lung wa na lam htet da u, nang gaw dawkrawng hpe la nna, nawng ntsa de na lata ladawn nna hka hpe karan u,” ngu nna hkang da wu ai hte maren, Mawshe mung nawng ntsa de shi lata hpe ladawn wu ai. Karai Kasang gaw shana tup ja la ai sinpraw nbung hpe ahpawt shangun nna hka hpe garan let ga hpe shadawng ya mu ai. Israela masha ni yawng hte mung nawng kata na hkarang ntsa hku hkawm lai wa shajang mu ai. Hka ni mung shanhte a pai de, hkra de rawt tsaw wa ai hte nlung shakum zawn, rai mat malu ai. Egutu hkawhkam wa hte hpyen luksuk ni yawng hte gaw dai

nawng kata hku nna hkan lai nang wa ma yang, jahpawt manap aten hta Karai Kasang gaw, hpyen leng ni yawng hte hpe a grawp kau ya mu ai. Jahpawt du yang Mawshe gaw nawng ntsa de lata bai ladawn dat wu yang, nawng gaw shada da matut mat wa nna Egutu hkawkam wa hte hpawn hpyen luksuk mang galang ni yawng hte hpe langai pyi n ngam hkra hka leng ni ka-up kau mu ai rai nna si mat shajang mu ai.

Israela kashu kasha ni yawng hte gaw, tsawmra tsan hkra sa mat wa ai hpang bai zuphpawng ma yang, “Anhte Israela masha ni hpe hku hku hpang gara ai hte sat kau na matu, ndai nam mali kata de woi wa myit hka;” ngu nna Mawshe yan Arun hpe aput angun ai hte bai tsun ma yang, Karai Kasang gaw, “Nanhte gaw shana aten hta shan sha lu nna, jahpawt manap aten hta muk ni hpe sha lu na marin dai, ngu nna shawa masha ni hpe tsun u,” ngu nna Mawshe hpe hkang da wu ai hte maren, Mawshe mung dai hte maren htawn tsun wu ai. Shana de aten hta u preng ni gaw shanhte nga ai dap de mana maka yan lung wa shajang ma ai. Jahpawt manap aten hta bai du yang tsingdu ni a ntsa hkan e hkyen zawn hpraw ai hte din din re ai gumdin kasha ni bai jawng taw nga ai hpe bai mu ma ai. Dai hpe mu ma yang, “Ndai gaw hpa rai ta?” ngu nna san shajang ma ai. Mawshe gaw, “Ndai gaw anhte sha na matu Karai Kasang jaw ai muk rai nga ai,” ngu nna tsun dan mu ai. Dai hpang langai hte langai tinang nang a dap hta nga ai masha ni sha law na daram shadawn nna marai langai mi a matu uma langai hpра magawn la shajang ma ai. Uma hte hteng la ai shaloi gaw loi mi law la ai wa mung njan, loi mi shayawm la ai wa mung nra, tinang sha law na daram shadawn shadang hte magawn la shajang ma ai. Dai hpang laban nhtoi du yang ga hta n taw mat malu ai rai nna, laban nhtoi rai n du yang shawng shani hta htam lahkawng magawn tawn da shajang ma ai rai nna nhtoi law law wa dai Manna muk hpe sha nna nga shajang ma ai.



Israela masha ni gaw, Rehpidim shara hta dap jung nna nga nga ma yang, dai shara hta hka nnga malu ai rai nna, shanhte yawng hka hpang kara shajang ma ai shaloi, “Anhte hka hpang kara nna si mat shajang na matu Egutu mung kaw nna woi wa mi hka,” ngu nna Mawshe hpe bai aput angun shajang mu ai, Shaloi Mawshe gaw Karai Kasang hpe aja awa jahtau let, “Karai Kasang Wa e, ndai masha ni hpe ngai na a mayam gaw kaning di na i? ngai hpe mara tam let nlung hte kabai sat kau na mara ai,” ngu nna hpyi tawng ban wu yang, Karai Kasang gaw, “Mawshe e, nang gaw Horeb shara de sa wa su, dai shara e nga ai nlung ntsa e ngai tsap nga na nngai; nang gaw dai nlung hpe na a dawhkrawng hte kayat na rai ndai,” ngu nna hkang da wu ai. Shingrai Mawshe mung Karai Kasang hkang da ai hte maren, sa nna kayat wu yang, hka mana maka lwi pru wa wu ai rai nna hka hkru hkra lu lu shajang ma ai.

Dai hpang Amalek masha ni gaw sa nna Israela masha ni hpe sa gasat mu yang, Mawshe mung shi a masha ni hpe lata la nna, “Amalek masha ni hpe gasat na matu pru sa marit, hpawt de manap e Karai Kasang jaw da ai dawhkrawng hpe lang nna ngai gaw kawng ntsa e tsap nga na nngai,” ngu nna Yawshu hpe tsun wu ai. Yawshu mung Mawshe lajang ai hte maren galaw nna Amalek masha ni hpe gasat mu yang, Mawshe, Arun hte Hura hte gaw bum ntsa de lung sa nna Mawshe a lata hpe sharawt ya mu yang, Israela masha ni awng dang wa malu ai. Mawshe a lata hpe bai jahkrat dat yang gaw Amalek masha ni bai dang wa malu ai. Shingrai Mawshe a lata tsu wa ai shaloi, Arun yan Hura gaw Mawshe a lata hpe madi shadaw ya mu ai.


Dai yan lahkawng gaw jan shang ai ten du hkra Mawshe a lata hpe madi shadaw ya let, nga nga ai laman hta Yawshu gaw, Amalek masha ni hpe nhtu hte aja awa gasat mu ai rai nna dang kau mu ai.

Egutu mung kaw nna pru wa ai hpang shata masum ngu na hta Sina bum de du shajang ma ai. Masum ya jahpawt du yang, dai bum ntsa de mu ngoi ai, myi hrap gala ai hte sumwi ni kayawp ka-up wa nna, pahtau zawn ngoi ai nsen ni ngoi pru wa ai majaw dap de nga ai masha ni gaw, grai hkrit kajawng shajang ma ai.

Dai hta n ga, Karai Kasang gaw, Sina bum kaw nna yu hkrat wa let, Mawshe hpe shaga la wu ai. Mawshe sa du wu yang Karai Kasang gaw tara kanu shi hpe jaw wu ai gaw, “ 1.Ngai gaw Egutu mung hta e mayam tai nga ai nta na nang hpe shapraw la ai, na a Karai Kasang Yehowa rai nga nngai. Ngai hta kaga Karai Kasang shaje hpe hkum naw, hkum ku et. 2.Lamu a lahta tang, lamu a npu ga ntsa tsang, ga a npu hka hpungtang hta rawng ai baw a hkrang hte bung ai sumla nang na a matu hkum galaw hkum shachyaw et; dai hpe hkum naw, hkum ku, hkum jaw, hkum jau et; 3.Na a Karai Kasang Yehowa a mying ning sang hpe kaman lila hkum gang hkum tsun et. 4.Laban nhtoi hpe shachyoi shapra na dai nhtoi hpe dum u. Sanit ya nhtoi gaw Karai Kasang a matu laban nhtoi rai nga ai. 5.Na nnu yan nwa hpe hkungga lara di u; 6.Masha hkum sat et; 7.Masha num hkum shaw et. 8.Masha a rai hkum lagu et; 9.Na a htingbu manang a lam n teng n man ai sakse hkum hkam

et. 10.Na a htingbu manang a nta hpe ra marit ai myit hkum rawng et.” ngu nna Karai Kasang gaw Mawshe hpe hkang da wu ai.

Kalang mi na Karai Kasang gaw, “Ngai nga ai bum ntsa de lung nna wa nga rit, masha yawng hpe sharin achyin ya lu na matu, lungpa ntsa e ka da ai tara kanu shi ngai nang hpe ap ya na de ai;” nga nna Mawshe hpe hkang da wu ai. Mawshe mung bum ntsa de lung wa wu ai. Dai bum ntsa e mung sumwi ka-up magap da nga ai hte Mawshe gaw dai sumwi kata de shang nna, nhtoi mali shi ya tup nga nga wu ai. Karai Kasang mung shi a layung hte ka ai sakse ga kap ai lungpa lakhawng Mawshe a lata hta ap ya dat wu ai.



Mawshe gaw Sina bum ntsa e na na wa nga mat sai lam hpe shawa masha ni chye ma yang shawa masha ni yawng hte gaw, Arun hpang de sa zuphpawng nna, “Rawt u, anhte a shawng de sa wa na hpara anhte a matu galaw ya rit, Egutu mung kaw nna anhte

hpe woi wa ai ndai Mawshe gaw hpa byin mat sai lam hpe anhte n chye ga ai,” ngu tsun nhtawm Israela masha yawng hte hta lang nga ai ja hte galaw ai na lakai ni hpe lahkawn shinggyin la nna Arun hpe sa ap ya mu ai. Shingrai dumsu kasha sumla jaw la mu ai. Mawshe mung bum ntsa de nna yu hkrat wa wu ai rai nna dap makau de du yang dumsu kasha sumla hpe mung, ka manau nga ai masha ni hpe mung wa mu wu yang, bum lagaw de du ai shaloi Mawshe masin ja ja pawt ai hte la hkrat wa ai lungpa yan hpe kabai agrawp kau wu ai. Dumsu kasha sumla hpe mung la nna wan hta ju kau nna, wan wu hpe hka tsing nna shawa masha ni yawng hpe dai hka lu shangun wu ai. Dai hpang Karai Kasang gaw, “Shawng na lungpa hte bung ai lungpa lahkawng galaw u, nang kabai ga kau ai lungpa hta ka da ai laika hte maren, bai ka da lu na rai ndai,” nga nna Mawshe hpe tsun wu ai.

Shingrai Karai Kasang hkang da ai hte maren Mawshe gaw lungpa lahkawng galaw la nna jahpawt jau jau Sina bum ntsa de bai lung sa wa wu ai. Dai shaloi Mawshe gaw shat lusha n sha ai sha nhtoi mali shi ya tup Karai Kasang hte rau nga nga wu ai. Lungpa hta tara kanu shi hpe bai ka la nna, bum lagaw de bai yu hkrat wa wu ai. Israela masha ni gaw Mawshe a myi man nsam htoi kabrim nga ai hpe hkap mu ma yang gadai mung Mawshe hpang de n htep wam mu ai. Shingrai Mawshe mung shi a man hpe magap kau nna Karai Kasang htet da ai lam ni yawng hpe shawa masha ni yawng hpe htawn shana ya mu ai.

Dai hpang Karai Kasang gaw, Mawshe hpe bai tsun wu ai gaw, “Nang gaw shawng na shata a shawng shani ngu ai langai ya hta shawa masha ni hpe jahpawng tawn da na matu, sum langai mi galaw na rai ndai, dai sum kata de hpun hte galaw ai sakse sumpu langai mi galaw bang da nna, dai hpe sumpan grang hte shinggang na rai ndai; dai shara hta laika ku ni hpe mung, kaga lajang ra ai rai ni hpe mung lajang nna bang da na rai ndai; wan kawk hpe mung galaw nna, shatu da na rai ndai; manam pyaw ai baw nat nawng na matu sakse sumpu a man de ja hte galaw ai tawn hkungri hpe mung nang galaw na rai ndai; shagu hkungga nawng na matu, tawn hkungri hpe mung shawa masha ni hpawng nga ai chyinghka lam a man e galaw da na rai ndai; sum a grup yin e mung sumpan grang

hte grang shing grup da nna chyinehka lam ni hpe mung sumpan grang hte grang da na rai ndai; Arun gaw nye a man e myihtoi bungli galaw na lam hpe mung, san seng ai nba hpun ni hpe bu hpun shangun nna namman chya nna san seng shangun na rai ndai,” ngu nna hkang da wu ai. Mawshe mung Karai Kasang htet da ai ga hte maren, galaw ngut jang sumwi gaw sum a grup yin e, ka-up wa nna Karai Kasang a hpung shing kang gaw, dai sum hpe magap ka-up da wu ai.

Israela masha ni gaw shanhte hkawm sa wa ai lam shagu hta sumwi gaw sum kaw nna htawt sit mat ai shaloi she, hkan hkawm sa wa wa rai ma ai. Sumwi sha n htawt wa dingsa gaw, shanhte a hkawm sa ai lam mung hkring nga nga rai ma ai. Israela masha yawng hpe Karai Kasang ga sadie tawn da ai Hkanan mung makau de du wa ma ai shaloi, Karai Kasang gaw Mawshe hpe bai hkang da wu ai gaw, “Ngai jaw ai Hkanan mung hpe sa yu na matu amyu langai mi hta na marai langai hpra salang ni hpe nang lata la nna san da na rai ndai,” ngu nna hkang da ai hte maren, Mawshe gaw lata la ai hte htawn tsun wu ai gaw, “Dai mungdan gaw kaning re ai mungdan re ai lam hpe mung, shanhte nga ai mare kahtawng ni gaw, kaning rai nga ai lam hpe mung, sum hta nga shajang ma ai kun? Shing nrai ngang kang ai mare hte dum nta ni hta nga shajang ma ai kun? Dai mungdan gaw ga sau kaja nga ai kun? Nkaja ai kun? Sa yu masu, nanhte sa du jang dai mung kaw na namsi namsaw nkau mi hpe mung la wa marit,” ngu nna htet dat wu ai.

Dai hpang nhtoi mali shi ya na jang, Hkanan mung hpe sa kawan yu ai bungli ngut nna bai nhtang wa ma yang, sa yu ai masha ni gaw, bai du wa nna, “Anhte gaw nang madu shangun dat ai hte maren sa yu na matu sa du saga ai. Gaja wa dai mung gaw nga chyu hte lagat jahku lwi ai mung dan rai nga ai. Namsi namsaw ni mung grai law nga ai. Dai hta n ga mung masha ni gaw grai law ma ai. Dai mung masha ni gaw, Anak a amyu aru arat ni rai nga ma ai rai nna, hkum hkrang grai galu kaba ai amyu ni rai nga ma ai. Dai masha ni a man e anhte ni gaw hkagrit hkadawn ni zawn she rai nga ai,” ngu nna wa tsun dan mu ai. Shawa masha ni dai ga na ma yang, Mawshe yan Arun hpe mara shagun let, shana tup hkrap ai hte aput angun mu ai. “Anhte gaw Egutu mung e si na

hta ndai nam mali e si mat yang gaw, grau nna kaja nga ai. Anhte hpe nhtu hte sat nna, anhte a kashu kasha ni hte num ma ni hpe hpyen ni a lata de du shangun na matu Karai Kasang gaw hpa majaw anhte hpe ndai nam mali de woi wa a ni? Marai langai ngai hpe lata la nna, Egutu mung de bai wa saga,” nga nna langai hte langai tsun shajang mu ai. Rai timung Hkanan mung hpe kin-yu sa yu hkawm ai Yawshu hte Hkaleb yan gaw, “Anhte sa yu ai mung gaw grai kaja dik ai mung rai nga ai. Karai Kasang hpe hkum gumlau myit, dai mung masha ni hpe hkum hkrit myit, shanhte hta shamyet shanat na lam hpa mung n nga ai, Karai Kasang gaw anhte hpang maga de nga nga ai” ngu nna tsun mu yang, shawa masha ni gaw Yawshu hte Hkaleb hpe nlung hte kabai sat kau na bawng shajang ma ai.

Bai, lang mi Karai Kasang gaw Mawshe hpe hkang da wu ai gaw, “Nanhte yawng ngai hpe chye na matu, nanhte tsun shaga nga ai ga hte maren, ngai nanhte hpe galaw na mawe ai. Asak hkun ning lai nna, ngai hpe mara shagun nna aput angun ai masha yawng ndai nam mali e si shajang na mara ai; dai mung de Yawshu hte Hkaleb hta kaga kadai mung du lu na myit dai nrai, hpyen ni e kashun la ai sha hkrum na myit dai; nanhte tsun ai ma kaji ni yawng hpe gaw, ngai woi jashawn nna nanhte lata kau ai mung hpe chye shangun na we ai. Dai hta n ga, dai mung hpe kin-yu sa yu ai nhtoi mali shi ya hte maren, lani mi hpe laning mi shatai nna shaning mali shi ning tup, tinang a mara hpe tinang gun nna nga lu shajang na rai myit dai,” ngu nna Karai Kasang tsun mu ai.

Mawshe gaw Karai Kasang hkang da ai hte maren, Israela masha ni yawng hpe dai mungga hpe htawn tsun shana ya mu yang, dai shawa masha ni gaw grai aput angun shajang ma ai.

Lani mi hta Kora, Dahtan, Abira ndai masha marai masum gaw, dan hkung nna hpung shingkang rawng ai hte atsam rawng ai masha marai lahkawng tsa e manga shi hte rau Mawshe hpe rawt gumlau mu ai. Shanhte gaw Mawshe yan Arun hpe gumlau ai maga de zup hpawng nna, “Nan gaw Karai Kasang a amu hpe gun myit dai rai nna, shawa masha ni yawng hte mung san seng shajang nga ma ai. Karai Kasang mung shanhte hta nga nga ma ai. Dai re ai mi, nan gaw hpa majaw Karai Kasang a masha ni a ntsa e

hpa rai tinang hkum shagrau la nga myit ta?" ngu nna tsun mu ai. Mawshe mung "Kadai gaw Karai Kasang a masha re ai mung, kadai wa gaw san seng nga ai lam hpe mung, hpawt de manap e Madu gaw, madun dan na ra ai" ngu wu ai.

Hpang jahpawt manap du jang Mawshe gaw, Dahtan hte Abira nga ai dap de sa nna, "Ndai n hkru ai dap hte hka nna nga mu, shanhte a sut gan mung, langai mi hpe mung hkum hkra myit, dai nrail yang shanhte hte rau shanhte a mara a majaw, hten run mat ai hkrum na marin dai," ngu nna shawa masha ni hpe tsun wu ai. Mawshe mung, "Ngai ndai amu ni yawng hpe nye a myit hte ngai galaw ai nrail, Karai Kasang shangun ai majaw, ngai galaw ai lam hpe nanhte kaning rai chye lu na gaw, Karai Kasang gaw lam ningnan hpan shapraw nna, a ga gaw ga mahka wa nna ndai masha ni hte rau shanhte hte seng ang ai sut rai ni hpe ga e mayu kau ai hte shanhte gaw kaja wa asak hkrung nga ninglen si hkrung si htan a mungdan de yu hkrat wa yang, Karai Kasang hte shut ai lam hpe nanhte chye na marin dai," ngu nna tsun ai ga htum jang, shanhte hte shanhte a nta dinghku hte sut gan rai ni yawng hte hpe ga e mayu kau mu ai. Shanhte hte kanawn ai masha ni rai nga ai manam pyaw ai baw nat nawng ai masha marai lahkawng tsa e manga shi hte hpe mung Karai Kasang kaw na wan pru wa nna hkru kau mu ai.

Dai hpang Zin nam mali de du ma yang, lu na ntsin n nga ma ai rai nna, hka hpang gara shajang mu ai majaw, shawa masha ni gaw Mawshe hpe mara shagun nga ma yang, Karai Kasang gaw "Dawhkrawng hpe la nna shawa masha ni hpe jahpawng tawn nhtawm, dai nlung hpe ntsin shapraw na tsun u, nlung kaw nna hka pru nna shawa masha ni hte rau shanhte a yam nga ni hpe nang ntsin jaw lu na rai nga ai," ngu wu ai. Mawshe mung Yehowa hkang da ai hte maren, shawa masha ni hpe shaga la nna, "Gumlau amyu ni e, madat mara mu, ngai gaw nanhte a matu nlung kaw na hka pru shangun na rai nga a ni?" nga nna tsun let, dai nlung hpe dawhkrawng hte lahkawng lang kayat dat wu ai rai nna dai nlung kaw na ntsin lwi pru wa ai hte masha hte yam nga ni yawng hka lu lu shajang ma ai.

Israela masha ni gaw, Hora bum de du shajang ma yang, Yehowa Karai Kasang gaw Mawshe yan Arun hpe shaga la nna, hkang da wu ai gaw, “Meriba hka shi makau e nye a ga hpe lale myit dai majaw, ngai jaw ai mungdan de Arun gaw n shang lu ai. Tinang amyu ni hpawng nga ai de wa lu na ra ai, dai majaw Arun hte shi a kasha Eleaza hpe shaga la nna Hora bum de woi sa nna Arun gaw hpun palawng hpe raw kau nna shi a kasha Eleaza hpe jahpun nhtawm Arun gaw dai shara hta si lu na ra ai” nga nna Yehowa Karai Kasang hkang da ai hte maren, Mawshe galaw nna, shanhte gaw shawa masha ni a man na Hora bum de lung wa ma ai. Dai shaloi Mawshe gaw Arun a hpun palawng hpe raw la nna kasha Eleaza hpe jahpun nhtawm Arun gaw dai bum ntsa e, shi a wenyi dawm la kau ai hkrum nu ai rai.

Mawshe hte Eleaza gaw bum ntsa kaw nna yu hkrat wa ai hpang Edom mung hpe hkawm kawai wa na matu, nawng hkyeng lam hku karet lung wa ma yang, lam loi mi yak shajang ma ai majaw, masha ni gaw myit n gun yawm shajang ma ai rai nna, “Nang gaw anhte hpe ndai nam mali e si mat shangun na matu, Egutu mung kaw nna hpa majaw woi wa myit ta? lusha sha hpa mung nnga, namchyim n rawng ai lusha ni hpe anhte matsat ga ai,” ngu nna Mawshe hte Karai Kasang hpe n htan shai ai ga tsun shajang mu ai. Dai shaloi Madu Yehowa gaw, Israela masha ni hpang de wan lapu hpe shangun dat nna, shawa masha ni ram ram wa lapu e achye ai hkrum nna si mat shajang ma ai. Dai hpang shanhte gaw Mawshe hpang de sa nna, “Anhte gaw Yehowa Karai Kasang hte nang madu hpe n htan shai ai hku galaw ga ai hte shut kau saga ai. Karai Kasang a wan lapu gaw anhte hpe n kawa na matu gawn kau ya u ga, akyu hpyi u,” ngu nna hpyi nem mu yang Mawshe gaw shawa masha ni a matu, akyu hpyi wu ai.

Dai shaloi Karai Kasang gaw, “Wan lapu sumla langai mi galaw nna shadaw langai mi a ntsa e nang noi da u, lapu achye hkrum ai ni dai hpe yu yang asak lawt lu na mara ai,” ngu nna Mawshe hpe hkang da wu ai. Shingrai Karai Kasang hkang da ai hte maren, Mawshe gaw magri hte lapu sumla langai mi galaw nna shadaw hta sharawt da ai hpe lapu achye hkrum ai ni yu yang asak lawt lu shajang ma ai.

Israela masha ni gaw, shaning mali shi ning tup hkawm ai hpang jahtum e Karai Kasang gaw Abarim bum de lung nna, “Ngai jaw ai mung hpe yu yu u, dai hpang na a nhpu Arun si mat ai hte maren, nang mung si na rin dai; Hpa majaw nga yang shawa masha ni gaw Kedesha shara Meriba hka shi makau e, n dang kalang hkat ai shaloi, nang gaw nye a ga hpe lale nna shanhte a man e ngai hpe n gawn n sawn di let, nlung hpe kayat ndai majaw rai nga ai,” ngu nna Mawshe hpe tsun wu ai

Dai shaloi Mawshe gaw, Israela masha ni nlang hte bai gumlau ma ai majaw, Karai Kasang hpe mung gumlau na mara ai ngu nna tsang ai majaw, rai nsi yang Karai Kasang hkang da ai ga hte maren, hkaw tsun dan ngut jang shawa masha ni hpe shadum jahprang wu ai gaw, “Nanhte gaw asak hkrung nna law htam mayat maya wa na lam Madu Karai Kasang gaw, jiwoi ni hpe dagam da ai mung de woi wa nna, shang sha lu na lam hpe mung dai ni ngai tsun da ai tara kanu ni yawng hte hpe hkan nang na matu hkum malap mu; Yehowa Karai Kasang gaw, nang hpe chyam yu nna tara kanu hpe hkan nang mayu ai, n hkan nang mayu ai lam ni hpe chye na lu na matu, lai wa sai mali shi ning tup nam mali hkan e, woi lai wa sai lam ni hpe myit dum mu; na a nji nwoi ni n mu n chye ai Mana muk hte nang hpe bau nit dai; lai wa sai shaning mali shi ning tup hta mung nanhte bu hpun lai wa sai bu hpun palawng ni n je n tsam ai lam hpe mung, lagaw n kayaw n bum ai lam hpe mung, kawa gaw kasha hpe sharin shaga ai zawn, na a Karai Kasang gaw nang hpe sharin shaga lai wa sai lam ni hpe mung, myit dum let myit sumru yu mu; na a Karai Kasang hpe malap nna, kaga hpara tsasam hpe nawku yang, nanhte teng teng hten run mat na marin dai, ngu nna dai ni ngai nan sakse hkam nngai.”

Mawshe gaw lam law law hte shi a amyu hpe shadum jahprang ngut jang Nebo bum a Pisga kawng pungding de lung wa nna Karai Kasang gaw Hkanan mung hpe madun dan let, “Ngai gaw Abraham, Isak, Yaku ni hpe dagam nna na a amyu aru arat hpe jaw na, ngu nna dagam da ai mungdan hpe yu yu u; nang hpe na a myi hte nan mu lu na ahkang jaw nngai; rai timung dai de nang rap sa wa lu na n rai,” ngu nna tsun wu ai. Dai zawn Yehowa

Karai Kasang hkang da ai hte maren, Mawshe gaw dai shara hta si wa sai rai nna, makoi mayang manu ai rai.

Mawshe gaw si wa ai shaloi asak latsa e hkun ning du sai rai timung myi amam ai hte n gun yawm ai ngu ai rai n nga ai. Israela amyu masha ni mung Mawshe hpe grai tsawra ma ai hte myit dum shajang ma ai rai nna Moba pa layang e, nhtoi sumshi ya tup sharung shayawt hkrap ngu hkrap ngoi rai nna nga shajang ma ai rai.

Mawshe a lam hpe grau nna chye mayu yang, Pru Mat Wa ai laika, Jaw Jau laika, Bu Hkawm laika hte Tara Jahprang laika ni hta hti yu mai nga ai rai.

## **YAWSHU A MAUMWI**

Israela masha ni gaw mayam tai nna nga ai Egutu mung kaw nna pru wa ma yang, Mawshe hpe karum ai Nun a kasha Yawshu gaw asak mali shi ning daram du sai ten hta Israela masha ni gaw, Edom panglai hpe rap nna sa wa ai lam nau wa rai n tsan yang, Rehpidim shara de du ma yang, Amalek masha ni gaw hpyen luksuk hte rau rawt sa wa ma yang, n gun n ja ai hte lanyan nna nga nga ai Israela masha ni nkau mi hpe sat kau mu ai. Dai shaloi Mawshe gaw Yawshu hpe shaga la nna, “N gun ja ai wa ngan ni hpe lata la nna Amalek masha ni hpe gasat na matu sa wa su,” ngu nna htet da wu ai. Hpawt de manap du jang, Yawshu gaw Mawshe htet da ai ga hte maren, Amalek masha ni hpe nhtu hte hkap gasat mu ai.

Dai hpang Karai Kasang dagam let, ga sadie jaw tawn da ai Hkanan mung makau de du wa ma yang, dai mungdan gaw kaning rai nga ai lam hpe kin-yu sa yu na matu, Mawshe lata da ai masha marai shi lahkawng hta Yawshu mung lawm nga ai. Dai mung hpe sa yu nna bai nhtang wa ma yang Yawshu hte Hkaleb hta kaga marai shi hte gaw, kam shut ai hte grai hkrit nna “Dai mung masha ni hpe anhte n gasat lu ai, amyu aru arat grai kaba ai hte hkum hkrang mung grai galu kaba ai masha ni rai ma ai. Dai ni a man e anhte gaw hkagrit hkadawn hte maren sha tai mat nga ga ai,” ngu nna tsun dan mu yang Yawshu mung, “Ngai sa kawan yu ai mung gaw, grai kaja ai mung rai nga ai; Yehowa Karai Kasang hpe gumlau ai amu hkum galaw myit, dai mungdan masha ni hpe mung hkum hkrit myit, shanhte hpe grai tsang na shara n nga ai; anhte hpang maga de Karai Kasang nga nga ai; dai majaw hkum hkrit myit,” ngu nna shadum jahprang mu ai.

Karai Kasang gaw Yawshu hte Hkaleb a kam sham ai lam hpe grai tsawra sharawng ya wu ai rai timung, kaga Israela masha ni gaw Karai Kasang hpe gumlau mu ai rai nna Yawshu hte Hkaleb hta kaga, kaga masha ni yawng hte gaw nam mali kata hkan e si mat shajang na mara ai lam hpe dagam da wu ai. Dai majaw Israela masha ni gaw, shaning mali shi ning tup nam mali hkan e wam

hkawm shajang masai rai nna, asak kaba ai masha ni yawng hte gaw, dai hkrun lam e si mat shajang ma ai rai.

Dai masha ni yawng hpe lam madun woi wa ai Mawshe gaw si na aten ni ai shaloi, Karai Kasang gaw Mawshe hpe tsun wu ai gaw, “Nye a wenyi lu ai Nun a kasha Yawshu hpe shaga la nna, na a lata shi a ntsa e mara da u, ndai Israela amyu masha ni gaw shi a ga hpe madat mara lu na lam, na a hpung shingkang n kau mi hpe shi a ntsa e mara da u,” ngu nna hkang da wu ai hte maren, Mawshe gaw hkinjawng a man e Yawshu hpe shaga la nna hkang da ai hte maren galaw wu ai.

Yehowa a shangun kasa si mat ai hpang Yehowa gaw Mawshe a hkringmang Nun a kasha Yawshu hpe, “Nye a shangun kasa si mat sai, dai rai nna rawt u, nang hte nang kaw na ndai masha nlang hte hte, dai Yawdan hka rap mu, Israela kashu kasha ni hpe ngai jaw ai mungdan de shang wa mu, Mawshe hpe ngai ndat da ai hte maren, nanhte kabye du madu ngai nanhte hpe jaw made ga, nam mali hte wora Lebanon bum garet nna, hka nu kaba ngu ai Uhprat hka htep, Hiti mung ting hte jan shang maga nammukdara kaba du hkra nanhte a lamu ga jarit rai na ra ai. Nang naw hkrung nga dingsa nang hpe kadai daw lu na nrail; Mawshe hte rau ngai nga ai zawn, nang hte rau mung ngai nga na nngai; ngai nang hpe kau da na nrail, nang hpe kau rap rai na nrail; n gun da ting u, myit nden shaja u, kaji kawa ni e jaw na ngu nna shanhte hpe dagam da ai mungdan ndai masha ni hpe madu shangun na rai ndai. Dai rai nna nye a shangun kasa Mawshe nang hpe tara hkang da ai hte maren hkan nang lu hkra, n gun da ting nna myit nden ja ja shaja u; nang galaw ai magup hta myit ai kaw du hkra dai tara lam hta hkan nang nga u; hkra de pai de hkum yit et; ndai tara laika hpe na nten hta na dawm mai na nrail; dai hta ka da mada mahkra nang hkan nang lu n ga, dai hpe shani shana hti aru yu u; dai rai jang nang maw ai lam byin lu nna, nang myit ai kaw du na ra ai. Nang hpe ngai hkang da sade ai nrail ni? n gun da ting nna myit nden shaja u; hkum hkrit et, myit hkum hten et, kaning rai nme law, nang sa wa ai lam magup hta na a Karai Kasang Yehowa rau rai nga ai,” ngu nna tsun wu ai.

Shaloi Nun a kasha Yawshu gaw Shitim shara kaw nna kin-yu marai lahkawng hpe, “Ndai mung hte Yerihko mare hpe sa yu yu masu,” ngu nna lagyim shangun dat wu ai. Shan gaw sa wa nna Rahab ngu ai shawa num langai mi a nta e sa lagyim shang mu ai. Shaloi Yerihko hkawkam hpe, “Ndai mung hpe kin-yu yu na nga, Israela masha ni ndai mare de shang masai,” ngu nna sa shana ya mu ai. Shaloi Yerihko hkawkam gaw Rahab a nta de masha shangun dat nna, “Nang kaw shang sa ai masha yan hpe shapraw ya mu, mungdan ting hpe kin-yu yu na nga shan gaw sa wa ai rai ma ai.” Dai numsha chyawm gaw dai yan hpe makoi da nna, “Ngai kaw manam ni du gaw du ma ai, rai timung kanang na sa ai gaw ngai n chye nngai, jan du nna chyinghka la na aten du jang shan bai pru mat wa masai, kade rai wa ma ai mung ngai n chye kau dat nngai, alawan shachyut masu, dep na re ai,” ngu nna bai tsun wu ai. Shing nga timung dai yan hpe chyawm gaw nta magaw de woi lung wa nna magaw e lam tawn ai lachyit sumpan a kata e makoi da wu ai. Shangun ma ni chyawm gaw Yawdan hka wora hkran de hkan shachyut sa wa ma ai. Shan hpe shachyut ai ni shinggan de gale jang mare chyinghka la kau ma ai.

Shingrai dai numsha gaw kin-yu yan garai n yup yang, nta magaw de shan kaw lung chyai nna, “Yehowa gaw ndai mungdan nanhte hpe jaw kau sai mung, nanhte hpe anhte hkrit mak mat nna nanhte a majaw mung masha ni nlang minla byaw mat masai lam mung, ngai chye ni ai. Kanning rai nme law Egutu mung kaw nna nanhte pru lung wa ai shaloi nawng hkyeng hka hpe Yehowa jahkyet kau ai hte Yawdan hka wora hkran e nanhte atsai awai hpya kau ai Amori hkawkam Sihon yan Oga hpe nanhte di ai lam anhte na saga ai. Shiga dai na jang anhte mung minla byaw mat ma nna, nanhte a majaw kaga kadai wa hta mung nden ja ai myit n gun kachyi mi mung n ngam chyawm saga ai. Nanhte a Karai Kasang Yehowa chyawm gaw, lahta tang na sumsing lamu hta mung, lawu tsang na ginding aga hta mung, Karai Kasang rai nga ai. Dai rai nna nan hpe ngai shalawt ai chyeju a matu nanhte mung nye a hpu nau ni hta chyeju htang nna, ngai nu ngai wa, ngai nau ngai na, ngai yung ngai jan ni hte shanhte hte seng maseng ni hpe n sat kau ai shaprawn da na lam, Yehowa hta dagam da ya mi, teng man ai

sakse kumla mung jaw da mi,” ngu nna tsun mu ai. Dai yan mung, “Nang gaw an a lam n shabrawng ya yang gaw, na a asak a matu an a asak gaw pahkam tai nga u ga; ndai mungdan Yehowa hpe anhte jaw ai nhtoi e, na a lam hpe kang ka hkra hkan nna chyeju htang na ra ga ai,” ngu nna yin la mu ai.

Num dai a nta gaw mare bunghku hte yep rai nga ai rai nna, dai bunghku ntsa e shi nga nga ai majaw, dai yan hpe hkuwawt hku sumri hte shayu dat nhtawm, “Hkan tam ai ni hte n hkrum myit ga, bum de sa wa nna masum ya tup sa makoi nga masu, hkan tam ai ni bai wa mat jang she bai nhtang wa mu,” ngu nna matsun dat mu ai. Shan mung, “Nang an hpe dagam shangun ai lam hta an a ntsa e mara n rawng u ga, yu u ndai mung de anhte du jang, ya an hpe shayu dat ai ndai hkuwawt hku hta ndai sumri hkyeng noi tawn nna na a nnu nwa , nhpu nnau ni hte nta masha yawng hpe shaga jahpawng tawn na rai ndai; shaloi na a nta nhku kaw nna shinggan de pru ai wa kadai rai timung, si ai hkrum yang shi dai tam si ai wa rai u ga, anhte chyawm gaw mara lawt u ga; na a nta nhku na hpe anhte sat ga yang gaw, dai wa a bunglat anhte hta mara u ga. Nang mung an a lam shabrawng ya n yang gaw, nang an hpe dagam shangun ai lam hta an mara lawt u ga,” ngu nna shi hpe tsun mu ai. Shaloi dai num mung, “Nan a ga hte maren rai u ga,” ngu nna yin la let, shan hpe dat dat mu ai rai nna shan mung wa mat ma ai. Dai sumri hkyeng mung dai hkuwawt hku hta noi da wu ai.

Shaloi shan gaw bum de lung mat wa nna, hkan tam ai ni bai wa du hkra masum ya tup nga nga ma ai; hkan tam ai ni gaw lam htum hkra hkan tam timung n mu mu ai majaw, bai nhtang mat wa ma ai. Dai masha yan gaw bum de na bai nhtang yu hkrat wa nna hka rap nhtawm Nun a kasha Yawshu kaw bai du pru wa mu ai. Shingrai shan hkrum ai lam yawng mayawng hpe tsun dan let, “Kaja wa teng teng Yehowa Karai Kasang gaw wora mung ting anhte hpe ap ya mani ai; anhte a man e mung, mung masha ni nlang yaw mat masai,” ngu nna Yawshu hpe wa tsun dan mu ai.

Yawshu chyawm gaw jahpawt jau jau rawt nna, Israela kashu kasha ni nlang hte hte rau Shitim shara kaw nna htawt nhtawm, Yawdan hka de du ma ai. Shanhte garai n rap yang dai

yang e shanhte but nga ma ai. Ya masum ya shani e du agyi salang ni gaw, dap ting de ga sa wa nna, “Nanhte a Karai Kasang a ga shaka sumpu hte sumpu hpai ai hkinjawng Lewi masha ni hpe mu ai shaloi, nanhte mung hkan rawt nang na rai myit dai; rai timung sumpu hte nanhte a lapran e dawng hkying lahkawng daram shagang na rai myit dai; hkan nang na lam nanhte chye lu hkra sumpu de nau wa n shani ai sha, hkan nang na rai myit dai. Kaning rai nme law, ndai lam hku nanhte shawng de lang mi mung n lai yu myit dai,” ngu nna shawa masha ni hpe hkang da mu ai. Bai Yawshu gaw amyu masha ni hpe, “Yehowa hpawt de anhte hpe mauhpa amu madun na ra ai majaw, nanhte a hkum dai shachyoi shapra da mu,” ngu mu ai.

Hkinjawng ni hpe mung “Ga shaka sumpu hpai nna masha a shawng e rap sa wa mu,” ngu nna Yawshu tsun da ai hte maren, shanhte mung ga shaka sumpu hpai nna mung masha ni a shawng e sa wa ma ai. Bai Yehowa Yawshu hpe “Mawshe hte rau nga nga ai zawn, nang hte rau ngai nga nngai gaw, Israela amyu ting chye lu hkra dai ni ngai nang hpe shanhte a man e shagrau hpang de ga; ga shaka sumpu hpai ai hkinjawng ni hte Yawdan hka hkin-gau de du jang Yawdan hka hta nanhte tsap nga lu na re ai, ngu nna tsun mu,” ngu wu ai. Bai Yawshu gaw Israela kashu kasha ni hpe, “Wa marit, nanhte a Karai Kasang Yehowa a ga madat la maru, ahkrung nga ai Karai wa nanhte hta nga nga nna, nanhte a man e Hkanani, Hiti, Hiwi, Perizi, Girkashi, Amori hte Yebusi masha ni hpe shi kaja wa teng teng jahtaw kau na gaw ndai lam hta nanhte chye lu na marin dai; yu mu, lamu ga Madu a ga shaka sumpu gaw, nanhte a man e Yawdan hka lai dut na ra ai. Dai rai nna, Israela amyu ni hta na amyu mi a marai langai langai di nna marai shi lahkawng san da mu, kaning rai n me law, lamu ga Madu Yehowa a sumpu hpai ai hkinjawng ni a lagaw lahpan ni Yawdan hka kabye hkra ai hte shaloi jang, Yawdan hka gaw dai kaw hprut rai di mat nna hka hku de na hka gaw sumpum tsaw mat wa na ra ai,” ngu nna tsun mu ai.

Shaloi amyu masha ni Yawdan hka rap na nga tinang sum shara na htawt ma yang, ga shaka sumpu hpai ai hkinjawng ni gaw, masha ni a shawng e sa wa nna, sumpu hpai ai ni Yawdan hka du ai hte, dai sumpu hpai ai hkinjawng ni a lagaw lahpan ni lwi nga ai

hka hpe kabye dat yang, nmut ta rai nna hka ding dung gaw hka hkin-gau lim hkra, tung nga ai rai tim, hka hku de na lwi hkrat wa ai hka gaw dai yang hkring mat nna grai tsan ai Zarehtan makau na Adam mare de du hkra rawt tsaw mat wa ai. Pa nawng ngu ai jum nawng de lwi wa ai hka mung, atsai awai hkyet mat nna amyu masha ni gaw Yerihko ang hku rap wa ma ai. Shingrai Yehowa a ga shaka sumpu hpai ai hkinjawng ni gaw Yawdan hka ka-ang e ga hta tsap lu ma ai. Amyu masha ni yawng rap kawt ma ai ten du hkra, Israela amyu ting ga hku hkawm wa lu ma ai.

Dai shani Yehowa Karai Kasang gaw, Israela amyu masha ni yawng a man e, Yawshu hpe shagru wu ai rai nna Mawshe hpe hkrit hkungga ai zawn, Yawshu hpe mung prat tup hkrit hkungga shajang mu ai.

Shaloi Yehowa gaw Yawshu hpe sakse sumpu hpai ai hkinjawng ni hpe “Yawdan hka na pru wa marit,” ngu nna tsun u, ngu wu ai. Yawshu mung hkinjawng ni hpe “Yawdan hka na pru wa marit,” ngu nna tsun dat wu ai. Shaloi Yehowa a ga shaka sumpu hpai ai hkinjawng ni Yawdan hka ka-ang na pru lung wa ma ai rai nna, shanhte a lagaw lahpan hkarang de kabye dep ai hte rau Yawdan hka gaw shi a shara de bai lwi wa nna mi na ta hka ding dung na hkin-gau lim hkra bai rai mat ai. Shata langai ngu na nhtoi shi ya hta amyu masha ni gaw, Yawdan hka na pru lung wa nna, Yerihko mare a sinpraw maga Gilgala ngu ai shara hta dap jung nga ma ai.

Yawshu gaw Yerihko makau e nga nga ai shaloi sharawt mada yu yang, yu u, nhtu shaw shada lang nna shi hte man ap rai tsap nga ai wa langai mi nga nga ai. Yawshu gaw shi hpang de sa wa nna, “Nang gaw anhte hpang maga na rai nni? gumlau hpyen hpung maga na rai nni?” ngu nna san wu yang dai wa chyawm gaw, “N rai Yehowa a hpyen laba up ai bu rai nna ya sa wa ring ngai,” ngu wu ai. Shaloi Yawshu gaw, ga e ding-nyawm nawku let, “Nye a Madu e, na a mayam wa hpe hpa tsun mayu n ta?” ngu wu ai. Yehowa a hpyen laba up ai bu wa gaw, Yawshu hpe, “Na a hkyepdin raw u, nang kabye ai ga gaw chyoipra ai ga rai nga ai,” nga ai. Yawshu mung shing rai galaw wu ai. Dai hpang lamu kasa gaw, Yawshu hpe “Yu u, Yerihko mare hpe mung, de a hkawhkam

hte n gun ja ai share ni hpe mung na a lata de ngai ap ya sade ai. Dai rai nna hpyen masha ni mahkra dai mare hpe lang mi hkawm shinggrup na rai myit dai. Shing di kru ya du hkra nang di na rai ndai. Hkinjawng marai sanit hte gaw, dai sumpu a shawng e garu pahtau sanit lang nna sa wa na rai ma ai. Sanit ya du ai shani hta dai mare hpe sanit lang hkawm shinggrup let, hkinjawng ni pahtau dum na rai ma ai. Shingrai shanhte gaw garu pahtau hte mahku galu wa dum dat nna, dai pahtau mahku nanhte na jang, masha nlang nsen shaja nna jahtau garu dat na rai myit dai; shaloi mare bunghku yan ting gaw daw ru mat wa na ra ai rai nna, kadai mung tinang man ang ai hku nna shang wa na rai myit dai,” ngu nna hkang da wu ai. Shaloi Nun a kasha Yawshu gaw, hkinjawng ni hpe shaga la nna “Dai ga shaka sumpu hpai nna Yehowa a sumpu a shawng e, hkinjawng marai sanit hte garu pahtau sanit lang let sa wa mu,” ngu wu ai. Yawshu mung, “Mare hte rau nga manga hte hpe majai kau nna Karai Kasang Yehowa hpe ap kau na rai myit dai; rai timung shawa num Rahab gaw anhete dat ai kin-yu ni hpe makoi da ai majaw shi hte rau shi a nta e nga ai masha ni yawng hte hpe asak shalawt da na rai myit dai; nanhte gaw majai kau sai rai ni hpe sadai ai hte koi gam mu, shing nrailai arai ni hpe la wa yang tinang hta rai timung, Israela dap hpe rai timung majai kau ai hkrum nna, tsin-yam hkrum na hpe tsang shara nga ai. Ja gumhpraw hpe rai timung, magri arai hpe rai timung, hpri rai nga manga hpe rai timung, Yehowa Karai Kasang a matu, jasan jaseng kau nna, dai hte hpe Yehowa a sut dek hta mahkawng da na rai nga ai,” ngu nna shawa masha ni yawng hpe hkang da mu ai.

Shingrai Karai Kasang a sumpu hte rau mare hpe lang mi shinggrup ngut jang, dap de bai wa mat ma ai. Shingrai shani shagu kru ya tup, galaw nga ma ai. Shingrai sanit ya ngu na jahpawt hta jau jau rawt nna shawng na hte maren mare hpe sanit lang shinggrup mu ai. Sanit lang ngu na hta hkinjawng ni gaw pahtau dum dat ai shaloi Yawshu gaw, “Jahtau garu mu, Karai Kasang gaw mare hpe nanhte hpe jaw sai,” ngu wu yang pahtau dum ai hte masha ni yawng hte gaw garu jahtau shajang mu ai. Pahtau hpe na ai hte rau nsen shaja nna jahtau shajang mu yang mare bunghku ni gaw daw ru mat wa nna, masha ni yawng hte gaw

tinang a man ang ai kaw nna mare de shang bang wa nhtawm, asak hkrung mahkrung yawng hte hpe jahten kau mu ai. Rai timung kin-yu yu ai shabrang ni gaw Rahab hte shi a kanu kawa, kahpu kayung, kanau kana hte shi hta nga manga hte hpe mung, shi a makyin janghku ni hpe mung woi wa nna Israela dap a shinggan e tawn da nhtawm, Yerihko mare hpe nat kau mu ai.



Ja gumhpraw hpe mung, magri rai ni hpe mung, hpri rai ni hpe mung, Yehowa Karai Kasang a sut dek hta mahkawng da mu ai. Yawshu mung Rahab hte shi hta nga manga hte hkyam sa jaw wu ai rai.

Yawshu gaw Yerihko mare kaw nna masha dat nhtawm, “Nanhte gaw Ai mare de sa nna dai mare a lam hpe sa yu yu mu,” ngu nna htet dat ai hte maren shanhte gaw Ai mare de sa nhtawm, yu yu ngut jang, Yawshu hpang de bai wa nna, “Ndai masha ni yawng hte gaw n sa shangun u ga, masha hkying lahkawng hkying masum daram sa nna Ai mare hpe sa gasat mu ga, dai mare de sa ai lam hta ndai masha ni yawng hpe n hki ba mu ga, mare masha ni gaw nau wa n law ma ai,” ngu nna wa tsun dan mu ai. Shingrai

masha hkying masum daram rawt sa wa ma yang Ai mare masha ni a man e hprawng bra shajang mu ai. Ai mare masha ni chyawm gaw shanhte hta na masha marai sumshi kru hpe sat kau mu ai. Mare chyinthka kaw nna Shebarim du hkra yu wa ai kadawng e shanhte hkan sat mu ai rai nna, amyu masha ni myit minla byaw mat nna ntsin zawn tai mat malu ai.

Shaloi Yawshu gaw shi a palawng gang je kau nna shi hte Israela agyi ni gaw, tinang a baw hta ga nhpu hte bun let Yehowa a sumpu a man e shana de du hkra gum dagup nga ma ai. Yawshu gaw, “Yehowa Madu e, ndai amyu masha ni hpe Amori masha ni a lata de ap nna jahten kau na matu Yawdan hka ndai hkran de hpa rai nang woi rap nta? Anhte Yawdan hka wora hkran e, myit shatawng nna nga nga sana le, Madu e, Israela masha ni masha hpyen ni a man e, nga mat wa ai gaw ngai kaning ngu na rai ta? Hkanani masha hte ndai mung na masha ni nlang ndai na na mara ai rai nna, anhte hpe sa wang nhtawm, anhte mying hpe ga ntsa e shamyit kau ya na mara ai. Dai rai nna na a galu kaba ai mying ning sang a matu kaning di na rai ta?” ngu nna san lajin wu ai.

Yehowa chyawm gaw Yawshu hpe, “Rawt u, hpa rai dagup nga nta? Israela amyu shut hpyit masai; ngai tawn da ai ga shaka pyi shanhte run kau manu ai. Shanhte majai da sai arai la nna, lagu mung lagu, masu mung masu, tinang a arai hta nan bang da manu ai; dai re ai majaw Israela a kashu kasha ni gaw, dagam dala hkrum ma ai rai nna, masha hpyen ni a man e n hkawm lu ma ai hte nga mat ma ai. Dagam dala hkrum ging ai wa hpe n seng kau myit yang gaw, ngai nanhte hte rau naw nga lu na nrail; Rawt u, amyu masha ni hpe shachyoi shapra u, hpawt ni nhtoi na matu, tinang hkum hpe shachyoi shapra mu, ngu nna tsun u, kaning rai nme law, Israela Karai Kasang Yehowa tsun ai gaw, Israela amyu e, majai kau sai arai ni nanhte hta rawng nga ai; dai hpe nanhte a kata na n seng kau dingsa masha hpyen ni a man e nanhte tsap lu na myit dai nrail; hpawt de manap e amyu baw sang hkan nna sit sa lu na rai myit dai; Yehowa lata la ai amyu gaw, lakung lama hkan nna sit sa lu na rai myit dai; Yehowa lata la ai lakung gaw nta dap hkan nna sit sa lu na rai myit dai; Yehowa lata la ai dap gaw, masha langai hte langai sit sa lu na rai myit dai; shingrai majai kau ai rai rem ai

lata la hkrum ai wa gaw, Yehowa a ga shaka tawt lai kau nna Israela amyu hta e angawk angak re ai amu galaw wu ai majaw, shi hpe, shi lu malu hte hpawn nat kau na rai myit dai,” ngu wu ai.

Yawshu mung jahpawt jau jau rawt nna Israela amyu baw masha ni hpe langai hte langai woi sit wu yang Yuda amyu hpe lata la wu ai. Bai Yuda amyu hpe woi sit wu yang Zera lakung hpe lata la wu ai. Bai Zera lakung dap htinggaw langai hte langai woi sit wu yang, Zabdi htinggaw hpe lata la wu ai. Dai htinggaw na la sha langai hte langai hpe woi sit wu yang, Yuda amyu na Zera lakung Zabdi dap na Hkarmi a kasha Ahkan hpe lata la wu ai. Shaloi Yawshu gaw Ahkan hpe, “Ngai sha e, Israela Karai Kasang Yehowa hpe shagrau nna shi a man e tawngban u, nang galaw kau ai amu ngai e tsun dan e, hkum ip tawn da e,” ngu wu ai. Ahkan gaw Yawshu hpe htan nna, “Kaja wa teng teng Israela Karai Kasang Yehowa hpe ngai shut ni ai. Ngai shut kau ai lam gaw, dai lanep rai hta na reng ai Shina hpajawng langai mi, gumhpraw Shekela ni tsa hte Shekela manga shi rawng ai ja hkaw langai mi ngai mu nna, dai hpe ra ai majaw, la kau se ai. Yu u, dai gaw nye a sum kata e ga hta lup da we ai. Gumhpraw gaw ga de jahtum nga ai,” ngu nna tsun dan wu ai.

Shaloi Yawshu shangun ma dat dat nna, shanhte dai sum de gat sa du yu ma yang, yu u dai arai gaw shi a sum e, makoi da wu ai rai nna, gumhpraw gaw ga de jahtum nga ai; dai arai hpe shanhte sum na la shapraw nhtawm, Yawshu hte Israela kashu kasha ni yawng a man e, la wa nna Yehowa a man e tawn da ma ai. Shaloi Yawshu hte Israela amyu ting, Zera a kasha Ahkan hpe dai gumhpraw, hpa jawng, aja hkaw rai ni hte shi a shayi shadang sha ni, shi a u tang, gumra, sagu bainam, shi a sum, shi lu malu mahkra hte hte hpawn la nna Akhora kadit de woi sa mu ai. Dai yang Yawshu gaw, “Nang anhte hpe hpa rai sharu nta? Dai ni Yehowa nang hpe sharu na ndai;” nga na tsun ai lata, Israela kashu kasha nlang, shi hpe nlung hte jawm kabai sat kau mu ai. Shanhte hpe mung wan hte nat nna nlung hte kabai sat mu ai. Shingrai shanhte shi a ntsa e nlung sumpum kaba lung kawng da mu ai rai nna dai ni du hkra nga nga ai. Yehowa a pawt bu ai masin mung kawp mat lu

ai. Dai hkan nna dai shara hpe dai ni du hkra Ahkora kadit, ngu nna shamying da mu ai.

Shaloi Yehowa gaw, Yawshu hpe “Hkum hkrit et, myit hkum kaji et, hpyen ma ni nlang hte hpe woi nna rawt mu. Ai mare de lung wa mu. Yu u, Ai mare a hkawkam hte shi a masha ni shi a mare hte shi a mungdan hpe na a lata de ngai ap ya de ai; Yerihko mare hte de a hkawkam hpe di ai zawn Ai mare hte de a hkawkam hpe nang di na rai ndai; rai timung arung arai, yam nga lanep mahkra gaw, nanhte a matu magawn la na rai myit dai, dai mare a wora maga de hpyen masha mayun up tawn da u,” ngu nna tsun wu ai. Shaloi Yawshu hte hpyen masha mahkra gaw Ai mare de lung wa na, rawt ma ai. Yawshu mung n gun ja ai share mun masum lata la nna shana e shangun dat wu ai. Shanhte hpe mung, “Nanhte gaw dai mare wora maga e gawp nga na rai myit dai; mare hte nau wa hkum tsan sa wa mu; nanhte yawng jin jin rai hkyen nga mu; ngai hte ngai kaw na masha nlang hte gaw, mare de shang sa na ga ai. Shanhte shawng na zawn gasat na nga pru wa jang anhte hprawng yen na ga ai. Shanhte mung hkan shachyut na nga pru yang ndum shami mare hte tsan wa hkra hprawng shalen na ga ai. Kaning rai n me law, shawng na hte maren, anhte a man na shanhte hprawng masai, nga nna shanhte tsun na mara ai. Anhte mung kaja wa hprawng ya na ga ai. Shaloi nanhte gaw up nga ai kaw na pru nna, dai mare hpe gasat dip la na rai myit dai. Nanhte a Karai Kasang Yehowa gaw, nanhte a lata hta dai mare ap ya na ra ai. Shing rai dai mare hpe lu la jang nat kau na rai myit dai. Yehowa tsun ai hte maren, nanhte galaw na rai myit dai. Yu u, ngai nanhte hpe hkang da masade ai,” ngu nna hkang dat mu ai. Shing rai Yawshu shanhte hpe shangun dat mu ai. Shanhte mung sa up nga na matu sa wa nna Ai mare a sinna maga Behtela hte Ai lapran e sa up nga ma ai. Yawshu chyawm gaw, amyu masha ni kaw dai shana naw shalai wu ai.

Shaloi Yawshu gaw jahpawt jau jau e rawt nna masha ni hpe shinggyin la nhtawm, Israela du agyi ni hte rau, masha ni a shawng e sa wa let, Ai mare de lung wa ai. Shi kaw hkan nang ai hpyen masha ni nlang hte mung lung wa nna mare de shanang sa wa nhtawm, Ai mare a ding dung maga e dap jung nga ma ai. Ai

mare hte shi a lapran e, hkaraw din nga ai; shi gaw marai hkying manga san la nhtawm, Ai mare a sinna maga Behtela hte lapran e up da wu ai. Shingrai shanhte dai mare a ding dung man de na hpyen daw wa nlang hte hte mare a sinna maga e up nga ai nlang hte hkyen tawn ma ai. Yawshu gaw dai shana e, hkaraw ka-ang de sa wa wu ai. Ya, Ai mare a hkawkam gaw dai hpe mu jang, shanhte jau jau e gan rawt nna shi hte shi a mare na la sha ni nlang hte hte rau madat da ai ahkying hta dai pa ang ang maga de Israela masha ni hpe gasat na nga htim ma ai. Mare a htawm de masha up nga ai chyawm gaw, shi n chye wu ai. Shaloi Yawshu hte Israela masha ni yawng hte gaw, sum wa masu let, nam lam hku hprawng wa ma ai. Shanhte hpe hkan shachyut na nga, mare na masha nga manga hpe ginrawn la nna shanhte Yawshu hpe hkan shachyut let mare hte n dum shami tsan mat wa ma ai. Shingrai Ai mare hte Behtela mare hta Israela masha ni hpe n hkan shachyut ai la sha langai mi mung n ngam hkra mare hpe jahkam kau da nna Israela masha ni hpe shachyut sa mat ma ai.

Shingrai Yehowa gaw Yawshu hpe “Nang lang ai ri nhtu hpe Ai mare de dawn dat u, dai mare na a lata de ap ya de ga;” Yawshu mung shi lang ai ri nhtu hpe Ai mare de dawn dat wu ai. Shi a lata ladawn dat yang up nga ai hpyen ni a lawan rawt nna mare de alawan wan gat shang nhtawm gasat dip la nna tin tin nat kau dat mu ai. Dai rai nna Ai mare masha ni gaw kayin yu dat yu ma yang, yu mu, shanhte a mare hkru ai wan hkut gaw lamu de ding dung rai nga ai; dai rai nna shanhte gaw kade mung n chye hprawng mat mu ai. Nam de hprawng masu ai ni mung hkan shachyut nang ai ni hpe mahtang nhtang gasat ma ai. Ya up da ai hpyen ni dai mare lu la nna mare na wan hkut dingdung rai nga ai hpe Yawshu hte Israela kashu kasha ni nlang hte mu ma yang, shanhte bai nhtang nna Ai mare masha ni hpe sat kau mu ai. Mare kata na ni mung pru gasat ma ai hte Israela masha ni gaw Ai mare masha ni hpe matep gasat nna langai pyi n lawt na hku jawm azat kau mu ai. Ai hkawkam hpe chyawm gaw shanhte jahkrung rim la nna, Yawshu hpang de woi wa mu ai.

Shingrai Israela masha ni gaw pa e mung, shanhte hpe hkan shachyut nang ai nam hkan e mung, Ai masha ni nlang hte hpe

nhtang gasat nna mahkra hte hpe nhtu hte atsai awai azat shamyit kau ngut jang, Israela masha ni gaw Ai mare de bai nhtang wa nna nhtu hte sat shatawm kau mu ai. Dai shani e Ai mare na num, la mahkra mun mi hkying lahkawng dang si mat ma ai. Kanning rai nme law, Yawshu gaw Ai mare masha ni hpe atsai awai sat kau ma ai du hkra, shi a lata hta lang ai ri hpe n dawm la wu ai. Rai timungYehowa Yawshu hpe hkang da sai hte maren, dai mare na yam nga hte lanep rai mahkra gaw, Israela masha ni tinang a matu magawn la ma ai. Shingrai Yawshu gaw Ai mare hpe nat kau wu ai rai nna dai ni du hkra, htani htana na matu akatsi katsang nga ai shanut sumpum shatai wu ai. Yawshu gaw Ebala bum e, Yehowa Karai Kasang a matu wan nat hkungga hte mahku hkungga nawng jau mu ai. Dai hta kaga shi gaw, Israela kashu kasha ni a man e, nlung hta Mawshe a tara hpe ka tawn da wu ai. Israela masha ni hpe shaman ya na lam, Yehowa a shangun kasa ni yawng hte shanhte a du salang ni, agyi ni, shingbyi manam ni ngu ai amyu jet ai hte n jet ai ni yawng hte gaw, Yehowa a ga shaka sumpu hpai ai Lewi hkinjawng ni hte dai sumpu a man e, lahkawng maga hpra ang ang rai nna, ka-ang hkup gaw Gerizim bum maga de, ka-ang hkup gaw Ebala bum maga de tsap nga ma ai. Shaloi tara laika hta ka da mada shaman chyeju hte dagam dala ding-nye ngu ai tara ga yawng mayawng hte hpe shi hti dan wu ai. Yawshu mung Mawshe hkang da mada hte maren, Israela shawa hpung ting hte shanhte hta na numsha hte ma kaji, shingbyi manam hte nga manga hte a man e ga hkaw mi mung n shayet ai sha hti dan wu ai.

Ya Yawdan hka a sinna hkran bum ga hte pa ga hkan e, Lebanon bum wora maga nammukdara hka kau dingdung hkan na Hiti, Amori, Hkanani, Perizi, Hiwi hte Yebusi masha ni a hkawkham ni nlang hte gaw shiga dai na jang Yawshu hte Israela masha ni yawng hpe jawm gasat na nga, myit langai hte sha rau hpawng nga ma ai.

Ya Gibeon masha ni gaw, Yerihko hte Ai mare hta Yawshu galaw ai lam na ma yang, shanhte maw hkalem ai hku galaw nna, shangun kasa tai masu let shanhte a lawze daw ni hta lachyit tingsan dingsa hte htaw let, aje amya kapa gala re ai tsabyi shan hpyi ndum ni gun, kapa gala re ai hkyepdin dingsa ni din, labu

palawng dingsa ni hpun rai nna, shanhte a sha jarit gaw nshu lamu mut mat sai lusha chyatsu rai malu ai. Shanhte gaw Gilgala dap e nga ai Yawshu hpang de sa nna, shi hte Israela masha ni hpe, “Anhte gaw sumtsan mung na du sa ra ga ai; dai re ai majaw anhte hte ga shaka tawn da ga,” ngu mu ai. Israela masha ni chyawm gaw, “Nanhte gaw anhte kaw rai nga myit dai nhten, dai rai yang nanhte hte kaning rai ga shaka da lu na rai ta?” ngu nna Hiwi masha ni hpe hkap htan mu ai. Shanhte mung, “Anhte na a mayam ni rai nga ga ai,” ngu nna Yawshu hpe bai htan mu ai. Shaloi Yawshu gaw, “Nanhte kadai ni rai myit ta? kanang na du sa myit ta?” ngu nna shanhte hpe san mu ai. Shaloi shanhte gaw, “Na a Karai Kasang Yehowa a mying ning sang a majaw, na a mayam ni na chying tsan ai mung kaw nna du ra ga ai; shi a gumhkawng ai shiga hpe mung, Egutu mung e galaw ai lam yawng mayawng hpe mung, Yawdan hka sinpraw hkran Hesbon e dung ai hkawhkam Sihon hte Ashtarot e dung ai hkawhkam Oga ngu ai Amori hkawhkam yan hta galaw ai lam yawng mayawng hpe anhte na saga ai. Dai rai nna anhte a du salang ni hte anhte a mung masha nlang hte gaw, lam na sha jarit la gun nna shanhte hpe sa bawp la masu; shanhte hpe, anhte nanhte a mayam ni rai saga ai, anhte hte ya ga shaka tawn da saga, ngu mu nga nna shangun dat mi ai. Nanhte hpe bawp la na pru sa ai shani e lam jarit ngu nna gun ai muk ndai ni a kahtet sha rai mali ai; yu yu mu, tsu mat nna nshu lamu mut mat hkra rai sai; tsabyi jahku hte tup re ai shanhpyi ndum ndai ni nnan rai mali ai, yu mu, ya je waw mat sai; hpun palawng ndai ni, hkyepdin ndai ni, lam nau tsan ai majaw dingsa mat sai;” ngu nna bai tsun mu ai. Israela masha ni mung Yehowa kaw n san ai dai ni a lusha hkap la sha ma ai. Yawshu mung dai ni hpe jahkrung da na lam ga shaka da nna, htinglu kau wu ai. Shawa hpung a du ni mung dai hku dagam da ma ai.

Ya shanhte hte ga shaka tawn da ai hpang masum ya rai yang, dai masha ni shanhte kaw na rai nna, htingbu sha rai nga ma ai gaw, Israela masha ni chye ma ai. Dai majaw Israela kashu kasha ni sa wa nna masum ya sat yang shanhte a mare ni de du ma ai.

Shaloi Yawshu shanhte hpe shaga la nna, “Nanhte gaw anhte kaw sha nga da myit htawm, nanhte hte grai tsan ga ai, nga nna anhte hpe hpa rai maw hkalem myit ta? Ya chyawm gaw nanhte dagam hkrum ai ni tai manit dai rai nna, mayam tai let nye a Karai Kasang a nta matu, hpun hta, hka ja amu hte langai mi mung lawt na myit dai nrai,” ngu wu ai. Shanhte gaw Yawshu hpe “Ndai mung ting nanhte hpe jaw kau nna mung masha mahkra hpe nanhte a man e na shamyit kau na nga, na a Karai Kasang Yehowa shi a shangun kasa Mawshe a lata hta hkang da sai lam hpe na a mayam ni teng teng na lu saga ai rai nna, na a lata hte si hkrum na hpe hkrit la ga ai majaw, galaw kau sagaw ai; ya rai timung, yu u, anhte na a lata e rai nga ga ai; kaja ai hte teng man ai hku nang myit lu ai hte maren anhte hpe di mi,” ngu nna bai tsun mu ai. Shingrai Yawshu dai hku galaw nna shanhte hpe n sat kau ai sha Israela kashu kasha ni a lata na shaw la wu ai. Dai shani e Yawshu gaw, shanhte hpe Yehowa san da ai shara na tawn hkungri a matu hpun hta ai hte hka ja ai masha shatai na hpajang da wu ai rai nna, dai ni du hkra nga ma ai rai.

Yawshu gaw Yerihko mare hte de a hkawkam hpe di ai zawn, Ai mare hte de a hkawkam hpe di wu ai rai nna, Ai mare hpe gasat dip la nna atsai awai shamyit kau ai lam hpe mung Gibeon masha ni Israela masha ni hte ga shaka da nna, rau nga nga ai lam hpe mung Jerusalem hkawkam Adoni-zedek na wu yang shanhte ja ja hkrit ma ai. Kaning rai nme law, Gibeon gaw hkawkam dung ai mare zawn mare kaba rai nga ai hte Ai mare hta grau kaba nna dai yang na lasha ni yawng wa ngan hkrai rai nga ma ai. Dai re ai majaw Jerusalem hkawkam Adoni-zedek, Hebron hkawkam Hoham, Yamut hkawkam Piram, Lakhisha hkawkam Yahpia, Eglon hkawkam Debira hte hpang de kasa shangun dat nna, “Gibeon mare gaw, Yawshu hte Israela amyu ni kaw ga shaka jinghku hku masai majaw, wora mare hpe gasat nna lu la hkra ngai kaw lung marit, ngai hte jawm gasat ga,” ngu dat wu ai. Dai ga hkan nna, Jerusalem hkawkam, Hebron hkawkam, Yamut hkawkam, Lakhisha hkawkam, Eglon hkawkam ngu ai Amori hkawkam manga hte gaw jawm hpawng

nna shanhte a hpyen laba nlang hte rau lung wa nhtawm, Gibeon mare a man e dap jung ma ai rai nna, wang gasat nga ma ai.

Shaloi Gibeon masha ni gaw Gilgala dap de Yawshu kaw masha shangun dat nna, “Na a mayam ni hpe n dum shami hkum yu nga et, anhte hpe hkye la na a lawan lung wa rit, bum ga na Amori hkawkam ni nlang anhte hpe gasat na nga, hpawng nga masai,” ngu nna sa tsun mu ai. Dai re ai majaw Yawshu gaw hpyen masha ni nlang hte hte wa ngan share nlang hte hte Gilagala dap na lung wa ma ai.

Yehowa mung, shanhte hpe “Hkum hkrit et, na a lata de ngai shanhte hpe ap ya sade ai, nang hpe kadai mung hkap daw lu na n rai,” ngu nna Yawshu hpe shalan wu ai. Dai rai nna Yawshu gaw, Gilagala dap nna shana tup lung wa nhtawm dai hpyen ni hpe n dum shami gasat kajawng dat ai hte Yehowa mung shanhte hpe Israela amyu a man e jasum kau mu ai rai nna, Gibeon makau e, gasat kaba hte sat kau nhtawm, Bet-horon de lung wa ai kadawng lam hkan nna Azeka hte Makeda du hkra shachyut gasat mu ai. Shingrai Israela man na shanhte hprawng wa ma yang, Bet-horon kaw na yu wa ai lam e, Yehowa gaw lamu de na lungdin kabai jahkrat bun wu ai rai nna, Azeka mare du hkra adup ai hte si shajang ma ai. Israela kashu kasha ni a nhtu hte si ai hta sin marang e si ai mahtang grau law ma ai. Yehowa Amori masha ni hpe Israela kashu kasha ni a man e ap kau ai shani hta Yawshu gaw Yehowa kaw tsun nna, “Jan e, Gibeon ntsa e naw la u, Shata e Aiyalon kadit e naw hkring u,” nga nna Israela masha ni a man e, tsun wu ai. Dai hte maren, Dai amyu gaw masha hpyen ni hpe ari jaw lu ai du hkra, jan gaw ala nga nna, shata gaw hkring nga mat ai. Dai lam hpe shing nga Yashara laika hta ka da nga ai n rai ni? Shing rai ajan gaw lamu ka-ang e hkring nan nga nna, lani jan mi daram na hkra lau n shang mat ai. Yehowa masha a ga madat ya nna, dai zawn re ai nhtoi lani mi muk, shawng de hpang de n byin yu ai: kaning rai nme law, Yehowa gaw Israela hpang maga gasat nga ai. Shaloi Yawshu gaw Israela masha ni mahkra hte rau Gilgala dap de bai wa ma ai.

Yawshu gaw Karai Kasang hkang ai ga ni yawng hpe madat mara nga ai hte maren, tinang a hpyen ni yawng hpe gasat

dang kau lu na matu, shi a lata hta ap ya nna, ga sad i tawn da ai lam ni langai mi hpe mung n lai ai sha, n yawm hkra Karai Kasang jahpring ya wu ai.

Yawshu gaw asak aprat kaba wa nna, dingla wa sai. Dai rai nna Yehowa gaw Yawshu hpe, "Ya nang aprat kaba ai hte dingla nit dai, kabye la na lamu ga mung naw law nga ai. Ya ndai mung hpe Israela amyu jahku hte Mawshe amyu chyen mi hpe sali garan ya u," nga nna hkang da ai hte maren, Yawshu gaw yawng mayawng hpe hkan galaw ngut jang, Yehowa Karai Kasang gaw grup yin e nga ai hpyen ni yawng a lata hta na, Israela masha ni yawng hpe hkye la nna, sim sa ai ahkang hpe prat tup jaw ngut jang, Yawshu gaw Israela amyu hta na aprat kaba ai masha ni, ningbau ningla ni yawng hte tara agyi ni yawng hpe shaga la nna, "Ngai gaw aprat kaba nna dingla wa sai, nanhte a Karai Kasang gaw, nanhte a matu, ndai amyu masha ni yawng hpe galaw sai hte maren, nanhte chye manit dai, Karai Kasang gaw nanhte hpang maga nga nna hpyen gasat sai. Dai re ai majaw, nanhte gaw Mawshe a tara kanu shi hta na pai de hkra de n yit shangun ai sha, rawng marawng yawng hte hpe hkan shatup na matu mung, nanhte hta naw ngam nga ai ndai masha ni hte n kanawn mazum na lam mung, shanhte a hpara lam ni hpe hkan nna n dagam ai sha nawku ai lam n hkan galaw, dai ni du hkra hkan sa nga ai hte maren, nanhte a Yehowa Karai Kasang hta manoi nga na matu, myit nden hpe shaja mu, hpa majaw nga yang hkum hkrang grai kaba ai hte n gun grai ja ai masha ni hpe Karai Kasang gaw, nanhte a man na gawt shapraw kau sai rai nna, dai ni du hkra nanhte a man e, kadai mung n tsap nga lu masai. Nanhte hta na marai langai sha rai timung, kaga masha marai hkying mi hpe jahtaw kau lu na ra ai. Kanning rai nme law, nanhte a Karai Kasang gaw, ga sad i dung nga ai hte maren, nanhte hpang maga de hpyen gasat nga ai. Dai majaw Yehowa Karai Kasang hpe hkrit hkungga ai hte ga sad i dung nna Karai Kasang hpe nawng jau nga mu; Hka wora hkran na hte Egutu mung e nanhte a ji wa ni nawku nga ai hpara ni hpe kau da nna, ahkrung nga ai Yehowa Karai Kasang hpe sha nawku nga mu. Shing n rai Yehowa Karai Kasang hpe n naw n ku yang gaw, hka wora hkran na ji wa ni nawku nga ai hpara ni hte ya nanhte nga ai

mung na Amori masha ni a hpara ni hta kaning ngu ai hpara hpe mahtang nawku mayu ai lam hpe dai ni lata la mu; Ngai hte nye a nta masha ni gaw, Yehowa Karai Kasang hpe chyu sha nawku kam sham na,” ngu tsun wu yang shawa masha yawng hte mung, “Anhte a Madu Yehowa Karai Kasang hpe nawku kam sham nna shi a ga hpe madat mara na ga ai,” ngu nna yin la shajang mu ai.

Dai hpang Yehowa Karai Kasang a mayam wa Nun a kasha Yawshu gaw, asak latsa e shi ning du yang si mat wa sai rai. Ehprim bum ga rai nga ai Gasha kawng a dingdung maga e nga ai shi a lamu ga sali Timnat-sera mare ginwang na ga hta makoi mayang manu ai.

Yawshu a maumwi labau lam ni hpe grau nna chye lu na matu Yawshu laika hta hti yu mu ai rai.

## **GIDON A MAUMWI**

Yawshu nnga mat ai hpang shaning tsawmra wa mi na wa ai hpang, Israela amyu masha ni gaw, Karai Kasang a man e n hkru n shawp ai amu galaw ma ai rai nna, dai masha ni hpe Midian masha ni a lata hta ap ya kau wu ai. Midian masha ni gaw Israela masha ni hpe zingri zingrat mu ai rai nna, Israela amyu masha ni gaw, bum ga hkan e ginlawng hku ni galaw nna rawng nga shajang ma ai. Bum masha ni a htung hte maren hkauna ni hpe galaw lu, galaw sha ma ai hte nga nga ma yang Midian masha ni gaw hpyen laba hte rawt sa wa nhtawm, dap jung let nsi nai si ni hpe jahten kau ya ai hte sagu, bainam hte yam nga lawze re ai ni yawng hpe langai mi pyi n ngam da ya ai sha la mat wa ya mu ai.

Kalang mi na Gidon mying ai Israela masha langai mi gaw shi a mam ni hpe Midian masha ni n mu lu na matu tsabyi kabye ai shara makau e mam ni hpe kabye nna, nga nga yang Karai Kasang a lamu kasa langai mi gaw shi a hkum hpe madun dan let, “Atsam hte hpring ai share wa e,” ngu nna shaga nhtawm, “Karai Kasang gaw nang hte rau nga nga ai,” ngu wu ai. Gidon mung “Madu, Yehowa Karai Kasang gaw ngai hte rau nga nga ai teng yang gaw hpa lam a majaw ndai zawn rai na rai ni? Ya gaw Madu Karai Kasang gaw anhte hpe kau da nna Midian masha ni a lata de ap kau sa hka?” ngu nna bai htan wu yang, Karai Kasang gaw shi hpe yu yu nna, “Ya nang lu ai pahtau hpe la nna sa wa su; nang gaw Israela masha ni hpe Midian masha ni a lata kaw na shaw la na rai n dai; nang hpe ngai shangun dat ai n rai ni?” ngu nna tsun wu yang, Gidon mung, “Madu e, ngai gaw Israela amyu masha ni hpe Midian masha ni a lata kaw na, kaning rai shaw la lu na rai ta? Amyu hku hkan na mung, grit htum ai wa rai nga nngai,” ngu nna htan wu yang, Karai Kasang gaw shi hpe n gun bai jaw nna Gidon gaw, “Ngai gaw na a man e myi man pa nngai rai yang gaw, ngai lang mi bai sa nna lusha shahpa ni hpe nawng jau na matu, la sa let Madu a man e rai n tawn yang, ndai shara kaw nna rai hkum wa mat u,” ngu nna tawngban tsun wu yang, “Nang bai sa ai ten du hkra ngai naw la nga na nngai,” ngu nna tsun wu ai.


Dai shaloi Gidon gaw wa nna bainam kasha langai mi sat lajang nhtawm shan hpe ka hta bang nhtawm, lamu kasa nga ai shara wamyi hpun nhppang de la sa nna sak wu ai.

Shaloi lamu kasa mung, “Na a shan hpe la nna nlung ntsa e mara tawn da u,” ngu nna tsun wu ai. Shaloi Gidon mung hkan galaw wu ai. Shaloi lamu kasa shi a dawkrawng hpe la nna dai shan hpe ahtawk wu ai rai nna nlung kaw nna wan pru wa ai hte dai shan hpe hkru kau wu ai. Dai hpang lamu kasa mung, mat mat wa wu ai.

Dai hpang Midian mung masha, Amalek masha ni hte sinpraw maga na masha ni yawng hte gaw jawm hpawng ai hte bawng la ngut jang, Yezrela hkaraw hpe rap nna dap jung let nga nga ma ai. Dai shaloi Gidon gaw, shara shagu de kasa ni hpe shangun dat ai hte shi a pahtau hpe dum dat wu ai. Shaloi Israela masha ni gaw, hkan nang sa wa shajang ma ai. Gidon mung Karai Kasang hpe, “Nang Madu hkang da ai hte maren, ngai hpe karum nna, Israela amyu masha ni hpe hkye la lu na lam teng yang gaw, ngai gaw sagu kasha langai mi a hpyi hpe chyarang hta hpyan tawn na nngai, dai shaloi sagu mun hta mari hte madi nna ga ting gaw hkraw hkun nga ai rai yang gaw hkang da ai hte maren hkan galaw na lam, chye lu n ga,” ngu nna hpyi wu yang hpyi ai hte maren byin wu ai. Shingrai jahpawt jau jau rawt nna, sagu hpyi hpe shup yu yang mari gaw ang dung hpring hkra rawng pru wa wu ai.

Bai Gidon gaw, “Masin hkum pawt et, lang mi bai naw hpyi nem tawngban na nngai; sagu langai mi a mun hte ya lang mi naw chyam yu na matu, ahkang naw jaw rit, ga ting gaw mari hte madi nga nna sagu mun gaw hkraw hkun nga u ga,” ngu nna hpyi nem wu yang Karai Kasang gaw lamu ga ting gaw mari hte madi nga nna sagu mun gaw hkraw hkun nga lu ai. Gidon gaw jahpawt jau jau rawt nna hpyen la nga manga hte hte Midian dap makau e dap jung nna nga wu ai. Karai Kasang gaw “Nang hta lawm ai masha ni gaw grai law nna shanhte a lata hta Midian masha ni hpe ngai n ap lu nngai; shing rai nau law yang gaw Israela masha ni gaw, nye a lahpum gaw ngai hpe hkye la na re ai, nga nna gumrawng na mara ai. Dai rai nna hkrit ai masha ni kadai rai timung, jau jau bai nhtang wa mu ga, ngu nna masha ni hpe jahtau

u,” ngu nna Gidon hpe hkang da wu ai. Shingrai Karai Kasang hkang da ai hte maren, Gidon jahtau wu yang hpyen masha mun lahkawng e hkying lahkawng bai nhtang mat wa ma ai rai nna, mun mi chyu sha ngam mat wu ai. Bai Karai Kasang gaw, “Ya mung masha ni nau naw law ai, dai masha ni hpe hka danam de woi sa su, dai masha ni hpe ngai na a matu naw chyam yu na nngai,” bai ngu wu ai. Gidon mung dai ngam nga ai masha ni hpe hka danam de woi sa wu ai rai nna, “Gwi ni hka hpe mata lu ai zawn, hka hpe shinglet hte mata lu ai hpung mi, lahput hput di nna hka lu ai hpung mi, rai nna masha hpung lahkawng lata da u,” ngu nna bai hkang da wu ai.



Dai shaloi tinang a lata hte hka dagawt lu ai masha marai masum tsa lawm ma ai. Yehowa Karai Kasang mung, “Hka hpe dagawt lu ai masha masum tsa a lata hta ngai Midian masha ni hpe ap ya na nngai,” ngu nna tsun wu ai. Dai shana jang Karai Kasang gaw, “Rawt nna Midian masha ni a dap nga ai de rawt sa wa mu, na a lata hta ngai ap ya na nngai, nden n ja yang gaw na a mayam wa Pura hte dai dap de naw sa su, shanhte kaning nga tsun ai ga

hpe na la lu na rai myit dai; dai hpang dap nga ai shara de lung wa na matu, na a lata atsam rawng na ra ai,” ngu nna Karai Kasang tsun wu ai hte maren, Gidon gaw shi a mayam wa hte hpyen ni a dap jung nga ai shara makau na hpyen yu ai shara du jang shabrang langai mi gaw, shi mu ai yup mang a kumla ni hpe shi a manang ma ni hpe tsun dan wu ai gaw, “Ngai mu ai yup mang gaw, muk pa langai mi gaw kaleng hkrat wa nna Midian masha ni a sum langai mi hpe hkra wu ai rai nna, dai sum gaw hten run mat wa ai hpe mu nngai,” ngu nna tsun dan mu yang shi a manang wa gaw, “Manang wa e, dai gaw kaga nrail, Gidon a nhtu laknak rai nga ai; dai wa a lata hta Karai Kasang gaw Midian amyu masha ni hte Midian hpyen luksuk yawng hte hpe ap kau na ra ai” ngu wu ai. Dai ga hpe na ai shaloi, Gidon gaw bai nhtang wa nna, “Nanhte ni yawng hte rawt mu, Karai Kasang gaw Midian masha ni yawng hte hpe anhte a lata hta ap ya sai,” ngu wu yang masum tsa re ai hpung ni hpe masum bram di karan nna, langai hpra hpe pahtau hte wan rawng ai dibu langai hpra lang shangun let, rawt sa wa mu ai.

Dap a shinggan de du wa ma yang Gidon gaw, “Ngai galaw ai hte maren nanhte mung hkan galaw na rai myit dai; ngai pahtau dum dat ai shaloi, dai dap a grup yin de nanhte mung, pahtau hpe dum let Yehowa Karai Kasang hte Gidon a nhtu law, ngu nna jahtau garu na rai myit dai,” ngu nna hkang da wu ai. Dai zawn masum tsa re ai hpyen hpung ni gaw sa wa nna shana yup tung hpawa re ai aten hta dap jung nga ai shara de du ma yang, pahtau dum shajang ma ai hte shanhte hta lawm sa ai wan kawk rawng ai di bu ni hpe kayat ga nhtawm, pai lata de wan kawk lang, hkra lata de pahtau lang rai nna, pahtau dum let, “Yehowa Karai Kasang hte Gidon a nhtu law,” ngu nna jahtau shajang ma ai. Shaloi Midian hpyen hpung ni gaw jahtau garu ai nsen ni hpe na ai hte jahtau nna hprawng bra mat shajang ma ai.



Dai shaloi Israela masha ni gaw, shara mi hte shara mi kaw nna masha ni yawng shinggyin wa nhtawm, Midian masha ni hpe hkan shachyut let gasat mu yang Midian dap yawng hpe gasat jahtum kau mu ai. Shing rai Midian masha ni gaw, Israela masha ni a man e sum mat malu ai rai nna, hpang de mung shanhte a mare hpe bai up hkang lu masai n rai. Gidon a lakhtak hta shaning mali shi ning tup dai mungdan gaw asim sha nga pyaw masai rai.

Gidon gaw dai hpyen gasat ai amu ni ngut mat ai hpang shi a nta de bai nhtang wa nna, nga let asak aprat kaba wa sai rai nna si mat wa sai. Shingrai Abiezra a kashu kasha ni a mare Ohpra e kawa Yoasha a lup hta shi hpe makoi mayang di manu ai rai.

Gidon a labau maumwi lam hpe Tara Agyi laika Dawkaba 6-8 hta hti yu mai ai rai.

## SAMSON A MAUMWI

Israela kashu kasha ni gaw Yehowa Karai Kasang a man e, n shawp ai hte n hkru ai amu galaw ma ai rai nna, Yehowa Karai Kasang gaw shanhte hpe Hpilisti masha ni a lata hta shaning mali shi ning tup ap kau ai hkrum mu ai.

Dai shaloi e, Zora mare na Dan amyu masha Mano ngu ai wa langai mi nga ai. Shi a madu jan gaw, maudung num rai nna kasha n shaprat wu ai. Ya Yehowa a lamu kasa gaw, dai num kaw dan pru nna “Ya, yu u, nang maudung dung nna kasha n shaprat ndai rai timung nang na-um nasin rai nna shadang sha shangai na rin dai. Dai re ai majaw sadu u, tsabyi hkum lu et, chyaru mung hkum lu et, n san n seng ai baw hpa mung hkum sha et, nang na-um nasin rai nna shadang sha shangai na rin dai; dai ma gaw hkritung nna Karai Kasang a Naziri masha rai na ra ai majaw, shi a baw doi ya lu na nrail; shi gaw Israela hpe Hpilisti masha ni a lata na hkye la hpang na ra ai,” ngu nna tsun wu ai.

Dai hpang Yehowa Karai Kasang a lamu kasa tsun ai hte maren, Mano a madu jan gaw shadang sha langai mi shaprat wu ai rai nna, shi hpe Samson ngu nna shamying wu ai. Dai ma mung kaba wa nna, Yehowa Karai Kasang a shaman ya ai hkam la wu ai. Ya Samson gaw Timna de yu wa nna dai yang na Hpilisti num langai mi hpe mu wu ai. Shaloi shi bai wa nna kanu kawa hpe “Timna e Hpilisti num langai mi mu da se ai; nye a matu hpyi ya mi,” ngu nna tsun wu ai. Shaloi kanu kawa ni gaw, “Hpilisti num la na gaw n mai nga ai, anhte a amyu hta nang la na num langai pyi n nga sani?” ngu nna tsun wu yang, Samson gaw, “Re ai,” ngu nna yin la wu ai. Rai timung Samson gaw dai numsha hpe grai tsaw ra wu ai rai nna ahkang lu ai ten du hkra kanu yan kawa hpe hpyi tawngban wu ai.

Shaloi Samson gaw kanu yan kawa hte rau Timna de du wa yang Timna na tsabyi sun ni de du jang hkanghkyi uram langai mi shi hpe shabam htim wu ai. Shaloi shi alata hta hpa n lang timung Yehowa a Wenyi shi hta aja awa du nna hkanghkyi dai hpe gang je kau wu ai. Shi galaw ai lam kanu kawa hpe mung n tsun dan wu ai.



Shaloi Samson dai numsha kaw sa chyai nna, shi e grai tsaw ra wu ai. Dai hpang kade nna yang num dai hpe hkungran na sa wa ai shaloi, hkanghkyi mang sa yu na numshe shang nna yu yu yang hkanghkyi hkrang kata e lagat shang nna lagat jahku rawng nga ai mu wu ai. Shaloi shi manaw la nna sha let sa wa ai. Kanu kawa hpe mung wa jaw nna shan mung sha ma ai. Rai timung lagat jahku dai hkanghkyi kata na re ai gaw n tsun dan mu ai.

Kawa mung dai numsha hpang de sa ai rai nna Samson gaw, shabrang ni a htung hte maren, poi galaw wu ai. Shanhte shi sa ai mu jang shi kaw poi shang lawm na manang sumshi shaga ya wu ai. Shaloi Samson gaw, “Ngai nanhte hpe gumwai ga hkaw mi tsun yu made ga, ndai poi nhtoi sanit ya hta nanhte htai dan lu yang, lachyit hpa jawng sumshi, palawng nnan sumshi ngai jaw na made ai, n htai lu myit yang gaw nanhte ngai hpe lachyit hpa jawng sumshi, hpun palawng nnan sumshi jaw lu na rai myit dai,” ngu wu ai. Shanhte mung “Mai ai le, na a gumwai ga anhte hpe

tsun yu mi,” ngu nna hkam la ma ai. Shaloi shi gaw, “Sha chye ai wa a kata na shahpa, n gun ja ai wa a kata na dwi ai apa pru ai hpa,” ngu nna san wu ai.

Gumwai de a lachyum hpe shanhte masum ya tup myit timung n chye ma ai. Ya sanit ya n htoi hta shanhte gaw Samson a madu jan hpe, “Na a madu wa anhte hpe gumwai ga lachyum tsun dan hkra shi kaw na akrawk la u, dai n rai yang, nang hte hpawn nanhte a dap hpe nat kau na gaw ai; anhte a arai kashun la na nga anhte hpe shaga ai rai myit ni?” ngu nna shama mu ai. Dai majaw Samson a madu jan shi a man e hkrap nna, “Nang ngai hpe tsaw ai n rai ndai, n dawng ai she rai ndai, nye a amyu masha ni hpe gumwai wai nhtawm ngai e pyi n tsun dan ndai,” ngu wu ai. Shi chyawm gaw “Ngai nu, ngai wa hpe pyi n tsun dan nga yang me, nang hpe tsun dan na rai ni?” ngu nna shi hpe tsun wu ai. Rai timung, poi n htoi sanit ya tup madu wa a man e ahkrap nga ai rai nna sanit ya shani e chyawm gaw, shi nau aput ai majaw tsun dan kau wu ai. Shi mung shi a amyu masha ni hpe gumwai lachyum dai sa tsun dan wu ai. Shaloi mare masha ni gaw sanit ya shani e jan garai n du yang sa nhtawm, “Lagat jahku hta hpa grau dwi ata? Hkanghkyi hta hpa grau ja a ta?” ngu nna htai mu ai.

Dai rai nna shi gaw “Nanhte nye a nga upra hte n galau yang kanang na nye a gumwai lachyum mi n mu law,” ngu nna shanhte hpe tsun mu ai. Ya Yehowa a Wenyi shi hta aja awa du nna shi Ashakelon de sa nna, mare masha sumshi hpe sat kau nhtawm dai masha ni a arai shi kashun la nna, gumwai lachyum htai ai ni hpe labu hte palawng yep yep wa jaw kau nhtawm, shi masin pawt let shi kawa a nta de sa mat wa wu ai. Samson a madu jan hpe chyawm gaw shi a kanawn manang wa hpe ya sha kau mu ai.

Dai hpang hkaulan mam dan ai aten e, Samson gaw bainam kasha dun let shi a madu jan hpe kawan yu na sa wu ai. Shaloi shi gaw, “Gawk de nye a madu jan hpang de shang yu n ga,” ngu wu yang katsa wa chyawm gaw n hkraw ai hte, “Nang ngai sha hpe teng teng n dawng nu ai, ngu nna ngai myit nngai majaw, na a manang wa hpe ya sha kau se ai. Rai timung shi a kanau shi hta grau tsawm nga ai n rai ni? kana jan a malai kanau jan hpe la u,”

ngu nna tsun wu ai. Dai rai nna Samson gaw, “Hpilisti masha ni hpe ndai lang mi n sam dat yang ngai hta mara shagun shara n nga na malu ai,” ngu nna shanhte hpe tsun wu ai. Dai hte maren shi sa wa nna, nam gwi masum tsa rim la nhtawm shingnan tam la let dai gwi ni a nmai hpe lahkawng yep yep di nna shajup kayep let, de a lapran e wan shingnan shakap nna dai shingnan hta wan shachyi ngut jang, Hpilisti masha ni a yi de dat dat ya wu ai. Dai rai nna mam hte mam hkauling mung, tsanlun sun ni mung hkru mat malu ai. Shaloi Hpilisti masha ni gaw, “Ndai gaw kadai di ai rai ta?” ngu nna san hkat shajang ma yang “Timna na wa a kakhri Samson di ai rai nga ai; shi a madu jan hpe shi a manang wa hte ya sha kau ya ai majaw rai nga ai,” ngu nna tsun dan mu ai. Shaloi Hpilisti masha ni sa wa nna dai numsha yan wa hpe nat kau wu ai. Dai majaw Samson gaw, Nanhte dai hku galaw myit yang gaw ngai mung masin si hkra naw galaw na nngai,” ngu nna shanhte hpe tsun ai hte rau shanhte yawng hpe sat kau mu ai. Dai hpang Samson gaw yu wa nna Etam e nga ai lungpu hku hta sa rawng nga mat wu ai.

Dai hpang Hpilisti masha ni gaw Samson hpe gyit la na matu Yuda mung de hpyen daw wa hte lung wa ma yang, Yuda masha marai hkying masum gaw Etam shara na lungpu hku de sa du nna, Samson hpe gyit la nhtawm, Hpilisti masha ni a lata de ap kau dat ya mu ai. Shingrai Samson hpe lu la jang, Hpilisti masha ni gaw garu jahtau ma yang Yehowa a Wenyi gaw shi kaw aja awa bai du nna, shi a lata hta kap ai sumri ni gaw wan kap ai lachyit zawn dut mat wa nna shi a lata na sumri ni yawng raw mat wa malu ai. Shi mung dai yang lawze shakap katsing mu hta la wu yang, dai hpe hta la nna masha hkying mi sat kau wu ai.

Dai hpang Samson gaw Gaza mare de sa wa yang shawa num langai mi hpe mu hkrup nna dai yang e shang nga wu yang, Samson du ra ai, nga nna Gaza masha ni hpe sa shana ya mu ai. Shaloi shanhte wang tawn ai hte shana tup mare chyinghka ni hta lagyim hkap nga nna n htoi htoi jang she shi hpe sat na ga ai, nga nna tsun let shana tup asim sha nga nga ma ai. Samson chyawm gaw yuptung du hkra yup la nna mare chyinghka ni hpe hkadun lahkawng hte httinggrang hpe pawn malaw la nna lahpa hta mara

hpai wa nhtawm, Hebron mare tawtap na bum jinghkang e wa tawn kau da ya mu ai.

Dai hpang Samson gaw, Sorek kadit e nga ai Delila mying ai num langai mi hpe tsaw ra wu ai. Shaloi Hpilisti du ni gaw dai num hpang de sa nna, “Samson a n-gun kaba gaw hpa hta madung ai kun? Shi hpe dip nna gyit la lu hkra kaning di yang she mai na kun? Shi hpe abawk nna sagawn yu u, anhte nang hpe gumhpraw hkying mi latsa hpra jaw na ga ai,” ngu nna tsun mu ai. Dai rai nna Dalila mung Samson hpe “Nang hta rawng ai n-gun kaba gaw hpa hta madung ai mung, nang hpe dang hkra kaning rai nna gyit yang sha dang na lam hpe mung ngai hpe tsun dan rit,” ngu nna tsun wu yang, Samson gaw, Garai n hkraw mat yu ai yang lasa katsing sumri sanit hte ngai hpe gyit hkang yang ngai hta n-gun daw mat nna, masha gale zawn rai mat na ring ngai,” ngu nna shi hpe tsun dan wu ai.

Shaloi Hpilisti du ni gaw, rai n hkraw mat yu ai yang lasa katsing sumri sanit la sa ya mu ai rai nna, dai numsha gaw dai sumri hte shi hpe gyit tawn wu ai. Dai shaloi numsha gaw nhku gawk e masha lagyim tawn da nhtawm shi gaw, “Samson e, Hpilisti masha ni nang hpe htum mara ai,” ngu wu ai. Samson chyawm gaw dai sumri ni hpe wan kap ai sumri hpe zawn gang dut kau ya mu ai.

Dai shaloi Delila gaw, “Nang ngai hpe shatu nna masu ai sha rai nga ndai, nang hpe kaning rai gyit yang dang na lam ngai hpe tsun dan e,” bai ngu wu ai. Samson gaw “Galoi mung garai n lang yu ai sumri hte gyit hkang yang shaloi masha gale zawn, rai mat na ring ngai,” ngu nna bai tsun dan wu ai. Dai shaloi Delila gaw, garai n lang yu ai sumri nnan hte gyit tawn da nna, “Samson e, Hpilisti masha ni nang hpe htum mara ai,” ngu nna bai tsun wu ai. Lagyim tawn da ai masha ni chyawm gaw nhku gawk kata e rawng nga ma ai. Samson gaw shi a lahpum na sumri hpe ri samyan hpe zawn gang dut kau ya mu ai.

Bai, Delila gaw Samson hpe, “Ya du hkra nang ngai hpe shatu nna masu kau nit dai, nang hpe kaning di gyit na lam tsun dan e,” ngu wu yang Samson gaw “Nye a kara shan tsing sanit hpe da shan hta da shalawm yang rai na re,” ngu nna bai tsun dan wu

ai. Shaloi dai num gaw Samson tsun ai hku hkan nna, da lim hte da hku bang nhtawm, “Samson e, Hpilisti masha ni nang hpe htim mara ai,” ngu wu ai. Shi mung yup ai kaw na hprang nna da rung, da rai, da shan ni hte hpawn gang di dun mat wa wu ai.

Dai re ai majaw numsha gaw shi hpe, “Nang ngai hpe tsawra ai nga nna myit n lawm ai sha hpa rai tsun nta? ya masum lang shatu nna ngai hpe masu nit dai, na a n-gun kaba gaw hpa hta madung ai lam n tsun dan hkraw ndai,” bai ngu wu ai. Shingrai shani shagu aput shatsang ai majaw si na daram shi myit ru wu ai. Dai rai nna shi a myit hta rawng marawng mahkra tsun dan wu ai gaw, “Ngai gaw nu a hkri tung kaw nna Karai Kasang a Naziri masha rai nga nngai majaw, nye a kara lang mi mung n doi yu nngai; nye a kara doi kau ya yang nye a n-gun daw mat nna gawng kya mat ai hte masha gale hte maren sha rai na ring ngai,” ngu nna bai tsun dan wu ai.


Shing nga nna shi a myit hta rawng marawng tsun dan ai lam hpe Delila chye wu yang, Hpilisti du ni hpe “Ya kalang mi naw sa yu marit, shi a myit hta rawng marawng ngai hpe tsun dan ni ai,” ngu nna bai shaga dat wu ai. Dai rai nna Hpilisti du ni mung gumhpraw gun let shi kaw sa du ma ai. Shaloi Delila gaw Samson hpe shi a lahpyen hta yup shangun nna masha langai mi hpe shaga la nhtawm, shi a baw na kara shan tsing sanit hpe kadoi kau ya mu ai. Shing rai ngut jang shi hpe dip gyit hkang wa manu ai rai nna shi a n-gun daw mat lu ai.

Dai num gaw, “Samson e, Hpilisti masha ni nang hpe htim mara ai,” ngu wu ai. Shaloi shi yup hprang nna “Shawoi na hte maren ngai pru wa nna n-gun dat we ga,” nga nna tsun wu ai. Rai timung Yehowa shi hpe tawn kau nu ai gaw, shi n chye wu ai. Dai rai nna Hpilisti masha ni gaw shi hpe rim la nhtawm shi a myi achyaw baw kau ya mu ai. Shing di Gaza mare de la wa nna magri sumri hte gyit tawn let htawng kata e htumrin rin shangun mu ai.

Samson gaw htawng e rawng nga yang shi a kara gaw shawng de na zawn bai galu wa lu ai. Lani mi hta Hpilisti du ni gaw, “Anhte a hpara gaw anhte a hpyen wa Samson hpe anhte a lata de ap ya mani ai,” nga nna shanhte a hpara Dagon hpe hkungga kaba jaw na hte padang poi galaw na matu zup hpawng

galaw nga ma ai. Masha ni yawng hte gaw Dagon hpara hpe shakawn ai hte myit pyaw bu nga ma yang, "Samson hpe woi wa marit, anhte a man e ginsup dan u ga," nga ma ai. Shingrai Samson hpe htawng na woi wa mu ai rai nna shi shanhte a man e ginsup nga ai. Shi hpe dai jawng shadaw lapran e tawn da mu ai. Shaloi Samson gaw, "Ngai shadaw hta shamyet nga n ga, nye a lata hpe shadaw hte jahkrum ya e," ngu nna shi hpe gyit dun ai masha ni hpe tsun wu ai. Dai nta hta numsha lasha hpring chyat rai nga ma ai. Hpilisti du ni nlang hte mung lawm nga ma ai. De a ntsa htap hta mung, numsha lasha hkying masum daram Samson ginsup ai yu nna de nga shajang ma ai.

Shaloi Samson gaw, "Yehowa Madu e, ngai hpe dum e law, nye a myi lahkawng maga baw kau ya ai ndai Hpilisti masha ni hpe lang lata matai htang lu n ga, Karai Kasang e ndai lang sha mi n-gun shaja ya e law," ngu nna Yehowa hpe hpyi shaga wu ai. Shing nga hpyi ngut jang, dai jawng a magaw daw yan hpe apai ahkra hpra di nna ahpum da let, "Hpilisti masha ni hte rau ngai si wa ni ga," nga nna tsun let, gum nna n-gun shaja dat wu ai. Shaloi dai nta gaw du ni a ntsa e mung, dai hta rawng ai ni yawng a ntsa e mung, daw agrawp kamyet sat mu ai.



Shingrai hkrung nga yang sat kau lu ai hta si ai shani grau law nna sat kau wu ai. Shaloi shi a kanau ni hte shi a nta masha ni nlang sa nna shi a moi mang sa hpai la nhtawm Zora hte Eshtaola lapran na kawa Mano a lup hta lup makoi da mu ai.

Shi gaw Israela amyu hpe hkun ning tara dara ya wu ai rai. Samson a labau maumwi hpe Tara Agyi laika Dawkaba 13-16 laman hta hti yu mai ai rai.

## SAMUELA A MAUMWI

Moi shawng de Elakana ngu ai Ehprim masha langai mi nga ai. Dai wa gaw Karai Kasang hpe hkrit hkungga chye ai num langai mi lu wu ai. Dai num a mying gaw, Hana rai lu ai. Dai yan gaw laning hte laning rai nna, shaning law law wa kanawn mazum let nga ma ai rai timung, dai num hta kashu kasha n shaprat wu ai majaw Elakana gaw shanhte a mung hta htung nga ai hte maren, num kaji langai mi bai la wu ai. Dai num a mying gaw Penina rai lu ai. Dai num chyawm gaw kashu kasha law law shaprat wu ai. Dai num gaw Hana masin pawt hkra lam law law galaw wu ai. Dai num a jahpoi asawng ai law law hkam sha ai majaw, Hana gaw shat lu sha n sha hkra rai nna nga wu ai.

Shingrai shat lusha n sha hkra rai nna hkrat nga ai hpe madu wa Elakana gaw mu wu yang, “Nang hpa majaw hkrat nga n ta? hpa majaw myit ru myit tsang nga n ta? shadang sha marai shi nga ai hta ngai gaw na a matu grau kaja ai n rai ni?” ngu nna tsun wu ai. Shingrai Hana gaw rawt nna myi prwi katsut kau ai hte Karai Kasang hpe hpyi wu ai gaw, “Zaw nawng Zaw wa up ai Madu Yehowa e, na a mayam jan hpe n malap kau ai sha, na a mayam jan a matsan shagoi hpe mada mara dum ya nna, na mayam jan hpe shadang sha jaw n yang gaw shi a kara galoi mung n doi ya ai sha, shi a prat dingsa nang Madu Yehowa hpe ap ya na nngai,” ngu nna shaka hpyi wu ai. Shingrai Yehowa gaw Hana hpyi ai hte maren, lajang ya wu ai rai nna, shadang sha shangai wu ai. Dai shadang sha hpe Samuelia ngu nna shamying ya mu ai.



Hana gaw, asak naw kiji ai kaw nna dai ma kiji hpe Shilo mare hta nga ai Yehowa a nta de woi lung wa nna, myihtoi Eli kaw ap let, "Ndai ma kiji gaw ngai Karai Kasang kaw hpyi nna lu la ai kasha rai li ai majaw, shi hpe si ai nhtoi du hkra, Yehowa a matu jaw da ai rai sai," ngu nna tsun wu ai. Dai hpang Elakana hte Hana gaw Rama shara e nga ai shanhte a nta de bai wa mat ma ai. Ma dai mung myihtoi Eli a man e, Karai Kasang a amu gun hpai let nga wu ai.

Lang mi na Samuela gaw Karai Kasang a sumpu nga ai Yehowa a nta e yup nga yang, wan kawk rai n sat ai ten hta Yehowa gaw Samuela hpe shaga wu ai. Samuela gaw, "Ngai nga nga nngai," nga nna htan let Eli hpang de gat wa nna, "Nang shaga ai majaw wa ring ngai," ngu wu ai. Eli gaw, "Ngai n shaga nngai, naw yup nga su," ngu wu ai. Shaloi shi wa nna bai yup nga ai. Bai, Yehowa gaw, "Samuela e," ngu nna bai shaga wu ai. Samuela mung rawt nna Eli hpang de wa nhtawm, "Nang shaga ai majaw wa ring ngai," ngu wu yang Eli gaw, "Ngai sha e, ngai n shaga nngai bai naw yup nga su," ngu dat wu ai. Ya Samuela gaw Yehowa hpe garai n chye wu ai. Yehowa mung shi a ga shi kaw rai

n shapraw yu wu ai. Masum lang ngu na hta Yehowa gaw Samuela hpe shaga wu ai. Shi mung rawt nna Eli hpang de wa nhtawm, “Nang shaga ai majaw wa ring ngai,” ngu wu yang dai ma hpe Yehowa shaga ai gaw Eli dum wu ai. Dai re ai majaw Eli gaw Samuela hpe “Naw wa yup nga su, ya na lang bai shaga jang, Yehowa e, tsun rit, na a mayam madat nga nngai, ngu nna htan u,” ngu dat wu ai. Shingrai Samuela bai wa nna shi a shara e bai yup nga ai.



Shaloi Yehowa sa tsap nna shawng na zawn, “Samuela, Samuela” nga nna shaga wu ai. Samuela mung, “Tsun rit, na a mayam wa madat nga nngai,” ngu nna htan wu ai. Shaloi Yehowa gaw Samuela hpe “Yu u, ashi na mana ni yawng, ana maga lahkawng kachyeng hkra Israela amyu hta ngai amu lama mi shapraw na nngai; dai shani e Eli a nta masha ni hpe ngai te nna tsun matsun hte maren npawt nna ndung hkren ngai shapraw na nngai. Kanning rai nme law, dai wa a kasha ni tinang hkum shayuk ai du hkra, tinang a n shawp ai amu hpe chye ninglen, shan hpe n hkum kau ai majaw, shi a nta masha ni hta ngai tut tut ari jaw na,

ngu nna ngai tsun se ai. Dai re ai majaw Eli a nta masha ni a yubak gaw, hkungga hte shadung kumhpa e sha shaprai lu sai n rai; tut tut rai nga nu ga, ngu nna shanhte a lam ngai dagam kau se ai,” ngu wu ai.

Samuela chyawm gaw jahpawt du hkra yup nga nna, Yehowa a nta chyinghka ni hpaw wu ai. Dai shingran Eli hpe tsun dan na Samuela n wam wu ai. Shaloi Eli gaw, “Ngai sha Samuela e,” ngu nna Samuela hpe shaga wu yang shi gaw, “Nga nga nngai” ngu nna htan wu ai. Bai Eli gaw, “Hpa lam tsun a ta? Ngai e hkum ip da et, Karai Kasang nang hpe tsun matsun hta na lama mi ip da n yang gaw, shi tsun ai hta n ga, nang hpe di u ga,” ngu wu ai. Samuela mung lama mi mung n ip da ai sha, atsai awai tsun dan wu ai. Eli gaw “Yehowa she rai nga ai gaw, shi ra ai hku galaw u ga,” ngu nna yin la wu ai.

Samuela chyawm gaw kaba wa nna Karai Kasang shi hte rau rai nga ai; shi a ga hkaw langai mi mung ga de jahkrat kau ya wu ai n rai. Samuela hpe madun dan ai Karai Kasang a shingran gaw, langai mi pyi n ngam da ai sha byin pru wa sai rai nna, Hpilisti masha ni gaw Israela masha ni hpe gasat mu ai rai nna, Israela masha ni hpyen sum nna Karai Kasang a sumpu mung Hpilisti masha ni e la mat wa ya mu ai. Eli a kasha Hopni yan Hpineha mung, hpyen ni a lata hta sat kau ai hkrum mu ai. Kawa Eli gaw, kasha yan hte sumpu lawm mat wa ai lam na jang, shi dung nga ai ting-nyang kaw nna shingdu de nga hkrat mat wa ai hte du daw nna si mat wu ai.

Shingrai Samuela a ga yawng hkum tsup ai hte byin wa ai majaw, Samuela gaw Karai Kasang a myihtoi majing rai nga ai lam hpe Israela mung ting, Dan mare kaw nna Berasheba mare du hkra, chye shajang mu ai. Dai prat hta Israela masha ni hta teng man ai hte Karai Kasang hpe nawku kam sham ai lam hte Karai Kasang a tara ni hpe hkan sa ai lam ni gaw grai yawm mat wa shajang masai rai nna, Samuela gaw shaning mali shi ning tup, Israela masha ni hpe n-gun atsam dat let, shinggyin lu ai daram shinggyin nna, “Anhte gaw hpara shaje naw ai Bala hpara, Ashadod hpara hpe jahten kau nna ahkrung nga ai Yehowa Karai Kasang hpe hkrit hkungga ai hte nawku kam sham myit yang gaw,

Hpilisti masha ni a lata na bai hkye la na ra ai,” ngu nna sharin shaga wu ai. Shawa masha ni mung Bala hpara hte Ashadod hpara ni hpe kau da nna ahkrung nga ai Karai Kasang hpe sha, nawku kam sham na saga ai, ngu nna yin la shajang mu ai.

Dai hpang Isreali masha ni gaw, Mizpa mare e zuphpawng nna Yehowa Karai Kasang hpe shut kau saga ai, nga nna tawng ban ma ai majaw, Samuela gaw shanhte a matu, Yehowa Karai Kasang kaw hpyi tawng ban ya wu ai. Dai shani e Israeli masha ni gaw, Samuela hpe tara agyi aya dang da manu ai majaw, Samuela gaw amu lam ra mara yawng hte hpe dara ya mu ai. Shingrai Israeli masha ni Mizpa mare e zuphpawng nga ai lam hpe Hpilisti masha ni na ma ai shaloi, hpyen rawt sa wa ma ai hpe Samuela na wu yang, shi gaw Yehowa Karai Kasang hpe hkungga nawng jau ya wu ai. Shingrai hkungga nawng jau nga yang Hpilisti masha ni gaw, ni sa wa ma yang Karai Kasang gaw shanhte a ntsa e mu ngoi ai hte mu achye shangun dat wu ai rai nna, Israeli masha ni a man e hpyen sum mat malu ai.

Dai zawn Hpilisti masha ni gaw, Israeli masha ni a man e hpyen sum ai hkrum ma ai majaw, Samuela naw nga nga ai prat tup shanhte lang mi mung hpyen n sa htim gwi ma ai. Samuela gaw Rama mare hta tut nawng e a nga nga nna, Betela mare, Gilgala mare hte Mizpa mare hkan e shaning shagu kawan hkawm let, amu lam shagu hpe san jep yu ai hte tara dara ya let nga wu ai. Samuela mung asak aprat kaba wa nna, dingla wa ai hte hkawm sa na n-gun n rawng wa wu yang shi a kasha yan lahkawng hpe Israeli mung ting hta up hkang na ahkang aya jaw da nu ai. Rai timung kasha yan gaw, kawa a hkang n hkan ai sha, myit marin lawhpa ai hte amu dara ai lam hta kumhpa sha ai hte tara n lang wa ma ai majaw, kawa galaw da ai lam shagu hpe jahten kau mu ai.

Dai hpang Israeli masha ni hta asak aprat kaba ai salang ni zuphpawng let Rama shara e nga ai Samuela nga ai shara de sa nna tsun mu ai gaw, “Nang madu mung asak aprat kaba sai hte dingla sai majaw, nang madu a kasha ni gaw, nang madu a lam hpe hkan ma ai n rai. Dai majaw htung nga ai hte maren anhte hpe up hkang na matu hkawkam langai mi san da u,” ngu mu ai. Dai ten hta Karai Kasang gaw shi nan san da ai tara agyi ni hpe nan Israeli

masha ni hpe up hkang lam shading wa ai prat re ai majaw, shingrai hkawkam aya dang let, san da na lam hpe Samuela n ra wu ai hte maren Karai Kasang kaw akyu hpyi wu ai. Karai Kasang mung, “Nang hpe ndai masha ni tsun matsun madat u, shanhte gaw nang hpe kau ai n rai, ngai gaw shanhte a ntsa e n up hkang na matu, ngai hpe kau da ai she rai ma ai. Ya gaw nang shanhte a ga hpe madat u, rai timung shanhte hpe ga sad i jaw let shanhte hpe up hkang na ra ai hkawkam wa a htung tara hpe madun u,” ngu nna tsun wu ai.

Shaloi Samuela gaw hkawkam hpyi ai masha ni hpe Yehowa a ga htawn shana ya wu ai. Shi gaw, “Nanhte a ntsa e up na hkawkam wa a htung hking gaw ndai rai na ra ai. Shi nanhte a shadang sha ni hpe shaga la nna shi a leng ni, shi a gumra ni hta jawn na amu madun tawn nhtawm shi a leng ni a shawng de shanhte gat lu na rai ma ai. Bai shi a hpyen bu shatai nna hkying mi up na matu, manga shi up na matu, a ya tawn da na mu ai. Bai nkau mi hpe shi a yi hkauna galaw, shi a mam dan shu la na hte shi a hpyen ri nhtu, shi a hpyen leng shachyaw amu hta hpajang tawn na maru ai. Nanhte a shayi sha ni hpe mung shaga la nna shanhte hpe manam pyaw ai baw lajang ai ni, shat shadu ai ni, muk kabaw ai ni shatai na mara ai; nanhte a kaja htum ai yi hkauna, tsabyi sun, tsan lun sun ni hpe gare la nna shi a shangun ma ni hpe karan jaw na mu ai. Nanhte a nsi naisi hte tsabyi htam shi hta na htam mi shi la nna, shi a bu hkringmang ni hte shangun ma ni hpe jaw na mu ai. Nanhte a la yam, num yam ni hte kung grau ai shabrang ni hpe mung, nanhte a lawze ni hpe mung, gare la nna shi a makan galaw shangun na ru ai. Shanhte a sagu bainam hpung hta na, htam shi hta na htam mi, shi la na wu ai rai nna shanhte shi kaw yam na rai myit dai; nanhte hpyi la ai hkawkam wa a majaw dai shani e jahtau hkrap timung, Yehowa nanhte hpe madat ya sana n rai,” ngu nna shadum wu ai.

Mung masha ni chyawm gaw, Samuela a ga n madat ai sha, “N rai law, anhte amyu masha nlang hte bung hkra, anhte hpe tara dara ya na hte majan shani e anhte hpe woi awn nna gasat lu na matu, anhte a ntsa e up na hkawkam anhte ra nga ga ai,” nga ma ai. Shingrai Samuela gaw mung masha ni a ga mahkra na nna,

Yehowa kaw htawn tsun wu ai. Yehowa mung shanhte a ga hkan nna, “Shanhte a matu hkawkam sharawt ya u,” ngu wu ai. Dai rai nna Samuela gaw, Israela masha ni hpe, “Nanhte langai hte langai tinang a mare de naw wa manu,” ngu wu ai.

Ya Ben-yamin amyu hta Kisha ngu ai share ning hkring langai mi nga ai. Shi gaw shadang sha langai mi lu ai rai nna, shi a amying Shawlu rai nga ai. Dai wa gaw ahpraw nsam tsawm ai hte atsam rawng ai wa rai nga ai. Israela kashu kasha ni yawng hta dai wa zawn ahpraw rawng ai masha langai mi mung n nga ma ai. Ya Shawlu a kawa Kisha gaw lawze ni mat ai majaw, kasha Shawlu hpe, “Ma langai mi woi nna lawze sa tam masu,” ngu nna shangun dat wu ai. Shaloi shi gaw Ehprim bum ga hte Shalisha ga ting tam kau timung n mu mu ai. Bai shan gaw Shalim ga lai hkra tam timung dai yang e n nga malu ai. Dai kaw nna Ben-yamin ga ting bai tam timung n mu mu ai. Ya Zuhpa ga du jang Shawlu gaw, “Bai nhtang wa saga, dai nrail yang wa gaw lawze ni a majaw gaw myit n ru, an a majaw mahtang myit ru na sai,” ngu nna shi kaw hkan nang ai ma hpe tsun wu ai. Shaloi ma dai gaw, “Yu u dai mare e kajai gumhkawng ai Karai Kasang a masha wa langai mi nga ai; shi tsun matsun kang lu ai; shi hpang de sa saga, an sa ai lam shi madun lu a nhten,” ngu wu ai. Shawlu chyawm gaw, “Taw, an sa yang shi hpe hpa kumhpa shaw na rai; an gun ai muk mung ma sai; dai Karai Kasang a masha wa a matu kumhpa di na hpa mung n nga sai; hpa naw lu nga ga ta?” ngu nna shi a ma hpe htan wu ai. Ma gaw, “Ngai kaw gumhpraw hti lahkawng rawng nga ai, an hpe lam madun na matu dai Karai Kasang a masha hpe ndai jaw na re ai,” ngu nna Shawlu hpe tsun wu ai. [Moi prat e, Israela masha ni Karai Kasang kaw lama ma san na nga sa wa yang, “Sa, myi san wa hpang de sa saga,” ngu nna tsun chye ma ai. Ya na myihtoi ngu ai wa hpe moi prat e myi san wa nga ma ai.] Shaloi Shawlu gaw, “Ma e sa saga,” nga nna ma hpe htan let Karai Kasang a masha wa nga ai mare de sa wa ma ai.

Ya shan gaw mare ring hpung kadawng lung wa yang, hka ja sa ai num ni hpe hkrum nna, “N dai yang e myi san wa n nga a ni?” ngu nna san mu yang shanhte gaw, “Nga nga ai, na a shawng e sha rai nga ai, lawan sa wa mu, dai ni ndai mare de wa ra ai;

mare masha ni mung dai ni kawng tsaw ntsa e hkungga nawng jau na ma ai; dai myi san wa shan sha na matu dai kawng tsaw de garai n lung mat yang nang mare de du rau yang gaw hkrum shayan na myit dai. Shi garai n du yang kadai n sha mai ai dai hkungga shan shi nawng nawng re ai. Nawng ngut yang she shaga tawn ai ni sha ma ai; dai majaw lung wa mu, ya e hkrum na myit dai,” ngu nna htan mu ai. Shaloi shan gaw mare de lung wa ma ai. Ya shan gaw, mare de shang wa yang, yu u, Samuela kawng tsaw ntsa de lung wa nga yang shanhte hkrum wu ai.

Ya Shawlu du na shawng shani e sha, Yehowa gaw Samuela hpe, “Hpawt de n dai ten e Ben-yamin ga na masha langai mi nang hpang de shangun dat na ring ngai; dai wa hpe nye a amyu Israela masha ni a du shatai nna namman chya let aya dang na rai n dai. Shi gaw na a amyu masha ni hpe Hpilisti masha ni a lata na hkye la na ra ai. Kanning rai nme law, shanhte a jahtau shaga ai nsen nye a na hta hkrang ra ai rai nna, nye a amyu hpe ngai mada mara se ai,” ngu nna shi hpe shadan dan ya wu ai. Dai rai nna, Samuela gaw Shawlu hpe mu jang, Yehowa gaw “Yu u, ngai tsun ai wa gaw dai rai sai. Dai wa gaw nye a masha yawng hpe up hkang lu na ra ai,” ngu wu ai. Shaloi chyinghka lam e nga ai Samuela hpang de sit sa wa nna “Myi san wa a nta gara rai ta? madun e,” ngu nna hpyi wu ai. Samuela gaw, “Myi san wa ngai rai nga nngai, htaw kawng tsaw de ngai hte rau lung wa ga, daini ngai hte rau shat sha na re ai, hpawt de she dat dat na made ai. Na a myit gun sa ai lam tsun dan na nngai, ma ni mat ai lawze hpe hkum myit nit, mu la manu ai. Israela amyu hta na ra hpa rai yawng mayawng kade a matu rai ta? Nang hte na a nta dap ni a matu rai nga ai n rai ni?” ngu wu ai. Shawlu chyawm gaw, “Ngai wa mi Israela amyu hta kaji htum ai Ben-yamin amyu she n rai a ni? Nye dap mung Ben-yamin amyu dap lakung yawng hta na kaji htum ai dap she n rai ni? Dai rai nna nang ngai hpe hpa rai shing nga tsun nta?” ngu nna san wu ai.

Shaloi Samuela gaw, Shawlu hte shi a ma hpe manam gawk de jashawn nna, shaga tawn ai masha ni hta reng grau ai shara e shadun wu ai. Shaga tawn ai ni chyawm gaw marai sumshi daram rai ma ai. Bai Samuela gaw shat shadu ai wa hpe, “Nang

hpe kaga di matsing da u, ngu nna nang hpe ngai ap da ai kumhtaw la wa rit,” ngu wu ai. Shat shadu wa mung magyi shan hte dai hta lawm ai shan shatmai la wa nna Shawlu a man e tawn ya wu ai. Samuela mung, “Nang hpe tawn ya ai dai gaw matsing da ai re, sha u, ngai masha ni hpe shaga ni ai, ngu ai kaw nna na a matu ngam da ya sai re ai,” ngu wu ai. Shingrai Shawlu dai shani e Samuela hte rau sha wu ai.

Ya, shanhte dai kawng tsaw na yu hkrat wa nna mare de shang nhtawm Samuela yan Shawlu gaw nta ntsa e, shaga chyai nga ma ai. Hpang jahpawt e shanhte jau jau rawt nna nhtoi leng wa yang Samuela gaw “Rawt u, nang hpe ngai shabawn dat de ga,” ngu nna Shawlu hpe nta ntsa de shaga wu ai. Shaloi Shawlu rawt nna Samuela hte shan lahkawng pru wa ma ai. Mare shing nawm du jang Samuela gaw, “Na ma hpe shawng magang na tsun u,” ngu wu ai. Ma mung shawng magang mat wa wu ai. Bai Samuela gaw, “Hkring mi naw tsap u, ngai nang hpe Karai Kasang a mungga htawn tsun de ga,” ngu wu ai. Shaloi Samuela gaw, namman tau ba la nna, Shawlu a baw e jaw bun nhtawm shi hpe pup nna “Yehowa gaw shi a sali amyu a du tai na matu, nang hpe namman chya ya nit dai n rai ni?” ngu nna Shawlu hpe tsun wu ai.

Bai Yehowa Karai Kasang hkang da ai hte maren, Israela masha ni yawng hpe Gilgala shara e hpawng shangun nna, Shawlu hpe mung shaga ai hte dai yang masha ni yawng myit hkrum ai hte Shawlu hpe hkawkam aya dang ya mu ai. Samuela mung tara dara ai amu lam ni hpe kau da nna shawa masha ni hpe tsun mu ai gaw “Israel masha ni e, nanhte tsun ai ga madat nna nanhte a ntsa e up hkang na hkawkam mung lata sharawt ya sai. Ya hkawkam wa mung nanhte a man e rai nga ai. Ngai mung dingla sai hte baw hpraw sai; ngai naw kaji nga kaw nna dai ni du hkra, nanhte a man e hkawm sa nga ni ai. Dai ni mung nanhte hte rau rai nga nngai. Kadai wa a dumsu lawze hpe ngai la yu a ta? kadai wa hpe maw sha yu a ta? kadai wa hpe zing ri yu a ni? kadai wa a lata na sake manawn la sha yu a ni? n dai Karai Kasang a namman chya hkam ai wa a man e nye a lam sakse hkam yu mu, masha wa a sutgan ni hpe ngai la hkrup ai rai yang, dai ni ngai mahkra bai ya na nngai,” ngu nna Israela masha ni yawng a man e, tsun wu ai. Shaloi

shanhte gaw, “Nang madu gaw kadai wa a sutgan rai timung n la yu ai, kadai wa hpe mung n maw sha yu ai, kadai wa a lata na sake manawn mung n la sha yu ai,” ngu nna bai htan mu ai. Samuela gaw, “Nanhte gaw ngai kadai wa a lata na sutgan hpe mung n la, kadai wa hpe mung n maw sha, kadai wa a sake manawn mung n la sha yu ai lam hpe Karai Kasang gaw ngai hpang maga sakse rai nga nu ga,” ngu wu ai. “Ndai namman chya hkam ai wa mung nye a sakse rai nga ai,” ngu nna bai tsun mu yang shawa masha ni mung yin la shajang mu ai.

Dai hpang Samuela gaw, Israela masha ni yawng hpe Yehowa Karai Kasang galaw wa ai lam ni yawng hpe tsun hkai dan let, teng man ai Karai Kasang a up hkang ai lam hpe jahten kau nna hkawkam hpe hpyi ai lam gaw, mara kaba ai ngu nna sharin shaga ai hte hkaw tsun dan mu ai. Dai masha ni gaw shanhte shut ai lam hpe mu nna bai tawngban tsun mu yang, Samuela gaw, “Nanhte myit hkum ru myit, dai mara ni hpe galaw hkrup kau ai rai timung, Yehowa Karai Kasang a hpang de hkan sa ai lam hpe hkum yit myit, Yehowa hpe myit masin mahkra hte kam sham nga myit, ngai chyawm gaw nanhte a matu n hpyi nna, Yehowa hpe shut ai lam gaw ngai hte tsan nga u ga law: dai mai kaja ai hte tengman ai lam hpe ngai nanhte hpe naw madun na nngai. Yehowa hpe hkrit hkungga nna, kangka rai let myit masing mahkra hte jaw jau nga mu: nanhte a matu gade kaning di ya sai gaw a dum nga mu. Shing n rai, nanhte n shawp ai amu naw galaw nga myit yang gaw, hkawkam wa hte hpawn, hten bya ai kaw du na marin dai” ngu nna mung masha ni hpe tsun wu ai .

Dai hpang laning mi lai ai hpang Shawlu hkawkam wa gaw, Hpilisti masha ni hte hpyen gasat ma yang, hpyen sum na ra ai ngu nna tsang ai majaw, tinang n galaw mai ai baw wan nat hkungga nawng jau kau wu ai. Dai lam hpe Samuela na wu yang, myihtoi tai let, Shawlu hpe aja awa sharin shaga wu ai.

Bai lang mi Samuela gaw, Shawlu hkawkam wa hpe tsun wu ai gaw, “Yehowa Karai Kasang gaw masha ni hpe up hkang na matu namman chya ya ai lam ngai hpe hkang da ai majaw, ngai nang hpe namman chya ya se ai. Ya Yehowa Karai Kasang a ga hpe madat mara u, sumsing lamu a Madu Yehowa Karai Kasang

hkang da ai gaw, Egutu mung kaw nna pru wa ai Israela masha ni hpe Amalek masha ni galaw ai hte hkum da ai lam hpe ngai matsing nga nngai. Ya sa nna dai amyu ni hpe sa gasat kau mu, lahpawt ai myit n rawng ai sha lasha, numsha, ma kaji, chyu chyu ai ma ni kaw nna sagu, dumsu, lawze hte gawla-u ni du hkra atsai awai sat kau mu,” ngu nna Shawlu hpe hkang da wu ai. Shawlu mung hkang da ai hte maren galaw nna, lagaw hpyen sen lahkawng, Yuda amyu hta na mun mi shingga la nna Amalek masha ni nga ai shara, hkaraw hta dap jung let sa gasat mu yang, masha ni yawng hpe n htu hte atsai awai sat kau mu ai. Rai timung Shawlu hte shi a masha ni gaw, Amalek hkawkam Agag hte hpawn sagu, dumsu grau kaja ai hpum sau ai yam nga, sagu kasha ni hte kaja dik ai arai yawng mayawng hpe gaw lahpawt ai myit hte n shaza kau mu ai. Asung n shang ai hte n mai n tai re ai rai ni hpe sha, shaza kau mu ai. Ya Yehowa a ga Samuela kaw du nna, “Ngai Shawlu hpe hkawkam shatai ai majaw, myit malai lu se ai. Shi myit yit mat wa nna nye a hpang n hkan ai hta n ga, hkang da ai ga n shatup nu ai.” Dai majaw Samuela mung myit ru nna, shana tup Yehowa hpe hpyi jahtau wu ai. Bai Samuela gaw Shawlu hpe sa tau na nga, jahpawt jau jau e rawt sa wa ai. Rawt sa wa yang Shawlu mahtang Hkamela shara de du wa nna padang dawng hkawn jung kau da nhtawm, kayin mat nna Gilgala de yu mat wa sai hpe Samuela na wu ai. Dai rai nna Samuela gaw Shawlu nga ai shara de hkan nang sa wa ai. Shawlu mung, “Yehowa nang hpe shaman ya u ga, Yehowa hkang dat ai ga ngai shatup se ai,” ngu wu ai. Samuela chyawm gaw, “A taw, sagu ngoi ai nsen mi ana, dumsu n baw ai nsen mi akra, kaning re ai rai ta?” ngu wu ai. Shaloi Shawlu gaw, “Amalek masha ni kaw na, la wa ma ai. Masha ni mahtang, na a Karai Kasang Yehowa hpe hkungga nawng jau na nga kaja htum ai sagu dumsu ni hpe lahpawt nna, gale yawng hpe gaw, atsai awai shaza kau manu ai,” ngu wu ai. Dai rai nna Samuela gaw, “Naw hkring u, mana e Yehowa ngai hpe tsun ai ga hti dan de ga,” ngu nna Shawlu hpe tsun wu ai. Shawlu mung, “Tsun u,” ngu wu ai.

Shaloi Samuela gaw, “Nang gaw, nang hkum dai pyi kaji dum ai wa rai nga ninglen, Israela amyu ni a baw nang tai nit dai, n

rai ni? Yehowa nang hpe Israela amyu a n tsa e hkawhkam shatai na namman chya nit dai. Bai Yehowa nang hpe sa u, mara law ai Amalek masha ni hpe atsai awai sat kau su, shanhte amyu matu n htum dingsa a gasat nga u, nga nna she lam madun dat ai rai yang me, Yehowa a ga n madat ai mi, masha hpyen ni a rai htawm wa nna, Yehowa a man e n shawp ai amu shapraw ai gaw hpa majaw rai ta?" ngu nna tsun wu ai. Shawlu mung, "Yehowa a ga ngai teng teng madat ni ai, Yehowa ngai hpe shangun dat ai lam de, ngai sa ni ai, Amalek hkawhkam Agag hpe ngai la wa nna Amalek masha ni hpe ngai atsai awai sat kau se ai. Masha ni chyawm gaw Gilgala e na a Karai Kasang Yehowa hpe nawng jau na nga, dai majai kau sai kaja htum ai lanep sagu dumsu ni hpe la wa manu ai," ngu nna htan wu ai. Bai Samuela gaw, "Yehowa gaw shi a ga madat ai hta awng sharawng ai zawn, wan nat hkungga hte hkungga amyu hta awng sharawng na a ni? yu u, madat mara ai gaw, hkungga shan hta grau nga ai; tsun ai hku hkan ai gaw sagu la sau dung hta grau kaja nga ai; n madat ai myit chyawm gaw, hpyi shung shung sha ai zawn, je hpre ai myit gaw mandan lakle hte sumla nawku ai zawn, mara kaba nga ai. Nang Yehowa a ga kabai kau ndai majaw, Yehowa mung nang hpe hkawhkam aya hta na jahkrat nna kabai kau nit dai," ngu wu ai. Shaloi Shawlu gaw, "Ngai shut ni ai, masha ni hpe hkrit nna shanhte a ga madat kau ai majaw, Yehowa a ga hpe mung, na a ga hpe mung, tawt kau ni ai. Ya nye a mara sharang kau ya e, Yehowa hpe ngai nawku lu n ga, ngai hte rau wa saga," ngu nna Samuela hpe hpyi wu ai.

Ndai amu byin ai hpang Shawlu si mat ai ten du hkra shi hpe kawan yu na matu, Samuela gaw lang mi mung n sa du wu ai. Rai timung Samuela gaw shi a matu myit ru let sha anga nga wu ai.

Dai rai nna Yehowa Samuela hpe "Israelahkawhkam aya na ngai jahkrat kau ai Shawlu a majaw nang gaden du hkra yawn nga na nta? na a tau hta namman bang jahpring nna sa su, Bethlehem masha Yese hpang de shangun dat de ga, shi a kasha ni hta na langai mi nye a matu hkawhkam shatai na matu ngai san da se ai," ngu wu ai. Samuela chyawm gaw, "Ngai kaning rai sa lu na rai ta? Shawlu na jang, ngai hpe sat kau na ra ai," ngu wu ai. Yehowa gaw, "Dumsu u pra langai mi la nna, Yehowa hpe

hkungga jaw na sa wa nngai, ngu nna tsun u, Yese hpe mung hkungga jaw ai de shaga u, dai yang nang kaning rai galaw na ngai madun na de ai. Ngai amying gang nna shapraw dat ai wa hpe nye a matu namman chya u,” ngu wu ai. Samuela mung Yehowa tsun ai hte maren hkan galaw nna, Betlehem mare de sa du ai. Betlehem na salang agyi ni gaw, shi hpe hkrit gari let, sa tau nna, “Nang ngwi pyaw lam hte sa rin ni?” ngu nna san mu ai. Shi gaw “Ngwi pyaw lam hte hpawn Yehowa hpe hkungga jaw na du ring ngai, tinang hkum shachyoi shapra nna, ngai hte rau hkungga poi shang na sa marit,” ngu wu ai. Yese hte shi a kasha ni hpe mung shi shachyoi shapra nna hkungga poi de shaga mu ai. Ya shanhte du ma jang shi Eliaba hpe hkap yu nna kaja wa, Yehowa a namman chya hkam na wa gaw shi a man e rai sai, nga ai. Yehowa chyawm gaw, “Shi a myi man, shi a hkum shing-yan hpe hkum yu et, ngai shi hpe n la we ai, Yehowa gaw masha mu de nna mu ai n rai, masha gaw ahpraw nsam sha yu chye ma ai, Yehowa chyawm gaw myit masin she yu ai,” ngu nna Samuela hpe tsun wu ai.

Shawng na hte maren, Yese gaw kasha ni hpe Samuela a man de langai hte langai lai wa dan dan di mu yang, kasha hpungdim rai nga ai Dawi hpe namman jaw ya wu ai. Dai hpang kade nna yang Samuela gaw dingla u gut gu nna si mat wa sai rai.

Shingrai Israela masha ni yawng hte gaw, Samuela hpe grai tsawra ma ai rai nna, shanhte yawng hpawng ai hte hkrap ngu hkrap ngoi sharung shayawt let Samuela shi nga ai shara Rama mare e shi hpe makoi mayang manu ai.

Samuela a labau maumwi lam hpe I Samuela laika Dawkaba 1-16 laman hta hti yu mai ai rai.


## **DAWI A MAUMWI**

Israela amyu ni hta Dawi gaw ngwi pyaw ai hte sumpyi tingse hte dum shapyaw mahkawn mangoi chye ai wa rai nga ai. Dawi a lam ni hpe chyum laika ni hta hti yu ai hte maren masha ni yawng na chye lu shajang nga ai rai. Dawi gaw prat naw kaji nga ai ten kaw nna, si mat wa ai ten du hkra, shi galaw lai mat wa ai lam ni yawng hpe mung, shi ka lajang kau da ai Shakawn Kungdawn laika ni hpe mung, hti yu myit yu yang Dawi a myit masin kraw lawang hta shi a lailen hte shi myit jasat sa ai lam ni yawng hpe chye lu nga ai.

Lani mi hta Yehowa Karai Kasang gaw Samuela hpe hkang da wu ai gaw, “Shawlu hpe ngai Israela hkawkam aya kaw na jahkrat kau sai majaw, na a namman tau la nna namman hpe jahpring u, ngai Betlehem masha Yese nga ai shara de shangun dat na de ai; dai wa a kasha ni hta na langai mi hpe Israela masha ni a matu hkawkam tai na ngai lata la se ai,” ngu nna hkang dat wu ai hte maren Samuela sa nna Yese a kasha ni marai sanit hte hpe kaba grau ai kahpu kaw nna kaji grau ai kasha kaji kaw du hkra, yu yu wu ai. Shaloi dai ni hpe Yehowa n la wu ai. Bai, Samuela gaw, “Na a kasha ni ndai hte sha rai sani?” ngu nna san wu yang, shi gaw “Hpungdim langai mi gaw naw nga ai; shi gaw sa gu rem nga ai,” ngu nna tsun dan wu ai. Shaloi Samuela gaw, “Shi hpe shaga shangun dat u, shi garai n du yang poi de shang dung na ga ai nrhai,” ngu nna tsun wu ai. Shingrai shi hpe shaga woi wa mu ai. Shi gaw myi man hkyeng nna ahpraw tsawm ai hte hkum hkrang hking ai wa rai nga ai. Yehowa mung, “Ndai wa re ai; rawt nna shi hpe namman chya ya u” ngu wu ai. Dai shani kaw nna Yehowa a wenyi Dawi a ntsa e adung nga lu ai.

Dai hpang kade nna yang n hkru ai wenyi gaw Shawlu kaw shang nna shatsang tsang rai wu ai. Dai rai nna Shawlu a ali ama ni gaw, “Karai Kasang kaw na nhkru ai nat nang hpe shatsang tsang rai nga ai. Dai re ai majaw anhte nang madu a ali ama ni hpe, tingse atsawm sha dum shapyaw chye ai wa langai mi hpe tam na ahkang jaw mi, shingrai Karai Kasang kaw na dai n hkru ai nat nang kaw du jang dai wa nang hpe tingse dum shapyaw na rai nga

ai," ngu nna tsun wu ai. Shawlu mung, "Mai sa, dum shapyaw chye ai wa nye a matu tam nna ngai hpang de woi wa marit," ngu nna tsun wu ai. Shaloi shabrang langai mi tsun ai gaw, Betlehem masha Yese a kasha langai mi gaw, ngai mu yu se ai; dai wa gaw tingse dum shapyaw chye ai hte nden ja nna majan gasat kung ai hte mungga hpaji rawng nna ahpraw tsawm ai wa rai nga ai. Yehowa mung shi hte rau rai nga ai," ngu nna tsun dan wu ai. Dai majaw Shawlu gaw, Yese hpang de masha shangun dat nna "Sagu rem nga ai na a nsha Dawi hpe ngai hpang de dat ya rit," ngu dat wu ai. Yese mung lawze daw hta muk shagun dat nna, tsabyi tau hte bainam kasha la nhtawm, shi a kasha Dawi a lata hta Shawlu hpang de shagun dat wu ai. Dawi mung Shawlu kaw du nna shi a man e tsap nga ai. Shawlu mung Dawi hpe grai tsawra wu ai rai nna shi a ri nhtu gun ai wa shatai wu ai. Shingrai Shawlu gaw Yese hpang de masha shangun dat nna, "Dawi hpe ngai ra se ai majaw ngai kaw nga nga u ga," ngu nna hpyi wu ai.



Dai rai nna Karai Kasang kaw na ndai n hkru ai nat Shawlu a n tsa de du jang, Dawi gaw dai tingse la nna dum shapyaw pyaw di wu ai majaw, dai n hkru ai nat Shawlu kaw nna pru mat wa nna bai bran wa ai hte mai mat mat rai lu ai.

Dai hpang Dawi gaw Shawlu a man kaw na pru wa nhtawm, tinang a nta de wa let sagu ni hpe rem let bai nga nga yang, Hpilisti masha ni gaw Israela masha ni hpe gasat na matu lung wa ma yang, hkaraw langai mi a maga mi de dap jung nna hpawng nga ma ai.

Shingrai Hpilisti masha ni gaw maga mi na kawng de, Israela masha ni gaw maga mi na kawng hta rai nna tsap nga ma ai. Shanhte a lapran e gaw hkaraw din nga malu ai. Shaloi Hpilisti masha ni hta dawng kru e lahkam mi tsaw ai Gat mare na Goliat ngu ai share langang langai mi pru sa wa ai. Dai wa gaw magri gup du ru gup nna, magri palawng hpun wu ai. Dai palawng gaw magri shekela hkying manga li ai rai lu ai. Magri laraw raw nna lahpa hta magri ri kaba hpai nga lu ai. Shi a ri numdu gaw da hkaw daram kaba nna, ri lap gaw hpri joi kru li lu ai; shi a n-gang lang ya ai wa mung shi a shawng e sa wa nga ai. Dai wa gaw sa tsap nna Israela hpyen laba ni hpe, “Nanhte hpa majaw hpyen gasat na hkyen nga myit ta? ngai gaw, Hpilisti masha, nanhte chyawm gaw Shawlu a mayam ni rai nga ai nrail ni? marai langai mi lata la nna ngai hte sat hkak shangun mi; shi ngai hpe gasat nna sat kau lu sayang gaw anhte gaw nanhte a mayam ni tai na ga ai; ngai mahtang shi hpe dang nna sat kau lu yang gaw, nanhte gaw anhte a mayam tai nna, anhte a amu gun hpai lu na rai nga ai,” ngu nna jahtau wu ai. Dai Hpilisti wa gaw, “Ngai dai ni Israela hpyen laba ni hpe dakat nga nngai; langai hte langai chyaw rai nna sat hkak lu na marai langai mi dat dat mu le,” ngu wu ai. Dai Hpilisti wa dakat ai ga Shawlu hte Israela masha ni na ma yang shanhte gaw myit htum nna grai hkrit ma ai.

Dai hpang Hpilisti hpyen bu kaba gaw nhtoi mali shi ya tup jahpawt lang mi, shana de lang mi sa pru dan dan rai wu ai. Rai timung sa gasat gwi ai masha kadai mung n nga ma ai. Dawi a kahpu ni hta na kaba grau ai kahpu ni marai masum gaw, Shawlu hte rau hpyen gasat ai de nga ma ai. Lani mi hta Yese gaw kasha

Dawi hpe shaga nna, “Na a nhpu ni a matu ndai mam npaw bye mi, dai muk tawng shi la nna dap de nga ai na nhpu ni kaw gat du wu; ndai nga chyu shage tawng shi mung shanhte a hpyen bu kaba wa hpe jaw u, na nhpu ni kaja ai n kaja ai hpe yu nna shanhte kaw na kumla la wa rit,” ngu dat wu ai. Dai hte yang Shawlu gaw Dawi a kahpu ni hte Israela masha ni nlang hte gaw Ela kadir e nga nna Hpilisti masha ni hte gasat nga ma ai. Shaloi Dawi jahpawt jau jau e rawt nna, sagu ni hpe sagu rem ai wa langai mi a lata hta ap kau da nhtawm, kawa Yese hkang dat ai hte maren, shahpa la gun nna sa wa ai; shingrai hpyen luksuk ni hpyen garu let gasat na pru ma yang, dai hpyen dap na leng ni nga ai shara de shi du ai. Israela luksuk ni hte Hpilisti luksuk ni man jahkrum nna gasat na hkyen ma ai. Ya Dawi gaw shi gun ai arai ni hpe rai sin ai wa a lata hta ap da nhtawm, luksuk hpawng de gat shang nna, kahpu ni hpe shachyen wu ai. Ya shanhte hte shaga nga yang Hpilisti masha ni a share, Gat mare na Goliat ngu ai wa Hpilisti dap na pru nna shawng na zawn, sa dakat nga ai. Dai hpe Dawi na wu ai. Israela masha ni yawng dai wa hpe mu jang, nachying hkrit ai hte hprawng ma ai. Israela masha langai mi mung, “Le ra lung wa ai wa hpe nanhte mu myit ni? kaja wa Israela amyu hpe roi na lung wa ai rai nga ai; dai wa hpe sat kau lu ai wa hpe gaw, hkawhkam wa sutgan kaba hte shagraw nna, shi a shayi sha ya sha na da; dai wa a nta dap ni hpe mung Israela mungdan hta lahkawn shalawt na da;” nga nna tsun nga ai. Dawi mung “Dai Hpilisti wa hpe sat kau nna kaya shara yeng kau ai wa hpa lu la na da aw? Karai Kasang a luksuk ni hpe roi lu ai gaw, kadai wa rai nga a ta?” ngu nna shi a makau e tsap nga ai ni hpe san wu ai. Masha ni gaw dai wa hpe sat lu ai wa gaw, dai lu la na da, ngu nna shawng na zawn tsun dan mu ai. Ya shanhte hpe shaga nga ai hpe kahpu kaba Eliba na wu yang, shi Dawi hpe masin pawt nna, “Nang hpa majaw sa nta? dai n law la ai sagu ni hpe kade a lata hta nam mali e ap da nu ta? na a myit kaba ai hte n shawp ai ngai chye ya de ai; majan yu na sha sa nga ai rai lit dai,” ngu nna daru wu ai. Dawi mung “Ngai hpa shut a ta? Taw, tsun shara n nga a ni?” ngu nna htan nhtawm kaga ni hpang de kayin nna shawng na zawn bai san wu ai. Masha ni mung shawng na hku htan nna tsun dan mu ai.

Ya shing nga Dawi tsun ai ga masha ni na ma yang, Shawlu kaw htawn tsun shana ya mu ai. Shaloi shi hpe shaga wu ai. Dawi chyawm gaw, “Kadai mung dai wa a majaw myit hkum htum et; na a mayam sa nna dai Hpilisti wa hpe gasat na we ai,” ngu nna Shawlu hpe tsun wu ai. Shawlu gaw, “Nang dai Hpilisti masha wa hpe n sa gasat lu law; nang ma sha naw rai nga ndai; dai wa gaw kaji nga kaw nna majan gun man sai,” ngu nna Dawi hpe tsun wu ai. Bai Dawi gaw, “Na a mayam nye wa a sagu ni rem nga ai shaloi hkanghkyi, a tsap ni sa nna sagu hpung na sagu kasha la sha mat wa yang, ngai hkan shachyut nna sagu kasha hpe shi a n gup na shaw la we ai; ngai hpe htim kawa wa yang shi a amun hta magra shadang nna kayat sat kau we ai. Shingrai na a mayam gaw hkanghkyi hpe mung, tsap hpe mung sat kau lu ai; dai matu n gadoi ai Hpilisti wa hpe mung a hkrung nga ai Karai Kasang a hpyen laba ni hpe jahpoi ai majaw dai zawn rai na ra ai,” ngu wu ai. Bai, Dawi gaw, “Hkanghkyi hte tsap a lata na, ngai hpe hkye la ai Yehowa gaw dai Hpilisti wa a lata na mung hkye la na ra ai,” ngu wu ai. Shawlu mung “Sa su, Yehowa nang hte nga nga na ra ai,” ngu nna Dawi hpe tsun wu ai.

Shawlu mung Dawi hpe shi a hpun palawng jahpun nna, shi a baw hta magri gup du ru gup ya, hpri palawng mung jahpun di wu ai. Dawi mung hpun palawng ntsa e nhtu hpye nna hkawm chyam yu wu yang n man ai majaw n dang wu ai. Dai rai nna Dawi gaw “Dai hpyen hking ni hte ngai n sa lu nngai, garai n man nngai,” ngu nna shawlu hpe tsun let, raw kau ya wu ai.

Shingrai shi a daw hkrawng lang nna hkaraw na manen tsawm ai lungdin manga hta la n htawm, shi hpye ai sagu rem tingsan hta bang gun let, shi a lata hta lakli lang nna Hpilisti wa hpang de sit sa wa ai.

Dai Hpilisti wa mung Dawi hpang de sit sa wa ai rai nna dai wa a n gang lang ai wa shi a shawng e sa wa nga ai. Dai Hpilisti wa chyawm gaw, Dawi hpe mu jang n gawn n sawn rai nga ai; kaning rai nme law, Dawi mahtang hkum naw hkalung ai hte myi man hkyeng nna ahpraw tsawm ai; dai Hpilisti wa gaw, “Nang dawhkrawng hte ngai hpang de sa wa ai gaw ngai gwi sha rai ni?” nga nna tsun let, tinang a hpara ni a mying gang nna Dawi

hpe dagam wu ai. Bai, dai Hpilisti wa gaw Dawi hpe, "Sa rit, na a shan ntsa malen u ni hte nam na rai matse ni hpe jaw kau de ga;" ngu wu ai. Dawi mung, "Nang gaw ri nhtu hte ngai hpang de sa wa ndai, ngai chyawm gaw nang roi rip ai Israela hpyen laba ni a Karai Kasang Zaw nawng Zaw wa up ai Yehowa a mying ning sang hte nang kaw sa ring ngai. Yehowa dai ni nye a lata hta nang hpe ap nna, nang hpe ngai sat nhtawm na baw daw la na we ai, shing di nna Hpilisti hpyen laba a mang hpe n tsa malen u ni hte nam rai matse ni hpe dai ni ngai jaw kau na we ai. Shaloi Israela amyu hta Karai Kasang nga nga ai gaw mungkan ga ting chye lu na mara ai; Yehowa gaw ri nhtu hte sha hkye la lu ai n re ai gaw, ndai shawa masha ni yawng chye lu na mara ai; majan ndai Yehowa gun nga ai rai nna, shi nanhte hpe anhte a lata hta ap kau na ra ai," ngu nna Hpilisti wa hpe htan wu ai.



Ya dai Hpilisti wa gaw Dawi hpang de htim sa wa jang Dawi mung Hpilisti wa hpe hkrum hkra hpyen laba de gat sa wa nna shi a tingsan na lungdin langai mi shaw la nhtawm n wat kabai

dat wu ai rai nna Hpilisti wa a lahtan hpe hpawk di ya wu ai; baw kata de dai nlung din hkawn shang wa nna dai wa gaw ga de kadawng taw mat wa wu ai. Shingrai Dawi gaw lakli hte nlung langai mi e sha, dai Hpilisti wa hpe dang kau nna shi e sat kau wu ai. Dawi a lata hta nhtu n lang wu ai. Shaloi Dawi gat sa wa nna, Hpilisti wa a makau e tsap let shi a n gang na nhtu shaw la nhtawm shi hpe du htau daw nhtawm sat shakre wu ai. Hpilisti masha ni mung shanhte a share langang wa si ai mu jang htaw mat wa mu ai. Shaloi Israela masha ni hte Yuda masha ni rawt nna garu let Hpilisti masha ni hpe Gat hte Ekron mare chyinghka du hkra hkan shachyut mu ai. Hpilisti masha ni a hkala n ba hkrum ai masha ni gaw Sharim lam makau kaw nna Gat hte Ekron du hkra si taw nga ma ai. Israela masha ni chyawm gaw Hpilisti masha ni hpe hkan shachyut ai kaw na bai wa nna shanhte a dap na rai ni hpe magawn la ma ai. Dawi chyawm gaw Hpilisti wa a baw la nna Jerusalem mare de la wa wu ai. Dai wa a hpyen hking palawng chyawm gaw shi a sum e tawn da wu ai.

Ya Dawi gaw dai Hpilisti wa hpang de htim sa wa ai Shawlu mu jang shi a luksuk ni a bu Abna hpe, “Abna e, wora shabrang wa kade a kasha rai ta?” ngu nna san yu yang, Abana gaw “Hkawkam wa e nang hkrung nga ai hte maren ngai n chye nngai,” ngu wu ai. Dai rai nna hkawkam wa gaw, “Dai ma gaw kade a kasha re ai kun? Gawn yu mu,” ngu mu ai. Shingrai Dawi gaw Hpilisti wa hpe sat nna baw daw lang let bai wa jang Abna shi hpe shaga nna, Shawlu hpang de woi wa wu ai. Shingrai Shawlu gaw, “Shabrang wa e, nang gaw kade a kasha rai nta?” ngu nna san wu yang Dawi gaw, “Ngai gaw na a mayam Betlehem masha Yese a kasha rai nngai,” ngu nna htan wu ai. Shingrai dai shani kaw nna Shawlu gaw Dawi hpe shi a kanu kawa ni a nta de bai n wa shangun ai sha, shi a n ta e nga shangun wu ai. Dai kaw nna Shawlu a kasha Yonahtan mung Dawi hpe tsawra wu ai. Yonahtan mung Dawi hpe tsawra ai hte jinghku hku nna shi a hpun palawng hte hpawn ri nhtu, ndan hte shingkyit Dawi hpe jaw wu ai. Dai hta n ga Dawi hpe shi a hkum hte maren tsawra wu ai.

Dawi mung Shawlu shangun ai lam shagu de sa nna, hpaji byeng-ya hte galaw wu ai. Shawlu mung shi hpe hpyen

bu shatai wu ai rai nna dai hpe mung masha ni hte Shawlu a ali ama ni yu kabu nga ma ai.

Lani mi hta Dawi gaw Hpilisti ni hpe sat kau ngut nna, bai wa yang du wa ai Israela mare shara shagu hkan na Shawlu hkawkam hpe tau la na nga, numsha ni kabu gara myit hte mahkawn mangoi let, shup sheng hte tingse dum nna ka pru wa ma ai. Dai num ni gaw, “Shawlu sat ai gaw hkying hkying, Dawi sat ai gaw mun ging,” nga nna dum let httingli httinglai mahkawn mangoi nga ma ai. Shaloi Shawlu gaw “Shanhte Dawi hpe mun mun, ngai e gaw hkying hkying sha nga i? Dai mungdan sha n rai yang kaga hpa jaw lu na ma ta?” nga nna grai pawt bu ai hte ga dai a majaw myit n pyaw nga ai. Dai shani kaw nna Shawlu gaw Dawi hpe sha a gyam nga nu ai.

Dai hpang jahpawt e Karai Kasang kaw na n hkru ai nat langai mi, Shawlu kaw du nna, shi gaw shi hkaw kata e myihtoi shung nga ai: Dawi mung shawng na zawn tingse dum shapyaw wu ai. Ya Shawlu nri lang da wu ai rai nna, “Ngai Dawi hpe shakum hte jinghkyen shakap we ga” nga nna tsun ai hte rau, shi a ri tu jinghkyen dat wu ai. Dawi chyawm gaw lahkawng lang yen kau wu ai

Dawi gaw lam shagu hta awng dang wa ai hte hpaji byeng-ya hte galaw nga ai majaw, Israela masha ni yawng hte gaw shi hpe shagrau nna tsawra sharawng mu ai lam hpe Shawlu hkawkam wa chye wu yang, Shawlu gaw Dawi hpe n dawng nga ai. Rai timung shi hkum nan n sat ai sha Hpilisti masha ni she sat mu ga ngu nna “Hpilisti masha ni hpe grau nna ja ai hku gasat lu ai wa hpe gaw ndai nye a shayi sha Merab hpe ya sha na we ai,” ngu nna Dawi hpe tsun wu ai. Dawi chyawm gaw, “Ngai wa, hkawkam wa a kakhri tai na gaw ngai hkum hte nye a marai, nye a amyu dap ni wa mi Israela mungdan hta hpa grau a ta?” ngu nna Shawlu hpe htan wu ai. Rai timung Shawlu a shayi sha Merab hpe Dawi kaw ya sha na shani du jang Meholahti masha Adriela hpe ya sha kau wu ai.

Bai Shawlu a shayi sha Mihkala gaw Dawi hpe tsawra da wu ai. Dai lam Shawlu hpe tsun dan mu yang Shawlu na kabu wu ai. Shaloi Shawlu gaw, ngai sha hpe Dawi a mahkam shatai nna,

shi hpe Hpilisti ni a lata de shang hkra, shi hpe ya sha na we ai, nga nna myit lu wu ai. Shaloi Shawlu gaw, shi a ali ama ni hpe “Ning ngu Dawi hpe bai tsun mu: Hkawkam wa shi a hpyen ni hta masin jasat lu hkra, Hpilisti masha ni a hpyi matu latsa hta kaga, hpu ja shaje n ra ai da,” ngu nna tsun dat wu ai. Dai gaw, Dawi hpe Hpilisti masha ni a lata hta si u ga, nga nna Shawlu myit ai rai nga ai. Ali ama ni Dawi hpe dai tsun dan mu yang, Dawi mung hkawkam a kahkri tai na, grai ra nga ai. Ya nhtoi garai n du yang, Dawi gaw shi a masha ni hte rawt sa nna, Hpilisti masha ni tsa sat kau nhtawm, hkawkam a kahkri tai lu na matu, dai ni a hpyi matu la wa nna, ahkum sha hkawkam wa hpe wa hti ya mu ai. Shawlu mung shi a shayi sha Mihkala hpe ya sha wu ai.

Dai hpang Shawlu hkawkam wa a kasha Yonahtan gaw kawa Shawlu hte Dawi hpe sharam wu ai rai nna, Dawi mung shawng na hte maren hkawkam wa a man de wa nna nga wu ai. Dai hpang kade nna yang Shawlu gaw Dawi hpe nri hte lang mi bai jinghkyen wu ai rai nna, Dawi gaw bai hprawng mat wa wu ai. Shingrai Dawi n hprawng lu na matu Shawlu gaw, sin langa ni hpe sin shangun ai lam hpe Dawi a madu jan Mihkala gaw chye wu yang, dai na n hkye la yang gaw hpawt ni e teng teng sat kau ai hkrum na ra ai, ngu nna Dawi hpe shi a yup gawk hkuwawt chyinghka lam kaw nna sumri hte shayat jahkrat dat nna hkum singgu hprawng lawt mat wa wu ai. Mihkala chyawm gaw dai terahpim sumla la nna yupku hta kaleng tawn da nhtawm bainam mun hte da ai nba grang hpe n htung de grang kau nna hpajawng jahpun tawn da wu ai.

Dawi hpe rim la na matu Shawlu dat dat ai shangun ma ni du jang madu jan gaw, “Dawi machyi nga ai,” ngu wu ai. Shawlu gaw “Ngai shi hpe sat kau na we ai; yupku hte hpawn hpai wa marit,” ngu nna Dawi hpe sa yu na masha shangun dat mu ai. Shangun ma ni shang yu yang, yu u, nhtung de bainam mun hte da ai nba grang, grang tawn nna yupku e terahpim sumla taw nga ai sha mu ma ai. Shaloi “Ngai hpe masu nna nye hpyen wa hpe hpa majaw dat kau nta? ya hprawng lawt mat sai,” ngu nna Mihkala hpe daru wu ai. Mihkala mung “Shi mahtang, ngai hpe dat dat e, dai nrail yang nang hpe sat kau na de ai,” nga nna tsun ai, ngu nna

Shawlu hpe htan wu ai. Shingrai Dawi hprawng lawt nna Rama shara e nga ai Samuela kaw du jang Shawlu shi hpe galaw ai lam yawng tsun dan wu ai.

Dai hpang Dawi gaw Nayut mare de sa mat wa ai lam hpe Shawlu na wu yang, Dawi hpe rim na matu masha hkan shangun dat mu ai. Yehowa Karai Kasang mung Shawlu a lata hta na Dawi hpe hkye la wu ai. Dawi mung Rama ginwang Nayut shara kaw nna hprawng let Yonahtan kaw du wa wu yang, “Ngai hta hpa mara rawng a ta? Na a nwa nye a asak gyam ai gaw ngai shi hpe hpa shut we ta?” ngu nna san wu ai. Yonahtan chyawm gaw, “Dai gaw n rai u ga, nang si lu na n rai, yu u, wa gaw ngai hpe n tsun ai amu kaji kaba hpa mung n galaw yu ai. Dai lam teng yang gaw ngai n chye hkra hpa majaw ip da na a ta? dai gaw teng ai n rai,” ngu wu ai. Dawi gaw, “Ngai na a jinghku rai nga ai; na a nwa chye da wu ai majaw, Yonahtan yawn na hpe tsang ai, dai amu hpe hkum chye shangun u, ngu nna tsun wu ai; kaja wa Yehowa a hkrung nga ai hte nang mung hkrung nga ndai hte maren, ngai hte si hkrung si htan a lapran gaw kalang htawt sha rai sali ai,” ngu nna dagam ai hte tsun wu ai. Yonahtan gaw, “Na a myit ra ai hte maren hpa mung ngai galaw na nngai,” ngu nna Dawi hpe tsun wu ai. Bai, Dawi gaw Yonahtan hpe, “Hpawt ni shata praw langai ya rai nga ai rai nna hkawkam wa hte shat sha na rai nna shat ku e n dung n mai rai nngai, rai timung masum ya shana du hkra nam e naw makoi nga n ga, na nwa ngai n lawm ai dum jang Dawi nta dap ni nlang a matu shaning shagu na hkungga nawng na nhtoi du ai majaw, shi a mare Bethlehem mare de gan wa na nga akroi anoi hpyi ai, ngu nna tsun u, shaloi na a nwa mai sa, nga yang gaw, na mayam pyaw lu na ni ai; dai nrail, pawt bu wa taw gaw shi n hkru ai hku maw nga ai, ngu nna myit dum u. Dai rai nna na a mayam wa hpe matsan dum la e; Yehowa a ga shaka hta na a mayam wa nang hpe shaka nga nngai; rai timung ngai hta ra rawng ai rai yang gaw na a lata hte nan sat kau ni, hpa majaw na nwa hpang de ngai hpe woi wa na rai ta?” ngu nna tsun wu ai. Yonahtan mung, “Dai zawn gaw n rai u ga; nye wa nang hpe sat na maw ai ngai teng teng chye yang nang hpe n tsun ai nga na kun?” ngu wu ai. Bai, Dawi gaw, “Na nwa aja awa nga htan yang ngai hpe kadai sa shana ya na

rai ta?" ngu nna Yonahtan hpe san yu wu yang Yonahtan gaw, "Sa, an gaw pa ga de naw sa ga," ngu nna Dawi hpe tsun let, shan lahkawng gaw pa ga de sa wa ma ai. Yonahtan gaw, "Nang gaw masum ya naw makoi nga nhtawn alawan sha yu hkrat wa nna shawng de nang sa makoi ai shara de du jang Ezela lunghkrung makau e la nga u. Ngai mung ndan gap masu nna lunghkrung dai makau de pala masum gap dat na ring ngai. Yu u, 'dai pala sa tam su,' ngu nna ma hpe dat dat na nngai. Shaloi 'pala na makau e rai nga ai hta la su,' ngu nna hkrang hkrang tsun yang gaw, wa rit, Yehowa hkrung nga ai hte maren, nang hta hpa ru yak ai lam n nga sai, pyaw nit dai. Shing n rai 'dai pala nang hpe lai kau nit dai,' ngu nna ma hpe tsun yang gaw, hkum wa nu, Yehowa nang hpe dat dat nit dai," ngu wu ai.

Shingrai shan lahkawng ga tsun ngut jang Dawi mung hkawm mat wa nna Yonahtan mung nta de bai wa mat wu ai. Dai hpang lahkawng ya ngu na shani hta hkawkam wa a shat sha ai shara hta Dawi a shara gaw man nga ai rai nna, Shawlu gaw "Ndai Yese a kasha gaw mani e mung n sa, dai ni mung n sa, hpa majaw nga nga ai?" ngu nna kasha Yonahtan hpe san wu yang, Yonahtan gaw, "Dawi Betlehem de naw wa na nga akroi anoi ahkang hpyi wu ai, ngai hpe wa na ahkang jaw dat rit; nye nta dap ni mare de hkungga jaw poi galaw ma ai; nye hpu mung htet dat ai; nang kaw myi man pa nngai rai yang gaw ngai wa nna hpu ni hte hkrum lu na ahkang jaw rit, nga nna akroi anoi hpyi ai, dai majaw hkawkam wa a sha ku de n du ai rai nga ai," ngu nna Shawlu hpe htan wu ai.

Shaloi Shawlu gaw, Yonahtan hpe pawt bu nna, "Myit magaw ai gumlau num a kasha e, nang hkum nan hte na nnu kaya hkrum hkra Yese a kasha hpe nang maga nga ai gaw, ngai n chye ai zawn nawn wu ni? Yese a kasha hkrung nga dingsa nang hte na mungdan grin nga lu na rai; ya alawan shangun nna shaga la su, shi teng teng si lu na re ai," ngu wu ai. Yonahtan gaw "Shi hpa majaw si lu na rai ta? shi hpa shut a ta?" ngu nna kawa hpe san wu yang, Shawlu gaw, kasha Yonahtan hpe ri tu hte jinghkyen wu ai. Dai re ai majaw shi a kawa gaw Dawi hpe sat na maw nga ai lam Yonahtan chye wu ai.

Hpang jahpawt Dawi hte n dat da ai aten e Yonahtan gaw, ma kaji langai mi woi nna pa de sa wa ai. Ma dai hpe mung “Gat su, ngai gap dat ai pala hkan tam su,” ngu nna shangun dat nhtawm, ma dai gat sa wa jang shi hpe lai hkra pala langai mi gap dat wu ai. Yonahtan gap dat ai pala hkrat ai shara de du maw jang Yonahtan gaw, “Pala nang hpe lai kau nit dai nrail ni? gat su, lawan u, hkum hkring et,” ngu nna dai ma hpe hkan jahtau wu ai. Yonahtan a ma mung, pala hta lang nna madu hpang de bai nhtang wa ai. Yonahtan gaw n dan pala ni hpe shi ma a lata de ap ya nna “Mare de la wa su,” ngu nna dat dat wu ai. Ma dai wa mat ai hpang Dawi gaw dingda maga de na pru nna, ga e gum dagup let, masum lang du hkra gum dagup nna shada da pup ai hte hkrap mu ai. Shaloi Yonahtan gaw Dawi hpe, “Yehowa gaw nang hte nye a lapran e mung, nye a amyu matu ni hte na a amyu matu ni a lapran e mung, tut nawng prat dingsa a nga nga u ga, ngu nna Yehowa a amying ning sang hta an lakhawng dagam shaka ai majaw dai hta tau yu nna ngwi pyaw ai hte hkawm wa su,” ngu nna dat dat wu ai.

Dawi gaw shabrang ni nkau mi hte rau Noba mare hkinjawng Ahimelek kaw du ai hte Dawi gaw dai hkinjawng wa hpe sha na muk hpyi wu yang, Ahimelek gaw, “Ja ku hta mara da ai san seng ai muk hta kaga hpa muk mung n nga ai,” ngu htan let shanhte gaw grai kawsi hpang gara nga ai majaw, dai madun da ai chyoipra ai muk shi hpe jaw kau wu ai. Dai hpang Dawi gaw, Ahimelek hpe “Nang kaw ri nhtu ni nga a ni?” ngu nna san wu yang, Ahimelek gaw “Ela hkarakw e nang sat kau ai Hpilisti masha Gat mare na Goliat a nhtu gaw sumpan hte kayap nna nga nga ai, nang ra yang gaw la u,” ngu nna tsun wu ai. “Kaga nhtu nri ni gaw hpa mung n nga ai,” ngu wu yang Dawi gaw, “Dai hte bung ai kaga n nga ai, dai hpe ngai e jaw rit,” ngu nna bai hpyi wu ai.

Shawlu gaw, Dawi hpe hkan tam na ra ai hpe tsang wu ai majaw, Dawi gaw rawt nna Gat hkawkam Ahkisha hpang de hprawng mat wa wu ai. Dai hkawkam a mayam ni gaw, “N dai wa gaw Israela hkawkam nrail ni? Shawlu gaw hkying hkying, Dawi gaw mun mun sat kau sahka, nga nna ndai wa a man e ka manau shajang ai gaw, n dai wa nrail nga a ni?” ngu nna shana dan mu yang, Dawi gaw grai hkrit wu ai rai nna, shanhte a man e mana

masu let chyinghka hta laika ka masu nna tinang hkum pyi n dum ai wa zawn rai let, shi a nhka mun hkan e hkumbai shaya let nga wu ai. Shaloi Ahkisha hkawhkam gaw “Nye a man de hpa majaw jashawn myit ni, ngai gaw mana n mu yu ai zawn nawn nna nye a man e mana shachyo dan u ga, dai wa hpe nye a nta de woi shawn myit ni?” ngu nna daru mu ai. Dai rai nna Dawi gaw, dai kaw nna bai hprawng mat wa nna Adulam lungpu hku de du pru wa wu ai. Shi a kahpu hte nta masha ni yawng mung dai na jang shi kaw sa wa ma ai. Amu hkrum ai ni, ahka kap ai ni hte myit karen ai masha ni nlang shi kaw sa zup nna, shi shanhte a agyi tai nga ai; shingrai marai mali tsa daram shi kaw hkan nang ma ai.

Shaloi myihtoi Gad gaw, “Ngang ai lungpu hpyen dap hkan e hkum nga et; pru nna Yuda mung de wa u,” ngu nna Dawi hpe tsun wu ai. Dai majaw Dawi wa nna Heret nam mali hkan e wa du wu ai.

Ya masha nkau mi gaw, Dawi hpe “Yu u, Hpilisti masha ni Kila mare sa hpya nna mam chyarang ni kashun la kau ya manu ai,” ngu nna tsun dan mu ai. Dai re ai majaw Dawi gaw, “Ngai wora Hpilisti masha ni hpe sa gasat na rai ni?” ngu nna Yehowa hpe san wu ai, Yehowa mung, “Sa su, Hpilisti masha ni hpe sa gasat kau nna, Kila mare hpe sa hkye la su,” ngu nna Dawi hpe htan wu ai. Dawi a masha ni chyawm gaw “Yu u, anhte Yuda mung e pyi hkrit ra nga yang Kila mare de yu wa nna Hpilisti hpyen laba ni hte gasat daw na gaw grau hkrit shara rai nga ai nrail ni?” ngu nna shi hpe tsun mu ai. Dai rai nna Dawi gaw Yehowa hpe bai san wu ai. Yehowa chyawm gaw, “Rawt u, Kila mare de yu wa su, Hpilisti masha ni hpe ngai na a lata hta ap ya na de ai,” ngu wu ai.

Shingrai Dawi hte shi a hpyen hpung ni yu hkrat wa nna Hpilisti hpyen ni hpe gasat shabra kau dat mu ai rai nna Kila mare hpe hkye la mu ai rai.

Shawlu gaw Dawi hpe bai lu la hkra gyam nga ai lam hpe Dawi na wu yang, Zihpa bum lapran hkan e makoi hkawm wu ai. Shawlu gaw shani shagu Dawi hpe agyam nga ai rai timung, Karai Kasang Yehowa gaw Dawi hpe Shawlu a lata hta n ap ya wu ai. Shingrai Dawi gaw Zihpa bum lapran hkan e nga nga yang,

Shawlu gaw shi hpe sat na lam gyam nga ai hpe na wu yang, Shawlu a kasha Yonahtan gaw Dawi hpang de sa wa nna Dawi hpe myit n-gun jaw let, shalan shabran na matu tsun ai gaw, “Nang gaw hkum hkrit u, nye wa Shawlu a lata hta na lawt lu nna Israela masha ni a ntsa e hkawhkam tai na rai n dai; ngai mung na a lawu e, lu ang ai arawng aya lu nna nga na rai nngai,” ngu tsun let shan shada da ga sadi tawn da ngut jang Dawi gaw nam mali de bai hkawm mat wa ai hte Yonahtan gaw shi a nta de bai n htang mat wa wu ai rai.

Dai hpang Shawlu mung hpyen ma hkying masum lahkawn shinggain la nna nam mali hkan e mung, bum ga hkan e mung Dawi hpe hkan tam hkawm wu ai. Shingrai sa wa yang lam makau e lungpu hku langai mi mu wu ai rai nna dai yang e hkum tsan na ngu nna Shawlu shang bang wa wu ai. Dai lungpu hku a kata maga htum e, Dawi hte shi a hpyen ma ni nga ma ai rai nna dai hpyen masha ni gaw Shawlu hpe grai sat kau mayu ma ai. Rai timung Dawi gaw Shawlu hpe sat kau na a hkang n jaw mu ai. Shingrai Dawi gaw rawt sa wa nna Shawlu a palawng galu daw mi hpe rep di la ya wu ai. Dai hpang Shawlu mung dai lungpu hku kaw nna bai pru mat wa wu ai. Dai shaloi Dawi mung yat yat sha hkan nang pru wa nna kade n tsan ai shara kaw nna, “Nye a madu hkawhkam wa e, ngai gaw nye a madu hkawhkam a asak hpe gyam nga ai, nga masha ni tsun ai ga hpe hpa majaw nang kam nga n ta?” nga ai n sen hpe na wu yang, kayin yu ai shaloi Dawi gaw, ga du hkra gum dagup let naw nga ai hpe mu wu ai. Bai, Dawi gaw, “Dai ni gaw nang madu a asak hpe ndai ginlawng hku kata e nye a lata hta ap ya kau sai lam hpe yu yu u; sat kau na matu masha nkau mi shadum ma ai rai timung, ngai na a mayam wa gaw, lahpawt ai myit rawng nna nang nye a madu gaw, Yehowa Karai Kasang a namman chya hkam ai wa re ai, ngu nna dai wa hpe sat na matu nye a lata hpe pyi ngai ladawn ai n rai; rai timung nye wa e, yu yu u, na a palawng galu daw mi hpe chyu sha ngai rep dut la ai hta kaga na a asak hpe ngai sat ai n rai; na a palawng daw mi rep dut la ai hta kaga ngai mara hpa mung n galaw nngai; ngai dai daram myit ai rai timung nang gaw nye a asak hpe naw hkan gyam nga n hka,” ngu nna tsun wu ai.

Shawlu mung, “Ngai sha Dawi e, ya ngai na lu ai n sen gaw nang ngai sha Dawi a nsen gaw teng nga a ni?” ngu nna san let Shawlu gaw, nsen shaja nna jahtau hkrap wu ai. “Yehowa Karai Kasang gaw nye a asak hpe na a lata hta ap ya kau sai rai timung, nang gaw n sat ai nga nit dai; masha gaw hpyen wa hpe hkrum yang asak hkyem sa jaw let shalawt na rai ni? Dai ni nang ngai hpe galaw ai chyeju gaw Yehowa Karai Kasang gaw bai htang ya u ga law; ya nang gaw teng teng wa hkawhkam tai na ra ai lam hpe mung, Israela mungdan gaw na a lata hta rai na ra ai lam hpe mung ngai kaja wa chye ni ai. Dai re ai majaw, nang gaw nye a kashu kasha ni prat mi hte prat mi n tsan kau ai sha, nga nga na lam hpe mung dai ni jang Yehowa Karai Kasang kaw dagam da u,” ngu nna tsun wu yang Dawi mung dai hku hkan nna dagam ga tsun ngut ai hpang Shawlu gaw shi nga ai mare de bai wa mat ai hpang Dawi mung ngang kang ai hte shim ai shara de bai htawt hkawm mat wa wu ai.

Ya Samuela gaw, dingla ugut gu mat wa nna si mat sai rai. Dai hpang Dawi gaw Paran nam mali de bai htawt mat wa wu ai. Dai mung hta mung grai lu su ai masha langai mi nga ai rai nna, shi a mying gaw Nabala rai nna shi a madu jan a mying gaw Abigela rai lu ai. Dai num gaw hpaji rawng ai rai nna ahpraw mung tsawm nga ai. Madu wa chyawm gaw myit ja ai hte n hkru ai amu shapraw chye ai wa rai nga ai. Dai shaloi Dawi hte shi a hpyen hpung ni mung dai makau hkan e nga nga nna dap jung nga ma ai. Rai timung lang lang shat lusha htum mat ma ai raitim, dai Nabala a sut rai ni hpe tinang a sut rai zawn myit ai hte hpa mung n sharu shatsang mu ai. Nabala a sagu bainam ni hpe mung tinang a sagu bainam hpung ni hpe zawn sin ya mu ai.

Lani mi hta Nabala gaw sagu mun rep nna nga ai lam hpe nam mali e Dawi na wu ai. Shaloi Dawi shi a ma marai shi hpe dat dat nna “Nabala nga ai shara de sa nna nye a matu shachyen ya mi, dai sut su ai wa hpe ning ngu tsun mu, ‘nang madu gaw ngwi pyaw nga u ga; na a nta masha ni mung ngwi pyaw nga u ga; nang hte seng maseng mung ngwi pyaw nga myit ga law, nang sagu mun rep ga saw ai lam ngai na nngai; na a sagu rem ai ni anhte hte rau nga yang anhte shanhte hpe hpa mung n sharu ga ai; shanhte

Hkarmela bum e nga nga ai hte yang shanhte a arai hpa mung n mat malu ai. Na a shabrang ma ni hpe san yu u; shanhte tsun na ma ai, dai re ai majaw, nye a ma ni nang kaw myi man pa mu ga, anhte mung nhtoi kaja hta sa du saga ai. Nang jaw ra ai made na a mayam ni hte nsha Dawi hpe jaw dat na ngai hpyi nngai,’ nga ai,” ngu nna tsun na lam hkang dat mu ai.

Ya Dawi a ma ni gaw, Nabala hpang de du jang Dawi htet ai ga mahkra sa tsun dan nna atsin sha nga ma ai. Dai rai nna Nabala gaw Dawi shangun dat ai ma ni hpe “Dawi gaw kadai rai ta? Yese a kasha gaw kadai rai ta? ya hte yang madu hpe gumlau ai mayam ni law nga ma hka, ngai nye a sagu mun rep ai ni a matu lajang tawn ai nye a muk, nye a ntsin hte ngai sat tawn ai shan hpe la nna kanang na pru ai re pyi n chye ai ni hpe jaw kau na kun?” ngu nna htan mu ai. Shingrai Dawi a ma ni nhtang wa nna dai ga mahkra hpe wa tsun dan mu ai. Dawi chyawm gaw “N htu la hpye mu,” ngu nna shi a ma ni hpe tsun jang, yawng mayawng nhtu la hpye shajang mu ai. Dawi mung shi a nhtu la hpye wu ai. Shingrai marai mali tsa daram Dawi kaw hkan nang ma ai. Lahkawng tsa sha arai sin nna nga ma ai.

Dawi mung, “Dai wa a sut rai langai mi pyi n mat hkra ngai ndai nam mali e nga nga ai laman hte yang kaman sha yu sin kau ya a hka, ngai gaw shi a ntsa e kaja ai amu galaw ai daram shi gaw n kaja ai amu she galaw nga a hka,” ngu nna masin grai pawt bu ai hte grai ja ai hku dan jaw na, ngu nna Dawi hte shi a ma ni gaw dai shara de sa wa ma ai. Rai timung shabrang ma langai mi Nabala a madu jan Abigela kaw wa nna, “Yu u, Dawi gaw anhte a madu hpe shachyen na nga nam de nna kasa shangun dat wu ai. Shi mahtang shanhte hpe hkap daru kau dat mu ai. Dai masha ni chyawm gaw anhte hpe grai hkau chyap nna anhte hpe hpa mi n sharu mi ai; pa ga hkan e shanhte hte rau naw nga nga ai hte yang, anhte hpa mung n sum ga ai. Anhte sagu rem let shanhte hte kanawn mazum ai hte ting, shani shana anhte hpe makawp maga mi ai; dai rai nna kaning di na gaw nang du jan she myit yu u; anhte a madu hpe mung shi a nta masha ni yawng hpe mung hpya kau na nga bawng ngut masai; madu mahtang hpa n hkaw ai wa re ai majaw kadai mung shi hte ga n tsun wam ga ai,” ngu mu ai.

Shaloi Abigela gaw muk tawng lahkawng tsa, tsabyi tau lahkawng, sat lajang ngut ai sagu hkum manga, mam n paw uma manga, tsabyi si chyahkraw sumbaw latsa, lakum si dik apye lahkawng tsa alawan la nhtawm lawze hta htaw let “Nye a shawng de sa wa magang mu, ngai hkan dep na ring ngai,” ngu nna dat dat mu ai. Madu wa Nabala hpe chyawm gaw n tsun dan mu ai. Ya shi gaw lawze jawn nna sa wa yang bum na a katsi katsang nga ai shara e Dawi hte shi a masha ni yu hkrat wa ai hte hkrum mu ai. Shingrai hkrum ai shawng e Dawi gaw, “Kaja wa nan dai wa a arai lama mi pyi n mat hkra, nam mali na shi a arai mahkra hpe ngai kaman sin kau lawm se hka, nye a kaja ai hpe n kaja ai hku htang jaw nhka, hpawt de nhtoi htoi jang shi hte seng ai nlang hta na lasha ma langai mi she ngam da ai nga sayang gaw, dai hta grau nna Dawi a hpyen ni hpe Karai Kasang di mu ga,” ngu nna shaka kau mu ai.

Shingrai sa wa ma yang Abigela gaw Dawi hpe mu jang lawze dinghkung kaw na alawan yu wa nhtawm, Dawi a man e ga de dingnyawm dagup nga ai. Shi a lagaw nhppang e lahput hput di let, “Nye a madu e, yubak mara nye a ntsa e rai nga u ga, na a mayam jan ga hkaw mi tsun lu na a hkang jaw e, na a mayam jan a ga she madat ya rit; nye a madu wa gaw hpa n hkaw ai wa Nabala hpe hkum nawn et, shi mying mung shi a myit hte shabung nga lu ai. Shi a mying mung Nabala, shi a myit mung myit ngawk rai nga lu ai. Nang madu shangun dat ai ma ni hpe ngai na a mayam jan n mu kau we ai. Ya rai timung nye a madu e, masha asak sat na de n sa n ga hte tinang myit machyu nna matai n htang n ga, Yehowa nang hpe hkum da nit dai majaw, Yehowa ahkrung nga nna, nang madu ahkrung nga ai hte maren, na a hpyen ni hte nang hpe jahten maw ai ni gaw Nabala zawn rai nga mu ga, ya na a mayam jan la sa ai kumhpa nang kaw hkan nang ai ma ni hpe karan ya shangun mi. Nye a madu nang Yehowa a hpang maga majan gasat n dai majaw, na nta teng teng grin wa na ra ai. Yehowa nang madu hpe nga mai shangun ai nhtoi hta e na mayam jan hpe mung dum rit law,” ngu nna hpyi wu ai.


Shingrai Dawi mung Abigela la sa ai kumhpa ni hpe shi a lata hta hkap la let, “Ya nang nta de bai wa nna, akatsi sha ngwi

pyaw ai hte nga su, nang hpyi tsun ai ga ni yawng hpe ngai madat ni ai; na a myi man hpe tau nna nga nga na nngai,” ngu wu ai.

Dai hpang nhtoi shi ya daram lai yang Nabala si mat sai lam hpe Dawi na wu yang Abigela hpe tsawra wu ai rai nna shi hte hkungran na lam tsun na matu, masha shangun dat wu ai. Dawi a mayam ni mung, Abigela hpang de sa du ai hte tsun mu ai gaw, “Anhte a madu Dawi gaw nang hte hkungran na matu sa tsun shana na sa du ra ga ai,” ngu mu yang Abigela mung Dawi hpe tsawra wu ai rai nna ga de gum dagup ai hte “Ngai gaw shi a mayam jan nan rai u ga law,” ngu tsun let alawan rawt nna shi a mayam numsha marai manga hte rau lawze jawn nna Dawi shangun dat ai mayam la ni hte rau hkan nang sa wa n htawm Dawi a madu jan tai wu ai. Dawi gaw Yezrela mare na numsha Ahinoam hpe mung la wu ai rai nna, shan lahkawng gaw Dawi a madu jan tai ma ai. Shawlu chyawm gaw shi a shayi sha Dawi a madu jan Mihkala hpe Galim shara na Laisha kasha Palati hpe ya sha kau wu ai.

Lani mi na Zihpa masha gaw Shawlu hpang de sa nhtawm, Dawi gaw Yeshimun taw tap na Hahkila kawng e makoi nga ai lam sa tsun dan mu ai. Shaloi Shawlu gaw n-gun lapyin ja ai wa ngan marai hkying masum hpe lata la nna Dawi hpe tam na matu sa wa let Hahkila kawng makau e dap jung let nga ma ai. Dawi gaw, nam e nga nga yang Shawlu shi hpe hkan tam ai lam hpe chye wu yang, Dawi rawt sa wa nna Shawlu hte shi a masha ni dap jung ai shara de du sa wa ma ai. Shaloi Shawlu hte Abna yup ai shara hpe mu ya wu ai. Shawlu gaw leng dap ka-ang e yup nga nna grup yin e hpyen masha ni dap jung nga ma ai hpe Dawi mu wu yang Dawi gaw, “Ngai hte rau Shawlu nga ai shara de kadai hkan sa na myit ta?” ngu nna Hiti masha Ahimelek hte Zeruia masha Yoab a kanau Abishai hpe san wu yang, Abishai mahtang, “Ngai hkan nang na nngai,” ngu wu ai. Shingrai Dawi yan Abishai gaw shana e dai dap de sa wa ma ai. Shaloi yu u, Shawlu gaw leng dap ka-ang e yup nga nna, ri gaw shi a baw n htung ga hta jung nga lu ai. Abna hte shi a masha ni gaw, grup yin e yup nga ma ai. Shaloi Abishai gaw, “Karai Kasang gaw na a hpyen wa hpe daini na a lata hta ap ya ra ai; dai rai nna ga de hkrang hkra nri hte ngai shi hpe galun

htinggrang kau we ga, lahkawng lang pyi n kahtap na nngai,” ngu nna Dawi hpe hpyi wu ai. Dawi chyawm gaw, “Shi hpe hkum hkra et, Yehowa a namman jaw hkam ai wa hpe kadai wa mi ra nrawng ai hkra lu na rai ta?” ngu nna Abishai hpe daru wu ai. Bai, Dawi gaw, “Yehowa ahkrung nga ai hte maren, Yehowa shi hpe sat kau na wu ai; shing nrail shi a si ten du na ra ai; shing nrail majan hta sa sum si na ra ai; Yehowa a namman jaw hkam ai wa hpe ngai lata n du hkra Yehowa hkum kau u ga law; ya chyawm gaw shi a baw nhtung na nri hte ntsin namtau hpe la wa ga,” ngu nna tsun let, Dawi gaw Shawlu a baw nhtung na nri hte ntsin nam tau hpe la nna shan lahkawng bai wa ma ai. Kaning rai nme law, Yehowa gaw shanhte hpe yup kaba hte shayup mu ai majaw, shanhte nlang hte gaw yup nga ma ai.



Shaloi Dawi gaw hkaraw wora hkran de rap nhtawm tsawmra gang ai bum pungding e tsap nga nna hpyen masha ni hpe “Abna e, nang kaja n htan nni?” ngu nna jahtau wu yang Abna mung “Hkawhkam wa hpe jahtau ai kadai rai nga a ta?” ngu nna

htan wu ai. Shaloi Dawi gaw Abna hpe “Nang share la n rai nni? Israela amyu hta nang zawn re ai kadai nga a ni? dai rai yang na madu hkawkam hpe hpa rai n sin nta e, na madu hkawkam hpe sat na nga masha langai mi shang wa sai law; nang galaw ai lam n sun nit dai; Yehowa namman jaw hkam ai wa nanhte a madu hpe n sin myit dai majaw Yehowa hkrung nga ai hte maren nanhte gaw si ging myit dai law, hkawkam wa a baw nhtung na nri hte ntsin namtau kanang nga ai gaw yu yu mu law,” ngu nna jahtau wu ai.

Shawlu gaw Dawi a nsen re ai chye wu yang, “Ngai sha Dawi e, dai gaw na a n sen rai ni?” ngu nna san wu yang, Dawi mung “Rai nga ai, Nye a madu hkawkam e,” ngu nna htan wu ai. Bai Dawi gaw, “Nye a madu e, na a mayam wa hpe hpa rai nna hkan shachyut hkawm nga n ta? ngai hpa shut de ta? nye a lata hta hpa mara rawng nga ata? Nye a madu hkawkam wa e, Ya, na a mayam wa a ga hpe madat ya e, Yehowa nan ngai hpe hpyen na hku nang hpe shadut n dai rai yang gaw, shi hkungga hkap la u ga; shing n rai shinggaim masha e shadut ai hku rai yang gaw, Yehowa a man e dagam dala hkrum sha mu ga; kaning rai n me nga yang shanhte ngai hpe ‘hprawng u, hpara shaje tam naw wa nu,’ nga nna Yehowa a sali ga hta n nga lu hkra, dai ni pyi gawt kau nga myit hka; dai re ai majaw nye a asai gaw Yehowa a myi man hte tsan ai shara e, ga de n hkrat li ga, kaning rai n me law, masha ni gaw bum alang hkan e u preng ni hpe hkan shachyut ai zawn, Israela hkawkam wa mi ting, wa hkalai hkan tam na nawt hkawm nga a hka;” ngu wu ai.

Dai shaloi Shawlu gaw, “Ngai shut ni ai, ngai sha Dawi e, bai wa rit, dai ni nang nye a asak hpe lahpawt ya nit dai majaw, ya hpang de n zingri na ni ai; ngai mahtang mana ni ai; ngai shut kau se ai,” ngu wu ai. Bai Dawi gaw, “hkawkam a nri nang e rai nga ai; ma langai mi dat nna sa la shangun u, dai ni nye a lata hta nang hpe ap kau sai rai timung, shi a namman chya hkam ai wa hpe ngai n hkra nngai, Yehowa gaw kadai hpe rai timung, tinang a ding hpring ai hte kang ka ai hta hkan nna akyu htang jaw na ra ai. Dai rai nna daini ngai na a asak hpe lahpawt ya ai zawn, Yehowa nye a asak hpe lahpawt nna ngai hpe ru yak lam shagu hta na shaw la n ga law,” ngu nna tsun wu ai. Shaloi Shawlu gaw Dawi hpe, “Ngai

sha Dawi e, nang a lu nit ga law; rai mung rai lu na nit dai;” ngu nna htan wu ai. Shingrai Dawi hkawm mat wa nna, Shawlu mung shi a shara de bai wa mat wu ai.

Dai hpang Dawi gaw “Lani mi hta Shawlu a lata hta ngai asak sum na ring ngai, Hpilisti mung de hprawng yang she mai na sai; dai hta grau ai lam nye a matu n nga sai; shaloi she Israela mung ting hta ngai hpe n mu tam ai, Shawlu chye nna myit jasat kau yang shi a lata na ngai lawt na ni ai” ngu nna myit la wu ai. Shaloi Dawi hte shi kaw hkan nang ai masha marai kru tsa gaw rawt nna Gat hkawkam Mohka a kasha Ahkisha hpang de rap mat wa ma ai. Ahkisha hkawkam wa mung Dawi hpe hkap tau la wu ai rai nna Zekla mare hpe jaw wu ai.

Dai hpang lani mi hta Hpilisti masha ni hte hpyen hpung kaba ni yawng hte gaw, Israela masha ni hpe gasat na matu pru sa wa ma yang, Ahkisha hkawkam mung Dawi hte shi a masha ni hpe hpyen gasat ai de sa na matu, shangun dat wu ai. Dai shaloi Hpilisti masha ni gaw Dawi hte shi a masha ni hpe n kam mu ai rai nna, shanhte hpe mare de bai nhtang wa na matu, Ahkisha hkawkam hpe tsun mu yang, shanhte yawng mare de bai nhtang mat wa mu ai. Shingrai shanhte bai nhtang du wa ma yang Amalek masha ni gaw shanhte nga ai mare hpe nat kau nhtawm dai mare na numsha ni hte, dai hta nga ai kaji kaba yawng hpe woi mat wa sai lam hpe wa mu ma yang, Dawi hte shi a masha ni gaw n sen aja awa hte jahtau hkrap shajang ma ai.

Dai mare masha ni gaw shanhte a madu jan kashu kasha ni a majaw myit ru myit tsang hkrum shajang ma ai rai nna, Dawi hpe n lung hte kabai sat kau na maw mu ai. Dawi mung grai myit ru ai hte grai myit kaji wu ai rai nna, “Ngai gaw n dai hpyen hpung ni hpe hkan shachyut na rai ni? hkan shachyut yang dep lu na rai ni?” ngu nna Yehowa Karai Kasang hpe san wu yang Karai Kasang gaw, “Hkan shachyut su, yawng hte hpe bai lu la na ra ai,” ngu nna tsun wu ai hte maren Dawi hte shi hta lawm ai marai kru tsa hte rau hkan shachyut nang wa ma yang Besora hka shi de du ai shaloi masha marai lahkawng tsa gaw hkiba mat shajang ma ai rai nna, dai yang e hti nga mat ma ai. Dawi hte masha marai mali tsa hte gaw bai lai sa mat wa ma yang, pa langai mi hta machyi ai masha

langai mi taw nga ai hpe sa mu mu ai. Shanhte gaw dai masha hpe shat lu sha jaw mu yang dai wa mung n gun bai ja wa nna bran wa wu ai. Dawi gaw, “Nang kadai rai nta?” ngu nna san yu wu yang, dai wa gaw, “Ngai gaw Amalek masha ni kaw mayam yam ai wa rai nga nngai, ngai hpe nye a madu gaw kau da nna wa mat masai; Hkerehti mung a dingda maga, Yuda mung hte Hkaleb mung ni a dingda maga daw mi hpe gasat ngut nna Zekla mare hpe mung wan hte nat kau manu ai,” ngu nna tsun dan wu ai. Dawi mung “Dai masha ni nga ai shara de lam madun lu nni?” ngu n na san wu yang shabrang wa gaw “Nang madu gaw ngai hpe n sat kau ai hte nye a madu hpang de bai n ap kau na rai yang gaw dai lam ni yawng hte hpe ngai madun lu na nngai,” ngu wu ai. Shingrai dai shabrang wa hte Dawi gaw, ga shaka tawn da ngut jang, hkan shachyut nang wa ma yang hpyen hpung ni dap jung let nga nga ai shara de hkan dep mu ai. Amalek masha ni gaw Hpilisti mung, Yuda mung ni kaw na lu la wa ai lanep rai ni hte hpawn padang poi galaw nna ka manau ai hte masha wunawng wuwa de jawng nga mala ai hpe sa mu mu ai. Dawi mung du ai hte rau gasat wu yang, gawla-u jawn nna hprawng lawt mat wa ai masha mali tsa hta ka ga, nga manga hte hpe gasat kau n htawm shanhte la mat wa ai lanep rai ni yawng hpe bai lu la ai hta n ga, shi a madu jan yan hpe bai hkye la lu wu ai.

Shingrai Dawi gaw Amalek masha ni hpe gasat kau nna bai nhtang wa ai hpang, masum ya na jang shabrang ma langai mi gaw shi a hpun palawng gang je kau ai hte shi a baw hta ga n hpu hte bun let sa du nhtawm Dawi a lagaw n hpang e, nawku wu ai. Shaloi Dawi gaw, “Nang kanang na sa n ta?” ngu wu yang dai shabrang wa gaw, “Ngai Israela dap kaw nna hprawng wa ai rai nngai,” ngu wu ai. Dawi gaw “Nanhte sa ai amu lam gaw kaning rai sata?” ngu wu yang “Israela hpyen hpung ni gaw shara shagu hprawng bra mat masai hte Shawlu hkawkam hte shi a kasha Yonahtan mung si mat masai,” ngu nna tsun dan wu ai. Shingrai shiga sa tsun dan ai shabrang hpe “Nang gaw Shawlu hte kasha Yonahtan si ai lam gaw kaning rai nna chye n ta?” ngu nna bai san wu yang, shabrang wa gaw “Ngai gaw Gilboa bum de sa hkawm du yang Shawlu gaw shi a ri hta shadaw nna nga ai hpe mu we ai. Leng jawn ai share ni, gumra jawn ai share ni gaw aja awa gasat

chyi nga ma ai. Shawlu gaw hpang de kayin yu dat wu yang ngai hkan nang ai hpe mu nna, ngai hpe shaga nngai; ngai mung, nga nga nngai ngu htan we ai. Dai shaloi, nang kadai rai n ta? ngu nna bai san wu yang, ngai gaw Amalek masha rai nngai, ngu we ai. Shaloi Shawlu mung ngai kaw sit sa nna, ngai hpe sat kau rit; ngai n sa n hti hkraw ai majaw grai jam jau ru tsang nga nngai, nga nna tsun ai majaw ngai sit sa yu yang shi n hkprung mai sai lam hpe chye nngai majaw, ngai shi hpe sat kau da nna, shi a baw n tsa na gup chyawp hte shi a lata na lahkawn hpe raw la n htawm nang madu hpang de wa ap ya nngai,” ngu bai tsun dan wu ai.

Dai shaloi Dawi gaw shi a palawng hpe gang je kau wu yang, shi a masha ni yawng hte mung dai hte maren hkan galaw shajang ma ai. Shawlu hte shi a kasha Yonahtan hte Karai Kasang a masha ni yawng hte gaw, n htu hte si shajang masai majaw shanhte a matu shana yup tung du hkra, sharung shayawt let hkrap ngu hkrap ngoi shajang let shat lu sha gam shajang ma ai.

Dai hpang Dawi gaw shi a dum n ta masha ni yawng hpe shaga la nna Hebron mare de htawt mat wa let, dai yang e nga wu ai. Dai hpang Yuda salang ni gaw sa hpawng nna Dawi hpe hkawkam aya dang mu ai rai nna Dawi gaw Yuda hkawkam tai wa wu ai. Yuda masha ni hta n ga, Israela masha ni gaw Dawi kaw n hkan nang mayu ma ai. Hpa majaw nga yang Ish-boshet ngu ai Shawlu a kasha gaw, dai masha ni hpe naw up hkang nga ai majaw rai nga ai. Shingrai Shawlu a amyu masha ni hte Dawi amyu masha ni gaw shaning na na wa gasat hkat ma ai hte Dawi a masha ni gaw n gun grau ja wa ai hte Shawlu a amyu masha ni gaw lani hte lani grit wa shajang ma ai. Dai hpang sanit ning bai lai wa yang Ish-boshet a mayam ni gaw shi hpe sat kau mu ai rai nna Israela salang ni gaw Hebron mare e bai zuhp hpawng nhtawm Dawi hpe Israela hkawkam aya bai dang ya mu ai.

Dai hpang Dawi a hpyen hpung ni gaw Yerusalem mare de bai lung wa nhtawm Ziun hpyen dap hpe gasat la kau nna, shanhte dai yang e nga let dai mare hpe Dawi a mare, ngu nna shamying mu ai. Dawi gaw n gun grau ja wa ai hte Karai Kasang mung shi hta e tut nawng a nga nga wu ai. Ya, Turu hkawkam Hiram mung shi a kasa ni hte rau marau hpun, lak sama hte wut gaw chye ai ni

hpe Dawi hpang de shangun ya ai hte hkawhkam hkaw hpe atsawm sha galaw shangut mu ai. Yehowa Karai Kasang gaw shara shagu kaw na shi hpe hkye la ai akyu hkam sha wu ai rai nna, hkawhkam hkaw hta angwi apyaw sha nga lu wu yang myihtoi Nahtan hpe shaga nna, “Yu u, ngai wa gaw n dai marau hpun pyen n ta hta rawng nga ni ai; Yehowa Karai Kasang a sumpu gaw, sumpan sum kata e sha nga nga ai,” ngu nna tsun wu ai. Dai shaloi myihtoi Nahtan gaw “Nang myit lu ai hte maren galaw u, Yehowa nang hte rau rai nga ai” ngu nna htan wu ai.

Dawi hpe Israela hkawhkamaya dang masai lam hpe Hpilisti masha ni na ma yang dai masha ni yawng hte gaw, Dawi hpe tam na matu sa wa ma ai. Shaloi Dawi gaw hpyen dap de sa nga nga wu ai. Hpilisti masha ni gaw Rehpim kadit e nga nga ma ai; shaloi Dawi gaw “Ngai sa gasat lu na rai ni? nye a lata hta ap ya sai rai ni?” ngu nna Yehowa Karai Kasang hpe san wu yang, Yehowa Karai Kasang gaw, “Sa gasat su, Hpilisti masha ni hpe ngai na a lata hta kaja wa ap ya se ai,” ngu nna tsun wu ai hte maren Dawi gaw Bala-perazim shara de sa nhtawm, hpyen ni yawng hpe sa gasat kau wu ai. Dai shara hta Hpilisti masha kabai kau da ai hpara sumla ni yawng hte hpe Dawi hte shi a masha ni gaw yawng hte atsai awai jahten kau mu ai.

Bai, lang mi na Dawi gaw masha marai mun masum hpe lata la nna jahpawng tawn n htawm, Hkerubim n tsa e dung nga ai sumsing lamu a Madu Yehowa Karai Kasang a amying ningsang hte seng ai sakse sumpu hpe Bale-Yuda mare kaw nna la wa na matu, shi hte rau hpawng nga ai masha yawng hte rau rawt sa wa wu ai. Karai Kasang a sakse sumpu hpe bum n tsa e nga ai Abinada a nta kaw na shaw la n htawm leng ning nan a ntsa e mara let la wa ma ai. Abinada a kasha Uza hte shi a kanau gaw leng hpe gawt mu ai. Uza gaw leng makau e hkan nna shi a kanau gaw leng a shawng e hkawm sa wa nga ai. Dawi hte Israela amyu masha ni yawng hte gaw marau sumpyi, tingse, doria, shupsheng, chying hte pahke ni amyu myu lang let Yehowa a man e dum shaja let sa wa ma ai.

Ya Nahkon a chyarang e du jang, usu yan kadawng ai majaw Uza gaw shi a lata ladawn nna Karai Kasang a sumpu hpe

rum shadang wu ai. De a majaw Yehowa Uza hpe masin pawt nna, shi a mara majaw Karai Kasang shi hpe ari jaw nna Karai Kasang a sumpu makau e shi si mat sai. Dai shani e Dawi gaw Yehowa hpe hkrit nna “Yehowa a sumpu ngai kaw kaning rai du lu na i?” nga ai. Shingrai Dawi gaw Yehowa a sumpu hpe Dawi a mare de n hpai wa ai Giti masha Obed-edom a n ta de hpai koi mat wa ai. Dai Karai Kasang a sumpu majaw Obed-edom hte shi kaw nga manga hte hpe shaman ya ai lam Dawi na jang, Dawi bai sa nna Karai Kasang a sumpu hpe Obed-edom a n ta na la wa nna kabu gara ai hte Dawi a mare de shawn la ma ai. Shingrai Yehowa a sumpu hpai ai ni lahkam kru htawt yang, usu hte hpum sau ai nga langai mi hkungga jaw jau ma ai. Dawi mung sumpan hpa hkai lawng hpun nna, Yehowa a man e ka manawt nga ai. Dawi hte Israela masha ni n lang garu jahtau ai hte pahtau dum let Yehowa a sumpu la wa ma ai. Yehowa a sumpu hpe shawn nna, Dawi gap tawn ai sum a ka-ang hta tawn da ngut jang, Dawi gaw wan nat hkungga hte mahku hkungga nawng jau wu ai.

Dawi gaw grup yin na hkawkam yawng hte hpe gasat dang la kau nna, gumra leng hte ja gumhpraw re ai ni hpe lu la wu ai.; shi galaw ai lam magup hta Yehowa Karai Kasang gaw karum ya wu ai rai nna, Israela mungdan hpe amu lam shagu ding hpring teng man ai hku tara daw dan ya wu ai.

Lang mi na Dawi hkawkam gaw, Yoab hte shi a ali ama ni, Israela amyu masha ni yawng hte hpe shangun dat nna, Ammon a kasha ni hpe sa gasat kau mu ai hte Raba mare hpe wang tawn da mu ai. Dawi gaw Yerusalem mare e sha anga nga ai. Lani mi na shana de e, Dawi gaw yup ra kaw na rawt nna, n ta ntsa e hkawm chyai nga yang grai ahpraw tsawm ai numsha langai mi gaw, hka shin nga ai hpe mu wu ai. Dai shaloi Dawi gaw, “Dai numsha gaw kadai rai ni?” ngu nna masha dat nna san shangun dat wu yang, dai numsha gaw Ammon amyu masha ni hpe sa gasat na matu shangun dat ai shi a hpyen bu wa Uria a madu jan re ai lam hpe tsun shana dan mu ai. Dai shaloi Dawi gaw dai numsha hpe shi hpang de shaga la shangun dat wu ai. Shingrai kade nna yang dai numsha hpe shi a n ta de bai dat dat wu ai. Dai hpang kade nna yang dai numsha Batsheba gaw na-um nasin hkum rai wa sai hpe chye wu ai

shaloi, Yoab hpang de masha shangun dat nna, “Dai hpyen bu wa Uria hpe ngai hpang de wa shangun rit,” ngu nna htet dat wu ai. Shingrai htet dat ai hte maren, Yoab gaw dai Hiti masha Uria hpe hkawkam wa hpang de wa shangun dat wu ai. Shingrai Uria du wa wu yang Dawi gaw, “Hpyen majan lam gaw kaning rai sai i?” ngu nna jingku majing zawn san let, ngut jang “Na a n ta de apyaw sha naw wa nga su,” ngu nna tsun dat wu ai.

Ya Uria gaw, hkawkam wa hkang dat ai ga hpe n madat ai sha, shi a n ta de n wa ai sha, nga ai lam hpe hkawkam wa na wu yang, Uria hpe shaga la nna, “Nang gaw sumtsan ga kaw nna hkiba ai hte du wa ai n rai ni? hpa majaw na a n ta de n wa ai sha nga nga ai i?” ngu wu yang Uria gaw, “Karai Kasang a sumpu hte Israela masha ni hte Yuda masha ni gaw sum hta e nga shajang nga ma ai; madu Yoab hte madu a mayam ni gaw pa ga hkan e nga hkawm nga ma ai; ngai gaw nye n ta de wa nna lu lu sha sha rai nna madu jan hte pyaw nga mai na a ni? Nang madu hkrung nga ai hte maren ngai na a mayam wa gaw dai zawn n galaw na nngai,” ngu nna htan wu ai. Dawi mung “Nang dai ni mare e naw nga nga u, hpawt de she nang hpe shangun dat na nngai,” ngu nna tsun wu ai hte maren Uria gaw Jerusalem mare e lani mi hte lana mi du hkra nga nga ai. Dai shana tup hkawkam wa gaw Uria hpe shaga la nna lu lai sha lai rai nga ma ai ten du hkra lusha woi sha wu ai. Rai timung Uria gaw, yup tung du hkra rai timung shi a n ta de n wa ai sha hkawkam wa a mayam ni hte rau yup let shana shalai kau wu ai.

Hpang jahpawt e Dawi gaw Yoab hpang de laika ni ka nna, Uria a lata hta nan shangun dat wu ai. Dai laika hta ka da ai mungga ni gaw “Hpyen man grai laja ai shara de n dai Uria hpe san da nna shi hpe hpyen ni a lata hta si na matu hpyen la ni hpe gaw hpang de htong nut shangun kau dat u,” nga ai laika ni rawng nga lu ai. Hkawkam wa hkang dat ai hte maren Yoab gaw mare ni hpe hkan kawan yu nna hpyen man grau laja ai hte n gun grau ja ai shara de Uria hpe san da wu ai. Dai hpang mare masha ni gaw hpyen gasat anin pru wa mayang, Dawi a mayam ni n kau mi si mat wa shajang ma ai. Dai shaloi Hiti masha Uria mung si mat wu ai. Uria si mat wa sai lam shi a madu jan na wu yang shi a madu

wa a majaw grai sharung shayawt let hkrap ngu hkrap ngoi rai wu ai. Dai hpang Dawi gaw Uria a madu jan Bathsheba hpe shaga la n htawm hkawkam jan shatai wu ai.

Ya Dawi galaw ai amu lam ni hpe Karai Kasang gaw matsat wu ai rai nna, myihtoi Nahtan hpe Dawi hpang de shangun dat wu ai rai nna, myihtoi Nahtan gaw hkawkam wa kaw shang nhtawm, “Hkawkam wa e, mare langai mi hta marai lahkawng nga ma ai; langai mi gaw sahti kunmi, langai mi gaw matsan mayan wa rai nga ai. Sahti wa gaw sagu dumsu law law lu su nga ai; matsan mayan wa chyawm gaw shi mari la ai sagu yi kasha hta kaga hpa mung nlu wu ai. Sagu yi kasha dai gaw shi a madu kaw mung, madu a shayi shadang sha ni hte mung rau kanawn let kaba wa ai; madu a shat sha, madu a gawm hta lu, shi a lahpyen hta yup nna shayi sha zawn rai nga lu ai. Ya kalang mi na sahti wa kaw manam du nna sahti wa gaw manam ni hpe galaw jaw na matu, shi a sagu bai nam ni hta na gaw lahpawt nna nla wu ai sha, matsan mayan wa kaw na sagu yi shingtai sa la n htawm shi a manam wa hpe galaw jaw kau wu ai.” Shaloi Dawi gaw, dai sahti wa hpe grai masin pawt nna “Yehowa a hkrung nga ai hte maren, shingrai galaw ai wa gaw si ging ai wa rai nga ai,” ngu nna htan wu ai.

Dai rai nna Nahtan gaw Dawi hpe, “Nang nan rai nga ndai, Israela Karai Kasang Yehowa tsun ai gaw, ‘Israela masha ni a hkawkam tai na ngai nang hpe namman chya ya ni ai; Shawlu a lata na mung nang hpe hkye tawn sade ai. Na madu a amyu matu ni hpe mung, na madu a madu jan ni hpe mung na a lahpyen e ngai ap ya sade ai; Israela amyu hte Yuda amyu hpe ngai nang hpe ap ya sade ai; dai hta n law yang rai kaga mung ngai nang hpe jaw mayu nga nngai; dai re ai mi, Yehowa a tara hpe nang hpa rai n gawn n sawn rai nna, shi a man e n shawp ai amu galaw n ta? Hiti masha Uria hpe nang sat kau n na, shi a madu jan shaw la ya nu hka; kaja wa, Ammon a kashu kasha ni a n htu hte nang shi hpe sat kau nu ai; ya chyawm gaw nang ngai e n gawn n sawn rai nna, Hiti masha Uria a madu jan shaw n dai majaw, na a amyu matu ni mung n htu hte hkrui kadup na manu ai.’ Yehowa tsun ai gaw, ‘Yu u, nang hpyen na masha gaw na a kashu kasha ni hta na ngai shapraw na we ai. Na a man e na a madu jan ni hpe ngai la kau

nna, na a htingbu wa hpe ap ya na se ai. Shi gaw shani chying tung e nan na a madu jan ni hte nga sha dan na ra ai. Nang dai amu hpe mayun mayaw galaw ai rai timung, ngai gaw Israela shawa hpawng a man e rai timung, jan a ahtoi hta rai timung, dai hpe hpaw dan na we ai,”” ngu nna htawn tsun wu ai.

Shaloi Dawi gaw, “Yehowa hpe ngai shut se ai,”” ngu nna Nahtan a man e yin la wu ai. Nahtan mung, “Nang galaw ai yubak Yehowa raw kau nu ai, nang hkum si na n rai; rai timung nang ning rai shut ai rai nna, Yehowa a hpyen ni a man e jahpoi shara kaba shatai ai majaw, ya shangai na kasha gaw, teng teng si lu na ra ai,”” ngu wu ai.

Dai hpang Uria a madu jan shangai ai Dawi a kasha hpe Yehowa ari jaw dat nna shi grai machyi nga ai. Dawi mung dai ma a matu Karai Kasang kaw hpyi nem nga ai rai nna lusha gam let shana tup n hku kata e, ga hta kaleng taw nga ai. Shi a hkaw na myit su ni mung shi hpe sa sharawt na nga sit sa timung, shi mahtang n hkraw nna, shanhte hte rau n lu n sha ai nga nga ai. Shingrai sanit ya du jang, ma dai si mat wu ai. Dawi a ali ama ni mung “Ma dai naw hkrung nga yang pyi, anhte a ga n madat lu ai gaw, ma si ai lam tsun dan jang gaw grau nna shi a hkum hpe zingri na wu ai,”” nga nna ma si ai lam Dawi hpe n tsun dan wam mu ai. Rai timung ali ama ni kahte ai ga Dawi na nna ma si sai dum wu ai. Dai rai nna Dawi gaw, “Ma si sani?”” ngu nna ali ama ni hpe san wu ai. Shanghte mung, si sai ngu nna tsun dan mu ai.

Shaloi Dawi ga na rawt nna, hka shin ai hte sau chya let hpun palawng galai wu ai. Shingrai Yehowa a n ta de sa nawku nhtawm, hkaw de bai wa nna lusha hpyi sha wu yang, shanhte shachyip ya nna shi sha nga ai. Dai rai nna shi a ali ama ni gaw shi hpe “Ataw, hpa majaw shing rai n ta? Ma naw hkrung nga yang pyi, ma majaw lu sha gam let hkrap ngu hkrap ngoi rai nhtawm, ma si mat yang chyawm me, shat rawt sha n hka i?”” ngu wu ai. Dawi chyawm gaw “Ma naw hkrung nga yang Karai Kasang ngai hpe matsan dum nna, ma hpe shamai ya na n hten myit nngai majaw, lusha gam ai hte hkrap nga ai rai nga ai. Ya ma si mat sayang me, hpa matu lusha gam na rai ta? ma hpe hkan shabai la lu na a ni? shi hpang de mahtang ngai hkan na rai nga nngai. Shi

chyawm gaw ngai hpang de n htang sa na n rai,” ngu nna htan wu ai.

Bai Dawi gaw shi a madu jan Bathsheba hpe shalan shabran nna, shi hpe lashum wu ai. Shi mung shadang sha shangai ya wu ai rai nna, ma dai hpe Shawlumon ngu nna shi kawa nan shamying wu ai. Dawi a madu jan rai nga ai kaga langai mi mung shadang sha langai mi shangai ya wu ai rai nna, dai ma hpe Absalom ngu nna shamying wu ai. Israela kashu kasha ni hta na Absalom zawn ahpraww tsawm ai langai mi mung n nga ai hte shakawn shagraw hkrum ai masha kadai mung n nga ma ai. Shi a kara hpe shaning shagu daw nna shen yu yang shekela lahkawng tsa tup li nga lu ai. Shingrai timung Absalom gaw masin grai kadun ai masha rai nna shi a kahpu Amnon hpe sat kau da nhtawm kaga shara de hprawng mat wa wu ai. Shi gaw hprawng mat wa ai hte kaga mungdan de masum ning na hkra sa nga mat ai hpang Yerusalem mare de bai n htang wa ai. Dai mare de wa nga ai rai timung kawa hte n hkrum ai sha lahkawng ning tup wa makoi nga wu ai. Dai hpang kawa hte bai hkrum wu ai rai nna, kawa gaw shi hpe mara n jaw ai sha hkap ahpum la ai hte pup let, hkap tau la wu ai.

Dai hpang Absalom gaw leng hte gumra mazing tawn nna shi a shawng e gat na masha marai manga shi san tawn wu ai. Absalom mung jau jau rawt nna mare chyenghka lam e tsap nga nga re ai. Ya amu rawng ai wa tara sa dara na nga, hkawkam wa hpang de sa jang Absalom mahtang dai wa hpe hkap shachyen let, “Nang gara mare na rai n ta?” ngu nna san wu ai. Dai wa mung, “Na a mayam wa dai wora Israela lakung na rai nga nngai,” nga nna htan jang Absalom mung, “Na a amu gaw kaja ai hte teng man ai amu rai nga lit dai; rai timung na a amu dai hpe jeyang na masha hkawkam wa kadai hpe mung san da wu ai n rai,” ngu nna hkap tsun tsun rai nga ai. Dai hta n ga Absalom gaw, “Ngai lama n dai mung e tara jeyang du rai n ga law, dai rai taw gaw amu rawng ai ni yawng mayawng ngai kaw sa jang ngai gaw teng man ai hku jeyang ya na mawe ai,” ngu nna tsun tsun di wu ai. Shingrai marai langai ngai shi kaw hkungga lara rai sa jang, dai wa hpe hkap ahpum la nna, pup dat dat di wu ai. Shingrai hkawkam wa kaw

tara dara na nga Israela masha yawng mayawng hpe Absalom dai hku hkap galaw law rai nna Israela masha ni a myit hpe lagu la ya ya rai wu ai.

Ya mali shi ning lai yang Absalom gaw, hkawkam wa kaw shang nna, “Na a mayam Suri mung na Geshura mare e naw nga nga yang, Yehowa hpe ning nga ga shaka da sai. Yehowa ngai hpe Yerusalem mare de bai woi wa yang gaw, ngai Yehowa hpe jaw jau na nngai, ngu se ai. Dai rai nna Yehowa hpe ngai shaka da se ai hte maren, Hebron mare de wa nna ga shaka rap wa na ahkang jaw dat e,” ngu nna hpyi wu ai. Hkawkam wa mung, “Angwi apyaw wa nu,” ngu dat wu ai. Shingrai Absalom mung rawt nna Hebron mare de wa ai. Rai timung Absalom gaw Israela amyu ni n lang hpang de gumlau kasa shangun dat nna amyu masha ni hpe pahtau dum ai na jang Absalom gaw Hebron mare e hkaw dung ai re ai hpe chye mu,” ngu nna tsun da mu, nga nna hkang dat wu ai.

Shaloi masha langai mi gaw, Dawi kaw sa nna “Israel masha ni a myit gaw Absalom hpang de lawm mat wa masai,” ngu nna ashi tsun wu ai. Dai majaw Dawi gaw Yerusalem mare e shi hte rau nga ai ali ama mahkra hpe, “Rawt mu, anhte hprawng ga, shing nrai yang kadai mung Absalom hpe lawt lu na n rai; alawan pru saga, dai n rai yang shi anhte hpe dep rau nna anhte hpe sa sat ai hte mare hpe mung n htu hte hpya kau na maru ai,” ngu wu ai. Hkawkam a ali ama ni mung, “Nang madu hkawkam hpajang ai lam shagu na a mayam ni hkan nang na jin jin rai nga ga ai,” ngu mu ai. Shaloi hkawkam wa gaw shi a httingnu na ali ama ni yawng hte rau pru wa ma ai. Mung masha ni nlang hte gaw grai hkrap sharung ma ai; shi kaw hkan nang ai ni n lang sa wa nna hkawkam wa nan Kidron hkaraw rap wu yang masha n lang hkan rap wa nna, nam lam hku bawp mat wa ma ai. Dawi mung hkrap let baw httinggrum nna hkyepdin raw kau n htawm Tsanlun bum de lung wa nga ai. Shi kaw hkan nang ai nlang hte mung baw httinggrum nna hkrap let, hkan nang lung wa shajang mu ai.

Dawi hkawkam gaw Bahurim mare de du jang Shawlu a kahpu kanau ni hta na, Gera a kasha Shimi ngu ai wa langai mi matsa let pru sa wa ai. Dawi hte shi a ali ama ni n lang hpe lungdin

hte kabai wu ai. Masha n lang hte share jaubu ni mahkra gaw hkawkam wa a hkra de pai de gumbawm let sa wa ma ai. Shimi matsa ai ga gaw, “Masha sat ai, n hkru ai wa e, hprawng u, hprawng u, Shawlu a mungdan kashun la nna shi a amyu matu ni hpe sat kau ai yubak n lang hte gaw na a ntsa e Yehowa nhtang dat nna, na a mungdan hpe na a nsha Absalom a lata hta ap kau nu ai; hkrum sha u. Nang masha sat ai wa rai nna she, matai dawp ai hkrum nga n dai,” ngu wu ai.

Dai re ai majaw Zeruia kasha Abishai gaw hkawkam wa hpe, “Gwi chyasi wora, hpa nga nna me nye madu hkawkam hpe matsa nga a ta? ngai sa htau kau se ga,” ngu nna hpyi wu ai. Hkawkam wa chyawm gaw, “Zeruia kasha ni e, nanhte hte hpa seng a ta? matsa nga u ga. Dawi hpe matsa u, ngu nna Yehowa shangun dat nu ai. Dai rai nna nang hpa majaw shing rai n ta? nga nna kadai gawn lu n ta?” ngu wu ai. Bai, Dawi gaw, Abishai hte shi a ali ama ni mahkra hpe “Yu mu, nye a nshang na hkrat ai ngai sha majing wa pyi ngai hpe sat na tam nga ai rai yang gaw Ben-yamin amyu masha gaw dai hta grau na n rai ni? ra mi nga nga u ga; matsa nga u ga; Yehowa hkang da ai majaw rai sai; dai ni wora wa matsa ai a marang e ngai hkrum sha ai shoi hpa ni hpe Yehowa mada mara nna, chyeju bai nhtang jaw na n hten,” ngu wu ai. Shingrai Dawi shi a masha ni hte rau lam e sa nga ma yang, Shimi mung shi hte hkran hpra shada tawtap bum lanem e sa wa nna, matsa let n lung kabai ai hte ga n hpu hte shamawng di wu ai. Hkawkam wa hte shi a masha ni nlang hte gaw, Ayehpim shara de du nna dai yang nsa a wai la ma ai.

Dai hpang Absalom gaw alawan rawt sa wa nna gasat na ra ai lam ni hpe shiga na ma yang, marai langai pyi n ngam hkra shana n htoi rai n htoi yang Yawdan hka hpe rap shajang mu ai. Shingrai Dawi Mahana-im mare de du wa ma yang dai ga na masha n kau mi gaw sha hpa amyu myu lajang sa nna Dawi hpe sa tau let sak jaw mu ai.

Absalom gaw hpyen daw wa hte rawt sa wa ai shaloi, Dawi gaw shi hte rau sa ai masha yawng hte hpe shinggyin la n htawm hkying mi up na bu, latsa up na bu rai nna hpung mi hte hpung mi up ai bu ni hpe san da shajang ma ai. Shingrai hpyen hpung ni

mare kaw nna rawt sa wa ma yang, Dawi gaw mare chyinghka lam e, tsap nga let hpyen bu ni hpe hkan htet dat ai gaw “Nye a myi man tau nna, ngai sha Absalom hpe ngwi ai hku galaw ya mi,” ngu nna Yoab, Abishai hte Itai hte hpe hkang dat wu ai. Shingrai Dawi a masha ni gaw Israela masha ni hpe gasat na matu, pa de pru wa ma ai. Ehprim maling e shanhte hte hkrum gasat nga ma ai. Israela masha ni mahtang Dawi a ali ama ni a man e sum nna, dai shani jang tsam mari gasat nna masha mun lahkawng si mat ma ai. Mung ting dumbru dumbra rai gasat nna, dai shani e ri n htu hte si ai hta maling na nhkun hkan e hkala si ai mahtang grau law ma ai. Absalom mung Dawi a ali ama ni hte hkrum kadup wu ai. Shi gaw shi a lawze hpe jawn wu ai rai nna, dai lawze gaw wamyi hpun langai mi a lakung lakyng ni a n pu hku gat gale mat wa ai majaw dai wamyi hpun hta Absalom a baw chyat mat nna ga de mung n hkap ai noi goi wat nga ai; lawze gaw shi chyu lai mat wa ai. Dai lam hpe jau bu Yoab na wu yang nri masum brang rai lang sa nna Absalom a masin salum hpe galun ding hkren ya wu ai. Shi a manang ni marai shi mung wang shinggrup nna Absalom hpe sat shakre kau mu ai. Shingrai Absalom si mat ai hpang shi a moi mang hpe la wa nna, nam mali na n hkun langai mi hta bang kau nna, dai shara hta n lung sum pum da mu ai.

Dawi chyawm gaw chyinghka lam lahkawng a lapran e dung nga ai. Sin langa wa mung mare chyinghka ntsa na hpadu hta lung nna mada yu yang, masha langai mi gat wa ai hpe mu wu ai. Sin langa wa gaw dai lam hkawkam wa hpe jahtau tsun wu ai. Hkawkam wa mung, “Langai sha rai yang gaw shiga lawm na re ai,” ngu wu ai. Dai wa gaw makau du wa ra ai. Bai sin langa wa gaw kaga langai mi gat wa ai mu nna “Kaga langai mi bai gat wa ra ai,” ngu nna chyinghka sin ai wa hpe tsun dan mu ai. Hkawkam wa gaw “Dai wa mung shiga gun na re ai,” ngu wu ai. Bai chyinghka sin ai wa gaw “Shawng na wa a sat gaw Zadok a kasha Ahima zawn re ai,” ngu nna tsun wu yang hkawkam wa mung, “Dai wa masha kaja re ai; shiga kaja gun na re ai;” ngu nna tsun wu ai.

Ya Ahima gaw jahtau nna, “Dang saga ai,” ngu nna hkawkam wa hpe tsun wu ai. Bai hkawkam wa a man e

dingnyawm dagup let, “Nye madu hkawkam wa hpe gumlau ai ni hpe ap ya ai na a Karai Kasang Yehowa gaw a nga u ga law,” ngu nna tsun wu ai. Hkawkam wa chyawm gaw, “Ngai sha Absalom kaja nga a ni?” ngu nna san wu yang Ahima gaw “Jau bu Yoab ngai hpe ngu ai na a mayam wa hpe shangun ai shaloi kabrawng kabrang kaba re ai gaw, ngai mu nngai, rai timung hpa lam re ai ngai n chye nngai,” ngu nna htan wu ai. Bai Hkusha masha du wa nna, “Nye a madu hkawkam wa a matu shiga gun wa nngai, nang hpe gumlau ai nlang hpe shanhte a mara hte maren Yehowa dai ni matai dawp nu ai;” ngu nna tsun dan wu ai. Shaloi hkawkam wa gaw dai Hkusha wa hpe, “Ngai sha Absalom kaja nga a ni?” ngu nna san wu yang Hkusha wa gaw “Madu hkawkam wa hpe hpyen nna nang madu hpe zingri na nga gumlau rawt ai ni yawng hte gaw, dai shabrang wa zawn rai nga mu ga law,” ngu nna bai htan wu ai. Shaloi hkawkam wa a masin kahpra nna mare chyinghka n tsa na gawk de lung wa nna hkrap wu ai. Shingrai lung wa let, “Ngai sha Absalom e, ngai sha Absalom e, nang si na malai ngai si n ga law. Ngai sha, ngai sha Absalom e,” nga nna hkrap sharung wu ai.

Shingrai hkawkam wa Absalom a majaw, hkrap sharung nga ai, ngu nna Yoab hpe tsun dan mu ai. Dai shani na padang gaw, masha ni yawng a matu yawn shara tai mat malu ai. Kaning rai n me law, hkawkam wa kasha a majaw yawn hkyen nga ai lam dai shani e masha ni yawng na lu ma ai rai nna, majan ginra na hprawng wa ai ni kaya dum nna lagyim hkawm ai zawn, shanhte gaw dai shani e mare de lagyim shang wa ma ai. Hkawkam wa mung myi man magap kau nna, “Ngai sha Absalom e, Absalom e, ngai sha, ngai sha” nga nna shabam hkrap nga ai. Dai re ai majaw Yoab gaw hkawkam wa kaw shang sa nna, “Nang madu a asak hte na a shayi shadang, na a numdung madu jan ni hte lashi labai jan ni a sak hpe hkye ya ai, anhte na a mayam ni nlang hpe dai ni kaya jahkrum nit dai; hpyen ni hpe mahtang tsawra nna jinhku hpe gaw n dawng kau nit dai; na a agyi salang ni hte na a ali ama ni hpe hpa n sawn ai gaw, nang dai ni dan dan madun nit dai; Absalom hkrung nga nna, na a mayam ni n lang dai ni si yang mahtang nang grau kabu na gaw, dai ni ngai chye se ai; ya mung

rawt u, pru nna na a mayam ni n lang hte hpe shalan shabran mi, shing n rai yang dai na nang kaw masha langai mi muk n nga na saga ai; ngu nna Yehowa a mying gang let, ngai dagam nga nngai. Dai mahtang nang brang ram prat kaw nna ya du hkra hkrum ai shoi hpa yawng hta grau yak na ra ai,” ngu nna shadum wu ai. Shaloi she hkawkam wa rawt nna mare chyinghka lam e dung nga ai. Hkawkam wa mare chyinghka lam e wa dung ra ai, nga nna kajai shajang ma yang, masha n lang hte hkawkam wa a man e sit wa ma ai. Dai hpang Israela masha ni hte Yuda masha ni n lang hte gaw, “Nang madu a mayam ni yawng hte hpawn, nang hkum nang bai n htang wa rit,” ngu nna shaga mu yang Dawi hkawkam gaw Yerusalem mare de bai n htang wa nna, shawng na hte maren bai up hkang nna nga wu ai.

Dai hpang Dawi gaw gumrawng ai myit hte Yehowa Karai Kasang hpe kam sham ai hta masha hpe grau kam ai myit kumla dan pru wa ai. Shingrai jau bu wa Yoab hpe shaga la nna, Dan mare kaw nna Berasheba mare du hkra, Israela masha ni a ginwang ni yawng hpe hkan kawan nna, mung masha ni hpe hti yu na shangun wu ai. Shingrai Yoab gaw hkawkam wa shangun ai hte maren, sa wa nna shata jahku e n htoi hkun ya na jang she Yerusalem de bai du pru wa wu ai. Dawi hkawkam gaw, masha jahpan hkan hta la ai ni bai n htang wa ai hpang de she myit malai lu nna, “Ngai galaw ai mara gaw shut sai, Yehowa Karai Kasang e ngai galaw nna shut kau ai mara ni yawng hpe raw dat kau ya rit law,” ngu nna hpyi tawngban wu ai.

Dai hpang Dawi gaw kasha Shawlumon hpe shaga la nna, “Ngai sha e Yehowa Karai Kasang a matu n ta ngai galaw na ngu nna myit yu sai, rai timung Karai Kasang a mungga ngai kaw du ai gaw, nang gaw hpyen majan grai gasat nna masha asai hpe ga n tsa e nye a man hta grai jahkaw nit dai rai nna nye a amying ningsang a matu n ta nang gap lu na n rai. Nang lu da ai kasha langai mi gaw sumnung ai hte myit sim ai kasha rai nga ai; dai wa a mying gaw Shawlumon rai na ra ai rai nna, shi a prat hta hpyen majan nga sana n rai; shi gaw nye a matu n ta galaw na ra ai. Shi gaw nye a kasha rai na ra ai hte, ngai mung shi a kawa tai na nngai; shi dung

nga ai Israela mungdan a tingnyang gaw, tut nawng e a grin nga shangun na we ai; nga ai,” nga nna htet da wu ai.

Ya Dawi si na nhtoi du magang ra ai rai nna shi gaw kasha Shawlumon hpe, “Ngai gaw n-gawn shawa lam de sa wa na ni ai; dai rai nna, nang gaw n-gun a tsam rawng nna, marai ningja shapraw nga u; nang shang hkawm wa ai lam shagu hta e, awng wa lu hkra Mawshe a tara hta ka da nga ai hte maren na a Karai Kasang Yehowa hkang da ai tara mungga hpe dum nga let, shi a lam hta hkan nna shi a matsun maroi ga ndat da ai ga, tara dara ai hku hte sakse ga hkan shatup nga u; shing rai, na a nshu nsha ni sadie sahka nga nna, teng man ai hku hkan let tinang a kraw lawang mahkra hte myit masin mahkra hte nye a man e hkawm nga ma yang, Israela mungdan a tingnyang hta na a aru arat kaw nna langai mi matut manoi dung nga na ra ai, nga nna Yehowa ngai hpe tsun da ai ga hpe, shadik ya na ra ai.”

Dai shaloi Dawi hkawkam gaw, Karai Kasang a nta hkrang hpe mung dai hta la bang da ra ai rai ni hpe mung, kasha Shawlumon hpe ap ya wu ai.

Dawi hkawkam gaw Hebron mara e hkaw dung ai sanit ning e shata kru, Jerusalem mare e hkaw dung ai sum shi masum ning, yawng hpawn mali shi ning tup Israela mungdan hpe up hkang wu ai.

Dawi hkawkam gaw asak aprat kaba ai du hkra shi a mungdan hpe hkum tsup ai hte si wa ai shaloi du hkra galaw gun hpai nu ai rai nna, Dawi gaw dingla ugut gu nna si mat wa sai rai nna kasha Shawlumon gaw shi a malai hkaw dung sai rai.

Dawi a labau maumwi hpe I Samuela laika Dawkaba 16 kaw nna I Hkawkam laika Dawkaba 2 laman hta hti yu mai nga ai rai.

## SHAWLUMON A MAUMWI

Ya kawa Dawi si mat ai hpang kasha Shawlumon gaw Israela mungdan hpe up hkang na matu hkawkam tai wa wu ai. Shawlumon hkawkam gaw Karai Kasang hpe hkrit hkungga ai wa re ai hte shut hpyit ai lam hpa mung n galaw wu ai rai nna, lana mi na yup nga yang yup mang hta Karai Kasang gaw Shawlumon hpe hkum shadan dan wu ai rai nna, Karai Kasang gaw, “ Ngai nang hpe hpa jaw na hpyi e,” ngu wu ai. Shawlumon gaw “Kaja ai hte n kaja ai hpe ngai chye ginhka lu nna, dai na a amyu hpe chye jeyang lu na, hpaji byeng-ya rawng ai myit, na a mayam wa hpe jaw ya e law;” ngu nna hpyi wu ai. Shingrai hpyi ai lam hpe Karai Kasang ra sharawng ya wu ai rai nna, “Nang gaw asak galu na lam n hpyi n dai; ja gumhpraw sut gan ni hpe mung n hpyi, hpyen ni a asak hpe mung n hpyi, teng man ai hte tara dawdan chye na matu dang lu ai nyan hpaji ni hpe hpyi n dai majaw, nang hpyi ai hte maren, ngai jaw na nngai. Moi shawng de mung nang hte bung ai masha langai mi mung rai n nga, hpang na prat hta mung kadai n pra na ra ai, sut gan ja gumhpraw hpe mung ngai jaw da na de ai. Dai hta n-ga, nang n hpyi lawm ai sut gan hte arawng sadang mung, ngai nang hpe kahtap jaw sade ai: nang pra nga ai prat dingsa e, nang hte bung ai hkawkam langai mi mung n paw pru na sai. Na a nwa Dawi zawn, nang nye a lam hkan nna, nye a matsun maroi ga hte htet da ai ga hkan shatup nga yang gaw, na a aprat hpe mung galu shangun na nngai” ngu nna hkang da wu ai.

Lani mi hta numsha marai lahkawng gaw, Shawlumon hkawkam wa hpang de sa nna shi a man e tsap nga ma ai. Shawng na wa gaw, “Madu e, ngai hte ndai jan gaw nta langai hta sha rawng nga ga ai. Shingrai jawm rawng nga yang, ngai kasha shaprat nngai. Masum ya lai ai hpang n dai jan mung kasha bai shaprat wu ai. Ndai nta hta e an hta kaga kadai mung n nga ai; shi hte an hkrai sha nga ga ai. Ndai jan gaw shana e yup nga yang n dum ai sha shi a kasha hpe dip apyet kau ai majaw, si mat lu ai. Shana yup tung e shi gaw rawt n htawm, na a mayam jan yup pyaw nga yang nye a kasha hpe pawn la nna shi lahpyen e shayup da wu ai. Shi a kasha si mang hpe gaw, nye a lahpyen e tawn da ya wu ai.

Ngai gaw jahpawt aten e, ma hpe chyu shachyu na rawt wa yang, yu u, ma gaw si taw nga ai; bai jahpawt n htoi e yu yang ngai shaprat ai kasha n rai nga ai,” ngu nna tsun dan wu ai. Num kaga wa chyawm gaw “N rai law, hkrung nga ai ma chyawm gaw ngai sha, si taw nga ai ma gaw na nsha rai nga lit dai,” ngu wu ai. Bai shawng na num gaw, “N rai law, si ai ma gaw na nsha, naw hkrung nga ai ma gaw ngai sha rai nga li ai,” ngu wu ai. Shingrai shan lahkawng gaw hkawkam wa a man e n dang kalang hkat nga ma ai.



Shingrai n dang kalang hkat nga ma yang hkawkam wa gaw “Nhtu la wa rit,” ngu nna htet dat wu ai. Shaloi shanhte gaw hkawkam wa hpe nhtu jaw mu ai. Bai hkawkam wa gaw, “Hkrung nga ai ma hpe ka-ang brang di nna dai num yan hpe chyen hpra di nna karan ya mu,” ngu nna hparan ya mu ai. Hkrung nga ai ma a kanu chyawm gaw, shi a kasha hpe tsawra matsan dum wu ai majaw, “Madu e hkrung nga ai ma hpe hkum sat kau et; manang jan hpe mahtang ajaw kau u,” ngu nna hpyi wu ai. Manang

jan gaw, “She karan u; nye a mung, na a mung n rai u ga,” nga ai. Shaloi hkawkam wa gaw, “Hkrung nga ai ma hpe hkum sat kau et; shawng na num hpe jaw kau mu, shi gaw ma a kanu teng nga ai,” ngu nna hparan shangut ya mu ai.

Shingrai hkawkam wa hparan jeyang ya ai lam Israela masha ni yawng na shajang ma ai. Tara dara na lam hta ding man ai hku hkan lu hkra, Karai Kasang a hpaji byeng-ya shi hta rawng nga ai gaw, shanhte dum chye nga ma ai majaw, hkawkam wa hpe hkrit hkungga ma ai.

Karai Kasang gaw Shawlumon hpe nachying kaba ai hpaji byeng-ya ni hpe mung, nammukdara makau na zai bru zawn law la ai hkum tsup ai myit hpe mung, jaw da wu ai. Shawlumon a hpaji byeng-ya gaw sinpraw maga na kashu kasha ni yawng a hpaji byeng-ya hte Egutu mung na hpaji byeng-ya mahkra hta grau kaba nga lu ai. Kanning rai nme law, shi gaw masha mahkra hta hpaji byeng-ya grau rawng nga ai. Grup yin na mungdan shagu hta shi a kajai gara lam dan hkung nga ai. Shi a ga shagawp hkying masum tsun nna, shi a mahkawn mangoi ga hkying mi manga rai lu ai. Shawlumon a hpaji byeng-ya lam na lu ai ga ning tsa na hkawkam ni yawng hta na, shi a hpaji ga madat na matu, mung masha ni sa du shajang ma ai.

Shawlumon hkawkam wa a hkaw kata e, lani mi hta sha kau nna ma mat ai jarit shahpa ni gaw mani ai muk shadung dang sum shi, n mani ai muk shadung dang kru shi, kawn tawn ai usu shi, udat e rem ai usu hkun, sagu latxa, dai hta n ga chyahkyi , shan nga, ya hte rem tawn ai hkai pyek, hkrangma law law rai nga ma ai. Ya Turu hkawkam Hiram gaw shi a shangun ma ni hpe Shawlumon hpang de shangun dat wu ai. Kanning rai n me law, Dawi a malai shi hpe hkawkam aya hta namman chya ya ai lam Hiram na wu ai. Hiram chyawm gaw Dawi a jinghku tut nawng e arai nga ai. Shaloi Shawlumon gaw Hiram hpang de shangun dat nna, “Nye wa Dawi gaw, shi a grup yin shara shagu hkan e, hpyen majan rawt nna Yehowa gaw shi a lagaw npu e hpyen ni hpe garai n tawn da dingsa shi a Karai Kasang Yehowa a matu nawku nta n gaw da lu ai gaw nang chye nga n dai; ya chyawm nye a Karai Kasang Yehowa gaw shara shagu hkan e ngai hpe ngwi pyaw

shangun ya ai; gumlau wa mung n nga ai, gumlu gumlang she rai sai law. Dai re ai majaw, Yehowa gaw nye wa Dawi hpe na malai na tingnyang hta ngai dang da na, na a nsha gaw nye a mying nsang a matu nawku nta gaw da na ra ai, nga nna tsun da ai hte maren ngai maw nga nngai. Dai rai yang Lebanon bum na arit hpun kran la na htet da u; nye a shangun ma ni hte na a shangun ma ni rau rai na mara ai. Nang hpyi ai hte maren, na a shangun ma ni a matu ngai shabrai jaw na nngai.”

Ya Hiram gaw, Shawlumon a ga na lu ai shaloi e, ja ja kabu nna “N dai amyu kaba hpe up na matu Dawi hpe hpaji byeng-ya rawng ai kasha jaw ya ai Yehowa Karai Kasang gaw dai ni a nga u ga law,” nga ai. Bai Hiram gaw, Shawlumon hpang de masha shangun dat nna, “Nang ngai hpe htet dat ai ga ngai na se ai, nang ra ai hte maren arit hpun hte marau hpun ngai jaw na nngai, nye a shangun ma ni gaw Lebanon bum ga kaw nna nammukdara du hkra dai mai lung ni hpe karawt la nna, ngai dai hpe wawn shachyaw n htawm nang ra ai shara de du hkra, hka lam hku shayawng ya na nngai; dai de du yang, ngai wawn run nna nang hkap htawk karawt la nu; nang mung ngai ra ai hte maren, nye a hkaw na masha ni a matu lu sha jaw na rin dai,” ngu nna masha dat let tsun dat wu ai.

Shingrai Hiram gaw Shawlumon ra ai hte maren, arit hpun mung marau hpun mung jaw wu ai. Shawlumon mung Hiram a hkaw na ni a matu, hkau lan mam dang mun lahkawng, jet ai sau pung hkun jaw mu ai. Shawlumon gaw laning hte laning Hiram hpe dai daram jaw wu ai. Bai Yehowa gaw ga ndat tawn da ai hte maren, Shawlumon hpe hpaji byeng-ya jaw wu ai. Hiram yan Shawlumon gaw shada da hkau chyap nga nna shan lahkawng ga shaka tawn da ma ai.

Shawlumon gaw Israela mungdan hta hkaw dung ai mali ning shaning na Ziwa ngu ai shata lahkawng hta e, shi gaw Yehowa a nta hpe gaw da hpang nga ai. Hkawkam Shawlumon gaw Yehowa a matu gaw da ai nta gaw, de a galu de dawng kru shi, n da de dawng hkun, tsaw de dawng sum shi rai nga ai. Dai nta htingnu gawk na jan gaw, de a galu de nta a nda hte bung nga nna, dawng hkun rai nga ai; de a nda de gaw dawng shi rai nga ai. Nta

matu pat tawn ai hkuwawt awa mung shachyaw wu ai. Bai nta shakum grup yin e httingnu gawk ngu ai daw mi hta rai timung, shingran mu ai gawk a grup yin e rai timung, gawk htap mi hte htap mi, shi gawk da wu ai. Lawu htap gawk nda de dawng manga, lapran htap gawk nda de dawng kru, ntsa htap gawk nda de dawng sanit rai nga ai. Kanning rai n me law, dang bat a matu hpe shakum hta n tawk httingrang ai sha, dai shakum a shinggan maga de n gam galaw nna mara lung wa wu ai. Dai nta hpe gawk shachyaw yang n lung n hkun e tawk shatsawm la ngut sai n lung hte shachyaw wu ai majaw sumdu mung, n wa mung, hpa hpri arai ngoi shara ai mung, n na lu ai. Nta a jan ka-ang gawk ni a matu, shang wa ai chyinghka lam gawk, nta a hkra maga de waw nga ai. Bai manai ai lakang hte lapran htap ngu na de shanhte lung wa nna, lapran htap kaw nna ntsa htap de bai lung wa ma ai. Shingrai shi gawk dai nta hpe gawk da shangut lu ai; Arit hpun pyen hte mung dai hpe magap da wu ai. Dai nta makau na htap gawk ni hpe langai mi a tsaw de dawng manga nga, nta ting shakum hte htep di nna gawk da nu ai.


De a arit hpun dangbat ni gawk shakum ni a n gam ni hta mara shachya da nu ai. Shaloi Yehowa a ga Shawlumon hpang de du nna, “Ya nang gap da ai nta a lam gawk, nye a matsun maroi ga hta nang hkan hkawm nna, ngai hkang da ai ga hkan shatup let, ngai htet da ai ga n lang hte hpe hkan galaw n dai rai yang gawk, na a nwa Dawi hpe ngai tsun da ai ga hte maren, ngai nang hta e shagrin shadik da na we ai. Ngai gawk Israela kashu kasha ni hte rau a nga nga nna, nye a amyu Israela hpe n kau da na nngai,” ngu nna tsun wu ai. Shingrai Shawlumon gawk dai nta hpe gawk shangut da wu ai. Shi gawk nta shakum kata maga de arit hpun pyen hte magap da wu ai. Madang kaw nna magaw du hkra nhku maga de hpun pyen hte shangut da wu ai. Nta hpe marau hpun pyen hte nep da wu ai. Chyoi pra htum ai shara ngu ai shingran gawk a matu, mali maga maren sha dawng hkun hkun gang nna nta nbang matut ai gawk a nhku maga de mung, arit hpun pyen hte shangut da wu ai. Shingran gawk n lawm ai sha nawku httingnu gawk ngu ai nta a galu de dawng mali shi rai nga ai. Nta nhku maga de gawk tauba si sumla hte nampan pu sumla ni ka hkrep ai arit hpun pyen hte kum

da wu ai. Yawng gaw arit hpun pyen hkrai hkrai rai nga ai. Hpa nlung mung n mu lu ai.

Yehowa a sakse sumpu tawn da na matu nta nhku e shingran gawk san mazing da wu ai. Shingran gawk gaw galu de dawng hkun, nda de dawng hkun, tsaw de dawng hkun rai nga ai; dai gawk hpe ja jet hte sup wu ai. Arit hpun hte galaw ai hkungri hpe mung sup wu ai. Shingrai Shawlumon gaw nta nhku maga de ja jet hte sup wu ai. Shingran gawk a n pan de mung ja sai dawng dun grang nna, dai hpe aja sup wu ai. Nta ting ngut hkra aja hte sup nga ai. Shingran gawk hte seng ai hkungri hta mung ja hte sup wu ai. Shingran gawk kata e, tsanlun hpun hte dawng shi shi tsaw ai Hkerubim lahkawng shi galaw da wu ai. Dai Hkerubim yan a singkaw gaw maga mi hte maga mi dawng manga nga rai malu ai. Singkaw matu maga mi kaw nna maga mi du hkra dawng shi rai nga ai. Kaga ngu na Hkerubim mung dawng shi rai nga ai. Dai Hkerubim yan gaw hkrang bung nna maren sha rai nga ma ai. Dai Hkerubim langai mi a tsaw de gaw dawng shi, bai langai mung dawng shi rai nga ai. Dai Hkerubim yan hpe shingran gawk kata e shadun da nhtawm, shakum du hkra shan a singkaw maga mi hte maga mi shachyen da nna, gawk ka-ang e de a matu lahkawng shada da hkrum nga ma ai. Dai Hkerubim yan hpe mung ja hte sup wu ai.

Bai nta shakum a kata maga hte shinggan maga grup yin e Hkerubim sumla, pu pu ai nampan sumla ni tawk ka da wu ai. Nta a kata gawk hte shinggan gawk a htong nep hpe mung ja hte sup wu ai. Shingran gawk chyinghka lam matu, tsanlun hpun hte chyinghka man mi galaw wu ai; chyinghka hkadun ni hte hkanoi gaw shakum a htam manga hta na htam mi gang ma ai. Shingrai tsanlun hpun hte chyinghka man mi galaw nna Hkerubim sumla namhtan hpun hte nampan pu ai sumla ni tawk ka nhtawm, ja hte sup wu ai. Hkerubim hpe mung, namhtan hpun hpe mung aja hte chya da wu ai. Dai hte maren htong gawk ngu ai chyinghka lam a matu, htam mali hta na htam mi gang ai tsanlun hpun hkadun daw shadun wu ai. Chyinghka man mi marau hpun hte mung shachyaw wu ai. Man mi hte man mi katsu mai ai chyinghka rai nga ai. Dai hta mung Hkerubim sumla, namhtan hpun hte nampan pu ai sumla


tawk ka nna aja hte sup shakap wu ai. Bai kata ngu na wing gaw, tawk la ai nlung htap masum hte arit hpun dangbat htap mi e shangut da wu ai. Hkaw dung ai mali ning e Ziwa shata hta Yehowa a nta n pawt n hpang gaw da wu ai. Shi langai ning na shata matsat ngu ai Bula shata hta kasi hte maren nta ting na amu mahkra ngut wa sai. Shingrai shi gaw dai nta hpe sanit ning hta e shangut da lu sai.



Tsaw de dawng shi matsat, kaba de dawng shi lahkawng re ai shadaw lahkawng mung magri hte galaw nna Nawku Htingnu a n daw e jun da wu ai. Bai magri hka lawng hpe shajaw wu ai: de a nda de dawng shi, de a tsaw de dawng manga rai nga ai; de a grup yin e dawng sumshi rai nga ai. De a mahka grup yin lawu e nampan majawm lam lahkawng jaw nna, dawng mi hta shi shi shakap let, dai magri hka lawng hpe shajaw yang, dai majawm ni hpe mung jaw shalawm wu ai. Dai hka lawng gaw usu shi lahkawng a ntsa e dung nga ai: masum gaw dingdung maga de, masum gaw sinna maga de, masum gaw dingda maga de, masum gaw sinpraw maga de, man yawng nna, shingdu hkrum rai nga ma ai. Dai gaw lahpa mi tup htat nga ai; de a mahka gaw hkawan mahka zawn rai nna, hkalaw pan sumla hte sumli wu ai: dai gaw ntsin bat hkying lahkawng shang nga ai. Bai, magri punghkum shi

galaw da wu ai: de a galu de dawng mali, nda de dawng mali, tsaw de dawng masum rai nga ai. Bai shi gaw magri angdung shi jaw wu ai: angdung langai mi gaw ntsin bat mali shi shang lu ai; langai hte langai gaw dawng mali kaba nga ai; punghkum langai mi a ntsa e angdung langai mi, dai shi gu hkra, mara nga ai. Bai dai punghkum ni gaw Nawku Htingnu a hkra de manga, pai de manga shadun wu ai: dai magri hka lawng hpe mung, dai nta a hkra maga de sinpraw dingda jut e tawn da wu ai. Bai Shawlumon gaw, Yehowa a nta kata de nga ai rai yawng hte hpe galaw wu ai: aja hkungri galaw wu ai; madun dan nga na muk matu aku, aja rai nga ai; pyengdin shadun ni, shingran gawk a man e hkra maga de manga, pai maga de manga, aja jet rai nga ai; nampan ni, pyengdin ni, lakap ni mung aja rai nga ai; hka wan ni, wan lakap ni, angdung ni, chyaw ni, wan ban pa ni mung, aja jet rai nga ai: chyoipra htum ai shara ngu na kata nta a chyinghka ni a matu mung, Nawku Htingnu ngu na nta a chyinghka ni a matu mung, de a pat ta ni aja rai nga ai.

Shingrai hkawhkam Shawlumon gaw Yehowa Karai Kasang a nta hpe ra mara galaw shangut da ai hpang kawa Dawi alu jaw kau da ai ja gumhpraw rai ni yawng hpe shinggyin la nna Nawku Htingnu a sut dek hta mahkawng bang da wu ai.



Shaloi Yehowa a sakse sumpu hpe Ziun ngu ai Dawi a mare kaw nna la wa na matu, Shawlumon hkawkam gaw Israela masha ni hta aprat asak kaba sai ni hte Israela masha ni hpe up hkang nga ai du ni yawng hpe Yerusalem mare de shaga shinggyin jahpawng wu ai. Dai hte maren Israela masha agyi salang ni yawng hte mung, shata sanit ngu ai Ehtanim shata na poi de sa hpawng shajang ma ai. Hkinjawng ni gaw Yehowa Karai Kasang a sumpu hpe hpai sharawt mu ai. Shawa sum hte dai sum hte seng nna san seng ai rai yawng hpe mung, hkinjawng ni hte Lewi masha ni hpai sa wa ma ai. Shawlumon hkawkam hte rau zuphpawng nga ai Israela wunawng wuwa ting, dai sumpu man e rau hpawng nga nna, law ai majaw n dang hti lu ai sagu dumsu ni hpe sat nawng ya mu ai. Hkinjawng ni gaw Yehowa a ga shaka sumpu hpe, chyoi pra htum ai shara ngu ai Shingran gawk kata de, Hkerubim yan a singkaw npu e, hpai tawn da mu ai. Lungpa hta laika hkum hte ka da ai tara kanu shi mung dai sakse sumpu kata e rawng nga ai.



Ya hkinjawng ni gaw dai chyoi pra ai shara kaw na pru wa ma yang, dai sumwi gaw Yehowa nta hpe ka-up nna, hkinjawng ni gaw dai sumwi a majaw tinang a daw jau ai amu ni hpe n galaw lu mu ai: kaning rai nme law, Yehowa a hpug shingkang gaw Yehowa a nta hta hpring ka-up nga ai. Shaloi Shawlumon gaw, “Yehowa htat chyang ai nsin kata e nga nga na ra ai,” nga ai. Gaja wa ngai gaw, Na a matu tut nawng prat dingsa shanu nga na shingbyi shara nta gaw da nngai,” nga ai.

Shingrai Shawlumon hkawkam gaw, Yehowa a tawn hkungri a man e, Israela masha ni yawng a ka-ang e tsap nga nna, shi a lata hpe lamu de ladawn nna, “Israela amyu masha ni yawng a Karai Kasang Yehowa e, sumsing lamu a ntsa e mung, ga ntsa e mung, nang hte bung ai Karai Kasang n nga ai; Karai Kasang gaw ndai ga ntsa e teng teng shanu nga na rai ni? Sumsing lamu hte de a ntsa jahtum e rai timung nang Madu hpe sharawng da lu na n rai; dai majaw ndai ngai galaw ai htingnu hta nang kaning rai rawng nga lu na a ta? Nye a Karai Kasang Yehowa e, ngai na a mayam wa dai ni hpyi jahtau ai ga hpe madat mara ya e law; nang Madu a mayam wa hte nang Madu a amyu Israela masha ni gaw, ndai shara hta hpyi jahtau yang nang shanu nga ai sumsing lamu kaw nna madat mara ya mi law; Madu a mayam Israela amyu masha ni gaw, nang Madu hpe shut kau ai majaw hpyen sum nna bai n htang wa ai hte ndai shara hta nang Madu hpe wa hpyi jahtau yang, sumsing lamu kaw nna madat mara ya ai hte shanhte a shut kau ai yubak mara ni hpe raw dat kau ya mi law; ji wa ni hpe jaw da ai mungdan de lang mi bai woi wa rit law; nang Madu hpe shut kau ai majaw, marang n htu mat ai hte lamu marang hkyet mat ai du hkra, nang Madu sharin ai shaloi shanhte a mara hpe yin la ai hte hpyi tawngban yang, na a mayam Israela masha ni hpe mara kaw na raw dat kau ya mi; shanhte hkan na lam kaja hpe madun let, Madu a masha ni hpe nang Madu jaw da ai sali ga hta marang htu shangun u law; kaga mungdan kaw nga ai masha ni mung nang Madu a grau htum ai shiga hpe na nna, ndai shara de sa nna sa hpyi ma yang, nang shanu nga ai sumsing lamu kaw nna madat mara ya u law; nang Madu a masha ni gaw, nang Madu hpe hkrit hkungga ai zawn, ga ntsa masha nlang na a mungga hpe chye na matu mung,

ndai ngai galaw ai Nawku Htingnu hpe nang shamying da ai hpe chye shangun na matu mung, dai hta n-ga, amyu masha ni yawng hte akyu hpyi mahpyi madat mara ya mi,” ngu nna akyu hpyi wu yang, sumsing lamu de na wan gaw hkrat wa nna hkungga nawng na matu lajang da ai hkungga ni hpe hkru kau wu ai rai nna, Nawku Htingnu kata e Yehowa Karai Kasang a hpung shing kang hte hpring chyat nga ai rai. Htingnu kata e hpung shing kang hte hpring chyat nga ai rai nna, hkinjawng ni gaw Htingnu kata de n shang lu ma ai. Shingrai Yehowa Karai Kasang a wan gaw, sumsing lamu de nna hkrat nna Htingnu kata e hpring chyat ai hpe Israela amyu ni mu ma yang, shawa masha ni yawng hte gaw, Htingnu shinggan maga nlung nep da ai shara e gum dagup ai hte nawku nhtawm, “Yehowa Karai Kasang a hpung shing kang hte matsan dum ai myit gaw tut nawng e grin nga ai law,” nga nna Yehowa Karai Kasang hpe nawku ai hte tsun ma ai.

Dai hpang Shawlumon hkawkam gaw grai law la ai shawa masha ni hte rau shi mali ya tup, poi kaba galaw ma ai. Matsat ya ngu ai nhtoi hta e shi gaw mung masha ni hpe shabawn dat mu ai. Shanhte mung Yehowa Karai Kasang galaw ai chyeju a majaw ja ja kabu gara ai hte tinang a nta de bai wa shajang ma ai.

Shawlumon hkawkam gaw Nawku Htingnu hpe shangut ai hpang Karai Kasang gaw, shana e dan pru nna, “Nang hpyi ai lam shagu hpe ngai na la sai. Ndai shara hta wan nat hkungga nawng na shara shatai na matu ngai nye a matu lata la sai; marang n htu na matu ngai marang jahtum kau sai rai timung, hkaraw hka shi ni hta nsi nai si ni hpe sha lu na matu ngai lajang da nna, nye a masha ni hta ngai ana zinli ni shabra dat ai rai timung, nye a mying hpe shaga ai hte myit malai ma yang gaw, ngai gaw sumsing lamu kaw nna madat mara ya na nngai. Shanhte a mara hpe mung ngai raw dat kau ya na, shanhte a mung hpe ngwi pyaw shangun ai hte, ndai shara hta shanhte hpyi jahtau ai ga hpe mung, ngai madat mara ya na nngai.”

“Nang gaw ngai htet da ai ga yawng hpe hkan galaw nna, ngai lajang da ai ga ni hpe hkan nang na matu, na nwa Dawi hkan ai zawn, nang hkan yang gaw, na amyu hte aru arat yawng hte gaw htum mat na n rai. Israela mungdan hpe up hkang na du gaw, na

aru arat kaw na langai mi matut maroi a dung nga na ra ai, ngu nna na nwa Dawi hpe ndat da ai ga hte maren, na a ting-nyang gaw tut nawng e grin nga shangun na we ai. Shingrai nang gaw shut hpyit nna kaga hpara tsasam hpe nang nawku jaw jau n yang gaw, ngai jaw ai mungdan kaw nna ari jaw ai hte nang hpe gawt kau na nngai. Nye mying ningsang a matu ngai jasan jaseng da ai ndai htingnu hpe, ngai nye a man kaw nna yen kau na nngai; kaga amyu masha ni hpe nga shangun nna, jahpoi asawng ai shara shatai kau na we ai” ngu wu ai.

Shawlumon hkawkam gaw shi a matu grai hkik hkam ai hkawkam hkaw, sut gan ja gumhpraw tawn da na mare, leng ni hpe rem na mare, gumra ni hpe rem na mare, Jerusalem mare grup yin, Lebanon ginwang hte mungdan shara shagu hta ra nga ai mare ni yawng hpe de da wu ai. Dai mungdan hta nga nga ai maigan masha ni yawng hpe mayam shatai nna, Israela amyu masha ni yawng hpe gaw du salang, hpyen bu, hpyen ma, leng sin ai bu, gumra leng ni up hkang ai bu aya hta san da shajang mu ai.

Shawlumon hkawkam gaw magwi kawng hte tingnyang kaba hpe galaw nhtawm, jet ai ja ni hte sup da wu ai. Hkawkam tingnyang de lung wa na matu lakang n gam kru rai nga lu ai. Dung shara maga mi hte maga mi de lata mara shara hte hkum tsum nna, dai lata mara ai shara makau e, hkanghkyi lahkawng mung tsap nga ma ai. Lakang n gam kru a ntsa e mung, hkanghkyi shi lahkawng tsap nga ma ai. Ndai daram hkik hkam ai hkawkam tingnyang gaw, gara mungdan hta mung nga ai n rai.

Shawlumon hkawkam lang ai gawm nga manga hte Lebanon hkawkam hkaw e lang ai rai ni yawng gaw gumhpraw gawm n rai, ja gawm majing rai nga ma ai. Shawlumon hkawkam a prat hta gumhpraw hpe hpa n nawn nga ma ai. Kanning rai nme law, hkawkam wa gaw Kiram a sanghpaw li ni hte rau, Tarshi ngu ai sanghpaw li ni hpe mung, nammukdara hta hkawm shangun wu ai: Tarshi ngu ai sanghpaw li ni gaw, masum ning hta lang mi wa du nna, aja gumhpraw, magwi kawng, awoi hte u ni hpe wa htaw ya mu ai.

Sheba mung hpe up hkang ai hkawkam num gaw, Shawlumon hkawkam a hpung shing kang hte Yehowa Karai

Kasang a amyng ningsang hpe na wu yang, shi hpe gumwai ga hte chyam yu na matu, manam pyaw ai baw amyu myu, ja gumhpraw hte lungseng ni la nna, gawla-uk hta htaw let shi a mayam ni hte rau grai tsan ai mung kaw nna, sa du wu ai. Dai hkawkam num gaw, Shawlumon hkawkam hpang de shang nhtawm, shi myit lu ai lam ni hpe san yu u yang, ndai ga san ni yawng hpe hkawkam wa htai dan wu ai. Sheba hkawkam num mung hkawkam wa a nyan hpaji hkum tsup nga ai hte hkawkam hkaw ni, sha ku ni, laika ku ni hte laika ka ai chyare ni hpe mung, Yehowa Karai Kasang a matu gaw da ai Nawku Htingnu hpe mung, mu wu yang grai mau mat wu ai rai nna, “Madu hkawkam wa e, ngai na a mayam jan na ai shiga hte maren teng nga ai; rai timung ngai na lu ai nang madu a nyan hpaji hte ngwi pyaw ai lam gaw ngai na lu ai hta htam lahkawng grau nga lit hka; madu a man e tut nawng nga nna madu a nyan hpaji hpe tut nawng na lu ai ni gaw, kade wa ngwi pyaw na ma hka, madu hpe tsawra nna Israela mungdan tingnyang hpe shagrin da ai Karai Kasang gaw, *a* nga u ga law. Yehowa Karai Kasang gaw Israela amyu hpe tut nawng e tsawra nga nna, teng man ai hku tara dara ya na matu, madu hpe hkawkam aya hta dang da nit dai,” ngu nna tsun let shi la sa ai kumhpa ni hpe sak jaw wu ai.

Shawlumon hkawkam gaw shi hpe kumhpa sa jaw ai ni hta kaga Sheba hkawkam jan hpe shi ra ai lam hkum tsup na matu shi hpyi ai rai ni hpe bai jaw wu yang, Sheba hkawkam jan gaw shi a mayam ni hte rau shi a mung de bai nhtang mat wa wu ai.

Shingrai Shawlumon hkawkam gaw ga ntsa e nga ai hkawkam ni yawng hta sutgan hte hpaji byeng-ya grau lu nna hkum tsup nga ai rai timung, shi gaw num law law la wu ai. Hpara-u hkawkam a shayi sha hpe la ai hta n ga, kaga maigan shayi sha ni hpe mung law law la wu ai. Dai amyu ni a lam Yehowa gaw Israela kashu kasha ni hpe, “Nanhte gaw shanhte hte n mai kanawn, shanhte mung nanhte hta n lawm u ga; gaja wa shanhte gaw nanhte a myit masin hpe shanhte a hpara ni hpang de shadam kau ya na myit dai,” ngu nna tsun timung, Shawlumon gaw shanhte hta sumtsaw sumra hte a manoi nga ai. Shi a madu jan ni gaw hkawkam shayi sha hkrai sanit tsa lu nna, lashi num masum

tsa rai lu ai: shi a madu jan ni gaw shi a myit masin hpe shadam kau ya mu ai. Kanning rai nme law, Shawlumon asak kaba ai shaloi, shi a num ni gaw shi a myit masin hpe hpara tsasam ni a hpang de woi shadam kau ya mu ai: shi a kawa Dawi a myit masin gaw, shi Karai Kasang Yehowa man e dinghpring nga ai hte maren, shi a myit masin dinghpring nga ai n rai. Yehowa Karai Kasang hpe malap kau nna, hpara tsasam ni hpe wan nat hkungga nawng jau wu ai majaw, Yehowa Karai kasang gaw masin pawt wu ai rai nna, “Nang gaw ndai zawn galaw let, ngai tawn da ai tara hpe tawt lai kau nit dai majaw, na a mungdan hpe karan kau nna, na a mayam wa hpe ngai jaw kau na we ai. Rai timung na nwa Dawi a myi man hpe tau yu nna, na a prat hta gaw ngai naw sharang na we ai; na a nsha a lata kaw nna ngai ndai mungdan hpe dawm la kau na we ai; rai timung mungdan ting hpe n dawm la ai sha, nye a mayam wa Dawi hte ngai lata la ai Jerusalem mare hpe tau yu nna, na a nsha hpe ginwang langai mi ngai naw ngam jaw na we ai,” ngu nna Shawlumon hpe hkang da wu ai.


Shawlumon hkawkam gaw Jerusalem mare e hkaw dung nna, Israela mungdan hpe shaning mali shi ning tup up hkang ai hpang dingla ugut gu mat wa sai rai nna kawa Dawi a mare hta makoi mayang masai rai.

Shawlumon hkawkam a labau maumwi ni hpe I Hkawkam laika Dawkaba 2-11 laman hta hti yu yang mu lu ai rai.

## ELIA A MAUMWI

Israela hkawhkam Ahab a lakhtak hta myihtoi Elia paw pru wa wu ai. Hkawhkam Ahab gaw shi a shawng e paw pru ai hkawhkam ni yawng hta grau nna n hkru n shawp ai hku galaw ai wa rai nna, Samari mying ai mare hta Bala hpara a sumla hpe galaw nna Bala hpara a matu nta mung galaw ai hte tawn hkungrí mung galaw wu ai. Shingrai hpara tsasam hpe nawku jaw jau wu ai. Shingrai ndai daram n hkru n shawp ai lam hpe hkan galaw wu ai rai nna, Karai Kasang gaw myihtoi Elia hpe shangun dat nna, Elia gaw Ahab hpe “Ngai nawku nga ai Yehowa Karai Kasang hkrung nga ai hte maren, ngai n tsun yang gaw, ya kaw nna mari mung n hkrat, marang mung n htu na ra ai,” ngu wu ai.

Bai Yehowa a ga shi kaw du nna, “Shanang na pru wa u, sinpraw de man yawng nna, Yawdan hka taw tap na Hkerit hka shi makau e sa makoi nga su; dai hka na ntsin nang lu nna, u hka ni nang hpe lu sha jaw na matu, ngai htet da ni ai,” ngu nna tsun wu ai. Elia mung Yehowa a ga hte maren hkan galaw nna, Yawdan hka taw tap na Hkerit hka shi makau e sa nga nga ai. U hka ni gaw jahpawt e mung, shana e mung muk hte shan hpai jaw nna shi gaw dai hka shi ntsin lu nga ai.



Shaloi Yehowa a ga shi kaw du nna, “Rawt u, Sidun mung na Zarephtha mare de htawt nga u; Yu u, dai yang na gaida jan langai mi nang hpe bau na, ngai hkang da se ai,” ngu wu ai. Shingrai shi rawt nna Zarephtha de sa wa ai; mare chyinghka lam e du jang, hpun hta ai gaida jan langai mi nga ai rai nna, Elia gaw, “Ataw, ngai lu na ntsin loi mi sa jaw e law,” ngu nna shi hpe shaga wu ai. Shi gaw ntsin sa la na wa nga yang, Elia gaw, “Muk hkyep mi mung la sa rit,” ngu nna hpyi dat wu ai. Shaloi gaida jan gaw, “Na a Karai Kasang Yehowa hkrung nga ai hte maren, ngai muk pa mi pyi n lu nngai, di bu hta muk shadung latup mi hte namtau hta namman kaji mi sha rawng nga ai; ngai hpun hkyep langai lahkawng sa hta nna dai hpe nye a matu mung, ngai sha a matu mung shadu ngut yang she, an lahkawng dai sha nna si wa na saga ai,” ngu nna htan wu ai. Bai Elia gaw, “Hkum tsang et, nang tsun ai hte maren sa galaw timung nye a matu muk pa kaji shawng shadu nna sa jaw rit; dai hpang na a matu mung, nsha a matu mung shadu tawn u. Kaning rai n me law, Israela Karai Kasang Yehowa ning nga ai, Yehowa gaw ga ntsa e marang htu shangun ai shani du hkra dibu na muk shadung gaw ma wa na n rai, namtau na namman mung yawm wa na n rai, nga ai,” ngu nna shi hpe htawn tsun wu ai.

Shingrai shi gaw Elia a ga hte maren wa galaw nga ai rai nna shi mung, myihtoi wa mung, shi a nta masha ni mung, nhtoi tsawmra wa sha nga ma ai. Yehowa gaw Elia a n gup hta htawn tsun ai hte maren, dibu na muk shadung ma wa ai n rai, namtau na namman mung yawm wa ai n rai.

Dai hpang e nta madu jan a kasha gaw, machyi wa nna shi machyi ai gaw rung wa ai hte shi hta nsa n rawng nga ai. Dai rai nna nta madu jan gaw Elia hpe, “Nang Karai Kasasng a masha wa e, ngai nang hte hpa daw ga ta? Nye yubak mara ngai hpe shadum nna, ngai sha hpe sat kau na matu nang ngai hpang de shang nhka,” ngu wu ai. Shaloi Elia gaw, “Na nsha ngai hpe jaw rit,” ngu nna shi hpe tsun wu yang, shi gaw kanu a lahpyen hta na dai ma hpe pawn la nna shi nga ai ntsa gawk de pawn lung wa nhtawm, shi a yup ra ntsa e kaleng tawn da wu ai. Yehowa hpe mung shi hpyi nna, “Nye a Karai Kasang Yehowa e, ndai ngai shingbyi nga ai

gaida jan a kasha hpe sat kau na gaw, nang shi a ntsa e mara shagun da nni?" ngu nna jahtau wu ai. Bai shi gaw dai ma a ntsa e, shi a hkum hpe masum lang hkrawn gum nna Yehowa hpe hpyi let, "Nye a Karai Kasang Yehowa e dai ma a nsoi nsa gaw, shi hta bai shang u ga, ngai nang hpe hpyi de ai," ngu nna jahtau wu ai. Yehowa mung Elia a ga hpe madat mara ya nna, dai ma a nsoi nsa gaw shi hta bai shang wa ai hte, shi prawn wa sai. Shaloi Elia gaw dai ma hpe ntsa gawk de na woi yu wa nhtawm, nta nhku de kanu hpe ap ya wu ai. "Na nsha gaw hkrung nga salit dai," ngu nna shi hpe tsun wu ai. Dai numsha mung, "Nang gaw Karai Kasang a masha wa rai nga ai hte na a n gup na Yehowa a ga gaw teng nga lu ai hpe ya ngai chye nga nngai," ngu nna Elia hpe tsun wu ai.

Ya masum ning lai wa ai hpang, Yehowa a ga gaw Elia kaw du nna, "Sa wa su, na hkum Ahab hpe madun dan su; ngai gaw ga ntsa e marang htu shangun na we ai," ngu wu ai. Shaloi Elia gaw Ahab hpe shi hkum madun dan na nga sa wa ai . Samari mung hta e dai hku wa grai hku nga ai. Dai shaloi e Ahab gaw shi a kunhting wa Obedia hpe shaga wu ai. Dai Obedia gaw Yehowa hpe grai hkrit hkungga ai wa rai nga ai. Yezebela gaw, Yehowa a myihtoi ni hpe sat kau mu yang, Obedia gaw myihtoi latsa woi la nna, shanhte hpe manga shi shi di karan nna lungpu hta e makoi da nhtawm, muk hte ntsin jaw nna bau da mu ai. Dai shaloi e Ahab gaw Obedia hpe "Dai mung na hka hpawk ni hte hka shi ni mahkra hpe sa tam yu su; lawze hte gumra ni hkrung nga nna, yam nga ni yawng n si mu ga; anhte ushat mu hkrup na nhten," ngu wu ai. Shingrai shan lakhawng gaw dai mung hpe sa sawk yu na matu karan nna Ahab gaw shi hkrai lam mi de, Obedia mung shi hkrai lam mi hku rai nna bra hkawm wa ma ai. Ya Obedia sa wa nga yang, Yu u, Elia gaw shi hte hkrum wu ai. Shi mung Elia re ai hpe chye nna shi a myi man gum dagup let, "Nye a madu Elia rai nga nhka," ngu wu yang Elia gaw, "Rai nga nngai, yu u, ndai yang Elia rai nga ai lam na madu hpe wa tsun su," ngu wu ai. Obedia gaw, "Ngai na mayam wa si na matu Ahab a lata hta ap kau na gaw ngai hpa wa shut ni ta? Na a Karai Kasang hkrung nga ai hte maren, nye a madu nang hpe n sa tam shangun ai; amyu langai mi, mung langai mi mung n nga ai. Mung shagu, amyu shagu, shi nang e n

nga ai, mu yang nang hpe teng teng n mu ai gaw shanhte hpe teng teng dagam shangun da mu ai. Ya chyawm gaw Yu u, Elia nang e rai nga ai, ngu nna na madu hpe wa tsun su, nang nga nhtawm me ngai nang kaw nna pru wa yang, Yehowa a Wenyi gaw ngai n chye ai shara de nang hpe woi htawt mat na ra ai; shingrai ngai Ahab hpe sa tsun yang shi nang hpe n mu hkrup nna ngai hpe sat kau na ra ai; na mayam ngai wa chyawm gaw brang ram prat kaw nna Yehowa hpe hkrit hkungga ni ai. Yezebela gaw Yehowa a myihtoi ni hpe sat kau nga yang, ngai chyawm Yehowa a myihtoi latsa hpe manga shi shi di karan nhtawm lungpu hta makoi da ai hte shanhte hpe muk mung ntsin mung jaw nna bau da ai gaw nye a madu hpe n shana ya ma ni? Yu u, Elia nang e rai nga ai, ngu nna na madu hpe wa tsun su, nang nga ndai; shi mahtang ngai hpe sat kau na ni ai,” ngu wu ai. Bai Elia gaw, “Ngai daw jau nga ai Zawnawng Zawwa up hkang ai Yehowa hkrung nga ai hte maren, ngai dai ni jang hkawkham wa a man e paw pru na ring ngai,” ngu wu ai.

Shingrai Obedia gaw Ahab hpe sa tau nna tsun dan wu ai. Ahab mung Elia hpe tau la na sa wa ai. Ahab gaw Elia hpe mu wu yang, shi gaw “Israela amyu hpe sharu shatsang ai wa e, nang rai nit ni?” ngu wu ai. Elia gaw, “Ngai wa Israela hpe sharu shatsang ai wa n rai; nang hkum hte na a nji nwa ni gaw Yehowa hkang da ai ga hpe kau da nna Bala hpara ni hpe hkan nang myit dai majaw she sharu shatsang mu ai. Dai re ai majaw Israela masha ni nlang Bala myihtoi ni mali tsa e manga shi hte Yezebela sha ku e shat jawm sha nga ai. Ashera myihtoi ni mali tsa hpe mung Hkarmela bum de ngai kaw zuphpawng shangun mu law,” ngu wu ai.

Shaloi Elia gaw mung masha ni mahkra hpang de sit sa nna, “Nanhte gaw lam lahkawng a lapran e kade na hkra hpat wat hkawm nga na myit ta? Yehowa nan Karai Kasang rai nga yang shi hpe hkan mu; Bala mahtang rai yang shi hpe hkan mu;” ngu mu ai rai nna, mung masha ni gaw ga hkaw mi muk n htan ma ai.

Bai Elia gaw mung masha ni hpe, “Yehowa a myihtoi ngu na gaw, ngai chyu sha ngam ni ai; Bala myihtoi ni mahtang mali tsa e manga shi ting rai nga ma ai. Dai re ai majaw shanhte gaw usu lahkawng shapraw ya mi ga, shingrai shanhte usu langai mi lata la nna, hpya ngut jang hpun hta mara da timung, wan n

shachyi mu ga, ngai mung de ai manang hpya nna hpun hta mara nhtawm wan n shachyi na nngai; shingrai nanhte gaw nanhte a hpara mying hpe gang mu, ngai mahtang Yehowa a mying hpe shaga na nngai; wan hte htan pru ai mahtang Karai Kasang rai nga ai ngu mu ga,” mung masha ni nlang hte mung, dai gaw mai kaja ai ga rai nga ai nga nna htan mu ai.

Bai Elia gaw Bala myihtoi ni hpe, “Nanhte law nga myit dai majaw, usu langai mi lata la nna shawng hpya mu, nanhte a hpara a mying hpe shaga timung, wan hkum shachyi myit,” ngu mu ai. Shaloi shanhte kaw jaw da ai usu hpe hpya tawn nhtawm, “Bala e , anhte hpe htan ya mi,” ngu nna jahpawt kaw nna jan pungding ga hkra, Bala a mying hpe shaga ma ai. Rai timung hpa nsen ngoi ai mi nna, htan ai wa mung kadai n nga ai rai nna, shanhte gaw galaw tawn ai tawn hkungri grup yin e, ka gum lawt nga ma ai. Ya jan pungding e rai jang Elia gaw, “Aja awa jahtau ya mu, shi gaw hpara rai nga a hka, myit sumru yu nga ai nhten, shing nrailama ma hkan tam sa ai, lam hkawm nga ai nhten, shing nrail yup pyaw nga ai rai nna jasu ra ai,” ngu nna shanhte hpe asawng mu ai. Shaloi shanhte gaw aja awa jahtau nna htung nga ai hte maren, tinang a hkum hpe asai pru hkra ri nhtu hte jahpye kau mu ai. Shingrai shanhte gaw jan kayau kaw nna shana hkungga jaw ang ai aten du hkra, myi htoi shajang ma timung, nsen ngoi ai mi nna, htan ai wa mung kata, zawn nawn ai wa mung kadai n pra, nga ai.

Shaloi Elia gaw mung masha ni mahkra hpe, “Ngai hpang de sit wa marit” ngu nna tsun mu yang, mung masha ni nlang hte shi kaw sit sa ma ai, sharun shabya hkrum ai Yehowa a tawn hkungri hpe mung shi lajang da wu ai. Shingrai na a amying hpe Israela ngu na ra ai, nga nna Yehowa a ga pru ang ai hte maren Elia gaw, Yaku a shadang sha ni a amyu lakung ni a nambat hkan nna nlung shi lahkawng la wu ai. Yehowa a amying gang let dai nlung ni hte tawn hkungri galaw nna dai hkungri grup yin e, nli dang lahkawng dang shang ai hka hkawng htu mu ai. Hpun hpe ahprang nhtawm dai usu hpe shi hpya nna hpun ntsa e mara da wu ai. Bai shi gaw, yam mali hta ntsin jahpring nna “Wan nat hkungga hte hpun a ntsa e jaw bun mu,” ngu mu ai. Bai “Naw jaw mu,” ngu

mu ai hte maren bai naw jaw mu ai. Shingrai masum lang du hkra jaw bun mu ai. Ntsin gaw tawn hkungri grup yin e lwi nga ai hte hka hkawng mung ntsin hte jahpring mu ai.



Ya shana hkungga jaw ang ai aten e myihtoi Elia sit sa nna, "Abraham a, Isak a, Israela a Karai Kasang Yehowa e, nang gaw Israela amyu hta Karai Kasang rai nga ai mung, ngai gaw na a shangun ma rai nga nngai mung, ndai ngai galaw ai yawng gaw, na a mungga hte ngai galaw nngai mung dai ni jang chye lu hkra

shapraw dan u; nang Yehowa nan Karai Kasang rai nga ndai gaw, ndai amyu masha ni chye lu nna, nang shanhte a myit masin hpe nhtang kayin shangun ai gaw dan pru hkra madat mara ya e, Yehowa e madat mara ya e law,” ngu nna hpyi wu ai. Shaloi Yehowa a wan di hkrat nna wan nat hkungga hpe, hpun hpe, nlung ni hte shingbut hpe hkru kau ai hte hka hkawng na ntsin hpe mung jahkyet kau wu ai.

Mung masha ni gaw dai mu yang nlang hte gaw myi man gum dagup nna “Yehowa gaw Karai Kasang rai nga ai; Yehowa gaw Karai Kasang rai nga ai law,” nga ma ai. Shingrai Elia gaw “Bala myihtoi ni hpe rim la mu, langai mi mung n lawt mu ga,” ngu mu ai hte maren, shanhte yawng hpe rim la nhtawm Elia gaw Kishon hka shi de woi sa nhtawm dai yang e shanhte hpe sat kau mu ai.

Shaloi Elia gaw Ahab hpe, “Lung wa su, lu sha nga u, marang kaba zawn wu ngoi nga ai,” ngu wu ai. Shingrai Ahab gaw lu sha na matu lung wa sai. Elia chyawm gaw Hkarmela bum pungding de lung nna, ga de gum dagup let, shi a myi man lahput lapran e matep nna shi a mayam wa hpe, “Lung wa su, nammukdara de yu yu u,” ngu wu ai hte maren shi mada yu yang “Hpa mung nnga ai,” ngu wu ai. Bai Elia gaw, shingrai sanit lang du hkra “Sa yu yu u,” ngu wu ai. Ya sanit lang ngu na hta sa yu yu yang, mayam wa gaw, “Yu u masha lata daram kaji ai sumwi gaw nammukdara kaw nna dawng pru nga ai,” ngu nna tsun wu ai. Dai rai nna Elia gaw lung wa nna Ahab hpe, “Marang gaw nang hpe n hkap hkum yang gaw, na a leng alawan hkyen tawn nna yu wa su, ngu su,” ngu nna htet dat wu ai. Shingrai kade nna yang lamu gaw laru marang hte chyang mang wa nna marang ja ja htu nga ai. Ahab mung leng jawn let Yezrela shara de du wa ai. Yehowa a lata gaw Elia a lata hta rai nga nna, shi a shingkyit kyit nhtawm Yezrela mare chyinghka lam de Ahab a shawng e gat du wu ai.

Ya Ahab gaw Elia galaw ai lam yawng hte myihtoi ni nlang hte hpe nhtu hte sat kau ai lam Yezebela hpe tsun dan wu ai. Shingrai Yezebela gaw Elia hpang de kasa shangun dat nna, “Hpawt de ndai aten e na a asak hpe shanhte hta na marai langai mi a asak hte maren ngai n di yang gaw, hpara ni dai hta grau nna ngai

hpe di mi ga law,” nga ai. Elia gaw dai na wu yang asak lawt hkra, rawt nna Yuda mung na Berasheba de hprawng nhtawm shi a mayam wa hpe dai yang e jahti da wu ai. Shi hkum hkrai lani mi sat nam mali de naw lai sa nna marau hpun npu e dung nga let, si mayu nna hpyi ai gaw, “Yehowa e, ya ram sai, nye a asak dawm la ya ni; ngai gaw ji wa ni hta akyu grau rawng nga ai n rai,” nga nna hpyi jahtau let marau hpun npu e yup pyaw mat wa sai.

Shaloiyu u lamu kasa langai mi shi hpe ahtawt let, “Rawt u, shat sha u,” ngu nna shi hpe tsun wu ai. Mada yu wu yang, yu u shi a baw nhpang e wan n ga hta kakang ai muk hte ntsin namtau hpe mu wu ai. Shi mung lu sha nna bai kaleng taw nga ai. Yehowa a lamu kasa mung bai sa nna shi hpe ahtawk let, “Rawt u, shat sha u, nang sa wa na lam gaw na a matu nau yak la nga ai,” ngu wu ai. Shaloi shi gaw rawt nna lusha nga ai hte dai lusha hta n gun lu la nna Karai Kasang a bum Herob du hkra shani mali shi ya, shana mali shi na hkawm sa wa ai.

Shaloi shi gaw lungpu hku langai mi de du nna dai yang e nga nga ai. Yehowa a ga mung shi kaw du nna, “Elia e, nang nang e hpa galaw nga nta?” ngu nna shi hpe san wu ai. Elia gaw, “Ngai wa, zawnawng zawwa up ai Karai Kasang Yehowa a lam myit grai yu kahtet ni ai, hpa majaw nga yang Israela kashu kasha ni gaw, na a ga shaka lam kau da nna, na a tawn hkungri ni hpe sharun shabya kau ya ai hte na a myihtoi ni hpe nhtu hte sat kau mu ai; ngai hkum hkrai sha hti nga nna, ngai hpe mung sat kau na tam nga ma ai.” Bai Yehowa gaw, “Pru u, dai bum ntsa e, Yehowa a man e tsap nga u,” ngu wu ai.

Shaloiyu u, Yehowa lai wa nna grai ja la ai nbung laru gaw, Yehowa a man e bum ni hpe shaga kau nna, lunghkrung ni hpe agrawp kau mu timung, Yehowa gaw dai nbung laru hta lawm nga ai n rai; nbung laru a hpang e n nang nawn nawn timung Yehowa gaw dai nnang nawn hta lawm nga ai n rai; n nang nawn nawn ai hpang e wan grung timung, Yehowa gaw dai wan hta lawm ai n rai. Dai wan a hpang e a ngwi sha nga ai nsen shara nga ai. Elia gaw, dai na jang shi a myi man hpe hpajawng hte lawai magap nhtawm pru wa nna lungpu mahka e tsap nga ai. Shaloiyu u, nsen langai mi gaw, “Elia e, nang nang e hpa galaw nga nta?”

ngu nna san wu ai. Elia gaw, “Ngai wa zawnawng zawwa up ai Yehowa a lam hta myit grai yu kahtet ni ai; hpa majaw nga yang Israela kashu kasha ni gaw, na a ga shaka lam kau da nna na a tawn hkungri ni hpe sharun shabya kau ai hte na a myihtoi ni hpe nhtu hte sat kau mu ai. Ngai hkum hkrai sha hti nga nna ngai hpe mung sat kau na lam tam nga ma ai,” nga ai. Shaloi Karai Kasang gaw, “Bala a man e lahput n hput di nna, shi hpe n pup yu ai Israela masha hkying sanit hte hpe ngai naw jahti da na we ai,” ngu wu ai.

Bai Yehowa gaw, “Rawt u, Damasku nam mali hku bai wa u,” ngu wu yang shi sa wa nna Shahpat a kasha Elisha hpe mu hkrup wu ai. Shi gaw utang gap shi lahkawng hte hkaibang galau nna shi hkum nan shi lahkawng ngu na gap hta lawm nga ai; shaloi Elia shi hpang de sit sa nna, shi a hpajawng Elisha a ntsa e kabai mara ya wu ai. Shingrai shi gaw utang ni hpe kau da ai hte Elia hpang de gat nang nna, “Nye nu wa ni hpe naw pup da n ga, dai hpang nang kaw hkan nang na nngai,” ngu nna tsun wu yang Elia gaw, “Wa su, ngai nang hpe hpa di de ta?” ngu wu ai. Elisha mung bai wa nna, shi a utang gap mi la sat nhtawm nga shan hpe nahtai hkying rai ni hte shadu nna masha ni hpe jaw wu ai hte shanhte mung sha nga ma ai. Dai hpang shi rawt nna Elia kaw hkan let, shi hpe daw jau nga ai.

Ya dai amu ni byin ai hpang Yezrela masha Nabot gaw Yezrela shara e tsabyi sun langai mi lu ai. Dai sun gaw Samari hkawhkam Ahab a httingnu hte ni nga ai. Dai rai nna Ahab gaw, Nabot hpe, “Na a tsabyi sun, nye a nta hte ni nga ai majaw ngai shat mai sun shatai na matu, dai sun ngai hpe jaw e, ngai nang hpe grai kaja ai sun galai ya na de ai; shing nrail nang tsaw n yang gaw jahpu rai timung jaw na de ai,” ngu nna tsun wu ai. Shaloi Nabot gaw, “Ji wa ni a Sali wunli ga hpe nang hpe jaw kau na gaw, Yehowa hkum kau u ga,” ngu nna Ahab hpe tsun wu ai. Shingrai “Ji wa ni a sali wunli ga nang hpe n jaw na de ai,” nga nna Nabot gaw Ahab hpe tsun ai majaw, shi gaw myit ru nna n ji n mu let shi a nta de bai wa nhtawm yup ku hta kaleng taw let, myi man makoi kau nna shat n sha hkraw wu ai. Shaloi shi a madu jan Yezebela gaw shi kaw sa du nna, “Nang shat n sha hkra hpa rai myit ru nga nta?” ngu nna shi hpe san wu ai. Shi gaw, Yezrela masha Nabot

hpe ngai shaga la nna, “Ataw na a tsabyi sun ngai hpe dut ya rit, shing nrai de a malai grau kaja ai tsabyi sun ngai jaw na de ai; ngu nna hpyi we yang, ngai nye a tsabyi sun nang hpe n jaw lu na nngai, nga nna ngai hpe tsun ai majaw rai nngai,” ngu nna htan wu ai. Dai rai nna shi a madu jan gaw, “Nang gaw Israela mungdan hpe up nga ai nrai ni? rawt u shat sha nna pyaw pyaw rai nga u; ngai mahtang Nabot a tsabyi sun nang hpe ap jaw na de ai,” ngu nna shalan wu ai. Shaloi shi gaw Ahab a mying hte laika ka nna, Ahab a dazik dawk da nhtawm, dai laika ni hpe Nabot a mare e nga ai agyi salang ni hpang de shagun dat wu ai. Dai laika ni gaw ning nga nga ai: lusha gam ai aten madat da nna, mung masha ni hta reng grau ai shara e Nabot hpe shadun mu: shingrai n hkru ai masha lahkawng hpe shi a man e shapraw nhtawm, nang gaw Karai Kasang hpe mung, hkawhkam wa hpe mung matsa kau ndai, ngu nna sakse hkam shangun mu, dai hpang shi hpe shapraw la nhtawm nlung hte kabai sat kau mu, ngu nna ka dat wu ai. Shingrai Yezrela masha ni mung dai hte maren hkan galaw mu ai rai nna, Nabot hpe nlung hte kabai sat kau mu ai.

Ya Ahab hkawhkam gaw Nabot si mat ai lam na jang, shi a tsabyi sun madu la na nga, sa wa wu ai. Shaloi Yehowa a ga Tishbi masha Elia kaw du nna Elia gaw hkawhkam wa hpang de sa nna, “Yehowa Karai Kasang ning nga ai, nang gaw shi hpe sat kau nna shi a sut rai hpe mung la kau nu hka, gwi ni gaw Nabot a asai mata lu ai shara hta na a asai hpe mung mata lu na mara ai, nga ai,” ngu nna tsun wu ai. Ahab mung, “Ngai hpe hpyen ai wa e, nang ngai hpe mu da nu ni?” ngu nna tsun wu yang, Elia gaw, “Nang n kaja ai amu galaw na nga, na a hkum hpe dut kau nu ai majaw, ngai nang hpe mu de ai. Yu u, ngai na a ntsa e tsin-yam tsindam shangun dat nna, nang hpe atsai awai di kau na de ai. Ahab a amyu lasha ma nlang hte hte Israela hta bawng dung nga, bawng lawt pra ai ni hpe htau di kau na we ai; nga ai,” ngu nna Ahab hpe bai htawn tsun wu ai. Ahab zawn n hkru n shawp ai masha langai mi mung n nga ai. Madu jan Yezebela e shadut wu ai rai nna, Karai Kasang a man e n hkru n shawp ai amu galaw na matu shi a hkum hpe dut kau wu ai. Yehowa Karai Kasang gaw Israela amyu masha ni a man kaw nna gawt shapraw kau ai Amori masha ni galaw ai

hte maren, sumla nawku ai lam hpe hkan nang wu ai rai nna, grai matsat shabat ai amu galaw wu ai. Rai timung Elia htawn tsun ai ga hpe na wu yang, shi a palawng gang je kau nna lachyit nba lawai let shat lu sha gam nna nga wu ai. Karai Kasang a mungga gaw Tishbi masha Elia kaw bai du ai gaw, “Ya Ahab gaw, nye a man e myit shagrit shanem nu ai majaw, shi a prat hta ngai n jahten ai sha, shi a kasha ni a prat hta e she dai tsin-yam hpe ngai du shangun na nngai,” ngu nna tsun wu ai.

Ya Ahab hkawkam si mat wa ai hpang kasha Ahazia gaw kawa a malai hkaw dung nga ai. Lani mi hta Ahazia gaw nta ntsa htap hkuwawt hku kaw nna di hkrat ai majaw machyi nga ai. Shi gaw “Ndai machyi ai ana mai lu na kun? Ekron mare e nga ai Balazebu hpara hpe sa san yu masu,” ngu nna masha shangun dat wu ai. Dai shangun dat ai ma ni bai wa ma yang, hkawkam wa gaw, “Hpa majaw ya sha bai nhtang wa myit ta?” ngu nna san mu yang, marai langai mi gaw “Anhte hpe tau la nna, ‘nan hpe shangun dat ai wa hpang de bai wa masu, Karai Kasang Yehowa tsun ai gaw, Israela mungdan hta Karai Kasang n nga ai majaw, Ekron mare na Balazebu hpang de sa san ai rai ni? dai majaw, nang gaw ya nang kaleng nga ai yupku kaw nna hpang de bai yu lu sana n rai; teng teng kaja wa si lu na ra ai, ngu nna wa tsun dan masu,’ nga nna htet dat ai majaw, bai nhtang wa ga ai,” ngu nna tsun mu ai. Dai shaloi hkawkam wa gaw, “Nan hpe tau la let ndai zawn nga nna tsun ai wa gaw, kaning san ai wa rai ni?” ngu nna san mu yang, shan gaw, “Dai wa gaw hkum hkan e mun law law tu nna nshang e shan hpyi shingkyit kyit ai wa rai nga ai,” ngu nna htan mu ai. Shaloi hkawkam wa gaw, ndai wa gaw kaga nrai, Tishbi masha Elia rai na re ai nga nna myit la let, masha marai manga shi up hkang ai du hte shi a hpyen ma manga shi hpe shangun dat nna, dai wa gaw bum ntsa de du jang Elia hpe “Nang gaw hkawkam wa hpang de yu hkrat wa na lam hkang dat ai,” ngu wu ai. Elia mung, “Ngai gaw Karai Kasang a masha kaja wa teng yang gaw, sumsing lamu de na wan hkrat nna nang hte na a masha marai manga shi hte hpe hkru kau u ga,” ngu wu yang, kaja wa lamu de na wan di hkrat wa ai hte dai hpyen bu wa hte hpyen ma manga shi hte hpe hkru kau mu ai.

Dai hpang hkawkam wa gaw lahkawng lang ngu na hta masha bai shangun dat nna dai hpyen bu wa gaw, Elia kaw du yang, “Oh Karai Kasang a masha wa e, nang hpe alawan yu hkrat wa na lam hkawkam wa hkang dat ai,” ngu wu ai. Elia gaw, “Ngai gaw Karai Kasang a masha kaja wa teng yang gaw, lamu kaw na Karai Kasang a wan hkrat nna nang hte na a masha marai manga shi hte hpe hkru kau u ga,” ngu nna tsun wu yang, kaja wa lamu de na wan hkrat ai hte dai hpyen la manga shi hte hpe hkru kau mu ai. Dai hpang masum lang ngu na hta hpyen ma manga shi hte bu wa hpe bai shaga la nna shangun dat wu yang, shanhte sa du nna hpyen bu wa gaw Elia kaw du jang, Elia man e lahput hput di let, gum dagup nna, “Oh Karai Kasang a masha wa e, ngai hte nye a masha marai manga shi a asak hpe lahpawt dum ya e law, lamu na wan di hkrat nna lai wa sai hpyen bu lahkawng hte shanhte a ma ni latsa hte hpe hkru kau manu ai; rai timung nye a asak hpe lahpawt ya rit law,” ngu nna hpyi tawng ban wu ai. Shaloi lamu kasa langai mi dan pru nna “Shi hte rau hkan yu hkrat wa su, shi hpe hkum hkrit et,” ngu tsun ai hte maren Elia gaw, rawt sa wa let, hkawkam wa a man de du yang, Karai Kasang hkang da wu ai gaw, “Hpa majaw Ekron mare e nga ai Balazebu hpe san na matu masha dat na nni? san yu na matu Israela mungdan hta Karai Kasang nnga sai rai ni? dai majaw nang gaw ya nang kaleng nga ai yupku kaw nna hpang de bai yu lu sana nrail; ngu nna sa tsun su, nga nna Yehowa Karai Kasang hkang dat ai,” ngu nna hkawkam wa hpe htan wu ai. Dai hte maren kaja wa hkawkam wa gaw machyi ai rung mat wa sai rai nna si mat wa sai rai.

Yehowa Karai Kasang gaw Elia hpe woi la na aten ni wa magang yang Elia gaw, Elisha hte rau Gilgala mare de sa wa ma ai. Shaloi Elia gaw, “Ndai shara e naw nga nga u, ngai hpe Yehowa gaw Behtela shara de shangun dat nngai” ngu nna Elisha hpe tsun wu yang; Elisha gaw, “Yehowa gaw hkrung nga nna na asak mung hkrung nga ai hte maren, ngai nang hte n hka na nngai,” ngu nna tsun wu yang, shan lahkawng rau Behtela de yu hkrat wa ma ai. Ya Behtela mare e nga ai myihtoi ma ni gaw, Elisha hpang de pru sa nna, “Yehowa gaw dai ni jang na a madu hpe nang kaw nna dawm la na gaw nang chye nga nni?” ngu nna san mu yang, “Rai sa, ngai

chye nga nngai, azim sha nga mu,” ngu nna shanhte hpe tsun wu ai. Bai Elia gaw “Elisha e, nang e naw hkring nga u, Yehowa ngai hpe Yerihko de shangun dat ai,” ngu wu ai. Elisha gaw, “Yehowa hkrung nga nna, na a asak hkrung nga ai hte maren ngai nang hte n hka na nngai” ngu nna htan wu yang, shan lahkawng Yerihko shara de du ma ai. Yerihko mare e nga ai myihtoi ma ni mung, Elisha hpang de sit sa nna, “Yehowa gaw dai ni jang na a madu hpe nang kaw na dawm la na gaw nang chye nga nni?” ngu nna san mu yang, shi gaw “Rai sa ngai chye nga nngai, azim sha nga mu,” ngu wu ai. Bai Elia gaw “Nang e naw hkring nga u, Yehowa ngai hpe Yawdan hka de shangun dat ai,” ngu nna Elisha hpe tsun wu ai. Shi gaw, “Yehowa hkrung nga ai hte maren ngai nang hte n hka na nngai,” ngu nna tsun wu yang, shan lahkawng rau sa wa ma ai. Shingrai shan lahkawng gaw Yawdan hka makau de du ma yang, Elia gaw shi a hpajawng hpe la katsu nhtawm, hka hpe kayat nna hka gaw kade de ga karan mat wa wu ai. Shingrai shan lahkawng gaw hkarang hku ga rap wa ma ai. Shingrai shan lahkawng yan rap tawng ngut jang Elia gaw Elisha hpe, “Ngai hte garai n hka yang nang hpe hpa gam jaw na hpyi rit,” ngu nna tsun wu yang, Elisha gaw, “Na a Wenyi htam lahkawng nye a ntsa e nga nga li ga,” ngu nna hpyi wu ai. Shaloi Elia gaw, “Yak la ai lam nang hpyi ndai, rai timung nang kaw na ngai shalun la hkrum ai shaloi e, nang ngai hpe mu yang byin na ra ai; shing nrail yang byin na ra ai nrail,” ngu wu ai. Shingrai shan lahkawng tsun chyai let naw hkawm nga ma yang, Yu u, wan re ai leng, wan re ai gumra ni paw pru nna shan lahkawng hpe karan jahka kau nna, Elia gaw bung sha hte sumsing lamu de lung mat wa ai.

Mahte Laika Dawkaba 17:1-8 hta Elia mungkan ga de dawng pru ai lam hpe mu hti lu nga ai. Lang mi na Yesu Hkristu gaw, Kasa Petru, Yaku hte Yawhan ni hpe shaga la nna, tsaw ai bum langai mi de woi lung wa ai. Shaloi shanhte a man e shi a hpraw nsam galai wa ai hte myi man gaw jan zawn htoi kabrim nna, shi a hpun palawng nhtoi zawn hpraw tu wa lu ai. Dai hta n ga Mawshe yan Elia gaw Yesu Hkristu hte rau ga shaga ai hpe sape ni mu ma yang, Petru gaw, “Madu e ndai shara hta nga na matu htuk nga ai. Nang Madu a matu sum langai mi, Mawshe a matu sum

langai mi, Elia a matu sum langai mi anhte galaw ga,” ngu wu yang, sumwi gaw shanhte hpe magap ka-up mat ai hte Mawshe yan Elia gaw dai shara kaw nna mat mat wa wu ai.

Elia a maumwi labau lam hpe I Hkawkam Laika Dawkaba 17 kaw nna II Hkawkam Laika Dawkaba 2 du hkra hta rawng nga ai rai.

## **ELISHA A MAUMWI**

Myihtoi Elia gaw ndai mungkan ga ntsa kaw nna rai nhtawt mat wa yang, Karai Kasang a hkang da ai ga hte maren, shi a malai tai na matu, Shahpat a kasha Elisha hpe lata san tawn da wu ai. Dai ahkying aten kaw nna dai yan lahkawng gaw shada da tsawra mu ai. Dai majaw Elia gaw shi a aprat galai mat wa sana re ai lam hpe chye wu yang, Elisha gaw shi a sara wa hpe grai tsawra wu ai hte lahpawt wu ai rai nna mare langai kaw nna langai mi de rau sa wa ma ai hte Yawdan hka du hkra mung shan lahkawng yan rau sha sa wa ma ai. Shingrai shan lahkawng lam hkawm let ga naw shaga chyai nga ma yang, wan leng hte wan gumra ni gaw dan pru wa ai hte Elia hpe sumsing lamu de woi mat wa wu ai. Elisha gaw dai mu nna, “Nye a wa e, nye a wa e, Israela hpyen leng hte de a gumra jawn ai ni re a hka;” nga nna jahtau timung, htawm hpang de shi hpe bai n mu lu nu ai. Elisha mung shi a palawng hpe daw lahkawng di nna gang je kau wu ai. Bai shi gaw Elia kaw nna hkrat wa ai hpajawng hpe mung hta la nna, Yawdan hka hkin-gau e tsap nga ai. Elia kaw nna hkrat wa ai hpajawng hpe la nhtawm, hka hpe kayat let shi gaw “Elia a Karai Kasang gaw kanang rai nga nta?” ngu nna tsun wu ai.

Shingrai dai hka hpe kayat yang, hka gaw kade de karan mat wa nna Elisha gaw rap tawng mat wa ai. Dai shaloi Yerihko mare na myihtoi ma ni nkau mi gaw, shi hpe mu ma yang shanhte gaw, Elia a Wenyi nan Elisha a ntsa e shanu nga ai, nga nna shi hpe sa tau la ai hte shi a man e ga de ding nyawm dagup nga ma ai. Bai shanhte gaw, “Yu u, na a mayam ni hta n gun ja ai masha marai manga shi rai nga ma ai. Shanhte gaw na a madu hpe sa tam mu ga, Yehowa a Wenyi gaw shi hpe shapoi la nna bum langai ngai a ntsa e, shing nrail kadit langai ngai a kata e mahkoi wa jahkrat kau da wu ai nhten,” ngu nna hpyi wu yang, “Hkum sa tam myit,” ngu mu ai. Rai timung shi hpe n gun yawm hkra akroi anoi hpyi mu yang, shi gaw “Sa tam masu” ngu dat mu ai. Shingrai shanhte gaw marai manga shi shangun dat nna, dai ni gaw masum ya tup tam ma timung n mu mu ai. Elisha gaw Yerihko mare e naw

hkring nga yang, shanhte bai nhtang du wa nna, shi gaw, “Hkum sa tam myit, ngu nna ngai nanhte hpe hkum da ai nrai ni?” ngu mu ai.

Kalang mi na Yerihko mare masha ni gaw, Elisha hpang de sa nna, “Yu u, nang madu nga ai hte maren, ndai mare a htิงra gaw pyaw nga ai; rai timung hka n kaja nga ai; aga mung u bya bya shangun nga ai,” ngu mu ai. Shaloi shi gaw, “Di bu hta jum bang nna la wa marit” ngu nna tsun mu yang shanhte la sa mu ai. Shaloi shi gaw hka hpawk de sa nna dai hta e jum bang let, “Yehowa ning nga ai, ngai gaw dai hka hpe mu shangun nna, ya kaw nna si ai mung, n bya u bya mung byin sana nrai,” nga ai. Shingrai Elisha htawn tsun ai hte maren, dai hka gaw dai ni du hkra mu nga ai.

Dai hpang e shi gaw, Behtela de lung wa ai lam e lai wa yang mare de na shabrang ma ni pru sa nna, shi hpe shatan let, “Pung krin wa e, lung wa rit, pung krin wa e, lung wa rit,” nga ma ai. Shi mahtang kayin yu nna shanhte hpe mada yu let, Yehowa a mying hte dagam kau mu ai. Shingrai tsap yi lahkawng maling de nna pru wa nna, ma mali shi lahkawng hpe kawa sat kau mu ai.

Ya myihtoi ma langai mi a madu jan gaw Elisha hpang de sa nna, “Na a mayam wa rai nga ai, nye a madu wa gaw si mat sai; na a mayam wa Yehowa hpe hkrit hkungga nga ai gaw, nang chye nga ndai; ya hka madu gaw sa du nna ngai sha yan hpe mayam yam shangun na nga la mayu nga ai,” ngu nna tsun jahtau nga ai. Elisha gaw, “Ngai na a matu hpa galaw na rai ta? tsun rit , na a nta hta hpa nga lit ta?” ngu nna san yu yang, shi gaw, “Na a mayam jan gaw namman dibu langai mi hta kaga hpa mung n lu nngai,” ngu nna htan wu ai. Shaloi Elisha gaw, “Wa su, na a htิงbu manang ni kaw na, man ai dibu ni yawng shap tawn u, law law wa shap tawn u. Na nta de du jang na a nsha yan hpe shaga la nna chyinghka hpe la da nhtawm ndai dibu mahkra hta namman ru bang nna hpring ma jang she la tawn da u,” ngu wu ai. Shingrai shi gaw myihtoi wa kaw nna wa nhtawm kasha yan hpe shaga la nna chyinghka hpe la da yang, shan gaw dai dibu ni hpe shapraw tawn mu ai. Shi mung dai hta ru bang wu ai.



Ya dibu ni hpring ma jang, “Dibu kaga naw la wa rit,” ngu nna kasha hpe tsun wu yang, “Man ai dibu n nga sai,” ngu wu ai. Shaloi jang namman lwi ai gaw sim mat ai. Bai shi gaw, Karai Kasang a masha wa hpe sa tsun dan wu yang, myihtoi wa gaw “Dai namman hpe dut nna hka wa u, ngam ai hte gaw nang hte na nsha ni a asak bau mu,” ngu wu ai.

Lani mi hta Elisha gaw Shunem mare de lai sa wa ai. Dai yang e, a rawng lu ai numsha langai mi nga ai; shi gaw Elisha hpe hkap galaw daw wu ai. Shingrai shi gaw galoi mung dai lam hku lai wa yang, dai nta hta shang manam nga ai. Bai dai numsha gaw madu wa hpe, “Yu u, ndai hku lai lai re ai wa gaw Karai Kasang a chyoipra ai masha rai nga ai hpe ngai dum se ai. Dai rai nna bunghku ntsa e gawk kaji langai mi galaw nna shi a yup ku, sha ku, lahkum hte pyengdin ni tawn da ga, shingrai an kaw shang manam yang dai gawk hta shang yup na ra ai,” ngu wu ai.

Lani mi hta Elisha gaw bai lai ai shani e shi dai gawk hta shang nna yup nga ai. Shaloi Elisha gaw shi a shangun ma Gehazi hpe “Shunem num hpe shaga la su,” ngu wu ai. Dai num gaw Elisha a man e sa tsap nga ai. Bai Elisha gaw shangun ma hpe, “Dai num hpe ning ngu tsun su, yu u nang an hpe hkap hkalum la

ai majaw, na a matu hpa galaw na rai ta? hkawhkam wa hpe shing nrai hpyenbu wa hpe na a lam hpyi shara nga ai kun? ngu wu,” ngu nna tsun dat wu ai. Num jan mahtang gaw, “Ngai gaw nye a amyu hte nga nga na nngai,” ngu nna htan wu ai. Dai rai nna Elisha gaw, “A taw, shi a matu hpa galaw na ga ta?” ngu nna san wu yang Gehazi gaw, “Kaja wa shi gaw kasha n lu nga ai, madu wa mung dingla wa sai,” ngu wu ai. Shaloi Elisha gaw, “Bai shaga su,” ngu wu yang num jan gaw chyinghka lam e tsap nga ai. Shingrai myihtoi wa gaw, “Nang htaning ndai aten e shadang sha ba na rin dai,” ngu wu ai. Numsha gaw “Nye a madu Karai Kasang a masha e, na nchyang jan hpe masu ai ga hkum tsun et,” ngu nna htan wu ai. Ya dai num gaw na-um na sin rai wa nna, Elisha shi hpe tsun da ai hte maren ladu hkrum jang shadang sha shangai wu ai.

Ya dai ma gaw kaba wa sayang lani mi hta e shi a kawa hte mam dan ai ni hpang de sa yu nna, shi gaw kawa hpe “Baw machyi ai law, baw machyi ai law,” nga nna tsun wu yang kawa gaw shi hpe “Kanu hpang de woi wa su,” ngu nna shangun ma hpe tsun wu ai. Dai ma hpe kanu hpang de woi wa ngut jang, shi gaw jan pungding ga ai aten du hkra kanu a lahpyen e dung nga nna si mat wa sai. Shingrai kanu gaw ntsa de lung wa nna, dai ma hpe Karai Kasang a masha wa a yup ku hta tawn da nna, chyinghka la kau da nhtawm pru mat wa ai. Bai shi gaw madu wa hpe shaga la nna, “Ngai Karai Kasang a masha wa hpang de gat sa nna bai wa lu hkra, shangun ma langai mi hte lawze langai mi shangun dat ya rit,” ngu nna htet dat wu ai. Madu wa gaw, “Dai ni hpa majaw sa mayu nta? shata praw mung nrai, laban nhtoi mung nrai,” ngu nna tsun wu yang, madu jan gaw “Mai na re ai,” ngu nna bai htan wu ai. Shaloi shi lawze langai mi byau nna shi a shangun ma hpe, “Nang hkan sa su, ngai ntsun yang hkum lanyan et,” ngu wu ai. Shingrai shi sa wa nna Hkarmela bum de nga ai Karai Kasang a masha wa kaw sa du wu ai.

Ya Karai Kasang a masha wa gaw shi hpe tsan tsan kaw nna hkap mu mada jang, shi gaw shi a shangun ma Gehazi hpe, “Shunem num gaw wora de du ra ai. Shi hpe tau la na gat su; nang mung na madu wa hte ma mung hkam kaja nga myit ni? ngu nna san yu u,” ngu dat wu ai. Num jan gaw, “Hkam kaja nga ga ai,”

ngu nna htan wu ai. Bai shi gaw, dai bum ntsa e nga ai Karai Kasang a masha wa kaw du jang shi a lagaw hpe ginshum ya wu ai. Gehazi mahtang shi hpe hkum da na nga sit sa wa timung, Karai Kasang a masha wa gaw, “Shi a nga nga u ga; shi a myit masin kahtet la nga lu ai; Yehowa chyawm gaw dai lam makoi da nna ngai hpe n madun dan nga ai,” ngu wu ai. Shaloi num jan gaw, “Ngai nye madu kaw nna shadang sha hpyi nni? ngai hpe hkum hkalem kau et, ngu ai nrail ni?” ngu wu ai. Shaloi Elisha gaw Gehazi hpe “Shingkyit kyit u, nye a daw hkrawng lang nna sa wa su; langai ngai hte hkrum yang hkum shachyen et, nang hpe shachyen yang hkum htan et, nye a dawkrawng hpe ma a ntsa e mara da u,” ngu dat wu ai. Ma a kanu chyawm gaw, “Yehowa hkrung nga ai hte maren na a asak mung hkrung nga ai hte maren, ngai kaja wa nang hte n hka na nngai,” ngu wu yang shi hkum nan rawt nna hkan nang nga ai. Gehazi mahtang shan a shawng e sa wa nna dawkrawng hpe ma a myi man a ntsa e mara da wu timung, ma gaw n shaga, hpa mung n dum nga ai. Dai rai nna shi gaw, Elisha hpe sa tau let, “Ma gaw n hprang hkraw nga ai,” ngu nna shi hpe tsun wu ai.


Elisha gaw nta de du jang, yu u ma gaw si nga nna, yup ku hta taw nga ai. Dai re ai majaw shi shang nna chyinghka hpe la da nhtawm, Yehowa hpe akyu hpyi wu ai. Shi gaw lung wa nna n gup hte n gup, myi hte myi, lata hte lata hkrum di nna, shi a hkum hpe ma a ntsa e dagap nna ma a hkum shan gaw lum wa ai. Bai shi gaw nta kata e lang mi kahkrang hkawm nna, bai wa yang ma a ntsa e shi a hkum hpe dagap wu yang ma gaw sanit lang kahti nna myi hpaw wa ai. Ya Elisha gaw Gehazi hpe, “Shunem num hpe shaga u,” ngu wu ai. Shingrai shi shaga nna dai num jan du jang Elisha gaw, “Na a nsha hpe pawn la u,” ngu wu ai. Shaloi shi shang nna shi a lagaw nhpang e ga du hkra gum dagup nna shi a kasha hpe pawn la nhtawm, pru wa ai.

Ya Suri hkawhkam a hpyen bu wa Naman gaw shi a myi man pa ai hte arawng lu ai wa rai nga ai; hpa majaw nga yang Yehowa gaw shi a lata hte Suri masha ni hpe ninglaw na lam hpaw ya wu ai. Shi gaw share kaba rai nga timung manggang kap ai wa rai nga ai. Suri masha ni gaw gumlau shang lau nna, Israela mung

hta na mahkawn ma langai mi hpe rim woi wa ma ai. Shi gaw Naman a madu jan hpe galaw jaw nga ai. Shi gaw shi a nta madu num hpe, “A law, nye a madu Samari mare e nga ai myihtoi wa hpang de du taw; shi gaw dai ana hpe shamai ya na re ai,” ngu wu ai. Dai rai nna marai langai mi gaw, “Israela mung na mahkawn ma ning nga atsun nga ai,” ngu nna shi a madu hpe shang tsun wu ai. Shaloi Suri hkawkam wa gaw, “Sa su ngai Israela hkawkam hpe laika shagun dat na nngai,” ngu wu yang, Naman gaw pru nna gumhpraw joi mali tsa, ja deng ga hkying kru hte hpun palawng man shi la sa wu ai. Dai hta kaga, ya yu u, ndai laika na a lata de du jang, nang nye a hkring mang wa Naman hpe shi a manggang shamai ya na matu, ngai shi hpe nang hpang de shangun dat se ai, nga nna Israela hkawkam wa hpe ka dat ai laika mung shi lang wu ai.

Ya Israela hkawkam wa dai laika hpe hti ngut jang, shi a hpun palawng gang je kau nna, “Ataw, ngai gaw sat kau lu ai hte jahkrung ya lu ai Karai daw rai nga ai majaw, ndai wa a manggang shamai ya u ga nga , shi ngai hpang de shangun dat a hka; kaja wa shi gaw ngai hpe jahte tam nga ai gaw, matsing da mu,” nga ai. Israela hkawkam wa gaw, shi a hpun palawng gang je kau nga ai hpe Karai Kasang a masha wa Elisha na wu yang, shi gaw hkawkam wa hpang de masha shangun dat nna, “Nang hpa majaw na a hpun palawng gang je kau nga a ta? dai wa hpe ngai hpang de shangun dat rit, Israela amyu hta myihtoi nga nga ai gaw shi chye lu na ra ai,” ngu nna htet dat wu ai. Dai rai nna Naman gaw, shi a gumra ni hte shi a leng ni hte sa du nna, Elisha nta ndaw e tsap nga ai; shaloi Elisha gaw shi hpang de shangun ma dat nna, “Nang gaw Yawdan hka hta e sanit lang sa shin u; shaloi na a hkum shan galai wa nna nang san pra na rin dai,” ngu nna tsun shangun wu ai. Naman chyawm gaw masin pawt nna pru wa let, “Kaja wa myihtoi wa nan ngai hpang de pru nna, shi a Karai Kasang Yehowa a mying gang let, shi a lata hte machyi ai shara e masawp nna manggang kap ai wa hpe jasan shapra ya na ra ai ngu nna ngai myit nga nngai. Damasku mare na Abana hka hte Hparpa hka yan gaw Israela mungdan ting na hka hpung mahkra hta grau kaja ai nrail ni?

dai hka yan hta ngai mai shin nna san pra wa lu na nrai hka;” nga nna pawt bu ai hte wa mat ai.



Shaloi shi a mayam ni gaw sit sa nna “Wa e, myihtoi wa gaw magam kaba galaw shangun yang galaw na nrai ni? hka shin nna san pra u, nga nna nang hpe tsun yang grau galaw mai ai nrai ni?” ngu mu ai. Shingrai shi gaw, Karai Kasang a masha wa tsun ai hte maren Yawdan hka de yu wa nna shi a hkum hpe sanit lang kapruk jang shi a hkum shan gaw ma kaji na hkum shan zawn rai mat nna shi gaw san pra wa ai.

Dai rai nna shi gaw shi a hkan bawp hkan nang ai ni hte rau Karai Kasang a masha wa hpang de bai sa nna shi a man e tsap let, “Yu u, Israela mungdan hta kaga, ga ningtsa e Karai Kasang shaje nnga ai gaw ya ngai chye se ai; dai rai nna na a mayam wa a kumhpaw kumhpa hpe hkap la u,” ngu wu ai. Myihtoi wa chyawm gaw “Ngai daw jau nga ai Yehowa hkrung nga ai hte maren, ngai n hkap la na nngai,” ngu wu ai. Naman shadut wu timung, shi n dang kau wu ai. Bai Naman gaw, “Nang n la timung na a mayam wa hpe

ga shingbut lawze daw lahkawng jaw dat e, na a mayam wa gaw, ya kaw nna wan nat hkungga rai timung, hkungga amyu kaga rai timung, Yehowa hta kaga hpara shaje hpe nawng ya na nrai. Rai timung, Yehowa gaw na a mayam wa hpe lam langai mi hta mara raw dat ya u ga; nye a madu gaw nawku na matu, Rimon hpara a nta shang nna, nye a lata hta shamyet shanat nga let, ngai mung Rimon a nta kata e gum dagup nga yang ning rai gum dagup lawm ai mara hpe Yehowa raw dat kau ya u ga,” ngu nna hpyi wu ai. Myihtoi wa gaw, “A ngwi apyaw sha wa nu,” ngu wu ai.

Shingrai shi pru nna lam daw mi kaw du ai rai timung, Karai Kasang a masha Elisha a shangun ma Gehazi gaw, Yu u, nye a madu gaw ndai Suri masha Naman lang ai kumhpaw kumhpa hpe n hkap la ya ai. Shi hpe matsan nau dum nu ai. Yehowa hkrung nga ai hte maren, ngai shi kaw hkan gat nang nna lama ma hpyi la na we ai, nga ai. Shingrai Gehazi gaw Naman a hpang e hkan nang nga ai; Ya Naman gaw marai langai mi hkan gat nang nga ai mu jang shi a leng hta na yu nhtawm, sa tau let, “Yawng ngwi pyaw nga myit ni?” ngu nna san wu ai. Gehazi gaw, “Yawng ngwi pyaw nga ga ai; nye a madu gaw ngai hpe shangun dat nna, ning nga ai. Ehprim bum ga kaw na myihtoi ma lahkawng ya e ngai kaw du masai; shan a matu gumhpraw talenta langai mi hte hpun palawng man lahkawng karan jaw dat rit, nga ai,” ngu wu ai. Naman gaw “Rai sa, talenta lahkawng la u,” ngu wu ai. Shi dai lam shadut nna gumhpraw talenta lahkawng hpe tingsan lahkawng hta bang nna hpun palawng man lahkawng hte rau, gyit tawn nhtawm shi a shangun ma lahkawng hpe hpai shangun nna dai yan gaw Gehazi a shawng e hpai wa mu ai. Ya dai kawng de du jang Gehazi gaw dai arai hpe shan a lata na la nna, nta nhku e kyem da nhtawm, shan lahkawng hpe shabawn dat nna shan wa mat ma ai. Gehazi chyawm gaw shang nna shi madu man e tsap nga ai. Shaloi Elisha gaw, “Gehazi e, nang kanang na bai wa nta?” ngu nna san wu yang, shi gaw “Na a mayam wa kanang mung n sa nngai,” ngu nna htan wu ai. Bai Elisha gaw, “Dai wa nang hpe tau la na nga shi a leng hta na kayin yu wu yang, nye a myit masin nang hte rau n hkan nga a ni? ya gaw, aja gumhpraw, hpun palawng, tsanlun sun, tsabyi sun, sagu, dumsu, mayam la mayam num hkam la na aten

rai nga a ni? dai re ai majaw Naman a manggang gaw nang hte na a aru arat hta tut nawng prat dingsa e akap nga na ra ai,” ngu wu ai. Dai rai nna Gehazi gaw, hkyen zawn hpraw ai manggang kap ai wa tai nna, shi a madu a man kaw na pru mat wa wu ai.

Ya myihtoi ma ni gaw, Elisha hpe, “Yu u, anhte nang hte rau shanu nga ai shara gaw, gyeng la nga ai. Dai rai nna anhte gaw Yawdan hka kau de sa nna langai hte langai ngau shaw nna dai yang e nga nga na shara galaw ga,” ngu nna hpyi mu ai. Shi gaw, “Sa wa masu,” ngu mu ai. Bai langai mi gaw, “Nang madu a mayam ni hte rau sa wa ga,” ngu nna hpyi mu yang shi gaw, “Sa na nngai,” ngu nna htan wu ai. Shingrai shi shanhte hte rau sa wa nna Yawdan hka du jang ngau kran nga ma ai. Marai langai mi mahtang gaw hpun kran nga yang shi a ningwa hka de malaw hkrat bang mat lu ai. Shingrai shi gaw, “Nye madu e, dai gaw shap la ai ningwa re ai law,” ngu wu ai. Shaloi Karai Kasang a masha wa gaw, “Gara kaw hkrat nta?” ngu nna san yu yang, shi hpe hkrat ai shara madun dan mu ai. Shingrai myihtoi wa gaw hpun dingshan langai mi kahtam la nna, dai shara de kabai bang dat wu yang, dai hpri gaw waw pru wa ai. Dai myihtoi wa gaw, “Ya sai la u,” ngu nna tsun wu ai. Dai hte maren myihtoi ma gaw shi a lata ladawn nna sai la wu ai.

Dai laman e Suri hkawkam gaw, Israela masha ni hte hpyen gasat nga nna, “Ndai shara, wora shara hta e dap jung ga” nga nna shi a ali ama ni hte bawng yu nga ai. Shaloi Karai Kasang a masha wa gaw, Israela hkawkam hpang de masha shangun dat nna, “Ndai shara, wora shara de Suri masha ni yu wa na maw nga ma ai majaw, dai shara hpe koi kau nga u,” ngu nna shadum wu ai. Israela hkawkawm mung Karai Kasang a masha wa shi hpe madun dan ai shara de masha shangun dat nna, shi a hkum law law lang hpyen ni hpe koi kau lu wu ai. Dai lam majaw Suri hkawkam myit grai kahtet nga nna shi a ali ama ni hpe shaga la nhtawm, “Israela hkawkam hpang maga de kadai wa mahtang rai nga ai hpe ngai e n tsun dan ai nga nga myit ni?” ngu nna san wu ai. Shaloi shi a ma langai mi gaw, “N rai law, nye a madu hkawkam wa e, nang madu yup gawk hta tsun ai ga gaw, Israela mung hta nga ai myihtoi Elisha nan Israela hkawkam wa hpe shapraw dan

nga ai,” ngu wu ai. Dai re ai majaw hkawkam wa gaw, “Ngai shi hpe sa rim la lu hkra shi kanang nga ai gaw sa tam yu mu,” ngu mu yang marai langai mi gaw, “Yu u, shi gaw Dohtan mare e nga nga ai,” ngu nna tsun dan wu ai. Dai rai nna shi gaw dai mare de gumra hpyen leng hte luksuk kaba shangun dat nna shanhte gaw shana sa du nhtawm, dai mare hpe wang tawn da mu ai. Ya Karai Kasang a hkringmang wa gaw jahpawt jau jau rawt nna pru wa yang, Yu u, gumra hte hpyen leng ni hte rau luksuk hpung ni gaw dai mare hpe wang tawn da nga ma ai rai nna, shi a shangun ma gaw, “Alaw, nye a madu e, an kaning rai na rai nga ga ta?” ngu nna tsun wu ai. Shi gaw “Hkum hkrit et, anhte hpang maga de nga ai ni gaw, shanhte hpang maga de nga ai ni hta grau law nga ma ai,” ngu wu ai. Bai Elisha gaw, “Yehowa e, shi mu lu u ga, shi a myi hpaw ya u,” ngu nna hpyi wu ai. Shaloi Yehowa gaw, dai shangun ma a myi hpe hpaw ya wu ai rai nna shi mu wu yang, Yu u, Elisha grup yin e bum ting hta e, wan gumra hte wan leng ni hpring chyat nga ma ai.

Bai Suri masha ni shi kaw yu wa ma yang Elisha gaw Yehowa hpe, “Ndai masha ni n mu lu mu ga, shanhte a myi shamak kau ya mu,” ngu nna hpyi wu yang, Yehowa gaw Elisha hpyi ai hte maren shanhte a myi hpe shamak kau ya mu ai. Bai Elisha gaw, “Ndai lam, ndai mare n rai, ngai kaw she hkan marit nanhte tam ai wa nga ai de ngai woi wa made ga” ngu tsun nhtawm, Samari mare de woi wa mu ai.

Ya shanhte gaw Samari mare kata de du ma yang Elisha gaw Yehowa hpe, “Ndai ni mu lu mu ga shanhte a myi hpaw ya mu,” ngu nna hpyi wu ai. Shaloi Yehowa shanhte a myi hpaw ya malu ai rai nna shanhte mada yu mu yang, Yu mu, shanhte gaw Samari mare kata e rai nga ma ai. Israela hkawkam shanhte hpe mada mu jang shi gaw, Elisha hpe, “Nye a wa e, ngai shanhte hpe sat kau na rai kun? dat kau na rai kun?” ngu nna san wu ai. Shi gaw, “Nang shanhte hpe sat kau lu na n rai; na a ri nhtu ndan pala ni hte rim la lu ai ni hpe sat kau mai na rai ni? shanhte lu sha nna tinang a madu hpang de bai wa lu hkra shanhte hpe muk hte n tsin daw jau mu,” ngu nna htan wu ai. Shaloi shi gaw shanhte hpe lusha grai daw jau nna shanhte lusha ngut jang shabawn dat mu ai. Shanhte mung tinang a madu hpang de bai wa ma ai.

Dai hpang Suri hkawkam Benhada gaw shi a luksuk ni nlang shaga jahpawng la nhtawm Samari mare hpe wang tawn da mu ai. Shingrai Samari mare hta hku wa kaba hku wa nna, na na wa wang tawn ai majaw, lawze baw langai mi gaw gumhpraw lap matsat shi, hkru du hkyi jare mi gaw lap manga hte dut la ma ai. Ya Israela hkawkam wa gaw, mare bunghku ntsa e lai hkawm nga yang num langai mi gaw, “Nye a madu hkawkam wa e karum la e law,” ngu nna shi hpe jahtau wu ai. Hkawkam wa mahtang, “Yehowa nang hpe n karum yang ngai nang hpe mam chyarang hte tsabyi htum byen hta na kaning rai karum lu na rai ta?” ngu nna htan wu ai. Bai hkawkam wa gaw, “Nang hpa hkrum nga nta?” ngu nna san wu yang shi gaw, “Dai manang jan ngai kaw sa nna, dai ni an sha na matu na nsha hpe shapraw u, hpawt de gaw, ngai sha hpe sha ga, nga tsun ai majaw, ngai sha hpe shadu sha sagaw ai. Hpang shani e ngai gaw, sha na matu na nsha hpe ya shapraw u, ngu nna shi hpe tsun yang, shi gaw shi a kasha hpe makoi kau wu ai,” ngu nna hkawkam wa hpe htan wu ai.

Hkawkam wa gaw dai ga na wu yang, “Ndai zawn hku wa kaba wa ai gaw, Shahpat a kasha Elisha a majaw re,” ngu nna mara shagun let, “Shahpat a kasha Elisha a baw hpe ngai dai ni n htau kau lu yang Karai Kasang ngai hpe grau nna ari jaw u ga,” nga ai. Ya Elisha gaw nta e nga nga nna, salang ni shi hte rau dung nga ma ai. Hkawkam wa mung shi a shawng e kasa langai mi shangun dat wu timung kasa wa rai n du yang Elisha gaw “Masha sat ai wa a kasha ndai wa gaw nye a baw htau kau na nga du sa ra ai gaw nanhte mu mada nga myit ni? Yu mu, dai kasa wa du yang chyinghka la da nna chyinghka lam e shi hpe hkum da mu, shi madu a lagaw nsen shi a hpang e ngoi nang nga ai n rai ni?” ngu nna salang ni hpe tsun wu ai. Shi shanhte hte ga naw tsun nga yang kasa wa gaw shi hpang de sa du nna, “Yu u, ndai shoihpa shoirang gaw Yehowa kaw na rai nga ai rai nna, ngai hpa majaw Yehowa hpe naw a mada nga na rai ta?” ngu nna tsun wu ai.

Shaloi Elisha gaw, “Yehowa a ga madat mara mu, Yehowa ning nga ai, hpawt de ndai aten e, Samari mare chyinghka lam hta e muk shadung jik mi, gumhpraw lap mi, muk-yaw mam hpai mi gumhpraw lap mi hte dut na ra ai,” ngu nna htawn tsun mu ai.

Hkawkam wa shamyet shanat nga ai hkringmang wa mahtang “Yehowa gaw sumsing lamu hta e hkuwawt hku waw da yang pyi dai lam byin lu na a ni?” ngu nna Karai Kasang a masha wa hpe san wu yang, shi gaw “Yu u, nang gaw na a myi hte nan mu lu timung n sha lu na ndai,” ngu wu ai.

Ya manggang gang ai masha marai mali gaw mare chyinghka lam e nga nga ma ai. Shanhte gaw, “Ataw, anhte si hkra hpa majaw nang e a dung nga ga ta? mare kata de shang ngu yang, dai yang e hku wa kaba hkrum nna si na ga ai. Bai nang e dung nga ga yang mung si ai hkrai hkrum na ga ai. Dai re ai majaw, sa marit Suri luksuk ni hpang de shang bang wa saga, shanhte anhte hpe jahkrung da mi yang, hkrung na ga ai; sat kau mi yang si na sha rai nga ga ai,” nga nna shada da tsun hkat ma ai. Shing rai shanhte gaw Suri dap de shang na matu nhtoi garai n leng yang, rawt sa wa nna, Suri dap ndaw de du jang, yu mu masha langai mi mung n nga nga ai. Kuning rai nme law Madu gaw Suri masha ni hpe hpyen leng ngoi ai hpe mung, gumra ngoi ai hpe mung, wunawng wuwa kaba ngoi ai nsen hpe na shangun mu ai rai nna, shanhte gaw, yu mu, Israela hkawkam gaw anhte hpe gasat na matu, Hiti hkawkam ni hte Egutu mung na hkawkam ni hpe shaga manu ai, nga nna shada da tsun kajawng nna nhtoi garai nleng yang rawt hprawng nna tinang a sum ni, tinang a gumra ni hte tinang a lawze hte dap ting hpe kau da nna tinang a asak lawt hkra, hprawng htaw mat wa ma ai.

Ya ndai manggang gang ai ni gaw, dap ndaw de du ma yang, shanhte sum langai mi de shang nna lusha nhtawm dai kaw na aja gumhpraw hte hpun palawng ni hpe shaw la nhtawm sa makoi da mu ai. Dai hpang sum kaga de mung wa shang nna arai ni hpe shaw la nhtawm sa makoi da mu ai. Dai hpang shanhte gaw, “Anhte galaw ai lam n mai nga ai, dai ni gaw kaja ai shiga htawn tsun ai shani rai nga timung, anhte atsin sha nga nga ga ai, nhtoi leng hkra naw hkring nga ga yang gaw, ari ahpri hkrum na ga ai; dai rai nna sa marit, hkawkam a nta masha ni hpe sa tsun shana ya ga,” nga nna shada bawng nga ai. Shingrai shanhte gaw mare chyinghka sin ai ni hpe sa shaga nna, “Anhte gaw Suri masha ni a hpyen dap de du saga ai. Rai timung masha langai mi mung n nga

ai; masha a nsen mung n na ga ai. Gumra ni hte lawze ni sha dun nga mala ai; sum ni mung mi na ta rai nga ma ai,” ngu nna shanhte hpe tsun shana mu ai. Chyinghka sin ai wa mung manang ni hpe shaga nna shanhte gaw httingnu kata de sa shana ya mu ai.

Shingrai hkawkam wa gaw, nsin naw sin nga yang rawt nna shi a ali ama ni hpe, “Suri masha ni galaw maw ai lam gaw ngai nanhte hpe madun dan made ga, anhte kawsi hpang gara hkrum nga ai gaw shanhte chye nga ma ai. Dai re ai majaw shanhte a dap de na pru nhtawm nam mali hkan e makoi nga let, Israela masha ni gaw mare de na pru wa jang shanhte hpe jahkrung rim la nna mare de shang ga, nga nna tsun ma ai,” ngu mu ai. Rai timung, shi a ma langai mi gaw, “Mare kata e naw ngam nga ai gumra hta na manga hpe ap ya e, dai gumra ni gaw mare kata e naw ngam nga ai Israela wunawng hte mung, hten bya hkrum sai Israela wunawng hte mung bung nga ma ai majaw, dai ni hte sa yu ga,” ngu nna hpyi wu ai. Dai rai nna shanhte gaw gumra hte gumra leng lahkawng la mu ai. Hkawkam wa mung, “Sa yu mu,” ngu nna Suri masha ni a hpang e hkan nang shangun mu ai. Shingrai shan gaw Yawdan hka du hkra hkan nang ma ai rai nna, Yu u, Suri masha ni h prawng tin nna kabai kau da ai hpun palawng hte arung arai ni lam hkan e jawng nga ma ai. Kasa ni mung bai wa nna hkawkam wa hpe wa shana ya mu ai. Shaloi mare masha ni pru nna Suri masha ni a hpyen dap hpya kau mu ai. Shingrai Yehowa a ga hte maren, muk shadung jik mi gumh praw lap mi, muk-yaw mam hpai mi gumh praw lap mi hte dut ma ai. Hkawkam wa mung shi shamyet shanat nga ai hkring mang wa hpe mare chyinghka sin na matu hkang da wu ai. Mare masha ni chyawm gaw mare chyinghka lam e shi hpe kabye anut kau mu ai rai nna hkawkam wa gaw, Karai Kasang a masha wa kaw yu wa yang, shi tsun da ai hte maren, hkring mang wa gaw si mat wa sai.

Dai hpang matsat ning lai wa yang Elisha gaw myihtoi ma marai langai mi hpe shaga la nna, “Na a nshang hta shingkyit kyit u, namman tau mung la gun nna Gilead mung, Ramot mare de sa su, dai de du yang Yehosahpat a kasha Yehu hpe tam nna shi hpe mu jang, shi a manang ni a hpawng shingra ka-ang kaw na shaga shaw la nhtawm gawk de woi shang let shi a baw hta namman ru

bun ya u, ngut jang, ‘Ngai gaw Yehowa Karai Kasang hkang dat ai hte maren, ngai nang hpe Israela hkawkam aya dang da sade ai,’ ngu tsun let chyinghka hpaw nhtawm n hkring n sa ai sha h prawng pru wa u,” ngu nna hkang dat wu ai. Dai myihtoi shabrang wa Ramot mare de du yang Yehu gaw hpyen bu ni hte rau dung nga ai hpe sa mu wu ai. Shaloi shi gaw, “Hpyen bu wa e, ngai nang hpe tsun na ga gun nngai,” ngu wu yang Yehu gaw, “Anhte hta na kadai hpe mahtang tsun mayu nta?” ngu nna san wu yang, “Nang hpyen bu wa hpe nan rai nga ai,” ngu wu ai. Shaloi shi rawt nna nhku de shang wa yang myihtoi ma gaw shi a baw ntsa e namman ru bun let “Israel Karai Kasang Yehowa ning nga ai, nang gaw Yehowa a amyu ngu ai Israela amyu ni a ntsa e hkawkam tai na matu, nang hpe namman chya ya ni ai; nye a ali ama ni a asai hte Yehowa a ali ama ni mahkra a asai hpe matai dawp na matu, Ahab a nta masha ni hpe nang sat kau na ndai, Ahab a dap lakung ni mahkra hten mat na mara ai rai nna, Ahab amyu hta na lasha ni mahkra Israela hta bawng dung nga, bawng lawt pra ai ni hpe htau di kau na mawe ai. Gwi ni gaw Yezrela ginwang hkan e Yezebel a hpe sha kau na mu ai rai nna shi hpe lup makoi na masha n nga na sai,” nga nna htawn tsun ngut jang chyinghka hpaw nhtawm bai gat mat wa wu ai.

Ya Yehu gaw shi madu a ali ama ni hpang de sa du yang, langai wa mi gaw, “Yawng ngwi pyaw nga a ni? Dai mana bu ai wa gaw hpa majaw nang kaw sa du nta?” ngu nna san wu yang, Yehu gaw, “Nanhte nan dai wa hpe mung, shi tsun ai ga mung chye myit dai,” ngu mu ai. Bai shanhte gaw “N chye ga ai, tsun dan yu mi,” ngu mu yang, shi gaw, “Dai wa gaw wora lera hku tsun nna, Yehowa ning nga ai; nang Israela hkawkam tai na matu, ngai nang hpe namman chya ya de ai, nga nna ngai hpe htawn tsun ai,” ngu mu ai. Dai rai nna shanhte gaw langai hte langai tinang a hpun nba alawan raw nna lakang ntsa, Yehu a npu e nep n htawm pahtau dum let, “Yehu gaw hkawkam rai nga ai law,” nga nna tsun ma ai. Dai ngut jang Yoram gaw Yezrela mare e nga ai rai nna Yehu gaw leng jawn let dai mare de sa wa ai.

Ya mare sin ai wa gaw Yezrela mare langchiyi ntsa e tsap nga ai rai nna Yehu hte hkan nang ai ni hpe mu jang, “Ngai masha

wunawng mu nngai,” ngu wu ai. Shaloi Yoram gaw gumra jawn ai masha langai mi hpe shaga la nna shanhte hpe sa tau la let, “Ngwi pyaw nga myit ni? ngu nna sa san yu su,” ngu dat wu ai. Shingrai shi hpe tau la na gumra jawn ai wa langai mi pru nna, “Hkawkam wa tsun ai, ngwi pyaw nga a ni? da,” ngu nna san wu yang, Yehu gaw, “Ngwi pyaw ai lam nang hte hpa seng a ta? nye a hpang de hkan nang rit,” ngu wu ai. Mare sin ai wa mung, “Kasa wa shanhte kaw sa du nna bai wa ai n rai,” ngu nna hkawkam wa hpe shana ya mu ai. Bai shi gaw gumra jawn ai masha marai langai mi hpe bai shangun dat nna dai wa mung shanhte kaw sa du nna “Hkawkam wa tsun ai, ngwi pyaw nga nni? da,” ngu nna san wu yang, Yehu gaw, “Ngwi pyaw ai lam nang hte hpa seng nta? nye a hpang de hkan nang rit,” ngu wu ai. Bai mare sin ai wa gaw, “Dai wa mung shanhte kaw sa du nhtawm bai wa ai n rai. Leng jawn du ai wa mung Yehu zawn jawn gat nga ai. Shi gaw myi di na hpang jawn gat nga ai,” ngu wu ai. Shaloi Yoram gaw, “Byau hkyen tawn mu,” ngu yang shanhte gaw shi a hpyen leng hkyen tawn ya mu ai. Shingrai Israela hkawkam Yoram hte Yuda hkawkam Ahazia gaw tinang a hpyen leng ni hte Yehu hpe tau la na pru sa wa nna Yezrela masha Nabot a ga dachyawlk hkan e shi hte hkrum mu ai. Ya Yoram gaw Yehu hpe mu wu yang shi gaw, “Yehu e, kaja nga nni?” ngu nna san wu yang Yehu mahtang, “Na nnu Yezebelah hkan ai n se n sa ai lam hte hpyi shung sha ai lam nde wa law nga yang ngwi pyaw lam kaning rai nna nga lu na ata?” ngu nna hkap htan wu ai. Shingrai Yoram gaw shi a lata sharawt nna kayin hprawng let, “Ahazia e, gumlau amu rai nga ahka,” ngu nna Ahazia hpe tsun wu ai. Yehu chyawm gaw shi a ndan aja wa shachyen nhtawm Yoram a hpa dip marung e gap ya wu ai, rai nna pala gaw shi a salum e hkrang pru ai majaw, shi gaw shi a hpyen leng kata e kadawng taw nga ai. Bai Yehu gaw shi a hpyen bu Bidka hpe, “Shi hpe karawt la nna Yezrela masha Nabot a ga dachyawlk hkan e kabai tawn da u. An lahkawng shi a kawa Ahab a hpang e gumra rau jawn nna hkan nang nga yang Yehowa shi a lam ning nga hkang da ai gaw, nang n matsing nni?” ngu nna tsun wu ai.

Bai Yehu gaw, Yezrela de du ra ai hpe Yezebelah na wu yang, shi a myi mun tsyi chya ai hte, shi a baw hpe mawn sumli

nhtawm, hku wawt hku e azi yu nga ai. Shingrai Yehu gaw mare chyinghka e shang wa nga yang, shi gaw “Na madu hpe sat kau ai Zimri e, ngwi pyaw nga a ni?” ngu nna hkap san wu ai. Yehu gaw hku wawt hku de dawng yu nhtawm, “Nye a hpang maga de kadai wa rai nga a ta? kadai?” ngu nna san wu yang httingnu sin ai masha marai lakhawng masum shi hpe mada yu mu ai. Dai rai nna shi gaw, “Shi hpe kanawng jahkrat dat mu,” ngu nna tsun wu yang dai ni gaw shi hpe kanawng jahkrat dat mu yang, shi a asai gaw nta shakum ntsa e mung, gumra ni hta mung, hkaw bun nga ai. Yehu mung shi hpe kabye kau wu ai. Shaloi shi shang nna lu lu sha sha rai nhtawm, “Ndai dagam dala hkrum ai num hpe sa hta lup kau mu, shi gaw hkawhkam a shayi sha rai nga ai,” ngu mu ai. Shingrai shi hpe lup kau na nga shanhte sa yu ma yang, shi a pung kum, lagaw lata lahpan ni hta kaga hpa mung nmu lu ai. Dai re ai majaw shanhte bai wa nna shi hpe wa shana ya mu ai. Shi gaw, Yezrela ga dachyawlk hta e gwi ni gaw Yezebel a shan hpe sha kau na mara ai, nga nna Yehowa gaw shi a shangun ma Tishbi masha Elia n gup hta htawn tsun ai ga dik wa sai. Ndai gaw Yezebel a lup rai nga ai nga nna kadai mung n tsun lu hkra, shi a mang gaw Yezrela ga dachyawlk hta e ga nam hpun zawn tai na ra ai, ngu wu ai.

Elisha gaw shaning kru shi manga ning tup lamik kumla madun dan let, Yehowa Karai Kasang a myihtoi amu hta kangka sadu sahka ai hte galaw ngut ai hpang, machyi makaw hkrum let n gun yawm wa nna si na aten ni wa magang yang Israela hkawhkam Yehoasha gaw shi hpang de sa nna hkrap ai hte, “Nye a wa e, nye a wa e, Israela a hpyen leng ni hte Israela a gumra jawn ai ni rai nga a hka,” ngu wu ai. Dai hpang Elisha hte shan shada da shaga ngut jang, myihtoi Elisha gaw, si mat wa sai rai.

Elisha a labau maumwi lam gaw II Hkawhkam laika Dawkaba 2-13 laman hta rawng ai rai.

## ESHTA A MAUMWI

Ahasuru hkawkam a prat hta e, dai hkawkam wa gaw India mung kaw nna Hkusha mung du hkra, mungdaw latsa e hkun sanit hpe up hkang wu ai. Hkawkam Ahasuru hkaw dung ai masum ning shaning hta Shushan htingnu e hpawng nga ai masha kiji kaba mahkra a matu, hkawkam htingnu na sun wang kata e, sanit ya tup poi kaba galaw nga ai. Dai yang e lunghpraw shadaw hta gumhpraw shanghkawng noi, nna mani ai lachyit ri, hkyeng tsawm ai sumri ni hpe grang ai, ahpraw, atsit, amut n san ai nba grang ni grang nga ai; yupku ni gaw aja gumhpraw rai nna, hkyeng ai, hpraw ai, tsit ai, chyang ai lung nep ntsa e tawn da nga ai. Shanhte gaw ja gawm hta na tsabyi lu ma ai; gawm ni gaw langai hte langai kaga ga rai nga ai. Hkawkam wa daw mayu ai hte maren, hkawkam wa a tsabyi ntaw ntsang rai nga ai. Tsabyi lu ai lam gaw htung hte maren rai nga ai; kadai hpe mung shagwi jaw lu na nrail; langai hte langai tinang ra ai hku daw jaw na lam hkawkam wa gaw shi a du hte ali ama ni hpe hkang da wu ai. Ya hkawkam jan Washti mung, hkawkam Ahasuru a htingnu na numsha ni a matu poi galaw nga ai. Sanit ya ngu ai nhtoi hta e, hkawkam wa gaw, tsabyi lu ai hte myit pyaw nga ai. Shaloi jang mung masha ni hte du ni hpe hkawkam jan Washti a hpraw tsawm ai hpe madun dan na matu, hkawkam janmau gup let hkawkam wa hpang de jashawn na matu, marai sanit hpe hkang da wu ai. Kanning rai nme law, shi gaw grai ahpraw tsawm ai num rai nga ai. Rai timung hkawkam jan Washti gaw unuk ni a n gup hta hkawkam wa hkang da ai ga hpe lale kau nna, n sa ai nga nga ai. Dai re ai majaw hkawkam wa grai pawt bu nna sindawng kahtet nga ai. Dai rai nna, hkawkam wa gaw “Hkawkam jan Washti hpe tara htung hte maren kaning di na rai ta?” ngu nna, tara htung hking chye ai du sanit hpe san wu ai.

Shaloi, Memuhkan gaw “Hkawkam jan Washti gaw hkawkam hpe sha shut ai nrail; hkawkam Ahasuru a mungdaw ni ting hta nga ai du ni mahkra hte amyu masha ni hpe mung shut nga ai. Kanning rai nme nga yang, hkawkam Ahasuru gaw hkawkam jan Washti hpe shi hpang de jashawn na lam hkang da timung shi n

sa hkraw ai, ngu nna mung shagu hta kajai gara wa ai hte numsha ni na jang, shanhte gaw tinang a madu wa ni hpe n kaw n law di kau na mara ai; hkawkam jan galaw ai lam Persi, Medi du jan ni gaw dai ni pyi na jang shanhte mung dai hte maren hkawkam a du ni mahkra hpe di kau nna asawng asang hte pawt bu kaba pru na ra ai. Hkawkam wa hkraw n yang gaw, htawm hpang e Washti gaw hkawkam wa a man de shang na a hkang n lu u ga; nga nna hkawkam wa jaw dat ai mungga gaw, n gale n galai mat lu hkra, Persi yan Medi a tara laika hta ka da u ga; dai hta kaga hkawkam wa gaw shi a hkawkam jan aya hpe shi hta grau kaja ai num hpe jaw kau u ga. Shingrai hkawkam wa a mungga gaw shi a galu kaba ai mungdan ting hproi hkra chyam wa sayang, dingku num ni nlang hte gaw, tinang a madu wa ni, arawng lu ai, n lu ai rai timung hkungga lara na mara ai;” ngu mu ai. Dai ga hpe hkawkam wa hte du salang ni na ra nna, hkawkam wa gaw Memuhkan a ga hte maren galaw wu ai. Shi gaw masha langai hte langai tinang a nta up na hte tinang a amyu ga hku tsun nga na matu amyu langai hte langai a tsun ai ga hku hkan nna hkawkam mungdaw ni hproi hkra, mungga laika shabra dat wu ai.

Dai hpang hkawkam Ahasuru gaw myit kawp mat yang, Washti hte shi galaw ai lam mung, shi hpe daw dan ai lam mung shi dum wu ai. Shaloi hkawkam wa hpe daw jau ai ali ama ni gaw “Hkawkam wa a matu ahpraw tsawm ai hkawn sek hkan tam mu ga; hpraw tsawm ai hkawn sek ni yawng hpe Shushan htingnu na numsha ni a nta hta jahpawng da nna numsha ni hpe up ai hkawkam wa a unuk Hegai a lata hta ap ya mu ga; mungdaw langai hte langai hta hkan tam na agyi ni hpe san da mu ga; shanhte hpe jasan jaseng na matu tsi amyu myu jaw mu ga; hkawkam wa grau ra ai hkawn sek hpe Washti a malai hkawkam jan shatai u ga,” ngu nna tsun mu ai. Hkawkam wa gaw dai lam na ra nna, dai hku hkan galaw wu ai.

Dai aten hta Shushan htingnu hta Ben-yamin amyu lakung na Mordehkai mying ai Yuda masha langai mi nga ai. Dai wa gaw Yuda hkawkam Yehkonia hte rau Babelon hkawkam Nebuhkadneza lata hte rim wa ai hkrum nna, Yerusalem mare na bawng dung ai ni hta lawm nga ai. Shi gaw kawa di a kasha

Hadasa mying ai Eshta hpe bau maka la wu ai. Dai ma gaw kanu kawa n lu sai. Shi gaw gawng shing-yan tsawm ai hte hpraw htap ai numsha rai nga ai. Kanu yan Kawa si ai hpang Mordehkai gaw shi hpe kasha majing yin la wu ai.

Ya hkawkam wa a mungga nga ai hte maren, shi hkang da ai ga kajai nga ma ai rai nna, mahkawn law law wa Shushan htingnu e zuphpawng nga shangun ai hte Hegai a lata hta ap ya hkrum ai shaloi jang, Eshta hpe mung hkawkam htingnu de shaga nna numsha ni hpe up ai Hegai a lata hta ap ya mu ai. Dai mahkawn gaw shi a myit hte htuk nna myi man pa ai hkrum wu ai. Shi hkum mawn sumli na matu, lang ra ai baw amyu ni, jarit hte mahkawn nta na san da ai shi kaw hkan mai ai shingnan num marai sanit hpe alawan jaw wu ai. Bai shi gaw numsha ni a nta na grau kaja ai shara hta shingnan num ni hte rau tawn da mu ai. Eshta gaw shi a amyu hte kahpu kanau ni a lam hpa mung n tsun shapraw na lam Mordehkai hkang da ai majaw, hpa mung tsun shapraw ai nrai.

Ya Eshta gaw ladaw tawn da ai hte maren hkawkam wa kaw shang wu yang, hkawkam wa gaw mahkawn ni yawng hta shi hpe grau tsawra wu ai rai nna, shi hpe hkawkam janmau shagup ya nna, Washti a malai hkawkam jan shatai wu ai. Dai hpang hkawkam wa gaw Eshta poi ngu ai, poi kaba shi a du salang ni hte ali ama ni a matu galaw nna mungdaw ni hta lakhawn hkanse shayawm ai hte hkawkam wa a chyeju myit hte maren kumhpa kumhpa karan jaw mu ai.

Ya, Mordehkai gaw, hkawkam chyinghka lam makau e dung nga ai rai nna, chyinghka sin ai ni hta na hkawkam a unuk yan gaw hkawkam wa hpe sat kau na bawng ai lam hpe chye wu yang, shi a kasha Eshta hpe tsun dan wu ai. Shingrai Eshta gaw dai shiga lam hpe hkawkam wa hpe bai htawn tsun dan wu ai. Hkawkam wa gaw dai amu lam hpe jep yu nna dan leng nga ai lam hpe chye jang dai yan hpe hpun hta shadou sat kau nhtawm hkawkam a man e labau laika hta ka matsing da mu ai.

Dai hpang hkawkam wa gaw Haman hpe shagrau nna shi hte rau nga ai du salang ni hta grau tsaw ai aya dang da wu ai. Hkawkam wa gaw shi a lam hkang da ai majaw, hkawkam chyinghka e nga ai hkawkam ali ama ni mahkra gaw, gum dagup

nna Haman hpe nawku mu ai. Mordehkai chyawm gaw, gum mung n gum, naw mung n nawku wu ai. Dai rai nna hkawkam chyinghka e nga ai hkawkam a ali ama ni gaw, “Nang hpa majaw hkawkam wa hkang da ai ga hpe lale nta?” ngu nna shani shagu san mu ai. Rai timung Mordehkai gaw dai ga ni hpe n madat ai sha nga nga ai.

Ya Mordehkai shingrai nga nga ai lam Haman hpe sa tsun dan ya mu ai. Shingrai Mordehkai gaw n nawku ai lam hpe chye mu yang, Haman gaw masin grai pawt bu wu ai. Rai timung, shanhte gaw Mordehkai Yuda amyu re hpe Haman hpe shapraw dan ai majaw, Mordehkai langai hpe sha sat kau yang masin n kawp lu ai hte Mordehkai amyu ngu ai Ahasuru mungdan ting hta nga ai Yuda amyu masha ni nlang hte hpe sat shagrawm kau na maw nga ai.

Shingrai Haman gaw hkawkam Ahasuru hpang de shang nna, “Na a mungdan a mungdaw a myu ni mahkra hta amyu langai mi hkran nga ai; shanhte a tara gaw kaga amyu mahkra hta shai nga ai; shanhte gaw hkawkam a tara hpe hkan nang ma ai n rai; dai re ai majaw shanhte anga nga na gaw hkawkam wa a matu akyu nga ai n rai; hkawkam wa hkraw yang gaw shanhte hpe sat shagrawm kau na nga hkang dat ai laika ka u ga; ngai mahtang hkawkam wa a sut dek ni hta bang da na matu hkawkam a amu galaw ai ni a lata hta gumhpraw joi sen mi ap ya na nngai,” ngu wu ai. Dai rai nna hkawkam wa gaw shi a lachyawp malaw la nna Yuda masha ni hpe hpyen ai wa Haman hpe jaw wu ai.

Dai shaloi jang shawng shata na shi masum ya e, hkawkam wa a chyare ni hpe shaga la nna Haman hkang dat ai hte maren, mungdaw shagu a munggyi ni hte amyu shagu ni a agyi ni hpe mungdaw langai hte langai a laika ka ai hku hte amyu langai hte langai a ga ga ai hku hkan nna, laika ka shabra dat mu ai. Hkawkam wa Ahasuru a mying gang let ka nhtawm, hkawkam a lachyawp hte dazik shakap wu ai. Shingrai Adara ngu ai shata shi lahkawng a shi masum ya shani jang, Yuda masha yawng kaji kaba, ma kaji hte numsha mahkra hpe atsai awai sat shamyit kau nna, shanhte a arung arai ni hpe lanep shatai na nga, hkang dat ai laika ni hpe laika sa ai ni a lata hte hkawkam a mungdaw shagu

de shabra dat mu ai. Masha amyu ni yawng dai shani hta jin jin rai nga mu ga, mungdaw shagu hta amyu baw ni mahkra a matu ning re ai laika hkap htawn ka shabra dat na rai nga ai. Dai hkang dat ai ga gaw Shushan htingnu hta chye ai shaloi jang hkawkam wa hkang dat ai hte maren, laika sa ai ni alawan sa wa ma ai. Shaloi hkawkam wa hte Haman gaw, tsabyi rau lu ma ai hte Shushan htingnu chyawm gaw myit ung ang ai hkrum nga ai.

Dai byin wa ai lam mahkra hpe Mordehkai chye jang shi a hpun nba gang je kau nhtawm wan dap hta galu ai lachyit nba bu hpun let mare ka-ang de sa du nna, nsen kaba hte hkrap ngu hkrap ngoi wu ai. Lachyit nba bu hpun ai hte hkawkam chyinghka de kadai n mai shang timung shi gaw hkawkam chyinghka ndaw e nan sa tsap nga ai. Hkawkam a hkang dat ai tara laika du ai mungdaw shagu hta e Yuda masha ni gaw lusha gam let hkrap ngu hkrap ngoi, sharung shayawt ai hte myit yawn hkyen nga ma ai; law law wa mung wan dap hta galu ai lachyit nba hta kaleng taw nga ma ai.

Eshta a shingnan num ni hte shi a gawk sin ai ni gaw dai lam shi hpe sa tsun dan ai majaw, hkawkam jan gaw nachying myit yawn ai hte, Mordehkai a lachyit nba galai kau na matu shi hpang de hpun palawng shagun dat timung shi hkap la ai nrai. Dai rai nna Eshta gaw hkawkam san da ai hte shi hpe bau sin ai hkawkam a unuk Hahtak hpe shaga nna dai lam hpa re ai kun? hpa majaw rai kun? sa san yu na nga shi hpe Mordehkai hpang de shangun dat wu ai. Shingrai Hahtak gaw hkawkam chyinghka n daw na mare htingwang e nga ai Mordehkai hpang de sa du ai. Shaloi Mordehkai gaw shi hkrum ai lam mahkra mung Yuda masha ni hpe sat shagrawm kau nna, hkawkam a sut dek hta Haman bang da na nga ai gumhpraw kade re ai mung Hahtak hpe tsun dan wu ai. Dai hta kaga Yuda ni hpe sat shagrawm kau na nga, Shushan mare hta shapraw dat ai tara laika Eshta hpe madun dan nna shi hpe hti dan na matu mung, Eshta gaw hkawkam wa kaw shang nna, shi a amyu masha ni a matu mara hkawkam wa hpe hpyi nem ya na matu mung, Mordehkai gaw htawn ka ai laika Hahtak hpe jaw dat wu ai.

Shaloi Hahtak gaw Mordehkai a ga Eshta hpe wa tsun dan wu ai. Dai re ai majaw, Eshta gaw Hahtak hpe Mordehkai hpang de bai shangun nna, “Numsha, lasha kadai rai timung, hkawkam n shaga ai kata wang e hkawkam hpang de shang yang hkawkam wa gaw dai wa hpe jahkrung da na matu shi a ja sumdoi n ladawn ya yang teng teng si wa ai hkrum na lam langai sha nga ai gaw, hkawkam a ali ama ni hte mungdaw masha ni mahkra chye shajang ma ai. Ngai mung, ya sumshi ya tup hkawkam hpang de shang na shaga hkrum ai nrail,” ngu nna ga htang dat wu ai. Shanhte gaw Eshta a ga Mordehkai hpe htawn tsun mu ai. Dai rai nna Mordehkai gaw Eshta hpe “Kaga Yuda masha ni asak n lawt lu yang, nang hkawkam htingnu e nga timung lawt lu na zawn hkum nawn et; ndai aten e nang azim sha nga n yang gaw, kaga Yuda masha ni a matu lawt pru shara hku dam timung, nang hte na nwa a nta masha ni gaw si na mara ai. Ndai aten e ning re ai amu gun hpai lu na matu, nang hkawkam jan tai lu ai nawn shara nga ai nrail ni?” ngu nna htan dat wu ai. Shaloi Eshta gaw, Mordehkai hpe “Sa wa su, Shushan e nga ai Yuda masha nlang hte hpe jahpawng da u, nye a matu lusha gam ya nna, shani shana masum ya tup hkum lu hkum sha myit, ngai hte nye a shingnan num ni mung dai hte maren lusha gam na ga ai. Dai hpang tara tawt lai timung hkawkam hpang de ngai shang na nngai; si yang si hkam na nngai,” ngu nna ga htan dat wu ai. Shingrai Eshta hkang dat ai ga mahkra hte maren Mordehkai gaw wa galaw wu ai.

Ya masum ya e rai yang Eshta gaw shi a hkawkam jan hpun palawng sumraw nna hkawkam htingnu taw tap, hkawkam htingnu a kata wang e tsap nga ai. Hkawkam wa gaw htingnu a chyinghka lam taw tap na hkawkam htingnu kata e shi a hkawkam tingnyang hta dung nga ai. Hkawkam jan Eshta gaw, wang kata e tsap nga ai hpe hkawkam wa mu wu yang, Eshta gaw shi a man e myi man pa nga ai rai nna, hkawkam wa gaw shi a lata hta lang ai aja sumdoi Eshta hpang de ladawn dat wu ai.



Shingrai Eshta sit sa nna sumdoi a matu ahtawk ya wu ai. Shaloj hkawkam wa gaw "Hkawkam jan Eshta e, nang hpa ra nta? hpa hpyi mayu n ta? nye a mungdan chyen mi du hkra jaw na de ai," ngu nna tsun wu ai. Eshta chyawm gaw "Hkawkam a matu ngai hkyen tawn ai poi de Haman hte rau dai ni sa marit," ngu wu ai. Shaloj hkawkam wa gaw Eshta tsun ai ga hte maren sa lu hkra Haman hpe sa shatin mu, ngu nna tsun mu ai. Dai re ai majaw Eshta hkyen tawn ai poi de hkawkam wa yan Haman sa lawm ma ai.

Ya hkawkam wa gaw poi tsabyi lu nga yang Eshta hpe "Nang hpa hpyi nta? nang hpe jaw na de ai, nang hpa tam nta? mungdan chyen mi du hkra ap ya na de ai," ngu wu ai. Dai rai nna Eshta gaw, "Ngai hpyi ngai tam ai da ndai rai nga ai; hkawkam wa a man e ngai myi man pa ni ai rai nna, hkawkam wa gaw ngai hpyi ai ga madat mayu ai hte ngai tam ai lam shabyin na rai yang gaw, ngai bai hkyen tawn ai poi de hkawkam wa hte Haman naw sa marit, shaloj she hkawkam wa tsun ai hte maren, hpawt ni e galaw na nngai," ngu wu ai.

Dai shani e Haman gaw kabu gara ai myit kaba hte pru wa timung, hkawhkam chyinghka e dung nga ai Mordehkai gaw, shi a man e rawt mung n rawt, hkrit hkungga ai myit mung n madun ai hpe Haman mu wu yang, shi gaw Mordehkai hpe grai pawt bu nga ai. Rai timung Haman gaw shi a myit dip kau let nta de wa jang jinghku jing-yu ni hte madu jan Zeresha hpe shaga mu ai. Shingrai Haman gaw, shi sut gan kaba ai mung, kashu kasha law ai lam mung, hkawhkam wa shi hpe kabu shangun nna, hkawhkam wa a du salang ni hte ali ama ni a ntsa e shi hpe shagrau shatsaw da ai lam mahkra hpe mung, shanhte a man e hkai dan mu ai. Bai Haman gaw, “Rai sa hkawhkam jan Eshta pyi shi hkyen tawn ai poi hta ngai hta kaga hkawhkam wa hte rau kadai hpe mung n jashawn hkraw ai; hpawt ni mung, hkawhkam wa hte rau poi lawm na rai nga nngai; rai timung Yuda masha Mordehkai gaw, hkawhkam chyinghka hta dung nga ai ngai naw mu dingsa, ya ngai tsun wa ai lam ni nye a matu hpa akyu n nga ai,” ngu mu ai. Dai rai nna madu jan Zeresha hte jinghku jing-yu ni mahkra gaw “Dawng manga shi tsaw ai wudang sharawt jung da u, dai hta Mordehkai hpe shadau sat na matu, hpawt ni e hkawhkam wa hpe ahkang hpyi u, dai hpang kabu gara ai myit hte hkawhkam wa hte rau poi sa lawm u,” ngu nna shi hpe tsun wu ai. Haman mung dai ga hpe na ra nna wudang sharawt jung shangun wu ai.

Dai shana e hkawhkam wa gaw n yup lu nna jahpan labau laika ni hpe shapraw nna hkawhkam wa hkang da ai ga hte dai laika ni hpe shi a man e hti dan mu ai. Dai laika ni hta hkawhkam Ahasuru hpe sat na nga, chyinghka sin ai ni hta na hkawhkam wa a unuk Brightana yan Tere gaw, tam dakat ai lam, Mordehkai shabrawng dan ai hpe mu mu ai. Dai rai nna hkawhkam wa gaw “Mordehkai dai lam shabrawng dan ai majaw kaning re ai arawng sadang hte shagrau sha-a ai hkrum sata?” ngu nna san yu yang, hkawhkam wa hpe daw jau ai ali ama ni gaw “Shi a matu hpa mung n galaw ya ai,” ngu wu ai. Bai hkawhkam wa gaw “Wang kata e kadai nga nga nta?” ngu nna san yu yang, Haman gaw shi hkyen da ai wudang hta Mordehkai hpe shadau sat na matu hkawhkam hpe ahkang hpyi na nga httingnu na shinggan wang kata de shang ai majaw, hkawhkam wa a ali ama ni gaw “Haman tsap

nga ai,” ngu wu ai. Hkawkam wa gaw, “Shi shang ru ga,” ngu tsun mu ai. Shingrai Haman shang wa wu ai.

Shaloi hkawkam wa gaw, “Hkawkam wa shagrau shatsaw mayu ai wa hpe kaning di na rai ta?” ngu nna san yu yang, Haman gaw, ngai hta kaga hkawkam wa shagrau shatsaw mayu ai wa kadai wa mi rai nga a ta? nga nna shi a kraw e myit let, “Hkawkam wa shagrau shatsaw mayu ai wa a matu, hkawkam wa hpun ai bu hpun palawng hte janmau gup ai hkawkam wa jawn ai gumra la nna, dai rai ni hte gumra hpe arawng htum ai hkawkam du salang langai mi a lata hta ap ya n htawm, hkawkam wa shagrau shatsaw mayu ai wa hpe dai hpun palawng bu hpun shangun nna, gumra jawn let mare lam ni hta shapraw nna hkawkam wa shagrau shatsaw mayu ai wa hpe ning rai galaw nga ai, ngu nna shi a shawng e garu jahtau ai masha shangun dat u;” ngu nna hkawkam wa hpe htan wu ai. Dai rai nna hkawkam wa gaw Haman hpe, “Nang tsun ai hte maren hpun palawng hte gumra hpe lawan la nna hkawkam chyinghka lam e dung nga ai Yuda masha Mordehkai hpe galaw u; nang tsun ai hta langai mi muk hkum shayawm kau et;” ngu wu ai. Dai shaloi Haman gaw hpun palawng hte gumra ni la nna, Mordehkai hpe bu hpun shangun nhtawm, mare lam ni hta gumra shajawn let, “Hkawkam wa shagrau shatsaw mayu ai wa hpe ning rai galaw nga ai,” nga nna shi a shawng e garu jahtau nga ai. Dai hpang Mordehkai gaw hkawkam chyinghka lam de bai nhtang wa ai, Haman chyawm gaw yawn nna baw magap let shi a nta de alawan bai nhtang wa wu ai. Shingrai Haman gaw shi hta byin ai lam mahkra hpe madu jan Zeresha hte jingku jing-yu ni yawng hpe hkai dan wu ai. Dai rai nna shi a hpaji rawng ai ni hte madu jan Zeresha gaw, “Nang hpe sum hpang shangun ai Mordehkai gaw, Yuda aru arat hta na teng yang, nang shi hpe dang lu na nrail; nang shi a man e teng teng sum na ndai,” ngu mu ai. Shingrai shanhte shi hte rau ga naw tsun nga yang, hkawkam a unuk ni sa nna Eshta hkyen tawn ai poi de Haman hpe alawan shaga mu ai.

Shingrai hkawkam wa yan Haman gaw, hkawkam jan Eshta a poi hta lawm nga ma ai. Ya lahkawng ya shani na tsabyi lu ai shani hta hkawkam wa gaw Eshta hpe, “Hkawkam jan Eshta e

nang hpa hpyi n ta? nang hpe jaw na de ai; nang hpa tam n ta? mungdan chyen mi du hkra nang hpe ap ya na de ai,” ngu nna bai tsun wu ai. Dai rai nna hkawkam jan Eshta gaw, “Hkawkam wa e, ngai na a man e myi man pa ai hte hkawkam wa hkraw n yang gaw, ngai hpyi ai hte maren nye a asak ngai tam ai hte maren nye a amyu masha ni a asak jahkrung da ya mi; ngai hpe mung, nye a amyu masha ni hpe mung atsai awai, sat shamyit shagrawm kau na nga, anhte dut kau ai hkrum saga ai. Mayam num mayam la tai na matu dut kau hkrum ai rai yang hpyen wa gaw hkawkam wa sum ai malai jahpu n jaw lu timung, ngai azim sha nga na nga na nngai,” ngu nna htan wu ai. Shaloi hkawkam Ahasuru gaw, “Ndai lam galaw gwi ai wa gaw kadai wa rai ta? kanang e rai ta?” ngu nna hkawkam jan Eshta hpe san wu ai. Eshta gaw “Gumlau wa hte hpyen wa gaw, ndai nhkru ai Haman nan rai nga ai,” ngu wu ai. Dai rai nna Haman gaw, hkawkam wa hte hkawkam jan a man e hkrit gari nga ai. Hkawkam wa mung pawt bu ai hte tsabyi poi na rawt nna htingnu na sun de shang mat wa ai. Haman gaw shi a asak jahkrung da na lam hkawkam jan Eshta hpe hpyi na matu rawt tsap nga ai. Kuning rai n me law hkawkam wa shi hpe ari jaw na maw ai lam shi chye da wu ai. Shaloi hkawkam wa gaw htingnu sun kaw nna tsabyi poi gawk de bai shang wa ai. Haman gaw Eshta taw nga ai yupku hta gum dagup nga ai majaw, hkawkam wa gaw, “Nye a n ta kata e, nye a man e nan, hkawkam jan hpe gamu la na rai kun?” nga nna ga naw tsun nga yang shanhte gaw Haman a myi man magap kau ya mu ai. Harabona mying ai hkawkam wa a unuk langai mi gaw, “Yu u, hkawkam wa a lam ga kaja tsun ai Mordehkai a matu, Haman sharawt jung da ai dawng manga shi tsaw ai wudang gaw Haman a nta e jung nga ai,” ngu wu ai rai nna, hkawkam wa gaw, “Dai hta e shi hpe shadau sat kau mu,” ngu mu ai. Shingrai Mordehkai a matu jung da ai wudang hta Haman hpe noi da mu ai. Shaloi hkawkam wa a myit kawp mat lu ai. Dai shani jang hkawkam Ahasuru gaw, Yuda masha ni hpe hpyen ai Haman a nta hkawkam jan Eshta hpe ap ya kau wu ai. Eshta gaw hkawkam wa hpe Mordehkai hte kaning rai daw hkat ai lam hpe hkai dan ai majaw, Mordehkai gaw hkawkam wa kaw shang lu ai. Hkawkam wa mung Haman kaw na dawm la ai lachyawp hpe shi

a lata na malaw la nna Mordehkai hpe ap ya nu ai. Eshta mung Mordehkai hpe Haman a nta ntsa e up shangun wu ai.

Bai Eshta gaw hkawkam wa a man e gum dagup nna, Haman gaw Yuda masha ni hpe hkalem maw ai lam hkawkam wa shabai kau u ga; nga nna hkrap ngu hkrap ngoi let hkawkam wa a man e hpyi tawngban wu ai. Shaloi hkawkam wa gaw, Eshta hpang de shi a aja sumdoi ladawn dat wu ai. Shingrai Eshta gaw rawt nna hkawkam wa a man e tsap nga let, “Hkawkam wa hkraw nna ngai shi a man e myi man pa ai hte hkawkam wa dai lam ra nna shi ngai hpe yu ra ai rai yang gaw, hkawkam wa a mungdaw shagu hta nga ai Yuda masha ni hpe sat shagrawm kau na nga, Haman hpaji daw nna ka shabra dat ai laika ni hpe hkawkam wa bai hkan ka shabai kau u ga, nye amyu a ntsa e du ai tsin-yam tsindam hpe mung nye a kahpu kanau ni hten bya hkrum nga ai ni hpe mung, ngai kaning rai yu nga lu na rai ta?” ngu wu ai. Shaloi hkawkam Ahasuru gaw, “Haman gaw Yuda amyu masha ni hpe sat kau mayu ai majaw, ngai shi a nta hkawkam jan hpe ap kau se ai. Dai wa hpe mung wudang hta noi sat kau se ai; rai timung, hkawkam a amyng gang let ka ai hte hkawkam lachyawp dazik shakap ai laika hpe kadai mung n shabai kau lu nga ai majaw, nan mung myit ra ai hte maren hkawkam a mying gang let Yuda masha ni a lam ka shabra dat mu,” ngu nna hkawkam jan Eshta hte Mordehkai hpe tsun mu ai. Shaloi Mordehkai gaw hkawkam wa a chyare ni hpe shaga la nna, hkawkam Ahasuru a mying gang let, laika ka shangun mu ai hte dai laika hta hkawkam a lachyawp dazik shakap nhtawm hkawkam wa a matu kawn da ai grai lawan chye ai gumra jawn ai ni a lata hta laika shagun dat mu ai. Dai laika hta ka da ai gaw, Adara ngu ai shata shi lahkawng a shi masum ya ngu ai shani jang, hkawkam Ahasuru a mungdaw n lang hte hta mare mi hte mare mi hta nga ai Yuda masha ni gaw zuphpawng nga nna shanhte hte shanhte a ma kaji ni, kanu ni hpe sat kau nna, shanhte a arung arai ni hpe lanep shatai maw ai mung masha ni kadai hpe mung hkap gasat mai nna tinang a asak hkye la lu hkra hpyen ni nlang hte hpe atsai awai gasat shagrawm shamyit kau lu na ahkang rawng nga ai. Ya Mordehkai gaw, amut, ahpraw n san ai hkawkam bu hpun

palawng bu hpun nna ja janmau kaba gup ai hte mani ai lachyit nba ahpraw hte hkyeng tsawm ai nba lawai let, hkawkam wa kaw nna pru wa nna, Shushan mare masha ni gaw, kabu gara ai hte jahtau garu nga ma ai. Ya hkawkam wa hkang dat ai hte maren, daw dan da ai aten ni wa yang, Yuda masha ni hpe hpyen ai ni gaw shanhte hpe dang kau nna myit mada nga ai shani Adara ngu ai shata shi lahkawng a shi masum ya shani du jang hkawkam Ahasuru a mungdan kata e nga ai Yuda masha ni yawng hpe zuphpawng nga shangun nna hpyen rai laknak ni hpe lang shangun let, hkap nga nna hpyen ni yawng hpe sat shagrawm kau mu ai. Yehowa Karai Kasang gaw, Eshta hte shi a amyu rai nga ai Yuda masha yawng hpe hpyen ni a lata hta na hkye la wu ai rai nna Eshta hte Mordehkai gaw mungdaw shara shagu hta nga ai masha ni yawng hpe laika ka shabra dat mu ai.

Dai gaw Adara shata a shi masum ya e byin nga ai, dai rai nna shanhte gaw, dai shata a shi mali ya e ban sa nna, dai shani hpe poi sha ai hte kabu gara ai shani shatai mu ai. Shushan mare e nga ai Yuda masha ni chyawm gaw, shi masum ya hte shi mali ya hta zuphpawng nga nna, dai shata shi manga ya e ban sa nga ai hte dai shani hpe poi sha ai hte kabu gara ai shani shatai mu ai. Dai re ai majaw kahtawng ni hte bunghku n kum ai mare hta nga ai Yuda masha ni gaw Adara shata shi mali ya e kabu gara let poi sha ai shani hte sharawng awng ai shani shatai nna shada da kumhpa karan jaw hkat ma ai.

Eshta a maumwi lam hpe Eshta laika hta hti yu yang mu chye lu ai rai.

## YOBA A MAUMWI

Moi shawng de Uza mung hta e Yoba mying ai wa langai mi nga ai. Dai wa gaw ding hpring ai hte kangka ai wa rai nna, Karai Kasang hpe hkrit kamyin let, yubak mara hpe koi kau wu ai. Shi gaw shadang sha sanit hte shayi sha marai masum shaprat wu ai. Shi lu ai sut gan gaw sagu, bainam hkying sanit, gawla-uk hkying masum, dumsu gap manga tsa, lawze kanu manga tsa hte ali ama grai law nga ai rai nna dai wa gaw sinpraw masha ni mahkra hta grau kaba ai wa rai nga ai.

Shingrai shaning law law wa apyaw sha, nga ngwi nga pyaw ai hpang Yoba a kamsham ai lam hpe mung, hkam sharang ai lam hpe mung chyam yu na matu, Karai Kasang gaw Satan wa hpe ahkang jaw wu ai rai nna, Yoba a shayi shadang sha ni gaw, shanhte a kahpu kaba a nta e, tsabyi poi lu sha nga ma ai shani hta e kasa langai mi Yoba hpang de sa du nna “Utang ni gaw hkauna shawt nga nna, lawze yi ni gaw dai makau hkan e makrut sha nga ma ai. Sheba masha ni mahtang sa htim nna, yam nga ni hpe gawt mat wa manu ai; nchyang ni hpe mung, ri nhtu hte sat kau manu ai. Nang hpe wa tsun dan na matu ngai chyu sha lawt ni ai,” ngu wu ai. Dai wa gaw ga naw tsun nga yang kasa kaga langai bai du kahtap nna, “Karai Kasang a wan gaw sumsing lamu de na di hkrat wa nna sagu, bainam ni hte nchyang ni hpe hkru kau ai hte shamyit kau manu ai; nang hpe wa tsun dan na matu ngai chyu sha lawt ni ai,” ngu wu ai.


Dai wa gaw ga naw tsun nga yang kasa kaga langai mi bai du kahtap nna, “Hkalde masha ni dap masum htim lung wa nna gawla-uk ni hpe gawt mat wa manu ai, nchyang ni hpe mung ri nhtu hte sat kau manu ai. Nang hpe wa tsun dan na matu ngai chyu sha lawt ni ai,” ngu wu ai. Dai wa gaw ga naw tsun nga yang kasa langai mi bai du kahtap nna, “Na a shayi shadang sha ni gaw, shanhte a kahpu kaba a nta e tsabyi poi lu sha nga yang, nam mali de na nbung kaba bung wa nna, dai nta jut mali hpe wa ahpawt jang dai nta gaw shabrang ni a ntsa e daw kamyet nna shanhte si mat masai; nang hpe wa tsun dan na matu ngai chyu sha lawt ni ai,” ngu wu ai. Dai shaloi Yoba gaw rawt nna, “Ngai gaw nu a hkri

tung nna singgu krin shangai sa nngai; ngai dai de singgu krin bai wa na ni ai. Yehowa jaw nna Yehowa bai dawm la nga ai; Yehowa a mying ning sang gaw *a* nga u ga law,” ngu nna tsun wu ai.

Dai zawn Yoba gaw dai lam yawng hkrum timung shut mung n shut, Karai Kasang hpe mara mung n shagun ai sha, Karai Kasang a chyeju hpe shakawn let nga nga ai.

Dai hpang Yoba hpe grau nna chyam yu na matu, Satan hpe lang mi hte lang mi bai ahkang jaw wu ai rai nna, Satan gaw Yehowa kaw nna pru mat wa nna Yoba hpe lagaw lahpan kaw nna baw pungding du hkra krwi jap tu ahpra shangun wu ai. Shi hkum hpe ahkut kau na matu, di chyen shi la nna wan dap hta dung nga ai. Shaloi, madu jan gaw, “Nang gaw na a ding hpring ai myit hta naw agrin nga nni? Karai Kasang hpe nyet kau nna si mat wa u,” ngu nna shi hpe tsun wu ai. Shi chyawm gaw, “Myit n gring ai num ni tsun ai zawn, nang tsun nga ndai. A taw Karai Kasang a lata na kaja ai hpe hkam la nhtawm n kaja ai hpe mung hkam la na n mai nga a ni?” ngu wu ai. Yoba gaw dai lam yawng hkrum timung, n gup hte pyi n shut nga ai.

Dai hpang Yoba a jinghku jing-yu ni ngu ai Teman masha Elihpa, Shuhi masha Bilda, Nama masha Zohpa marai masum hte gaw Yoba hta byin ai tsin-yam tsindam mahkra a lam na ma yang, shi hte rau yawn hkyen nna shi hpe shangwi shapyaw na matu sa zuphpawng na a ten madat da ai majaw, langai hte langai tinang a shara na sa wa ma ai. Shanhte gaw tsan tsan kaw nna shi hpe mu mada timung, shi hpe n chye mu ai majaw shanhte nsen sharawt nna hkrap ngu hkrap ngoi let tinang a hpun nba gang je kau ai hte tinang a baw hta hkrat bun hkra, ga nhpu lamu de agat shalun ma ai. Shingrai shanhte gaw sanit ya sanit na tup shi hte rau ga hta dung nga nna, shi hkrum ai tsin-yam tsindam gaw, grai yak la nga ai hpe shanhte mu ma ai majaw, kadai mung shi hte ga hkaw mi pyi n tsun ma ai.



Dai hpang shi a jinghku ni marai masum shanhte a myit lu ai gaw, ndai wa gaw ndai daram yak ai tsin-yam tsindam hkrum sha ai gaw kaga n rai, mara grai law ai majaw hkam sha ai rai nga ai, ngu nna myit la let, tsun wu ai gaw, "Nang gaw mara kaw na lawt da nga ninglen kaning rai nna tsin-yam hkrum sha nga nta? tinang a hkum hpe myit sumru yu nna, myit malai lu u, anhte mu chye ai hte maren gaw n tara ai hkauna galaw ai wa hte myit shadang nna nli gat hkai ai ni gaw dai zawn re ai lam ni hpe dan la nga ai. Karai Kasang kawut dat wu ai rai nna dai ni hten za mat shajang nga ma ai. Tinang sa ai nsa hte nan sum kau ai hkrum nga ma ai," ngu nna shi a jinghku ni marai masum gaw, ga shadawn tsun let Yoba myit malai lu na matu, shadum jahprang ga tsun mu ai. Dai shaloi Yoba bai htan ai gaw "Dai zawn nga ai ga ni hpe shawng de rai nna yu nngai; nanhte yawng shalan shabran na matu ga tsun ma timung, grau nna myit tsang shangun nga myit hka; kaman lila ga tsun ai rai nhtum a ni? nanhte tsun ai ga hte maren, ngai mung ga tsun lu nga ai. Ngai hkrum ai zawn nanhte hkrum yang, ngai nanhte a lam ga sumtu tsun hkai lu nna, nye a baw mung kanga lu nga ai. Dai zawn ngai n galaw nna nanhte hpe ngai ga tsun karum na kaman lila ga ni hpe ngai sharang kau na nngai,"

ngu nna htan wu ai. Shingrai Yoba hta hkrum hkra ai tsin-yam gaw, grai kaba la nga ai rai nna dai wa gaw, “Ngai hpyi ai ga lu n ga, ngai myit marit ai rai hpe Karai Kasang mung jaw n ga, Karai Kasang gaw ngai hpe jahten na mung, shi a lata ladawn nna ngai si wa na matu mung shi galaw yang gaw, ngai hkyam sa lu na rai nga ai. Galoi wa mi shana htum nna ngai rawt lu na a ni? ngu nna aput ai hte yup wa lu nngai; nhtoi htoi ai du hkra gale galau rai nna shana shalai kau nga nngai; ngai gaw yup wa yang hkyam sa lu na nngai. Nye a bunghkum gaw ngai hpe ngwi pyaw shangun na rai yang, du gaw hkrit hpa yupmang hpe mu shangun nna, shingran hte ngai hpe kajawng shangun nngai. Ngai gaw si na lam hpe chyu sha marit la nga nngai. Rai timung ngai hpe shalawt da ai Karai Kasang gaw, asak hkrung nna hpang na prat hta mungkan ga de du yu hkrat wa na, nga nna mung nye a hpyi htun mat nna ndai hkum hkrang hpe pyi jahten kau ai rai timung, ngai gaw hkum hkrang nan Karai Kasang hpe mu lu na re ai, ngu nna ngai chye nga nngai;” ngu nna Yoba tsun wu ai.

Dai hpang Yoba gaw si mayu ai rai timung si na ahkang n lu wu ai rai nna shi hkrum ai tsin-yam tsindam gaw na wa lu ai rai nna hkam sharang ai myit gaw htum mat wa nna hpang e Karai Kasang hpe mara shagun wu ai. Shi a jinghku ni marai masum gaw, “Mara n lu ai masha kaja hpe jahten ga ai n rai, nang hta yubak mara nga ai majaw tsin-yam tsindam hkrum sha ai rai nga ai,” ngu nna Yoba hpe tsun mu yang, Yoba gaw masin pawt nna shingrai langai hte langai ga matai malai nga nna tsun shajang nga ai ga hpe Karai Kasang na chye wu yang, Karai Kasang gaw Yoba a ga hpe bai htan na matu nbung laru kaw nna tsun ai gaw, “Hpaji n lawm ai sha ga tsun ai hte ngai myit ai lam hpe jahten ai gaw, kadai wa rai nga a ta? ginding aga a npawt hpe ngai hpan da ai shaloi nang gaw kanang nga nta? nammukdara a chyinghka hpe la da ai majaw, nang gaw ndai shara du hkra sa lu ai nrail ni? lai nna n jat n sa lu ai; ndai shara e na a gumrawng ai hkaleng ni gaw sim mat wa nga ai,” ngu nna tsun wu ai hte “Chyinghka grang ni hpe tawn da ai ten hta kadai wa sa nna karum na a ni? dusat u ni, u zai ni hpe kadai jaw sha nna bau tawn na a ni? uhka hkalung ni gaw shahpa n nga nna pyen kayin hkawm wa nna, Karai Kasang hpe

shaga ai shaloi shahpa kadai jaw a ni? si ai chyinghka hpe kadai hpaw yu a ni? si ai de shang wa ai lam hpe mu yu nni? mungkan ga a ga man yawng hpe kadai mu yu a ni? N htoi htoi ai lam de kaning re ai lam de du lu a ni? masha kadai n nga ai nam mali hta marang htu shangun na matu mung, dam lada ai pa layang hta hka hte madit nna tsit lali ai tsingdu tsingman ni hpe tu shangun na matu mung, marang hka ni lwi hkrat wa na lam, myi hrap gala ai hte mu htim ai lam hpe kadai hpaw da a ta? nang gaw ngai dawdan da ai tara ni hpe n dang kau na rai nni? nang gaw na a hkum hpe dingman ai wa zawn, dingman dum nna ngai hpe mara shagun na rai nni?” ngu nna Yoba hpe daru sharin wu ai.

Dai shaloi Yoba gaw shi shut ai mara hpe mu nna, “Ngai gaw n hkru n shawp ai masha rai nga nngai, ngai gaw nang Madu hpe kaning ngu nna bai htan na rai ta? ngai gaw nye a hkum hpe grai matsat nga nngai; ga nhpu hte wan dap hta e, dung nga nna myit malai lu nga nngai,” ngu nna bai htan wu ai. Karai Kasang gaw Yoba a jinghku ni marai masum hpe ning ngu nna tsun wu ai; “Ngai nanhte hpe masin pawt nga nngai, hpa majaw nga yang nye a mayam Yoba gaw nye a lam hpe teng man ai hte maren , tsun ai zawn nanhte gaw n tsun myit dai; dai majaw dumsu usu sanit hte sagu la sanit la nna Yoba hpang de la sa nna tinang a matu wan nat hkungga sa nawng jau lu na rai myit dai; Yoba gaw nanhte a matu, akyu hpyi tawngban ya na rai myit dai; shing nrail Yoba gaw nye a lam hpe teng man ai hte maren tsun ai zawn, nanhte n tsun yang gaw nanhte a mara hpe ngai jeyang na nngai,” ngu nna hkang da mu ai. Dai zawn Karai Kasang hkang da ai hte maren shanhte gaw sa nna galaw mu ai rai nna, Karai Kasang gaw shanhte a mara hpe raw kau ya mu ai.

Dai hpang tsawra matsan dum ai myit hte hpring nga ai Karai Kasang gaw, Yoba hta hkrum hkra ai tsin-yam tsindam ni yawng hpe bai jahkoi kau nna shawng na hta htam lahkawng law la ai sutgan yam nga ni hpe bai shaman jaw wu ai. Kahpu kanau kajan hte shawng de mu chye hkat ai jinghku jing-yu ni yawng hte gaw, Yoba hpang de sa du shajang nna shanhte hte rau jawm lu, jawm sha shajang mu ai. Shi hta hkrum hkra ai Karai Kasang a

maw mawn ai lam ni hpe jawm kajai ai hte shada da shalan  
shabran ai ga shaga shajang mu ai.

Karai Kasang gaw Yoba hpe shawng de shaman ya ai hte  
hpang e grau nna shaman ya wu ai rai nna, shi gaw sagu bainam  
mun mi hkying mali, gawla-uk hkying kru, dumsu utang gap  
hkying mi hte lawze yi hkying mi hpe bai lu la wu ai. Dai  
mungdan hta Yoba a shayi sha ni zawn, ahpraw nsam htap ai  
numsha langai mi mung nnnga ma ai.

Dai hpang Yoba gaw, shaning latsa e mali shi ning tup,  
asak naw hkrung nga ai rai nna, shi a aru arat ni, prat mali du hkra  
hpe mu da ai ten du hkra nga nga nna, dingla ugut gu let si mat wa  
sai rai.

Yoba a labau maumwi lam hpe Yoba Laika hta hti yu mai  
nga ai.

## DANIELA A MAUMWI

Yesu Hkristu a shawng shaning kru tsa ning daram hta Yuda hkawkam Yehoiakim gaw n hkru n hkra matsat shabat amu hta grau hkan sa galaw ai hte kashun kashe ai hte sumla nawku lam ni a majaw Yehowa Karai Kasang gaw masin pawt ai rai nna, Hkalde mungdan hpe up hkang ai Nebuhkadneza hpe myit shaja ya ai hte hpyen luksuk hte rau Yerusalem mare de lung wa nna wang tawn ai hte Yuda hkawkam Yehoiakim hte nawku htingnu hta nga ai rai ni nkau mi hpe Nebuhkadneza a lata hta ap ya kau wu ai.

Lani mi hta Nebuhkadneza gaw Yerusalem mare hta e naw nga nga yang, unuk ni a agyi wa hpe shaga la nna, ra n rawng ai, hpraw tsawm ai hte hpaji byeng-ya amyu myu chye chyang ai hte maka kumla pru nna, hkawkam htingnu hta amu galaw mai ai Israela kashu kasha shabrang nkau mi hpe hkawkam amyu hta na mung, lata la nhtawm Hkalde masha ni a laika hte tsun ai ga shanhte hpe sharin achyin ya na lam shi hpe hkang da wu ai. Dai hta kaga hkawkam wa gaw, shi a sha ku na shat hte shi lu ai tsabyi jahku hta na shani shagu shanhte hpe karan jaw nna masum ning tup bau tawn nhtawm, hkawkam wa a man de shang lu na lam hkang da wu ai. Ya dai shabrang ni hta Yuda amyu na Daniela, Hanania, Mishaela hte Azaria hte lawm nga ma ai. Unuk ni a agyi wa gaw shanhte a amying lai nna, Daniela hpe Belteshaza, Hanania hpe Shadrak, Mishaela hpe Meshak, Azaria hpe Abed-nego, ngu nna shamying mu ai.

Daniela chyawm gaw hkawkam wa karan jaw ai shat hte shi lu ai tsabyi jahku hpe n lu n sha ai sha, awu asin hpe koi gam na nga, myit jahkut da wu ai. Dai rai nna awu asin n hkrum u ga, shi gaw unuk ni a agyi wa hpe hpyi wu ai. Daniela gaw unuk ni a agyi wa man e myi man pa ai hkrum u ga; Karai Kasang shabyin ya wu ai. Rai timung unuk ni a agyi wa gaw, “Nanhte a matu lusha san da ai, nye a madu hkawkam wa hpe hkrit nngai. Nanhte a myi man gaw rau ram ni a myi man daram n tsawm ai hpe shi mu jang nanhte a majaw nye a baw sum na tsang ra ai n rai ni?” ngu nna Daniela hpe tsun wu ai. Dai shaloi Daniela gaw, “Anhte lusha na matu namlaw namlap hte ntsin sha shi ya tup jaw yu mi, dai hpang

anhte a myi man hte hkawkam wa a sha ku na sha ai shabrang ni a myi man hpe nang shadawn yu u ga, nang nan mu ai hte maren, na a mayam ni hpe di mi,” ngu nna tsun mu ai. Shaloi shat shadu ai wa mung yin la nna nhtoi shi ya tup shanhte hpe chyam yu mu ai. Ya nhtoi shi ya lai yang, shanhte a myi man gaw hkawkam wa a sha ku na sha ai shabrang ni a myi man hta grau tsawm nna hpum nga malu ai. Dai rai nna shat shadu ai wa gaw shanhte a shat hpe mung, shanhte lu na tsabyi jahku hpe mung, dawm la nna namlaw namlap sha jaw mu ai. Karai Kasang gaw dai shabrang mali hpe laika chye ai hte hpaji byeng-ya amyu myu hta nyan rawng nna chye chyang ai myit jaw mu ai. Daniela mung, yupmang hte shingran amyu myu chye htai ai nyan hpring nga lu ai.

Shingrai masum ning tup sharin ngut jang, dai shabrang ni hpe hkawkam hkaw de jashawn na matu hkawkam wa madat da ai aten du jang unuk ni a agyi wa gaw, shanhte hpe Nebuhkadneza hkawkam wa hpang de woi shawn nna, hkawkam wa gaw shanhte hte tsun chyai nga ai; nlang hte hta Daniela, Hanania, Mishaela, Azaria hte bung ai wa langai mi mung n nga ai. Dai re ai majaw shanhte gaw, hkawkam wa a man e tsap nga lu ma ai. Hkawkam wa san yu ai hpaji byeng-ya hte chye chyang ai lam mahkra hpe dai shabrang ni gaw mungdan ting a lakle sara ni hte mandan bau ai ni nlang hte hta htam shi grau nna chye ma ai.

Nebuhkadneza hkaw dung ai lahkawng ning hta e, yupmang mu nna myit ung ang ai majaw, yup n lu sha nga ai. Yupmang htai ya na matu, hkawkam wa gaw lakle sara, mandan bau ai ni, gum hpan hpan ai ni hpe shaga la nna hkang da wu ai. Shingrai shanhte sa shang nna hkawkam wa a man e tsap nga ma ai. Shaloi hkawkam wa gaw, “Ngai yupmang mu ni ai, dai yupmang hpe chye lu hkra, ngai myit ung ang nga nngai,” ngu nna shanhte hpe tsun wu ai. Shingrai lakle sara ni gaw Suri ga hte hkawkam wa hpe, “Hkawkam wa e, nang tut nawng ahkrung nga n ga, na a mayam ni hpe dai yupmang hkai dan mi, anhte ga lachyum htai dan na ga ai,” ngu mu ai. Hkawkam wa gaw “Dai yupmang hpe ngai malap kau se ai; rai timung dai yupmang hte ga lachyum ngai hpe n htai dan yang gaw, nanhte kahtum kadaw di ai hkrum nna nanhte a nta ni nga hkyi sumpum tai na ra ai. Yupmang

hte ga lachyum htai dan yang gaw, nanhte gaw nye a lata na kumhpa hte arawng sadang kaba lu na marin dai. Dai re ai majaw yupmang hte ga lachyum ngai hpe htai dan mi,” ngu nna lakle sara ni hpe htan wu ai.

Shanhte mahtang, hkawkam wa gaw shi a mayam ni hpe dai yupmang hkai dan mi ga, anhte ga lachyum htai dan na ga ai, nga nna bai htan ma ai. Hkawkam wa gaw, “Dai yupmang ngai malap kau ai hpe nanhte chye ai majaw, nhtoi na hkra sharen mayu ai hpe ngai teng teng chye nngai; rai timung dai yupmang ngai hpe n htai dan mi yang, nanhte myit langai sha nga nna aten lai hkra, nye a man e masu ai ga tsun na maw ai majaw nanhte a matu tara langai sha rai nga ai. Dai re ai majaw, yupmang ngai hpe htai dan mi, shaloi ga lachyum nanhte chye htan shapraw ai hpe ngai chye na nngai,” ngu nna htan wu ai.

Bai lakle sara ni gaw, “Hkawkam wa a amu hpe chye htai ai wa gaw ga ning tsa e langai mi pyi n nga ai; kaning san galu kaba ai hkawkam wa hte du wa mung, mandan bau ai sara ni hte lakle sara ni hpe ning nga n san ga ai, hkawkam wa san ai lam gaw yak la ai lam rai nga ai; shinggaim masha ni hte rau n shanu ai hpara ni hta kaga, hkawkam wa a man e dai lam shapraw lu ai wa kadai mung n nga ai,” ngu nna hkawkam wa hpe htan mu ai.

Dai ga a majaw hkawkam wa masin pawt nna grai n yun bu let, Babelon mare na hpaji rawng ai ni mahkra hpe shamyit kau na hkang dat mu ai. Shingrai hpaji rawng ai ni hpe sat kau na nga, hkawkam mungga pru nga ai. Daniela hte shi a kanawn manang ni hpe mung sat kau na tam ma ai. Dai rai nna Daniela gaw Babelon mare na hpaji rawng ai ni hpe sat kau na matu pru wa ai hkawkam a sin langa hpyen bu Ariok hpe htap htuk ai hte myit su ai ga tsun nna, “Hkawkam wa a mungga gaw hpa majaw ndai daram lawan a ta?” ngu nna shi hpe san wu yang Ariok gaw, dai lam Daniela hpe tsun dan wu ai. Shaloi Daniela shang nna yupmang htai lu na aten nhtoi daw ya na lam hkawkam wa hpe hpyi wu ai. Shingrai Daniela gaw, shi a nta de nhtang wa nhtawm shi a kanawn manang ni hpe dai lam tsun shana nna, shanhte gaw Babelon mare na hpaji rawng ai ni hte rau sat kau ai n hkrum hkra, dai makoi magap di ai lam hta sumsing lamu na Karai Kasang kaw

na matsan dum ai chyeju lu na matu, Daniela hte shi a kanawn manang ni akyu hpyi ma ai.

Dai rai nna shana aten e shingran hte Daniela hpe dai lam shapraw dan wu ai. Dai rai nna Daniela gaw, sumsing lamu kaw na Karai Kasang a chyeju hpe shakawn ngut jang Babelon na hpaji rawng ai ni hpe sat kau na hkawkam wa san da ai Ariok hpang de Daniela sa shang nna, “Babelon mare na hpaji rawng ai ni hpe hkum sat, ngai hpe hkawkam wa a man de jashawn e, yupmang a ga lachyum ngai hkawkam wa hpe shapraw dan na nngai,” ngu nna shi hpe tsun wu ai. Shaloi Ariok gaw Daniela hpe hkawkam wa a man de alawan jashawn nna, “Yupmang a ga lachyum hkawkam wa hpe htai lu ai, bawng dung ai Yuda kashu kasha ni hta na langai mi hpe ngai mu se ai,” ngu nna tsun wu ai. Hkawkam wa mung, “Ngai mu ai yupmang hte de a lachyum htai dan lu na ani?” ngu nna Daniela hpe san wu ai. Daniela gaw, “Hkawkam wa san ai makoi magap nga ai lam hpe hpaji rawng ai ni, mandan bau ai ni, lakle sara ni, gumhpan hpan ai ni hkawkam wa hpe madun dan lu ai n rai; rai timung makoi magap lam shapraw shadan lu ai Karai Kasang gaw, sumsing lamu e dung nga ai, shi gaw htawm hpang e byin na ra ai lam, hkawkam Nebuhkadneza hpe madun dan nu ai; na a yupmang hte na a yup ku ntsa e nang mu ai shingran gaw, da ndai rai nga ai;” ngu nna madun dan wu ai.

Shaloi Daniela gaw, “Nang hkawkam wa e, htawm hpang e hpa byin na ra ai na a yup ku ntsa e nang sumru yu nna makoi magap lam shapraw dan chye ai wa gaw hpa byin na ra ai nang hpe madun dan nga ai. Shinggyim masha kaga hta ngai wa hpaji grau rawng ai majaw ndai makoi magap lam ngai hpe shapraw dan na n rai; nang hkawkam wa gaw de a ga lachyum chye lu nna, nang myit mang ai lam chye na lu hkra dai lam hpe shapraw dan ni ai.”

“Hkawkam wa e, nang gaw sumla kaba hpe mada mu ndai; dai galu kaba ai hte kabrim ala tu ai sumla gaw na a man e tsap nga nna de a ningja gaw hkrit hpa rai nga ai; dai wa a baw gaw ja jet rai nga ai. Sinda hte lata yan gaw, gumhpraw rai nga ai. Akan hte magyi yan gaw, magri rai nga ai hte de a shinglang gaw, hpri rai nna lagaw lahpan gaw hpri daw mi, ga kagam daw mi rai

nga ai. Nang mada yu nga yang lata hte n tawk ai nlung langai mi gaw hpri hte kagam rai nga ai sumla lagaw hpe hkra nna dai yan hpe agrawp mani kau wu ai. Shingrai ahpri, ga kagam, magri, gumhpraw hte aja gaw agrawp mani mat nna n mut ta chyarang na nbun zawn tai mat ai hte nbung e ahpawt kau nna de a matu nga shara n nga ai. Dai sumla hpe hkra ai nlung chyawm gaw, galu kaba ai bum tai wa nna lamu ga ting kapat nga ai hpe nang mu ndai.”

“Yupmang gaw da ndai rai nga ai; ya anhte gaw hkawkam wa a man e de a ga lachyum hta dan na ga ai. Hkawkam wa e, hkawkam ni a hkawkam rai nga ndai; sumsing lamu na Karai Kasang gaw, mungdan hte hpawn hpung dagu du magam hte hpung shingkang nang hpe jaw nit dai; shinggyim masha rawng nga ai shara shagu hta bra nga ai pa ga na ashu ashan ni hte ntsa malen u ni hpe na a lata hta shi ap ya nna, dai ni mahkra a ntsa e up shangun nit dai. Nang gaw aja baw rai nga ndai; na a hpang e nang hte lawu grit re ai mungdan langai mi pru na ra ai. Dai hpang masum ngu na magri mungdan pru nna dai gaw lamu ga ting hta up na ra ai. Mali ngu na mungdan gaw hpri zawn ja ai mungdan rai na ra ai; hpri gaw arai yawng mayawng hpe agrawp kau na dang lu ai zawn, dai mungdan gaw yawng hpe mani ayun kau ai hpri hte maren agrawp kau nna, mani ayun kau na ra ai. Lagaw hte latsa ni gaw daw mi dibu sama a ga kagam daw mi hpri rai nga ai hpe nang mu ai hte maren dai mungdan gaw karan mat ai mungdan tai na ra ai; rai timung hpri gaw madi ai ga kagam hte kayau nga ai hpe nang mu ai majaw dai mungdan hta hpri atsam mung lawm na ra ai. Lagaw latsa ni gaw daw mi hpri, daw mi ga kagam rai nga ai hte maren, dai mungdan gaw daw mi gaw ja, daw mi gaw kya re ai rai na ra ai. Hpri gaw madi ai ga kagam hte kayau nga ai hpe nang mu ai hte maren shanhte gaw shada mayu dama shaw hkat timung, hpri gaw ga kagam hte n matut lu ai zawn shanhte shada da manoi lu na ma ai n rai.”

“Ndai hkawkam ni a prat e, sumsing lamu na Karai Kasang gaw prat dingsa e n hten n mat ai mungdan de da nna de a ahkang aya gaw maigan amyu a lata hta galoi mung shang lu na n rai; dai gaw ya tsun ai mungdan yawng hpe agrawp shamyit kau

nna dai nan htana agrin nga na ra ai. Lata hte n tawk ai nlung langai mi gaw bum ga de nna chyai hkrat wa nna ahpri, magri, ga kagam, gumhpraw hte aja hpe agrawp mani kau ai nang mu ai majaw, galu kaba ai Karai Kasang gaw htawm hpang de byin na ra ai lam hkawkam wa hpe madun dan nu ai. Yupmang gaw grin nga ai; ga lachyum gaw teng nga ai,” ngu nna hkawkam wa hpe tsun dan wu ai.

Lahta na tsun lai wa ai nlung mungdan gaw kaga n rai; Madu Yesu Hkristu a mungdan rai nga ai.

Shaloi Nebuhkadneza gaw myi man gum dagup let Daniela hpe nawku nna shi hpe kumhpa hte manam pyaw ai hkungga nat nawng ya na lam hkang da wu ai. Bai hkawkam wa gaw Daniela hpe, “Nang ndai makoi magap lam shapraw dan lu ndai majaw, kaja wa na a Karai Kasang gaw hpara ni a Karai Kasang, hkawkam ni a Madu, makoi magap lam shapraw dan lu ai wa rai nga ai,” ngu nna tsun wu ai. Dai hta kaga hkawkam wa gaw Daniela hpe shagrau shatsaw let, kumhpa kaba amyu myu shi hpe jaw nna Babelon mungdaw ting a ntsa e up shangun ai hte Babelon mung ting na hpaji rawng ai ni yawng a agyi shatai wu ai. Shaloi Daniela gaw hkawkam wa hpe hpyi nna shi a manang ni marai masum hpe mung Babelon mungdaw amu a n tsa e san da mu ai. Daniela chyawm gaw hkawkam wa a rung hta a nga nga ai.

Dai hpang hkawkam Nebuhkadneza gaw dawng kru shi tsaw nna dawng kru kaba ai aja sumla galaw nhtawm, Babelon mungdaw na Dura pa hta e shadun da wu ai. Shaloi Nebuhkadneza gaw, shi shadun da ai sumla hpe hkap hkalum la na matu, munggyi ni, du ni, hpyen bu ni, tara agyi ni, sutdek up ai ni, mung bawng ni, pyada du ni hte mungdaw up ai du ni yawng hte hpe shaga jahpawng mu ai. Dai rai nna hkawkam Nebuhkadneza shadun da ai sumla hpe hkap hkalum la na matu shaga da ai du salang ni yawng hte gaw sa zuphpawng nna hkawkam wa shadun da ai sumla a man e tsap nga ma ai. Shaloi ga htawn ai wa gaw, “Masha amyu myu hte ga baw kaga ga tsun ai ni e, madat mara mu, nanhte gaw pahtau, pahke, tingse, sumpyi, chyingbau hpe dum ai baw amyu myu ngoi ai nsen na jang hkawkam Nebuhkadneza shadun da ai sumla hpe gum dagup nawku mu, n naw n ku ai wa kadai

mung, dai ahkying hta pyi, grung nga ai wan htung hta kabai bang kau ai hkrum na ra ai” nga nna jahtau tsun ai. Dai re ai majaw masha amyu baw mahkra gaw, pahtau, pahke, tingse, sumpyi, chyingbau hte dum ai baw amyu myu a nsen na jang masha amyu baw ni hte ga baw amyu myu tsun ai ni mahkra gaw gum dagup nna hkawkam Nebuhkadneza shadun da ai sumla hpe gum dagup nawku ma ai.

Shaloi jang Hkalde masha nkau mi gaw sit sa nna, hkawkam Nebuhkadneza hpe “Hkawkam wa e, nang tut nawng ahkrung nga n ga law, nang hkawkam wa nan pahtau, pahke, tingse, sumpyi, chying bau, ba ja hte dum ai baw amyu myu ngoi ai nsen na ai amyu masha ni yawng aja sumla a man e nawku nga mu ga; n naw n ku ai wa kadai mung grung nga ai wan htung hta kabai bang kau ai hkrum na ra ai, nga nna hkang da nit dai. Rai timung Babelon mungdaw ntsa e, nang san da ai Yuda masha Shadrak, Meshak, Abed-nego hte gaw nang hkawkam wa hpe n kaw n law di ma ai; shanhte gaw na a hpara hpe daw jau ma ai n rai; nang shadun da ai sumla hpe mung nawku ma ai n rai,” nga nna Yuda masha ni hpe mara shagun let jahte tam ma ai.

Shaloi Nebuhkadneza gaw masin pawt nna n yun bu let, “Shadrak, Meshak, Abed-nego hte hpe shaga mu,” ngu nna hkang dat mu ai. Shaloi shanhte gaw dai ni hpe hkawkam wa a man de shawn mu ai. Shingrai Nebuhkadneza gaw, “Shadrak, Meshak, Abed-nego hte e, nanhte gaw nye a hpara hpe dingsa n daw n jau ai hte ngai shadun da ai ja sumla hpe n nawku hkraw nga myit ni? ya nanhte gaw, pahtau, pahke, tingse, sumpyi, chyingbau, ba ja hte dum ai baw amyu myu a nsen ngoi ai na jang, ngai galaw da ai sumla hpe gum dagup nawku na matu, jin jin rai nga mu; shing n rai yang, dai aten e pyi grung nga ai wan htung hta nanhte kabai bang kau ai hkrum na myit dai, nye a lata na nanhte hpe mawai la lu ai hpara gaw, kadai rai ta?” ngu nna shanhte hpe sharim mu ai. Shaloi shanhte gaw, “Nebuhkadneza e, anhte nang hpe dai lam htan shara n nga ai; anhte daw jau nga ai Karai Kasang gaw, grung nga ai wan htung hta na anhte hpe shaw la lu na ra ai. Hkawkam wa e, shi gaw na a lata na mung, anhte hpe mawai la na ra ai. Shi n mawai la dam timung hkawkam wa e, na a hpara hpe anhte daw

jau na ga ai n rai; nang shadun da ai aja sumla hpe mung naw na ga ai n rai, chye u,” ngu nna hkawhkam wa hpe htan mu ai.



Dai rai nna Nebuhkadneza hkawhkam gaw grai masin pawt ai myi man hte nan dai wan htung hpe shawng na hta htam sanit kahtet shangun na matu hkang dat mu ai. Dai hta kaga Shadrak, Meshak, Abed-nego hte hpe gyit nna grung nga ai wan htung hta kabai bang kau na matu, n-gun ja ai hpyen masha nkau mi hpe hkang da wu ai. Shingrai dai masum hpe tinang a labu palawng lawai ai nba hte hpawn gyit nna grung nga ai wan htung kata de, kabai bang kau dat mu ai. Hkawhkam wa hkang da ai ga grai ja la nga ai hte wan htung gaw nachying kahtet la nga ai majaw, de a wan shinglet gaw Shadrak, Meshak, Abed-nego hte hpe dun bang ai masha ni hpe hkru sat kau mu ai. Shadrak, Meshak, Abed-nego ngu ai marai masum hte chyawm gaw, dai grung nga ai wan htung kata de gyit hkang let hkrat bang wa ma ai. Shaloi Nebuhkadneza gaw mau mat nna, gan rawt nhtawm, “Ataw! Marai masum hpe sha anhte gyit nna wan kata de jahkrat bang ai n rai ni?” ngu nna shi a salang ni hpe san wu ai. Shanhte gaw re ai; hkawhkam wa e,

ngu nna htan mu ai. Hkawhkam wa mahtang, “Yu mu, marai mali n gyit n hkang ai hte hkala n ba n hkrum ai wan kata e hkawm nga ma ai hpe ngai mu nngai; mali ngu na wa gaw hpara kasha zawn san nga ai;” nga nna tsun let, hkawhkam Nebuhkadneza gaw wan htung makau de sit sa nhtawm, “Tsaw htum ai Karai Kasang a shangun ma Shadrak, Meshak, Abed-nego hte e, pru wa marit,” ngu mu ai. Dai rai nna shanhte gaw wan htung kata de na pru wa ma ai. Shingrai mung gyi ni, du ni, hpyen bu ni hte hkawhkam wa a mung bawng salang ni gaw zuphpawng nna dai marai masum hpe jawm yu ma ai; wan gaw shanhte a hkum hpe n hkru ai hte shanhte a kara singgawng langai mi pyi hkru magyi ai n rai. Shanhte a hpun palawng mung n shai ai hte wan sama pyi n manam ai hpe mu ma ai. Hkawhkam Nebuhkadneza gaw ndai mau hpa lam ni hpe yu yu nna, grau mau mat wu ai. Dai re ai majaw “Masha amyu baw shagu hte ga baw amyu myu tsun ai ni hta na langai ngai Shadrak, Meshak, Abed-nego a Karai Kasang hpe shatan yang dai ni gaw kahtum kadaw di ai hkrum mu ga; shanhte a nta ni nga hkyi sumpum tai mu ga, nga nna ngai hkang da ni ai; kaning rai nme law, dai zawn hkye la lu ai Karai Kasang shaje n nga ai,” nga nna tsun nhtawm Babelon mungdaw hta Shadrak, Meshak, Abed-nego hte hpe shagrau shatsaw mu ai.

Dai hpang Nebuhkadneza hkawhkam bai htawn tsun ai gaw, ngai Nebuhkadneza gaw, nye nta e aban asa, nye a htingnu e apyaw alaw rai nga yang, ngai hpe hkrit kahpra shangun ai yupmang ngai mu nngai; ngai yup ku ntsa e myit sum ru yu ai hte ngai mu ai shingran gaw, ngai hpe myit ru shangun nngai. Dai re ai majaw, dai yupmang a lachyum htai dan na matu; Babelon hpaji rawng ai mahkra hpe nye a man de jashawn na ngai htet da nngai. Dai rai nna lakle sara ni, mandan bau ai ni, Hkalde sara ni hte gum hpan hpan ai ni shang yang, ngai shanhte hpe nye a yupmang hkai dan timung shanhte gaw de a lachyum hpe htai dan lu ma ai n rai. Dai hpang e nye a hpara mying hkan nna Belteshaza mying ai hte chyoipra ai hpara ni a wenyi hpring ai Daniela gaw nye a man de du nna ngai gaw nye a yupmang shi hpe hkai dan let, lakle sara ni a agyi wa Belteshaza e, nang gaw chyoipra ai hpara ni a Wenyi rawng nna, na a man e makoi magap lam n nga ai hpe ngai chye ai

majaw ngai mu ai yupmang shingran hte lachyum ngai hpe htai dan ya e, nye yup ku ntsa e mu ai shingran gaw ning rai nga ai; ngai mada nga yang yu u, mungkan ga ka-ang e tsaw la ai hpun langai mi tu nga ai; dai hpun gaw kaba wa nna n-gun ja wa ai hte de a tsaw de sumsing lamu dep nna de a gung dam ai gaw lamu ga ting dan hkung nga ai. Hpun lap ni tsawm la nga nna, de a asi law la ai hte yawng mayawng a matu sha hpa tai nga ai; pa ga na ashu ashan ni de a shingnip hta shanu nga nna ntsa malen na u ni de a lakung lakyng ni hta tsip tsip nga ma ai. Hkrung mahkrung gaw dai hpun hta na shahpa lu la ma ai.

Bai, nye a yup ku hta mu ai shingran hta, yu u, sin langa ngu ai chyoi pra ai wa langai mi sumsing lamu de na yu wa nna, shi gaw hpun hpe kran kau u; lakung lakyng ni hpe krum kau u; asi alap hpe sharun kau mu; ashu ashan ni gaw dai hpun npu kaw na pru mat wa nna, u ni gaw lakung lakyng ni hta na pyen mat wa mu ga; rai timung ga hta jung ai aru hte hpawn pa ga na tsit lali ai tsing du hta hpri hte magri sumri gyit hkang let, dai hpun du hpe naw ngam da u; dai gaw sumsing lamu na mari hte madi mat u ga; shi a kamhtaw gaw tsing du sha ai ashu ashan ni hte rau rai nga u ga; shi gaw masha myit mat mat nna ashu ashan myit rawng nga u ga, shingrai shi a ntsa e aten sanit lai wa u ga; kaning rai nme law, Tsaw Htum ai Wa gaw, masha mungdan hpe up ai mung, jaw mayu ai wa hpe jaw ai mung, yu maya ni hpe shagraw shatsaw nna mungdan ntsa e up shangun ai mung, hkrung mahkrung chye na lu hkra, dai hkang da ai ga gaw, sin langa ni kaw na pru nna htet da ai mungga gaw chyoi pra ai ni kaw na ga rai nga ai; nga nna ja ja jahtau wu ai. Ngai hkawkam Nebuhkadneza gaw ndai yupmang mu ni ai, nga ai.

Shaloi Belteshaza mying ai Daniela gaw, jahkring mi mau mat nna myit ung ang nga ai. Hkawkam wa chyawm gaw, “Belteshaza e, yupmang hte de a lachyum a majaw myit hkum ung ang et,” ngu wu ai. Belteshaza mung, “Nye a madu e, yupmang gaw nang hpe n dawng n yawt ai ni, ga lachyum gaw nang hpe hpyen ai ni a ntsa e du u ga, yupmang mu ai hte kaba wa nna n gun ja wa ai lamu ga ting htum hkra dan hkung nga ai alap tsawm nna, yawng mayawng sha na matu asi law ai, de a npu e ashu ashan ni

shanu nga nna ntsa malen u ni lakung lakyng ni hta tsip tsip nga ai hpun gaw, nang hkawkam wa nan rai nga ndai. Nang gaw kaba wa nna n-gun ja wa ndai, nang daru magam dan hkung wa nna dai gaw sumsing lamu de dep nga ai; nang up ai ahkang aya mung lamu ga ting dep nga ai.”

“Sin langa ngu ai chyoai pra ai wa langai mi sumsing lamu de na yu wa nna shi gaw, dai hpun hpe kran daw jahten kau u; rai timung ga hta jung ai aru hte hpawn, pa ga na tsit lali ai tsingdu hta hpri hte magri sumri hte gyit hkang let, hpun du hpe ngam da nna dai gaw sumsing lamu na mari hte madi mat u ga; aten sanit a ntsa e lai wa hkra shi a kamhtaw pa ga na ashu ashan ni hte rau rai nga u ga; nga nna hkawkam wa mu ai hte maren, hkawkam wa e, de a ga lachyum gaw da ndai rai nga ai. Tsaw Htum ai Wa kaw nna nye madu hkawkam wa a ntsa e, jeyang ai ga du nga ai; Tsaw Htum ai Wa gaw, masha mungdan hpe up nga nna, shi jaw mayu ai wa hpe jaw kau nga ai. Nang chye matsing ai ten du hkra, nang gaw masha kaw na shapraw kau ai hkrum nna, na a shanu shara pa ga na ashu ashan ni hte rau rai na ra ai; aten sanit na ntsa e lai wa hkra, usu hte maren nang tsingdu sha nna sumsing lamu na mari hte madi mat ai hkrum na rin dai. Rai timung, hpun du hpe ngam da na htet da ai lam gaw, Sumsing Lamu up nga ai hpe nang chye matsing ai hpang, na a mungdan gaw na a lata e grin nga na lam rai nga ai. Dai re ai majaw hkawkam wa e, nye a ga hkap la u; na a yubak kau da nna dinghpring ai amu galaw u; matsan mayan ni hpe matsan dum let, shut hpyit ai hpe koi kau u: shing rai yang nang sutgan naw galu dam nhten,” ngu wu ai.

Ya dai lam yawng mayawng hkawkam Nebuhkadneza a ntsa e du ra ai. Shata shi lakhawng lai jang shi gaw Babelon mare na hkawkam htingnu hta htinglet hkawm let, “Ndai mare gaw nye a mungdan daju tai nga nna nye a hpung shingkang dan hkung na matu, nye a hpung dagu hte ngai de da ai galu kaba ai Babelon mare rai nga ai n rai ni?” nga nna tsun ai. Dai ga hkawkam wa naw tsun nga yang pyi, sumsing lamu de na nsen gaw, “Hkawkam Nebuhkadneza e, na a lam tsun ai ga dik wa sai; nang gaw masha kaw na shapraw kau ai hkrum nna, pa ga na ashu ashan ni hte rau shanu nga na ndai; Tsaw Htum ai Wa gaw masha

mungdan hpe up nna jaw mayu ai wa hpe jaw kau nga ai; nang chye matsing ai ten du hkra nang gaw usu zawn tsingdu sha nna aten sanit na a ntsa e lai wa na ra ai,” nga ai. Dai ahkying hta pyi dai ga hte maren Nebuhkadneza hta byin wa nna, shi gaw masha kaw na shapraw kau hkrum ai hte shi a kara gaw langda mun zawn, shi a lamyin ni gaw u lamyin zawn galu wa ai du hkra, shi gaw usu zawn tsingdu sha nna shi a hkum hkrang sumsing lamu na mari hte madi mat nga ai.

Ya dai aten ladaw gu jang, ngai Nebuhkadneza gaw sumsing lamu de mada yu nna nye a myit bai gring wa li ai; shingrai Tsaw Htum ai Wa hpe ngai shagrau sha-a nna dinggrin ahkrung nga ai wa hpe shakawn nna hkungga lara nngai; shi a up hkang ai gaw htani htana up hkang ai lam rai nga ai. Shi a mungdan gaw prat mi hte prat mi agrin nga ai; mungkan masha ni yawng mayawng shi a man e hpa wa mi n rai nga ai; sumsing lamu na luksuk kaba ni hta mung, mungkan ga e shanu ai ni hta mung, shi galaw mayu ai hte maren galaw nna shi a lata hpe hkum da ai wa n nga ai. Nang hpa galaw nga nta? nga nna shi hpe tsun lu ai wa kadai mung n nga ai.

Dai aten e nye a myit myi na ta bai rai wa nna, nye a mungdan a arawng sadang a matu, nye a hpung shingkang hte dan hkaung ai gaw, myi na zawn rai nga ai; nye a baw mung ni hte agyi ni gaw ngai hpe tam ma ai; nye a mungdan ngang grin wa nna daru magam kaba ngai hpe kahtap jaw nga ai. Ya ngai Nebuhkadneza gaw sumsing lamu na Hkawkam wa hpe shakawn kung dawn shagrau sha-a ai hte hkungga lara rai nga nngai. Shi galaw ai lam yawng mayawng teng man nga nna shi a lam ni ding hpring nga ai. Shi gaw gumrawng gum tawng ai ni hpe shagrit kau lu nga ai, nga nna shara shagu mungga shabra dat wu ai.

Dai hpang Nebuhkadneza gaw si mat wa ai hpang kasha Belashaza gaw hkaw dung nga nna dai mungdan hpe bai up hkang wu ai.

Kalang mi na hkawkam Belashaza gaw du salang hkying mi hpe shaga nna, poi kaba galaw let shanhte hte rau tsabyi jahku lu nga ai. Belashaza gaw tsabyi jahku chyim yu yang, shi a kawa Nebuhkadneza gaw Yerusalem mare na la wa ai aja gawm,

gumhpraw gawm ni hta shi hkum hte shi a du salang ni, num dung num ni hte lashi num ni lu lu na matu dai gawm ni hpe shawn na hkang dat wu ai. Shaloi shanhte gaw Yerusalem mare na Karai Kasang a nawku htingnu na kashun la ai ja gawm ni hpe shapraw nna hkawkam wa hte shi a du salang ni, num dung num ni hte lashi num ni dai gawm ni hta lu lu ma ai. Kaja wa shanhte tsabyi jahku lu nna aja, gumhpraw, magri, hpri hpun hte nlung e tawk galaw ai hpara ni hpe shakawn kungdawn ma ai.

Dai ahkying hta nan masha lata a layung dawng pru nna pyending shadun taw tap e, hkawkam htingnu shakum a inggade hta ka da nga ai. Hkawkam wa gaw ka da nga ai lata hpe mu wu ai. Dai rai nna hkawkam wa myi man sum ai hte myit ung ang nga ai; shi a mashi marung n-gun kya wa nna, shi a lahput shada ahkawk nga ai. Bai hkawkam wa gaw “Man dan bau ai ni, Hkalde sara ni, gumhpan hpan ai ni hpe shaga mu,” ngu nna shabam dat wu ai. Shingrai hkawkam wa gaw, “Ndai ka da ai lam hte de a ga lachyum htai dan lu ai wa kadai mung hkyeng tsawm ai hpun palawng bu hpun nna, ja hkachyi gali let, ndai mungdan hta masum ngu na du tai na ra ai,” ngu nna Babelon hpaji rawng ai ni hpe tsun wu ai. Shingrai hkawkam wa a hpaji rawng ai ni nlang sa du timung, shanhte gaw dai ka da ai ga hpe n hti lu ai hte de a lachyum hkawkam wa hpe n htai dan lu mu ai. Dai rai nna hkawkam Belashaza gaw nachying myit ung ang nna shi a myi man sum wa ai hte shi a du salang ni myit law nga ma ai.

Ya hkawkam wa hte shi a du salang ni tsun ai ga a majaw, hkawkam jan poi gawk de shang nna, “Hkawkam wa e, tut nawng ahkrung nga n ga, myit hkum ung ang et; myi man hkum sum et; chyoipra ai hpara ni a wenyi rawng ai wa langai mi na a mungdan hta shanu nga ai; hpara ni a hpaji hte bung ai myit leng ai hte chye chyang ai hte hpaji byeng-ya gaw na a nwa a prat e dai wa hta rawng nga ai; na nwa hkawkam Nebuhkadneza mung kaja wa dai wa hpe lakle sara ni, mandan bau ai ni, Hkalde sara ni, gumhpan hpan ai ni a ntsa e up shangun wu ai. Kanning rai nme law Belteshaza ngu nna hkawkam wa shamying ai ndai Daniela hta nyan kaja chye chyang ai myit, hpaji byeng-ya hte yupmang chye htai ai, makoi magap lam chye shapraw ai; gum wai ga chye malan

ai nyan rawng nga ai; ya Daniela hpe shaga u; de a ga lachyum shi shapraw dan na ra ai,” ngu nna tsun wu ai.

Dai rai nna Daniela hpe hkawkam wa a man e jashawn mu ai. Hkawkam wa mung, “Nye wa hkawkam wa gaw Yuda mung na woi wa nna Yuda bawng dung kashu kasha ni hta lawm ai Daniela nang rai nni? Chyoi Pra ai hpara ni a Wenyi nang hta rawng nna myit leng ai, chye chyang ai hte nyan kaja nang hta hpring nga ai, ngu nna kajai ai shi ngai na nngai; ya ndai ka da ai ga hpe hti nna de a ga lachyum ngai hpe htai dan na matu, hpaji rawng ai ni hte mandan bau ai ni hpe nye a man e jashawn timung, shanhte gaw de a lachyum htai dan lu ma ai n rai; nang mahtang htai dan lu nna, gumwai ga malan lu ai hte na a lam ngai na ni ai; ya, ndai ka da ai ga hpe nang hti lu nna, de a lachyum ngai hpe shapraw dan lu yang hkyeng tsawm ai hpun palawng nang bu hpun lu nna ja hkachyi lu gali let ndai mungdan hta masum ngu na du tai na rin dai;” ngu nna Daniela hpe tsun wu ai.

Dai rai nna Daniela gaw, “Hkawkam wa e dai kumhpa nang kaw naw rai nga u ga, nang jaw mayu ai shabrai kaga wa hpe jaw u; rai timung dai ka da ai ga hpe na a man e ngai hti dan nna de a lachyum shapraw na nngai, nang hkawkam wa e, Tsaw Htum ai Karai Kasang gaw, na nwa Nebuhkadneza hpe mungdan hte hpawn daru magam arawng sadang hte hpung shingkang jaw wu ai; shi hpe jaw ai daru magam majaw, masha amyu baw ni hte ga amyu myu tsun ai ni yawng, shi a man e hkrit gari shajang nga ma ai; sat kau mayu ai wa hpe shi sat kau nga ai; jahkrung da mayu ai wa hpe jahkrung da nga ai. Shagrau shatsaw mayu ai wa hpe shagrau shatsaw nga ai. Shagrit kau mayu ai wa hpe shagrit kau nga ai. Rai timung gum rawng gum tawng lam hkan galaw hkra, shi myit kaba nna masin ja nga yang shi gaw hkawkam tingnyang hta na gemyu yu mat ai hkrum nna shi a hpung shingkang hkoi mat wa sai. Shinggyim masha shanu ai shara na shi hpe shaden kau nna shi a myit gaw ashu ashan myit hte maren tai wa ai hte shi gaw nam lawze ni hte rau nga ai. Tsaw Htum ai Karai Kasang gaw, masha mungdan hta up nga nna de a ntsa e up shangun mayu ai wa kadai hpe mung up shangun nga ai. Shi chye matsing ai aten du hkra, shi

gaw usu zawn tsingdu sha nna shi a hkumhkrang gaw sumsing lamu na mari hte madi mat nga ai.”

“Nang shi a kasha Belashaza e ndai lam ni yawng hpe chye ninglen, na a myit hpe shagrit da wu ai n rai; sumsing lamu na Madu hpe nang shinggan kau nna shi a nta na gawm ni hpe na a man e shawn nhtawm nang hte na a agyi salang ni, num dung num ni hte lashi num ni dai gawm ni hta tsabyi jahku lu nga ma hka; dai hta n ga myi n mu, na n na, hpa mung n chye ai gumhpraw, a ja, magri, ahpri, hpun hte nlung hpara ni hpe nang shakawn kungdawn nna, na nsoi nsa Madu ngu ai, na a lam yawng hpajang tawn da ai Karai Kasang hpe nang shagrau sha-a ai n rai; dai re ai majaw, dai lata daw mi shi a man na pru nna ndai ka shakap da wu ai.”

“Ya shakap da ai ga chyawm gaw, Mana, Mana, Tekela, Uhparsin nga ai; da ndai gaw, de a ga lachyum rai nga ai; Mana ngu ai gaw na a mungdan hpe Karai Kasang hti yu nna jahtum kau nu ai. Tekela ngu ai gaw, nang hpe joi hta shen yu yang nang yawm nit dai; Peresa ngu ai gaw, na a mungdan hpe karan kau nna Medi hte Persi masha ni hpe ap kau nu ai, nga ai, rai nga ai,” ngu nna hkawkam wa hpe tsun dan wu ai. Shaloi Belashaza hkang da ai hte maren, shanhte gaw Daniela hpe hkyeng tsawm ai hpun palawng jahpun nhtawm, ja hkachyi gali nna mungdan hta masum ngu na du shatai mu ai, nga nna shi a lam mungga shabra dat mu ai.

Dai shana e pyi hkawkam wa Belashaza sat kau ai hkrum nna Medi masha Dari gaw, shi a asak kru shi lahkawng ning e dai mungdan hpe up hkang wu ai. Ya Dari gaw mungdan amu mahkra hpe gun hpai na matu, munggyi latsa e hkun tawn da na myit hkut nga ai. Hkawkam wa akyu n yawm hkra dai munggyi ni gaw jahpan da na matu, shanhte a ntsa e munggyi kaba masum hpe shi tawn da nna, dai masum hta langai mi gaw Daniela rai nga ai. Ndai Daniela hta nyan kaja rawng ai majaw, shi gaw munggyi kaba ni hte kaga munggyi hta ningtawn ningla rai nga nna, shi hpe mungdan ting a ntsa e tawn da na hkawkam wa myit ra nga ai.


Shaloi munggyi kaba ni hte kaga munggyi ni gaw mungdan up ai lam hta Daniela hpe mara shagun na tam ma timung, shi gaw kangka rai nga nna, shut ai hte myit magaw ai lam shi hta nnga ai

majaw, mara shagun shara hpa mung nnga ma ai. Dai rai nna ndai masha ni gaw “Shi a Karai Kasang hpe nawku ai htung hta kaga, ndai Daniela hpe mara shagun na hpa mung anhte mu na ga ai n rai,” nga nna shada da tsun hkat ma ai. Shingrai ndai munggyi kaba ni hte kaga munggyi ni gaw hkawkam wa a man de sa hpawng nna, “Hkawkam Dari e, nang tut nawng ahkrung nga n ga; nang hta kaga, hpara hpe mung, masha hpe mung nhtoi sumshi ya laman e akyu hpyi ai wa kadai mung hkanghkyi nhkun hta jahkrat bang ai hkrum u ga; nga nna n galai mat lu ai hkawkam mungga shapraw na matu, munggyi kaba ni, du ni, munggyi ni bawmung ni hte hpyen du ni yawng bawng hkrum saga ai. Ya hkawkam wa e, n galai mat lu ai Medi hte Persi masha ni a htung hte maren, ndai tara hpe shagrin da nna dai laika hpe amying dazik shakap u,” ngu nna tsun mu ai. Dai re ai majaw Hkawkam Dari gaw, dai laika hte tara hpe amying dazik shakap wu ai.

Dai laika hta amying dazik shakap nga ai hpe Daniela chye jang shi gaw shi a nta de shang wa sai. Ya shi a hku wawt chyinghka ni gaw Yerusalem mare de ang nna hpaw nga ai; shingrai shi gaw shawoi galaw ai hte maren, lani mi hta masum lang lang lahput hput di let akyu hpyi nna, shi a Karai Kasang hpe shakawn kung dawn nga ai. Shingrai munggyi ni zuphpawng nna Daniela gaw shi a Karai Kasang hpe akyu hpyi ai hte tawngban nga ai hpe mu ma ai. Shaloi shanhte sit sa nna, “Hkawkam wa e, nang hta kaga hpara hpe mung, masha hpe mung nhtoi sum shi ya laman akyu hpyi ai wa kadai mung hkanghkyi nhkun hta jahkrat bang kau ai hkrum u ga, nga nna mungga laika hpe nang amying dazik shakap da nu ai n rai ni?” nga nna hkawkam wa a tara laika a lam hpe san mu ai. Hkawkam wa mung “N galai mat lu ai Medi hte Persi masha ni a tara hte maren dai lam teng nga ai,” ngu nna htan wu ai. Dai rai nna shanhte gaw, “Hkawkam wa e, bawng dung ai Yuda kashu kasha ni hta lawm ai ndai Daniela gaw, nang hpe mung, na a mying dazik shakap ai laika hpe mung, hpa n nawn nna lani mi hta masum lang lang akyu hpyi nga ai,” ngu nna hkawkam wa hpe tsun mu ai. Hkawkam wa gaw dai ga na jang myit grai n pyaw nna Daniela hpe kaning di nna mawai la lu na

myit sumru yu ai hte jan shang ai du hkra shi hpe shalawt dat lu na ginshan tam shakut nga ai.

Rai timung ndai masha ni gaw hkawkam wa a man e bai hpawng nna, "Hkawkam wa e, lang mi shapraw ai hkawkam mungga hte tara gaw n galai lu ai, nga nna Medi hte Persi masha ni a tara hta rawng nga ai hpe dum u," ngu nna hkawkam wa hpe shadum mu ai. Shaloi hkawkam wa ahkang jaw nna, shanhte gaw Daniela hpe woi la nhtawm hkangkyi nhkun hta jahkrat bang kau mu ai. Hkawkam wa chyawm gaw, "Daniela e nang n sim n sa nawku nga ai na a Karai Kasang gaw nang hpe mawai la na ra ai," ngu wu ai. Shanhte lungpa la nna, nhkun mahka hpe pat nhtawm Daniela amu hta n jat n yawm lu hkra hkawkam wa a lachyawp dazik hte mung, mungdu ni a lachyawp dazik hte mung dawk da mu ai.



Dai hpang hkawkam wa gaw shi a htingnu de wa mat nna, shana tup shat n sha nga ai; sumpyi dum ai baw mung shi hpang de n jashawn wu ai; yup mung n lu sha nga ai. Bai hkawkam wa gaw

jahpawt jau jau e rawt nna hkanghkyi nhkun de a lawan sa wa ai. Dai de ni wa jang shi gaw, hrap ngu hrap ngoi ai nsen hte Daniela hpe shaga nna, “Ahkrung nga ai Karai Kasang a shangun ma Daniela e, nang n sim n sa nawku nga ai na a Karai Kasang gaw, hkanghkyi ni a n gup na nang hpe mawai la lu a ni?” ngu nna san wu ai. Shaloi Daniela gaw, “Hkawkam wa e, nang tut nawng a hkrung nga n ga, nye a Karai Kasang gaw, shi a lamu kasa shangun nna hkanghkyi ni a n gup pat kau ya ai hte ngai hkala nba n hkrum nngai, kaning rai nme law, shi a man e ngai san seng nga nngai, na a man e mung, hkawkam wa e ngai hpa n shut nngai,” ngu nna hkawkam wa hpe htan wu ai. Shaloi hkawkam wa gaw nachying kabu nna, Daniela hpe nhkum de na sa shaw la na lam hkang dat mu ai. Shingrai Daniela gaw nhkun de na shaw la ai hkrum nna, shi gaw shi a Karai Kasang hta shamyet shanat nga ai majaw, hkala nba hpa mung shi hta n mu nga ai. Dai hpang Daniela hta mara shagun ai ni hpe hkawkam wa hkang dat ai ga hte shanhte shaga nhtawm, kashu kasha madu jan ni hte hpawn hkanghkyi nhkun de jahkrat bang kau nna hkanghkyi ni shanhte hpe kawa amya kau ai hte htumpa de pyi rai n du yang shanhte a nrut nra yawng hpe agrawp daw kau ya mu ai.

Dai hpang Dari hkawkam gaw, ga ningtsa ting hta e shanu nga ai amyu baw ni hte ga amyu myu tsun ai masha yawng hte hpe laika ka nna, “Nanhte hta ngwi pyaw ai gaw law htam wa u ga law; nye a mungdan ting chyam hkra masha nga manga hte gaw, Daniela a Karai Kasang a man e, hkrit hkungga nga mu, ngu nna hkangda ai ga, hkang dat nngai; kaning rai nme law, shi gaw ahkrung nga ai Karai Kasang rai nga nna, htani htana prat dingsa agrin nga ai; shi a mungdan gaw hten bya mat lu ai n rai; shi a ahkang aya gaw lamu ga htum hkra rai na ra ai; shi hkye hkrang la nna mawai la lu ai sumsing lamu hte ginding aga hta lamik kumla hte mau hpa amu shi galaw nga ai; shi gaw Daniela hpe hkanghkyi lawng hta hkanghkyi ni a n gup na mawai la lu ai,” ngu nna ka shabra dat wu ai. Shingrai ndai Daniela gaw Dari up hkang ai prat e mung, Persi masha Kuru up hkang ai prat e mung galu kaba wa nga ai.

Daniela gaw Babelon mare hta naw nga nga ai ten hta Karai Kasang hkang da ai ga ni hte myihtoi Yeremia laika hta htiyu yang Yuda masha ni gaw sanit shi ning tup mayam yam nga ai hpang tinang a mungdan de bai nhtang wa lu ma ai re ai lam hpe chye ma yang shanhte gaw tinang a mungdan de bai wa lu na hte Yerusalem mare hpe lang mi bai de da lu na matu, Yuda masha ni gaw shat lu sha gam hkra rai nna akyu bai hpyi shajang ma ai. Shingrai shanhte hpyi ai lam ni gaw, “Oh! Karai Kasang Yehowa e, anhte gaw Karai Kasang a mayam wa myihtoi ni a htawn tsun ai ga ni hpe n madat mara ai hte n hkan n sa ai hte shut hpyit kau saga ai; nang Madu hpe shut kau saga ai rai nna, nang gaw anhte hpe gawt shapraw kau dat ai hte ni ai mung, tsan ai mung de mare shara shagu nga mat wa ai Yuda mung masha, Yerusalem mare masha ni hte Isaela masha yawng hte rai nga ai anhte gaw dai ni ndai zawn rai myi man sum ai hkrum nga saga ai; anhte a Madu Karai Kasang Yehowa e, madat mara ya mi law; anhte hten run mat wa ai lam hpe mung, na a mying hte shamying da ai mare hpe mung, bai nhtang yu u law; anhte gaw tinang a akyu hpe n tam ai sha Madu a akyu hpe tam ai ni hpe shamyet shanat ai nang Madu Karai Kasang a man e hpyi tawngban ga ai law;” ngu nna hpyi mu ai.

Dai zawn akyu hpyi nga yang lamu kasa Gabriela gaw, alawan pyen sa wa nna, shana hkungga nawng ya ai aten e, ngai hpe sa ahtawk nga ai. Dai wa gaw ngai hpe sharin ya ai hte ngai hpe ga tsun nna, “Daniela e nang hpe hpaji byeng-ya hte chye chyang ai myit jaw de gaw, ngai ya pru sa wa ring ngai,” nga nna tsun nhtawm, byin na ra ai lam ni yawng Daniela hpe madun dan wu ai rai nna, Yuda masha ni gaw tinang a nga shara mungdan de bai nhtang wa nna Yerusalem mare hpe bai gaw da nna shaning mali tsa sumshi ning lai ai hpang shinggyim masha ni yawng hpe hkye hkrang la ai wa Madu Yesu Hkristu paw pru wa nna hpyen ni gaw Madu hpe sat kau let, mare hte hpawn Nawku Htingnu hpe lang mi bai jahten sharun kau na mara ai lam ni yawng hpe mung tsun dan wu ai. Lamu kasa gaw byin wa na ra ai lam ni yawng hte hpawn madun dan ngut ai jahtum e, “Nang gaw dai aten gu hkra sa wa su; simsa ai hte nga lu na ra ai. Shaning nhtoi ni htum mat jang,

tinang a shara ni hta bai nga lu na ra ai;” ngu nna Daniela hpe tsun wu ai.

Daniela gaw prat naw kaji ai ten kaw nna myit san seng ding hpring ai wa rai nna maigan hkawhkam ni, hkawhkam kasha, du salang ni hte matsan masha ni yawng a man e, Karai Kasang a man e nden ja ai hte sakse hkam lu nna, grai na hkra myihtoi bungli hpe galaw gun hpai ai hte si mat wa sai rai.


Daniela a maumwi lam gaw Daniela laika hta nan rawng ai rai.

## YONA A MAUMWI

Asuri mung e Nineve mare kaba langai mi nga ai. Dai mare gaw grai dan hkung ai hte dai mare hta hkik hkam ai nta ni, hkik hkam ai jawng kaba ni hte hkai sun kaba ni nga shajang ma ai. Rai timung Nineve masha ni gaw, langai hte langai n hkru n shawp ai hkrai rai shajang nga ma ai. Shingrai shinggyim masha hte dusat dumyeng yawng hpe up hkang ai Yehowa Karai Kasang gaw, dai masha ni a yubak mara ni hpe mu ai majaw, myihtoi Yona hpe hkang da wu ai gaw “Rawt u, Nineve mare de sa nna dai mare masha ni yawng hpe jahkrit ai hte sa jahtau tsun u,” ngu wu ai. Yona gaw Karai Kasang a ga hpe n madat ai sha Yopa mare de yu wa nna, Tarshi mare de sa wa ai sanghpaw li hpe mu wu ai. Shaloi dai li jahpu shi ya nna, Yehowa a man na hprawng na matu sanghpaw li hta jawn wu ai.

Yehowa chyawm gaw, dai nammukdara de nbung kaba shangun dat wu ai. Dai sanghpaw li ganoi noi agrawp mat hkra nammukdara hta laru kaba ru wa ai. Shingrai li ma ni gaw hkrit nga ma ai rai nna langai hte langai tinang a hpara hpe hpyi jahtau shajang nga ma ai. Sanghpaw li tsang wa u ga, dai hta rawng ai rai ni hpe mung nammukdara hta jahkrat bang kau mu ai. Yona chyawm gaw sanghpaw li a gawk kata de shang rawng nga nna kaleng taw let, yup a nga ai. Dai re ai majaw, li agyi wa shi kaw sa nna, “Yup taw nga ai wa e, nang hpa maw n ta? rawt u na a Karai Kasang hpe hpyi jahtau u, anhte n hten uga, dai Karai Kasang anhte hpe myit dum dam nhten,” ngu wu ai. Bai shanhte gaw, “Sa marit ndai tsin-yam tsindam gade a majaw anhte hkrum ai chye lu hkra hpaida da yu ga,” nga nna langai hte langai tinang a manang wa hpe tsun shajang ma ai. Shingrai shanhte hpaida da nna, dai gaw Yona hta jaw nga ai. Dai rai nna shanhte gaw “Gade a majaw ndai tsin-yam tsindam hkrum nga ai hpe ya tsun dan mi, nang hpa amu gun n ta? nang kade nna rai n ta? nang gara mung na rai n ta? nang hpa baw amyu rai n ta?” ngu nna shi hpe san mu ai. Shi gaw “Ngai Hebre masha rai nngai, nammukdara hte hkarang hpe hpan tawn da ai sumsing lamu na Karai Kasang Yehowa hpe hkrit hkungga ai wa rai nga nngai,” ngu nna shanhte hpe htan mu ai.


Shingrai dai masha ni gaw, na chying hkrit nga ma ai rai nna, “Ndai nang galaw ai gaw hpa rai nga a ta?” ngu nna shi hpe tsun mu ai. Shaloi Yona gaw, ginding aga hte nammukdara hpe hpan da ai sumsing lamu e nga ai Karai Kasang a man kaw na hprawng mat wa ai lam hpe tsun dan mu ai.



Shaloi shanhte gaw, “Dai nammukdara anhte a matu sim mat u ga, nang hpe kaning di na rai ta?” ngu nna san mu ai. Kaning rai nme law, nammukdara gaw grau grau rawt kabrawng wa nga ai; shaloi Yona gaw, “Ngai hpe hpai la nna nammukdara de kabai bang kau mi, shaloi dai nammukdara nanhte a matu sim mat na ra ai; ndai laru kaba nye a majaw, nanhte a ntsa e ru nga ai gaw ngai chye nngai,” ngu nna shanhte hpe htan mu ai. Shaloi li ma ni chyawm gaw hkarang de lep hkra ja ja shap shakut nga ma ai rai timung, nammukdara gaw grau nna rawt kabrawng wa ai majaw shanhte n dang lu mu ai. Dai re ai majaw shanhte gaw Yehowa hpe “Yehowa e, ndai wa a asak majaw anhte n sum u ga, mara n rawng ai asai anhte hta hkum shakap mi law, nang chyawm gaw Yehowa e, galaw mayu ai hte maren galaw nit dai;” ngu mu ai. Shaloi

shanhte Yona hpe hpai la nna nammukdara de jahkrat bang kau mu ai. Shaloi nammukdara a kabrawng bu ai mung, sim mat wa wu ai. Dai re ai majaw, dai masha ni gaw Yehowa hpe nachying hkrit hkungga nna Yehowa hpe hkungga nawng ya let ga sadi tawn da mu ai.

Yehowa gaw Yona hpe hkap mayu kau na matu nga kaba san tawn da nna Yona gaw dai nga kan kata e masum ya masum na tup rawng nga wu ai. Shaloi Yona gaw dai nga kan kata kaw nna, Yehowa Karai Kasang hpe hpyi wu ai. Shaloi Yehowa gaw, dai nga hpe tsun wu ai rai nna, dai nga gaw Yona hpe hkarang ntsa de n hpat shapraw kau dat wu ai.



Bai, lahkawng lang ngu na hta Yehowa a mungga Yona kaw bai du nna, "Rawt u, kaba la ai Ninewe mare de sa nna, ngai nang hpe tsun da ai hkaw dan ai ga hpe jahtau tsun u," ngu wu ai. Shingrai Yona gaw Yehowa a mungga hte maren rawt nna, Ninewe mare de sa wa ai. Dai mare gaw nhtoi masum ya sat dam nna Karai Kasang a man e mare kaba rai nga ai. Yona gaw dai mare kata de lani mi sat hkawm hpang nna, "Nhtoi mali shi ya lai jang Ninewe mare hten mat na ra ai," ngu nna jahtau tsun wu ai.

Ya, Ninewe mare masha ni gaw Karai Kasang hpe kamsham ma ai rai nna, lusha gam na ladaw tawn da ai hte kaji ai ni kaw nna kaba ai ni du hkra , lachyit nba bu hpun ma ai. Dai ga gaw Ninewe hkawkam kaw mung du nna shi gaw shi a tingnyang kaw na rawt nhtawm, hkawkam yangwat raw kau ai hte lachyit nba lawai let wan dap e dung nga ai. Dai hta n ga, hkawkam wa hte shi a agyi salang ni gaw, “Masha mung, yam nga mung, dumsu hpung mung, sagu bainam hpung mung hpa mung n chyim yu mu ga, u shat hkum shayaw mu, ntsin mung hkum lu shangun mu, masha hpe mung, yam nga hpe mung lachyit nba jahpun nna Karai Kasang hpe ja ja hpyi jahtau shangun mu, kaja wa langai hte langai tinang nang a n hkru ai lam hpe tinang a lata a kashun kashe ai amu hpe kau da shangun mu, Karai Kasang gaw myit malai myit nem na hte anhte n hten u ga, shi a pawt bu ai myit n galai na kadai chye lu a ta?” nga nna ga shabra ma ai. Ya shanhte gaw tinang a n hkru ai lam koi kau ai amu hpe Karai Kasang mu chye wu ai rai nna shi shanhte hpe ari jaw na lam Karai Kasang myit malai nna hpa n di mu ga.

Rai timung, Yona gaw shi jahtau ai hte maren, Karai Kasang gaw Ninewe mare hpe n jahten wu ai majaw grai myit n pyaw ai hte masin pawt wu ai. Hpa majaw nga yang myihtoi langai mi rai nna tsun ai ga ni n byin ai majaw, myihtoi ni a ga n teng ai nga nna mung masha ni jahpoi asawng kau ya na hpe tsang ai majaw rai nga ai. Dai rai nna Yona gaw, “Karai Kasang Yehowa e, nye a mung e ngai naw rai nga yang ndai ngai tsun ni ai ga n rai ni? nang gaw chyeju matsan dum ai myit galu kaba ai, n gaw nwai myit hpring nna, n hkru ai hta na myit nem la ai Karai Kasang rai nga ndai hpe ngai chye nngai; ngai gaw Tarshi mare de tin tin hprawng mat wa nngai. Ya chyawm gaw, Yehowa e, nye a asak dawm la kau ya e; hkrung nga na hta, si ai gaw, nye a matu grau kaja nga ai,” ngu nna hpyi wu ai. Shaloi Yehowa gaw, “Nang masin pawt mai a ni?” ngu wu ai. Yona mahtang dai mare kaw nna pru wa n htawm, de a sin praw maga e dung nga ai. Dai yang e shi gaw shi a matu sum gap nna, dai mare hta hpa byin wa na lam hpe mu lu hkra, de a shingnip kata e dung nga ai.

Shaloi Yehowa Karai Kasang gaw, Yona a baw shingnip ya u ga hte shi a ru tsang ai hta na shi hpe shalan shabran ya u ga, shi a ntsa e taudwi ru tu shangun wu ai. Yona mung taudwi ru a majaw, ja ja kabu nga wu ai. Karai Kasang chyawm gaw hpang jahpawt nhtoi htoi wa ai ahkying e, shingtai langai mi hpe san da nna dai gaw taudwi ru hpe nyip nywi mat hkra kawa kau ya wu ai. Bai, Karai Kasang gaw jan pru jang kahtet ai sinpraw nbung san da nna, ajan gaw Yona a baw hpe hkra ai majaw, shi ma mat wu ai. Dai rai nna Yona gaw, shi hkum si na hpyi nna, hkrung nga ai hta si na gaw nye a matu grau kaja nga ai, nga ai.

Shaloi Karai Kasang gaw, Yona hpe “Taudwi ru a majaw nang masin pawt mai a ni?” ngu nna san wu yang, “Si ai du hkra ngai masin pawt na mai nga ai,” ngu wu ai. Shaloi Yehowa gaw, “Galaw mung nang n galaw, tu mung nang n tu shangun ai, lana mi hta sha tu nna lana mi hta sha wai mat ai taudwi ru hpe nang lahpawt nga ndai; dai re ai mi, tinang a hkra lata hte pai lata hpe pyi n chye ginhka ai masha sen mi mun lahkawng rawng ai mare kaba Ninewe mare hpe ngai lahpawt dum mai nga ai n rai ni? dai hta n ga yam nga mung, law law naw rawng nga ai,” ngu wu ai. Shingrai Karai Kasang gaw Yona hpe sharin ai hpang kaw nna Yona kaning rai nga mat ai lam hpe chyum laika hta n mu lu sai.

Yona a labau maumwi lam gaw Yona Laika hta rawng nga ai rai.



**Maumwi shi matsat ngut sai.**



# PROJECT L.A.M.B.S. INTERNATIONAL

**LIGHT ABROAD MOBILE BIBLE SCHOOLS**

Project LAMBS Publications:  
Canada / Myanmar / Thailand

**[www.projectlambs.com](http://www.projectlambs.com)**

9 781927 468371

A barcode is centered within a white rectangular box. Below the barcode, the numbers "9 781927 468371" are printed vertically.